

**LIBRI SEX
ECCLESIASTICAE
RHETORICAE SIVE
DE RATIONE
CONCIONANDI...**

Luis : de Granada



6

8-a

32



XXIII. 6. 13.
AA. 11.


~~6.8.13.~~

LIBRI SEX
ECCLESIASTICAE
RHETORICAE
SIVE DE RATIONE CONCIONANDI

AVCTORE
R. P. M. F. *LVDOVICO GRANATENSI*

SACR. THEOL. PROFESS. MONACHO DOMINICANO

CVRANTE
IOH. BAPTISTA MVNNOZIO
VALENTINO DOCTORE THEOLOGO



VALENTIAE HEDETANORVM
IN OFFICINA VIDVAE IOSEPHI DE ORGA
CICIDCCLXVIII
SVPERIORVM PERMISSV

F.^R L V D O V I C V S

GRANATENSIS

E B O R E N S I A C A D E M I A E

virtutum & litterarum altrici,

BONITATEM, ET DISCIPLINAM, ET SCIENTIAM



VVM TE, O ALMA
MATER, & egregia vir-
tutum atque disciplina-
rum magistra, serenissi-
mus cardinalis HENRI-
CVS, dominus noster, e
suis, ut ita dicam, visce-

ribus genuerit, nutrierit, & ab ipsis incu-
nabulis in istam aetatem & dignitatem pro-
vexerit; omnesque curas & cogitationes
suas in TE una perficienda, cunctisque mu-
neribus exornanda, positas & constitutas
habeat: dignum profecto est, ut nos, qui
omnia clementissimo principi debemus, &
de tua TIBI felicitate gratulamur, numeris-
que omnibus absolutam cupimus, opera
quoque nostra, qualiscumque ea sit, studia

tua, aliqua saltem ex parte, iuvare curemus. Quum igitur conatus tuos omnes in hoc unum praecipue compares, ut alumnos tuos CHRISTI Domini praecones egregios efficias, qui dominicam messem caelestis doctrinae fluentis irrigent: operae pretium me facturum putavi, si libellum hunc, qui de ratione concionandi agit, TIBI dicarem; quo huius officii rudes atque tirones ad illud commode praestandum institueres. Quod eo libentius fecimus, quoniam D. Augustinus (a) bene dicendi artem, seposito ad hoc idoneo tempore, in adolescentia discendam esse monet. Quam quidem eo facilius alumni tui assequuntur, quo plenius a te dialecticis & philosophicis disciplinis instituti sunt. Ab his enim fontibus eloquentiae laudem manare, parens ipsius eloquentiae Cicero in his libris, quos *de oratore* (b) inscripsit, sub persona L. Crassi luculenter probat. Ut igitur hanc bene dicendi facultatem traderemus, necesse fuit, praecepta aliquot ex rhetorum officinis colligere: ut huius

quo-

(a) *August. lib. IV. de Doct. Christ. cap. 3.*

(b) *De Orat. lib. I. cap. 3. Orat. cap. 4.*

quoque artis disciplina , quemadmodum & ceterae , sacrae Theologiae , & divini verbi ministerio deserviret. De quattuor igitur praecipuis eloquentiae partibus , nempe, inventione , dispositione , eloquutione , atque omnium potissima pronuntiatione , quam etiam actionem vocant , in his libris differimus. Et quidem de pronuntiatione , si non meliora , quam alii , certe plura scripsimus: quod citra illius opem cetera omnia, quamlibet eximia , frigeant & langueant , atque adeo mortua sint. Quid enim tam acre aut magnificum esse potest , quod non iaceat, si id remissa aut languida voce & gestu pronuntiaveris? Inventioni autem , quae probandi & amplificandi materiam continet, tum communes locos , tum etiam privatos & singulares assignavimus. Communes autem locos , unde ad quaestiones omnes argumenta promuntur , dialectici in libris topicorum diligenter tradunt. De his igitur parcius loquuti sumus , quoniam eorum cognitio a dialecticis petenda est. De quibus breviter atque dilucide paucis antehac diebus scripsit in dialecticis institutionibus R.

P. Petrus a Fonseca: qui etiam commodissimis exemplis, ex sacris litteris desumptis, quod ad nostrum pertinet institutum, praecepta artis illustravit. Ad cuius opusculum studiosum concionatorem remittimus. Ceterum de singularibus locis, qui a privatarum personarum & rerum circumstantiis sumuntur, qui peculiariter ad oratorem pertinent, & magnam vim ad probandum & amplificandum habent, copiosius scribendum esse duximus. Vt autem, quanta sit circumstantiarum vis ad res amplificandas, concionator intelligat, duo insignia D. Chrysoctomi exempla, quae properanti mihi, quum ad hunc circumstantiarum locum venissem, exciderunt, hoc in loco attexere libuit. Is igitur illam Domini praedictionem, qua mulieris, caput ipsius ungentis, memoriam per totum orbem celebrandam esse dixit, ex omnibus circumstantiis hoc modo amplificat: (a) „in omnibus, *inquit*, „ecclesiis memorari mulierem audimus. „Sunt consules, duces, viri, mulieres, no-
„bi-

(a) *Homil. V. advers. Iudaeos*, | *Oper. edit. cura Bern. de Mont-*
quae exstat tom. I. pag. 629. seq. | *faucou, Paris. 1718.*

„ biles ... in omnibus urbibus : & in quam-
„ cumque orbis partem deveneris , summo
„ cum silentio audies huius mulieris offi-
„ cium ... *Sunt* reginae , primariaeque fe-
„ minae , *quae* innumerabilia benefacta
„ contulerunt in eos , quibus imperabant:
„ quae ne de nomine quidem ulli notae sunt.
„ Haec autem abiecta mulier , quae tantum
„ effudit unguentum , toto terrarum orbe
„ decantatur. Ne temporis quidem tam im-
„ mensa longitudo memoriam illius vel ex-
„ stinxit , vel exstinguet unquam : idque
„ quum factum ipsum non esset insigne;
„ quid enim magni erat , unguentum effun-
„ dere ? neque persona esset celebris ; erat
„ enim mulier abiecta : neque multi testes
„ aderant ; nam inter discipulos res est ge-
„ sta : neque locus nobilis ; neque enim hoc
„ fecit per theatrum transiens , sed in domo,
„ decem dumtaxat hominibus praesentibus.
„ Attamen neque personae vilitas, neque te-
„ stium paucitas , neque loci obscuritas, ne-
„ que ulla res alia potuit illius abolere me-
„ moriam. Quin potius reginis omnibus
„ ac regibus universis celebrior est nunc

„ haec mulier : nec ulla aetas oblivioni tra-
 „ didit , quod factum est. „ Haftenus Chry-
 softomus : qui in huiusmodi circumstantiis
 excutiendis , ut frequentissimus , ita mirus ar-
 tífex est. Sed commodissimum amplificatio-
 nis huius exemplum exstat apud eundem ;
 quo mundi conversionem , opera atque do-
 ctrina Paulli perfectam , inter maxima mira-
 cula computat : rem videlicet ex omnibus
 circumstantiis amplificans , maximeque mi-
 rabilem faciens. Sic igitur ait : (a) „ quo
 „ modo , *inquit* , Paullus cum illa arte vilif-
 „ sima tantam potuit inspirare virtutem (b),
 „ quantam ipse rerum testatur effectus? Ho-
 „ mo etenim ignobilis , abiectus , & circum-
 „ foraneus , qui artem exercebat in pellibus ,
 „ in tantum virtute progressus est , ut vix
 „ tri-

(a) *Homil. IV. de laud. Paul-
 li Apost. Oper. cit. edit. tom. 2.
 pag. 494. seq.*

(b) *In locum verborum: Quo-
 modo , inquit , Paullus cum illa
 arte vilissima , rectius diceretur:
 Quomodo , inquit , Paulo Chri-
 stus , &c. Non enim de Paulo
 dicitur , quod tantam potuit inspi-
 rare virtutem ; sed de Christo , ut
 praecedentia Chrysostomi verba
 evincunt , quae ita habent : „ Vn-*

„ de liquido patet , quoniam
 „ Christus non fuerit magus ,
 „ non seductor , sed qui e con-
 „ trario horum exstitit emen-
 „ dator , & vere divina virtus ,
 „ nec ulli omnino superabilis :
 „ idcirco & ipse cuncta vicit at-
 „ que perdomuit , & Paulo ,
 „ tentoriorum opifici , tantam
 „ potuit inspirare virtutem ,
 „ quantam ipse rerum testatur
 „ effectus.

„ triginta annorum spatio , & Romanos , &
 „ Persas , & Parthos , & Medos , & Indos ,
 „ & Scythas , & Aethiopes , & Sauromatas ,
 „ & Saracenos , & omne prorsus humanum
 „ genus sub iugum mitteret veritatis. Re-
 „ sponde igitur , unde iste opifex vilis ac
 „ publicus , stans in loco artis suae , ac scal-
 „ pellum in manu gerens , ita & ipse philo-
 „ sophatus sit , & alios docuerit philosopha-
 „ ri , gentes scilicet , urbes , atque regiones ,
 „ maxime imperitus , nec vim in se sermo-
 „ nis ostendens ? Audi enim ipsum loquen-
 „ tem : (a) *et si imperitus sermone , nec pecu-*
 „ *nias possidens* : nam hoc quoque ipse te-
 „ statur : (b) *usque ad hanc , inquit , horam*
 „ *et esurimus , et sitimus , et nudi sumus ,*
 „ *et colaphis caedimur*. Et quid dico pecu-
 „ nias , quum ille saepe ne necessarium qui-
 „ dem haberet cibum , nec , quo se circum-
 „ daret , indumentum ? Quia vero nec de
 „ professione clarus fuerit , ipsius discipulus
 „ ostendit , dicens : (c) *quoniam manebat a-*
 „ *pud Aquilam , et Priscillam , propterea quod*
 „ *eius-*

(a) 2. ad Corinth. XI. 6.
 (b) 1. ad Corinth. IV. 11.

(c) Act. XVIII. 3.

„ eiusdem artis essent. Erant enim scenofa-
 „ cloriae artis. Non igitur a proavis nobi-
 „ lis, quippe qui tam vilis fuisse artis osten-
 „ ditur; non a patria, non a gente: tamen
 „ progressus in medium, ac tantummodo
 „ apparens, inimicorum cuncta turbavit,
 „ universa confudit: & sicut in stipulas, aut
 „ in foenum ignis immissus, omnia daemo-
 „ num opera consumsit, atque in quod vo-
 „ luit, omnia convertit ... At nobilis & e-
 „ ruditus erat forte persuasor. Nec istud
 „ quidem; nam hoc quoque ipse confirma-
 „ vit, dicens: (a) *Et ego veni ad vos, non*
 „ *in sublimitate sermonis aut sapientiae, an-*
 „ *nuntians vobis testimonium Christi. Non*
 „ *enim iudicavi, me scire aliquid inter vos, ni-*
 „ *si Iesum-Christum Et hunc crucifixum. Et*
 „ *sermo meus, Et praedicatio mea non in*
 „ *persuasibilibus humanae sapientiae verbis.*
 „ Sed causa nimirum ipsa praedicationis e-
 „ rat idonea, quae ad se pertraheret audien-
 „ tes. Accipe quid etiam super hac re ipse
 „ pronuntiet. (b) *Quoniam, inquit, Iudaei si-*
 „ *gna petunt, Et Graeci sapientiam quae-*
 „ *runt:*

(a) 1. ad Corinth. II. 1. 2. 3. 4. | (b) 1. ad Corinth. I. 22. 23.

„*runt* : *nos autem praedicamus Christum*
 „*crucifixum ; Iudaeis quidem scandalum,*
 „*gentibus autem stultitiam.* Sed securitate
 „ac libertate , inquis , fruitus est. At omni-
 „no a periculis numquam respiravit : (a) *Et*
 „*ego , inquit , in infirmitate Et timore Et*
 „*tremore multo fui apud vos ...* Quum igi-
 „tur praedicator imperitus , quum etiam
 „pauper esset, & prorsus ignobilis; & quod
 „praedicabatur , non modo commendatio-
 „ne fui esset vacuum , verum etiam offen-
 „sione plenissimum ; & auditores ipsi in-
 „opes , imbecilles , atque omnino nulli ; &
 „pericula tam crebra , tam varia , non do-
 „ctoribus solum , sed etiam discipulis im-
 „minerent ; & crucifixus esset , qui annun-
 „tiabatur adorandus : ... nonne lucidissime
 „claret , divina hoc & ineffabili quadam
 „virtute perfectum ? „ Haecenus Chryso-
 stomus. Quem eius locum , quoniam mire
 amplificandi rationem , quae praecipua con-
 cionatoris virtus est , & circumstantiarum
 usum docet , hic adscribere libuit : ut quem
 ex eis commode tractatis fructum Ecclesia-

stes

(a) 1. ad Corinth. II. 3.

stes colligere posset, aperte monstrarem. Accipe igitur, INCLYTA MATER, munusculum hoc nostrum, quo filios TVOS ad divini verbi ministerium imbuas: in cuius pia & fidei tractatione, magna salutis humanae portio sita est. Cuius rei periculum iam fecisti, dum multos filiorum TVORVM, magisterii dignitate laureatos, per varia huius dioecesis loca spargis, qui salutaris doctrinae semine ecclesiarum arva fecundant. Iam enim illud Écclesiastici TIBI iure & merito convenit: (a) *aperta sunt prata, & apparuerunt herbae virentes, & collecta sunt foena de montibus.* Illud autem diligentissime curato, ut assiduis precibus a Deo contendas, ut parentem atque altorem TVVM quam diutissime fervet incolumem, qui tam multa in TE munera contulit, & multa item collaturus est: ut tandem partibus omnibus integram & absolutam, quum hinc ad superos discesserit, TE relinquat, videatque filios filiorum suorum, & ecclesiam suam, opera atque doctrina eorum, virtutibus cunctis egregie ornatam & stabilitam.

VALE. IOH.

(a) *Prov. XXVII. 25.*

IOH. BAPT. MVNNOZI

PRAEFATIO



QVOD plerisque accidere animadverto, ut, quum omnem prope aetatem in scholis ac libris contriverint, extrema demum senectū aut nihil sapere videantur; aut, si quid sapiant, orationis splendore illustrare cogitationes suas nesciant: id equidem in nostratium bene multis cum dolore video, fateri certe in hodierna litterarum luce propemodum erubesco. Atque, ut de umbraticis illis immedicabilibus raceam, ad delenda ingenia natis, qui eruditioni ac bonis libris bellum indixerunt; non possum non illorum accusare socordiam, qui, quantacumque demum scientia rerumque cognitione polleant, bene tamen dicendi arte destituti sunt. Nam quemadmodum eloquentia sine sapientia nimium obesse plerumque, prodesse numquam civitatibus potest; ita & sapientia perparum e rei publicae commodis fuerit, sine eloquendi facultate (a). Neque vero sapiens omnino existimandus est, cui una de summis virtutibus, dicendi prudentia, atque ingenii lumen eloquentia desit. Quamobrem merito eam acutissimi philosophorum Stoici, virtutem ac sapientiam esse dixerunt (b). Aristoteles vero cum prudentia iungebat: qui enim eloquentiae verae dat operam, eum & prudentiae dare, inquit gravissime Tullius (c).

Sed

(a) Cic. de Invent. lib. I. cap. 1. Exstant in hanc sententiam elegantissima Ben. Ariae Montani carmina Rhet. lib. I. vers. 33. seqq.

Quid moror? exactis cumula virtutibus unum.

Sit sapiens, sit multa sciens, sit denique quidvis,

Desit at una illi facundia, cetera pictum

Iudico, & argentes umbras, vultusque tabellae

Affictos, sunt vana & nomina praedita nullo

Vivendi sensu, tenebrisque absconditus ignis.

(b) Apud Cic. de Orat. lib. III. cap. 18.

(c) In Bruto, sive de claris Oratoribus, cap. 6.

Sed haec missa faciamus, quae & per se sunt manifesta, & ab aliis uberrime demonstrata, nec desiderant orationem meam. Ad Rhetoricam potius accedamus, cuius originem & progressus primum indicare constitui, de evangelicae praedicationis initio atque oratoribus christianis, de eloquentia sacra eiusque scriptoribus, sin minus pro dignitate, pro epistolae certe modulo, deinceps loquuturus.

Atque, ut a rei definitione ordiamur, Rhetoricam esse artem bene dicendi, norunt omnes. Qui enim benedicit, is Graecis *Rhetor* dicitur, unde Rhetoricae nomen derivatur. Huius vero artis inventor, si poëtis ac Diodoro credimus, Mercurius perhibetur. Hinc illa Horatii: (a)

*Mercuri, facunde nepos Atlantis,
Qui feros cultus hominum recentum
Vocem formasti catus, & decorae
More palaestrae.*

Verum nec poëtis adhibenda fides, qui fabulas ubique consecretantur, nec Sculus ille sine iudicio legendus est (b). Constat enim, magnae illi Graeciae, ut ceterarum artium fere omnium, & Rhetoricae originem propagationemque deberi. Quis vero a prima inventoris gloria celebrari debeat, id quidem haud satis exploratum est.

Empedoclem Agrigentinum, Parmenidis auditorem, primum fuisse, qui moverit aliqua circa Rhetoricam, scribit Quintilianus(c). Cuius sententiae fuerunt Aristoteles(d), Sextus Empyricus (e), ac Diogenes Laërtius, qui ut Zenonem Dialecticae, sic & Empedoclem Rhetoricae inventorem facit (f). Quam gloriam alii Coraci tribuunt, quod ni-

(a) *Odar.* lib. I. ode 9.

(b) Parum sibi constare videtur Diodorus Sculus, gravissimus ceteroqui auctor. Etenim *Biblioth.* lib. I. sec. 16. pag. 19. & sec. 43. pag. 53. artium & loquelae repertorem facit Mercurium; quum tamen lib. V. sec. 75. pag. 391. inde illi *Hermetis* nomen, quod interpretem sonat, obvenisse afferat, quod singula, in mandatis tradita,

dilucide interpretetur. Additque: *Non quidem nominum & dictionum inventor hic fuit, sed integram & perspicuam eloquutionem impensius ceteris excoluit.*

(c) *Instit. Orat.* lib. III. cap. 1.

(d) *In Elench. Sophist.* cap. 34.

(e) *Advers. Mathem.* lib. VII. sub init. pag. 139.

(f) *Lib. VIII. cap. 2. num. 3.* sec. 57.

himirum is, eiusque discipulus Tisias, Cicerone teste (a), artem & praecepta primi conscripserint. Nam quod de antiquissimo Pithei libro, quem, ab homine Epidaurio editum, legisse se memorat Pausanias (b), parum vero simile videtur. „ Quis enim sibi persuadere possit, inquit Vossius (c), aetate Pausaniae, qui sub Hadriano caesare vixit, exstitisse in arte hac aliquid antiquius bello Troiano, atque ipsis Herculis temporibus?

Exceperunt priores illos Gorgias Leontinus, vir, ut Laërtius ait (d), in oratoria eximius, Sopylus (e), eiusque filius Antiphon Rhamnusius, Periclis, Socratis, ac Thucydidis praeceptor (f), „ qui primus, inquit Plutarchus (g), „ rhetoricum artificium tradidit, & quod sollers esset, „ Nestor appellabatur (h). „ Rhetoricam deinde tractaverunt Lysias, Isaeus, & Theodorus Byzantius, qui artem scripsit ieiunam & aridam, meritoque a Platone (i) exagittatus est. Nec praetermittendus divinus ille Plato, qui, tamen si iustam artem minime tradiderit, Rhetoricae tamen naturam plane explicuit; & sophistas praeterea infectatus fuit, qui eloquentia abutebantur, rectumque egregiae artis usum pervertebant (k). Huius aequalis fuit Ilocrates, Gorgiae auditor, „ cuius praestantissimi fuerunt discipuli in „ omni studiorum genere: eoque iam seniore, ... (tanti „ viri gloria motus, ut inquit Cicero (l),) pomeridianis „ scholis Aristoteles praecipere artem oratoriam coepit, „ ac plurimis eam libris complexus est (m). „ Quibus tantam sibi gloriam comparavit, ut Rhetorum quoque, nedum Philosophorum, princeps habeatur. Qui enim post Aristotelem de arte hac scripserunt, Cicero, Dionysius Halicarnassensis, Quintilianus, hortos suos ex uberrimis illius fon-

- | | |
|--|---|
| (a) In <i>Bruto</i> cap. 12. | (g) In <i>vitis Rhetorum</i> . |
| (b) In <i>Corinthiacis</i> , seu lib. II. | (h) Vid. Cic. in <i>Bruto</i> cap. 12. |
| (c) Gerard. Ioh. Vossius de <i>Rhetor. nat. & constitut.</i> cap. 9. | Quintil. <i>instit.</i> lib. III. cap. 1. |
| (d) Lib. VIII. cap. 2. sec. 58. | (i) In <i>Phaedro</i> . |
| (e) Confer. Philostrat. in <i>Antiphonte</i> . | (k) In <i>Gorgia</i> . |
| (f) Apud Platon. in <i>Menexeno</i> . | (l) <i>Tusculan. quaest.</i> lib. I. cap. 4. |
| | (m) Quintil. <i>instit.</i> lib. III. cap. 1. |

fontibus irrigarunt (a).

Eodem tempore Theodectes fuit, & Anaximenes Lampfacenus, Alexandri Macedonis praeceptor (b), verus auctor, ut ego quidem cum Victorio (c) & aliis (d) sentio, Rhetoricorum ad Alexandrum. Hos sequutus elegans & suavis, Theophrastus, Aristotelis discipulus, qui de Rhetorica diligenter scripsit. Atque hinc vel studiosius Philosophi, quam Rhetores, praecipueque Stoicorum ac Peripateticorum principes. Fecit deinde velut propriam Hermagoras viam, quam plurimi sunt sequuti: cui maxime par atque aemulus videtur Athenaeus fuisse. Multa post Apollonius Molon, multa Areus, multa Caccilius, & Halicarnasseus Dionysius (e). Praecipue tamen in se converterunt studia Apollodorus Pergamenus, qui praeceptor Apolloniae caesaris Augusti fuit; & Theodorus Gadareus, qui se dici maluit Rhodium; quem studiose audisse, quum in eam insulam secessisset, dicitur Tiberius caesar. Hi diversas opiniones tradiderunt, appellatique inde Apollodorei & Theodorei, ad morem certas in philosophia sectas sequendi. Sed Apollodori praecipua magis ex discipulis cognoscas; quorum diligentissimus in tradendo Latine fuit C. Valgius, Graece Atticus. Nam ipsius sola videtur ars edita ad Matium, quia ceteras missa ad Domitium epistola non agnoscit. Plura scripsit Theodorus, cuius auditorem Hermagoram sunt qui viderint (f).

Succedere iis Apfines, Phoebammo, Aristides technicus, Minucianus, & Hermogenes sophista, cui primum locum post Aristotelem tribuunt quidam eruditi (g). Hunc

ve-

(a) Henric. Valesius *de Critica* lib. I. cap. 6.

(b) Suidas verbo *Anaximenes*.

(c) Praefat. in Aristot. Rhetor.

(d) Robortellus *variar. lect.* lib. XIV. cap. 2. Nunnescius in *not.*

in *Phrynicum* pag. 56. Ger. Ioh.

Vossius *de histor. Graecis* cap. 10. &

de Rhet. nat. & constit. cap. 9. Mc-

nagius *observat.* in *Diog. Laert.* lib. II. sect. 3. Capperoner. in *Quintil.* lib. III. cap. 4.

(e) Pauca, sed egregia, huius ad Rhetoricam pertinentia exstant in Criticis & Rhetoricis.

(f) Quintil. lib. III. cap. 1.

(g) Apud Graevium *Histor. Bioblioth.* sect. 12.

Verò Sopater, Syrianus, Marcellinus, Troilus, & Maximus Planudes, commentariis Graecis illustrarunt. Floruit & Aureliani imperatoris tempore Longinus, qui egregium *de sublimi charactere* libellum conscripsit. Atque hic postremus Graecorum est, qui cum primis Rhetoricae scriptoribus conferri possit. Qui enim post ipsum vixere, nihil attulerunt novi; sed aut veteres commentati sunt, aut ex illorum scriptis libellos suos contexuerunt. Quos inter celebriores exstiterunt Alexander & Theophrastus sophistae, Demetrius Alexandrinus, Phalereus vulgo dictus, Aristides rhetor, & Aphthonius, XI. christiani nominis saeculi scriptor, cuius Tzetzes mentionem facit (a).

Ac de Graecis haecenus. Ad Latinos veniamus, apud quos Rhetorica, perinde atque Grammatica, sero, paulloque etiam difficilior recepta fuit (b). Primus enim, qui eam Romae tradidisse memoratur, est L. Plotius Gallus, extremis L. Crassi temporibus, Cicerone etiam tum puero (c): quem M. Coelius, ut inflatum ac levem & sordidum derisit, atque ordearium rhetorem appellavit (d). De Rhetorica vero primus inter Romanos scripsit M. Cato Censorius, quaedam etiam M. Antonius inchoavit (e). Sequuntur deinde minus celebres, quos inter L. Otacilius Pilius, Cn. Pompeii in Rhetoricis praeceptor, fuit (f). Floruit deinceps eloquentiae parens Cicero, cuius de Rhetorica scripta & merita notiora sunt, quam ut a me commemorari debeant. Quamquam non desint, qui cum meliorem oratorem fuisse, quam rhetorem, arbitrentur (g). Aequalis Tullii fuit L. Cornificius, quem auctorem esse librorum ad Herennium, viri doctissimi (h) validissimis probarunt argumentis. Ad idem tempus referendus est Epidius, qui, inter ceteros, M. Antonium & Augustum docuit; itemque Sextus Clodius, de quibus mentionem facit Tranquillus.

b

lus.

(a) Ioh. Tzetzes *variar. histor.*
Chiliad. XI. vers. 121. seqq. pag.
206.

(b) Suetonius *de clar. Rhet.* c. 1.

(c) Cic. ad Titinnium.

(d) Apud Suet. *de clar. Rhet.* c. 2.

(e) Quint. lib. III. cap. 1.

(f) Apud Suet. loc. cit. cap. 3.

(g) Vossius *de Nat. & constit.*
Rhet. cap. 13.

(h) Eos videlicet apud Voss. loc.
cit.

lus (a). Aliqua etiam de hac materia scripsit Sterninius, non nulla Pater Gallio: accuratius vero priores Gallione Celsus, Laenas, Virginius, Plinius iunior, & Rutilius Lupus (b), qui quattuor iunioris Gorgiae libros in unum suum transtulit (c). Addi his meretur Visellius, non negligens quidem auctor, ut inquit Quintilianus (d). Excelluit vero praeter ceteros M. Fab. Quintilianus, Plinii iunioris praeceptor (e), vir summus, acri iudicio praeditus, & eruditione etiam singulari: qui, post impetratam studiis suis quietem, quae per XX. annos erudiendis iuvenibus impenderat (f), oratorias institutiones composuit, uberrimas quidem illas, & numeris paene omnibus absolutas (g). Nec praetereundus nobis est auctor dialogi *de causis corruptae eloquentiae*, qui Fabii, Tacitive, nomine circumfertur. Cuius scriptorem, quisquis demum ille fuerit, tanto in honore habet Iustus Lipsius, ut conferre eum cum optimi saeculi & optimae notae scriptoribus nequaquam vereatur (h).

Scripsere praeterea de Rhetorica Aquila Romanus, Iulius Ruffinianus, Curius Fortunatianus, Marius Victorinus, Sulpicius Victor, Emporius, alique non pauci, cum prioribus illis minime conferendi. Nam quemadmodum Graecis Rhetoribus finem imposuit Longinus; ita Latinis Fabius Quintilianus. „ Etenim, ut praeclare inquit noster „ Vives (i), studium artis oratoriae prorsum sublatum circiter Antoninorum tempora: quum iurisperiti, qui plurimum valebant gratia apud principes, decrevissent ipsi „ soli totum occupare ... *Tunc vero declamari quoque est* „ de-

(a) Sueton. *de clar. Rhet.* cap. 4. & 5. Alios Rhetores, quorum mentionem fecisse Suetonium, Achilles Statii Mss. testantur, vid. apud Voss. loc. cit.

(b) Quintil. lib. III. cap. 1.

(c) Quintil. lib. IX. cap. 2.

(d) Loco cit.

(e) Plin. lib. II. epist. 14.

(f) Quintil. in *prooem.* lib. I.

(g) Angelus Politianus praefat.

in Quint. institutiones, *Quintilianum vero*, inquit, *non nos quidem illum Ciceroni praetulerimus, sed has certe eius oratorias institutiones Rhetoricis Ciceronis libris pleniores uberioresque esse existimamus.*

(h) Legatur I. Lipsii praefatio in hunc dialogum.

(i) Ioh. Lud. Vives *de caus. corrupt. ars.* lib. IV. oper. tom. I. pag. 400.

„desitum & artem cognosci, quae nihil erat sine exerci-
tio profutura.

Sed de artis scriptoribus plura fortasse dicta sunt, quam ut praefationis angustiae pati videantur. Quae tamen speramus nec ingrata futura lectoribus, nec exiguae utilitatis. Multum enim interest eorum cognitio, qui in ea arte aut scientia, cui navamus operam, cum laude versati sunt. Quorum in pluribus ignoratio efficit, ut, quum bonas horas in libris inutilibus legendis collocarint, oleum & operam irreparabili prorsus damno perdidierint. Quod si hac nos disputatione assequeremur, ut praeclara Aristotelis, Tullii, Quintiliani, Hermogenis, ac Longini de Rhetorica scripta, diurna nocturnaue manu versarent oratoriae sacrae studentes, abunde magnum laboris nostri praemium existimabimus.

Deveniamus iam ad evangelicam praedicationem, si prius tamen non nulla de concionandi origine, & concionibus Iudaeorum, praeter propositum breviter disputaverimus. Ac primus omnium, qui concionandi munus obiverit, Moses memoratur. Nam quum legis tabulas, Dei digito scriptas, in monte recepisset; populum, concione habita, de lege edocuit, atque ad bene beateque vivendum informavit (a). Isaiam (b) quoque, Ieremiam (c), Ezechielem (d) misit Deus, ut animum, illius beneficiorum immemorem, Israëlitis exprobrarent, ac Ierosolymitanæ urbis eversionem vaticinarentur. Iudaei autem, trans Euphratem captivi, ad eundem Ezechielem, verbum Domini audituri, convenerunt (e). Frequentiores apud Iudaeos conciones fuere, ex quo synagoga instituta fuit: cuius vestigia iam inde ab Elisei temporibus occurrunt (f). Etenim inter synagogarum ministros, publicus quidam erat, qui oraret publice, curaret de legis lectione, & conciones ad populum haberet (g); quique *Chasam*, hoc est,

b 2

spe-

(a) Exod. XXXIV. 34.

(b) Isaiæ VI. 9.

(c) Ierem. II. 1. 2.

(d) Ezech. II. 3.

(e) Ezech. XXXIII. 31.

(f) Elisei aetate religiosi quique viri ad illum die Sabbati, le-

ctionis audiendae causa, conveniebant. 4. Reg. IV. 23.

(g) *Moses enim a temporibus antiquis habet in singulis civitatibus qui eum praedicant in synagogis, ubi per omne sabbatum legitur. Act. XV. 21.*

speculator, inspector, custos, episcopus, appellabatur (a). Neque apud Iudaeos tantum, verum etiam apud Ethnicos, Graecos & Romanos, aliosque, conciones sacrae, seu publici coetus, habebantur, in quibus populus de religione quisque sua institueretur. Sed haec libenter praetermittimus, de quibus disputare instituti nostri ratio, & proposita brevitatis non sinit. Eorum tamen cognitio cum per se utilis & iucunda est, tum a christiani doctoris studio nequaquam aliena: quum illud constet, plura, ad concionandi rationem ac ritus pertinentia, ex Hebraeorum & Gentium ritibus christianos desumpsisse (b).

Vt vero eo, unde digressi sumus, revertatur oratio nostra, evangelicae praedicationis initium a communi omnium servatore Iesu-Christo ducimus. Quem praecurrit eius nuntius ac testis, Iohannes Baptista, quo maiorem in natis mulierum excitatum fuisse neminem, Christus ipse testatur (c). Hic enim ille est, qui ante Dei spiritum intonavit, quam hominis vagiret in fletu (d); qui, dum sexto mense exsultavit in matris Elisabethae utero, Christi in Virginis uterum adventum nuntiavit. Puerulus adhuc in deserta concessit, quo in loco, perpetuis hymnis & orationibus vacans (e), in diem usque ostensionis suae ad Israël (f) commoratus est. Altero autem & tricesimo aetatis Christi anno, Spiritu Dei actus, venit in regionem Iordanis, praedicans baptismum poenitentiae (g) ac Messiae adventum: hunc vero venisse iam palam annuntians, atque in medio Israël esse, quem tot retro saecula expectarunt, qui vero ventilabro arcem esset purgaturus, paleamque absumpturus igne sempiterno (h). Quo in loco & alios plurimos, & Christum etiam baptizavit (i): adeoque se Iudaeis baptismo, praedicatione, & inaudito vitae gene-

(a) Bernard, Lamy *App. Bibl.* lib. I. cap. 8.

(b) Id ostendit Franc. Bernardin. Ferrarius *de ritu sac. vet. ecclesiae concionum* variis locis.

(c) Matth. XI. 11.

(d) Chrysostom. *serm.* LXXXVIII.

(e) Chrysostom. in Matth. homil. XXXVIII.

(f) Luc. I. 8.

(g) Luc. III. 3.

(h) Matth. III. 1. 12. Luc. III. 17.

(i) Matth. III. 6. 16. Marc. I.

4. 9.

nere commendavit, ut eum Messiam in lege promissum esse iudicarent. Quibus per legatos, num Christus esset, sciscitantibus, vocem clamantis in deserto esse se respondit, Christum vero aut Eliam negavit (a).

Per idem tempus praedicandi ac docendi munus Christus aggrediebatur. Quamquam omnia, quaecumque ad diem illum gessit, pro tacita quadam ad omne virtutis & pietatis genus adhortatione haberi possint ac debeant. Siquidem & in mundum veniens, & nascens, & cum hominibus vivens, humilitatis, paupertatis, caritatis, obedientiae, omnium denique virtutum, perfectissimum exemplum fuit. Verum hoc ille tempus destinaverat, ut populus, qui ambulabat in tenebris, videret lucem magnam, quae habitantibus in regione umbrae mortis oriretur (b). Post Iohannis baptismum, XL. dierum ieiunium, ac superatum daemone, e Galilaea Bethabaram redux, Baptistam iterum trans Iordanem, eiusque discipulos, offendit; quorum non nulli (c), magistri testimonio (d) excitati, ad Christum confugerunt. Hinc digressus, matre ac discipulis comitatus, Canam Galilaeae (e) primum, tum Capharnaüm, paucisque interiectis diebus, Ierosolymas, festum Paschatis celebraturus, contendit (f). Quo ubi pervenit, vendentes, numularios, & negotiatores scutica e templo eiecit, plurimaeque miracula edidit, quibus non pauci, ut illi crederent, adducti sunt (g). Nicodemo vero, noctu ad illum venienti (h), baptismi & regenerationis dogma explicuit, ad eumque in aqua & Spiritu sancto conferendum ad Iordanem fluvium remeavit. Quod sacramentum magnae hominum undique confluentium vi, discipuli ministrabant, quum

b 3

Ie-

(a) Iohan. I. 19. seqq.

(b) Matth. IV. 16.

(c) Andreas, eiusque frater Petrus, & qui primo cum illis ad Iesum venerat, quem alii Bartholomaeum, alii Iacobum Zebedaei putant: tum Philippus, ac Nathanaël.

(d) *Ecce agnus Dei, ecce qui tol-*

lit peccatum mundi. Iohan. I. 29.

(e) Hic Christus, ad nuptias cum matre ac discipulis invitatus, aquam in vinum transmutavit. Iohan. II. 1. seqq.

(f) Iohan. II. 13.

(g) Ibid. 23.

(h) Iohan. III. 1. seqq.

Iesus interim ad praedicationem unice intentus esset (a). Post haec Galilaeam, deinceps Iudaeam, variasque earum urbes ac pagos concursavit, praedicandi, docendi & baptizandi munere, tum per se, tum per discipulos, defungens; bene de hominibus merendi studium ubique locorum ostendens, ac benevolentiam in eos singularem. „ Dei e-
„ nim spiritu daemones eiiciebat, morbos corporum & a-
„ nimorum depellebat, mortuos in vitam excitabat, & in-
„ firum numen operibus admirandis indicabat (b).

Quibus permoti Iudaeorum & Gentilium plurimi, nempe qui libenter suscipiebant vera (c), eum esse verum Messiam credere, & christianae religioni dederunt nomen. Horum duodecim elegit Christus (d), quos, S. Spiritu repletos, ceteris praeesse, sacrique depositi custodes voluit, ut illis, ceu basibus, totius ecclesiae aedificium, nullo umquam tempore ruiturum (e), inniteretur. Sunt autem Petrus, Andreas, Iohannes evangelista, Philippus, Iacobus maior, Bartholomaeus, Thomas, Matthaeus, Simon, Thaddaeus sive Iudas, Iacobus minor, & Iudas Iscariotes; in cuius locum, nam laqueo sibi vitam eripuit (f), Matthias suffectus est (g). Hi vero *apostoli*, id est *missi* vocati sunt: quippe quod eos Iesus-Christus post resurrectionem in totum terrarum orbem miserit, ut evangelium annuntiarent, ac baptismum in nomine Patris, & Filii, & Spiritus sancti conferrent (h): cuius rei gratia, & Spiritu sancto imple-

(a) Ioh. IV. 2.

(b) Verba sunt eloquentissimi Hier. Ofor. l. V. de Sapient. sub finem.

(c) Ita loquitur Fl. Iosephus, Iudaeus & ipse, *Antiquit. Iudaic.* lib. XVIII. cap. 4. Eodem tempore fuit Iesus, vir sapiens, si tamen virum eum fas est dicere. Erat enim mirabilium operum patrator, & doctor eorum, qui libenter vera suscipiunt, plurimosque, tam de Iudaeis, quam de Gentibus, sectatores habuit, &c. quae talia sunt, ut vix clarius de vero Messia Christo testimonium a

christiano homine exigeremus.

(d) Luc. VI. 13.

(e) Ita promissit Christus Matth. XVI. 18. *Tu es*, inquit cum Petro, apostolorum principe, loquens, *Petrus, & super hanc petram aedificabo ecclesiam meam, & portae inferi non praevallebunt adversus eam.* Et Matth. XXVIII. 19. *Ecce ego vobiscum sum omnibus diebus usque ad consummationem saeculi.*

(f) Matth. XXVII. 5.

(g) Act. I. 26.

(h) Matth. XXVIII. 19.

pleti, & variarum linguarum cognitione, ac miracula parandi virtute donati sunt (a). Quibus suo merito adiungendus est, qui abundantius omnibus laboravit (b), magnus ille Gentium doctor Paullus, quem sibi Christus vas electionis adoptavit, ut portaret nomen eius coram gentibus, & populis, & filiis Israël (c).

Iam vero, quum Apostoli plura hominum millia (d) ad christianam pietatem in Iudaea & Samaria traduxissent; per omnes ferme terrarum orbis provincias dispersi, uberrimos sane praedicationis fructus retulerunt. Id autem scriptura sacra (e), id ex Iudaeis Iosephus (f), id ex ethnicis Tacitus (g), & Plinius iunior (h), id ex veteribus christianis quam plurimi (i) testati sunt: e quibus unum dumtaxat Lactantium in medium proferemus. Is enim eo libro, quem de mortibus persecutorum scripsit (k), ubi adnotasset, Christum post resurrectionem XL. diebus cum apostolis versatum fuisse, quo eos pluribus ad christianae religionis propagationem, ecclesiaeque stabilitatem necessariis documentis institueret, „ inde, inquit, discipuli, qui tunc erant undecim, adsumtis in locum Iudae proditoris Matthia & Paulo, dispersi sunt per omnem terram ad evangelium praedicandum, sicut illis magister Dominus imperaverat, & per annos XXV. usque ad principium Neroniani imperii, per omnes provincias & civitates, ecclesiae fundamenta miserunt. Quumque iam Nero imperaret, Petrus Romam advenit; & editis quibusdam miraculis, quae virtute ipsius Dei, data sibi ab eo potestate, faciebat, convertit multos ad iustitiam, Deoque templum fidele ac stabile collocavit. Qua re ad Neronem

b 4

„ de-

- | | |
|--|---|
| (a) Act. II. 1. seqq. | pud Matth. VII. 28. Luc. XIX. 47. |
| (b) 1. ad Corinth. XV. 10. | Ioh. XI. 48. |
| (c) Act. IX. 15. | (g) Annal. lib. XV. cap. 44. |
| (d) Act. II. 41. & IV. 4. | (h) Lib. X. epist. 97. |
| (e) Variis N. T. locis, praecipue in Actis Apostol. & Pauli epistolis. | (i) Eos videtis apud Ioh. Alb. Fabricium in opere, cui titulus: <i>salutaris lux evangelii</i> , &c. cap. 2. pag. 25. seqq. |
| (f) <i>Antiquit.</i> lib. XVIII. cap. 4. Ipsi etiam Pontifices & Pharisei a- | (k) Cap. 2. |

„ delata , quum animadverteret , non modo Romae , sed
 „ ubique quotidie magnam multitudinem deficere a cul-
 „ tu idolorum , & ad religionem novam , damnata vetu-
 „ state , transire , ut erat execrabilis ac nocens tyrannus ,
 „ profilivit ad excidendum caeleste templum , delendam-
 „ que iustitiam , & primus omnium persecutus Dei ser-
 „ vos , Petrum cruci adfixit , & Paullum interfecit.

Haec tamen funesta (a) I. clades , aliaeque sub II. Do-
 mitiano , III. Traiano , IV. Hadriano , V. M. Aurelio Antoni-
 no , VI. Severo , VII. Maximino , VIII. Decio , IX. Valeriano
 ac X. Diocletiano & Maximiano imperatoribus , quibus
 christiani per annos circiter trecentos vexati sunt , tantum
 abest ut evangelicae doctrinae propagationi obfuerint , ut ,
 crudelitate etiam tyrannorum , martyrumque sanguine , ma-
 iora in dies incrementa ceperit. „ Magis *entm* praeconium
 „ (evangelii) crescebat (inquit Matthaeus Camariota (b) ,)
 „ quam quaecumque humanarum rerum habentur in ho-
 „ nore apud homines , tantoque plures id sectabantur , &
 „ accipiebant , & venerabantur , quo plures contumeliae
 „ excogitabantur adversus sectatores , quoque graviora
 „ quotidie exquirebantur genera suppliciorum. „ Vt veris-
 sime dixerit Tertullianus (c) , religionis christianae semen
 esse sanguinem christianorum : & Prudentius : (d)

Nec furor quisquam sine laude nostrum

Cessit , aut clari vacuus cruoris :

Martyrum semper numerus sub omni

Grandine crevit.

Tantum vero , tam difficile planeque divinum evangeli-
 cae propagationis opus , praeter Paullum , ac duodecim il-
 los , quos supra memoravimus , viri etiam apostolici
 aureo illo nascentis ecclesiae saeculo perfecerunt. Horum
 non nullos Apostolus commendat in epistola ad Roma-
 nos

(a) Accidit circa A.C. 64. aut 66.
 II. A. 93. III. 104. IV. 125. V. 151.
 VI. 197. VII. 235. VIII. 250. IX.
 257. X. ab A. 303. quae fere per
 decennium duravit. Atque haec sunt
 praecipuae persecutiones christia-

norum primis ecclesiae saeculis.

(b) *De fato advers. Gemistum
 Pletonem* lib. II.

(c) *In Apollaget.* cap. ult.

(d) *Peristephan.* hymn. IV. (in
 quibusdam edit. VII.) a vers. 85.

nos (a): quibus adiungendi sunt Linus, Cletus, & Clemens Romanus, Petri successores, tum etiam Simeon, Ignatius, Polycarpus, Papias, ceteri, qui, tametsi ad saeculum II. referantur, ab Apostolis tamen instituti & initiati fuere. Quorum ea fuit tota cura & studium, ut evangelium praedicarent, miraculis confirmarent, atque Infideles, Iudaeos, cathecumenos, pro sua quemque conditione, erudirent. Eadem docendi ratio saeculo II. & III. obtinuit: nisi quod maiori apparatu doctrina sacra tradita fuit in scholis, praesertim Alexandrina, a Marco evangelista instituta (b), cui Pantaenus praefuit, tantaeque prudentiae & eruditionis, tam in scripturis divinis, quam in saeculari litteratura, fuit, ut in Indiam quoque, rogatus ab illius gentis legatis, a Demetrio, Alexandriae episcopo, ad praedicandum Christi evangelium mitteretur (c). Eandem, post Pantaenum magistrum, scholam tenuit Clemens Alexandrinus, qui discipulum habuit Origenem Adamantium (d), virum eruditissimum, in omnibus disciplinis apprime versatum, acri iudicio praeditum, atque inter optimae notae criticos referendum (e). Singularis etiam pietatis fuit; adeo ut vel laicus ipse Clementi in schola Alexandrina succederet (f), atque ab Alexandro Ierosolymitano, & Theodisto Caesariensi, episcopis, rogatus fuerit, ut publice in ecclesia differeret, & divinas scripturas, tametsi sacris nondum initiatus, exponeret (g). Quod erat illis temporibus non laicis modo (h), verum etiam presbyteris (i) interdictum. Tantam porro Origenes dicendi copiam, assidua concionandi exercitatione, adeptus fuerat, ut publice, magna omnium

(a) Cap. XV. a vers. 3. ad 16.

(b) Euseb. *Hist.* lib. II. cap. 15. 16. 23.

(c) Hieronymus *de Script. Eccl.* cap. 36.

(d) Hoc testatur ipse Clemens *Stromat.* lib. I.

(e) Confer. Henr. Valesius *de Critica* lib. I. cap. 23.

(f) Hieron. *de Script.* cap. 36.

(g) Euseb. *Hist.* lib. VI. cap. 19.

(h) Concilium Carthag. IV. can. 98. Trullanum cap. 64. Vid. Ferrarius *de rit. sacr. vet. eccles. concion.* lib. II. cap. 12.

(i) Confer. idem Ferrar. lib. II. cap. 9. ubi varia concil. decreta, & PP. testimonia adducit.

mnium admiratione , diceret ex tempore ; & , quae ita funderet , a notariis etiam excipi pateretur (a).

Atque hic primus christianorum oratorum apud Graecos fuit : quem paullo post , medio scilicet saeculo III. nobilis Latinus excepit , Caecilius Cyprianus. Rhetoricam Carthagine , patria sua , cum laude docuit ; eumque Deus eloquentiae & profanae eruditionis , seu Aegypti opibus , ut inquit Augustinus (b) , onerari voluit , quo ad ecclesiae fidem propugnandam instructior accederet. Laudat in eo Lactantius (c) ornatum in eloquendo , facilitatem in explicando , & in persuadendo vim : quibus si modestiam , gravitatem , pietatem , & invictum pectus addidisset , aliquam , tamen imperfectam , sanctissimi & eloquentissimi viri speciem haberemus. Floruit & sub Diocletiano Arnobius , Sicae in Numidia , Africae provincia , oratoriae artis professor , eruditione magis , quam aspero , quo utitur , stilo commendandus. Eius auditor fuit Lactantius Firmianus , qui dicendi quoque artem Nicomediae professus est. Homo sui temporis doctissimus , Tullianae eloquentiae fluvius , lacteus ac melitissimus orator Hieronymo (d) audit ; ut suo quodam iure christiani Ciceronis nomen adeptus fuerit (e).

Devenimus iam ad IV. saeculum , quo demum ecclesiae Christi , post acerbissimas impiorum principum vexationes , pacem diu expetitam concessit Magnus Constantinus (f). Imperator certe maximus & felicissimus , qui & christianis favit , & cathecumenis accenseri voluit , & ab Eusebio Nicomediensi tandem baptizatus est. Vna eius latina oratio ad sanctorum coetum *de Christi adventu & divinitate* hodieque superest ex pluribus , quas scripsit , quarumque magnam partem recitavit (g). Sub eodem Constantino vixit Athanasius (h) , magnus ille christianorum causae adversus Arium

- | | |
|---|--|
| <p>(a) Euseb. <i>Hist.</i> lib. VI. cap. 36.</p> <p>(b) <i>De doctr. christ.</i> lib. II. cap. 40.</p> <p>(c) <i>Divin. instit.</i> lib. V. cap. 1.</p> <p>(d) Epist. 13. ad Paullin. <i>de instit. Monachi.</i></p> <p>(e) Vixerunt Arnobius & La-</p> | <p>stantius usque ad initia IV. saeculi.</p> <p>(f) Romanum imperium tenuit ad anno 306. ad 337.</p> <p>(g) Confer. Euseb. lib. IV. <i>de vita Constantini</i> , cap. 29. & 32.</p> <p>(h) Decessit vero sub Valente anno 373.</p> |
|---|--|

Arium haeresiarcam patronus : quem qui laudat , virtutem ipsam laudare , inquit Nazianzenus (a). Singularis moderationis & iudicii in disputando fuit , atque a summa scripturarum eruditione , dictionis perspicuitate , suavitate , vi & copia , praecipue commendatur. Per idem tempus plurima opera , pia magis , quam docta (b) , scripsit Ephraemius , Syrorum doctor & propheta dictus. Ad tantam vero pietatis & doctrinae existimationem pervenit , ut eius scripta in quibusdam ecclesiis , post Scripturarum lectionem , publice recitarentur. Enituit vero ; praeter ceteros , iudicio , doctrina & eloquentia , Basilii Magnus Cappadox , qui , auctore Photio (c) , Platone , Demosthene aliisque ceteratoribus illustribus haud inferior habendus est : immo , si Erasmo credimus , Graecis oratoribus longe praestat , vitiisque eorum caret. Amicum & contubernalem habuit Gregorium Nazianzenum , ob acumen , quo de rebus divinis philosophatur , *Theologum* cognominatum. Tantum vero in oratoriae artis studio profecit Nazianzenus , ut Libanius sophista , sub cuius institutione Rhetoricam Athenis didicerat , a discipulis rogatus , quis illi dignus videretur , qui eius cathedram post mortem susciperet , Gregorius , inquit , ille , nisi christianus esset (d). Quod verum profecto esse , eius orationes , non minus piae ac eruditae , quam eloquentes , luculentissime probant. Cessit iis Graecis eloquentia Latinus Ambrosius , Mediolanensis antistes , Graeci tamen sermonis cognitione , varia doctrina , pietate , gravitate , miraue iucunditate celeberrimus : ut non immerito *melliflui doctoris* cognomen fuerit assequutus. Frequentissime ad populum concionabatur : neque enim ullum diem dominicum abire sermone vacuum permittebat (e). Eloquentissimi Basilii frater fuit eloquens & ipse Gregorius , episcopus Nyssenus , multa doctrina praeditus , nec vul-

(a) In Orat. de laudibus Athanasii , quae ita incipit : *Athanasium laudans , virtutem laudabo. Idem enim est , illum dicere , quod virtutem laudibus efferre.*

(b) Bellarm. de Scriptor. eccles. 6.

ad annum 365.

(c) Bibliothecae cod. CXLI.

(d) Apud Iohan. Anglum in praefat. hist. Eccles.

(e) Augustinus in Confess. cap.

vulgari eruditione. Ex Rhetoricae professore ad episcopi munus evocatus, operam suam in fidelibus erudiendis, refutandisque haereticis, Eunomio praesertim captiosissimo, feliciter posuit; plurimaeque opera, pura, libere fluenti, pleneque animi oratione scripsit.

Extremo iam saeculo IV. & V. ineunte floruit Gaudentius, episcopus Brixienſis, cuius sermones habemus, pietatis plenos, & pectus vere apostolicum referentes. Eodem tempore fuit Iohannes, Chrysostomus nuncupatus, quod tanta eloquentia valeret, ut flumen verborum aureum ex illius ore videretur exire. Omni ferme disciplinarum genere excultus fuit, quas pietati, praecipueque verbi Dei praedicationi, servire coegit. Quo in officio tanta cum laude versatus est, ut presbyter etiam, Antiocheni antistitis vices gerens, auditorum animos (a) ad se raperet; quos ab auribus vinctos, non secus atque Hercules ille Gallicus (b), ad linguam ita trahebat, ut, quum & maxima esset frequentia, & propius quisque dicenti adstare vellent, se invicem communi detrimento premerent (c). Sequitur numquam satis laudatus Aurelius Augustinus, admirandus & ipse concionator, doctrina, pietate, ingenio, nemini secundus. Praedicationis munus, non nisi presbyter, praeter consuetudinem Africanarum ecclesiarum, coram Valerio, Hippoſensi praefule, potestate sibi ab eo facta, utiliter exsequutus est (d): episcopus vero, populum & clericos, assiduis concionibus habitis, instituit, vires haereticorum fregit, & praeclara opera lucubavit, in quibus ingenium magis, quam eloquutio, viget. „Quamvis enim Rhetoricam docuisset, oratorum tamen eloquentiam non possidebat, aut illam saltem negligebat (e).

Sermones quoque sub initium V. saeculi conscripsit Maximus, vir pius ac doctus, episcopus Taurinensis. Horum plurimi inter Ambrosii & Augustini opera recensentur.

Di-

- | | |
|---|--|
| (a) Palladius in eius vita. | VIII. cap. 5. |
| (b) Apud Lucianum in <i>Hercule Gallico</i> . | (d) Possidonius in eius vita. |
| (c) Sozomenus <i>hisor. eccles.</i> lib. | (e) Dupinus in <i>Nova Biblioth. auctor. eccles.</i> tom. III. pag. 256. |

Disputant etiam eruditi de tempore, quo ille floruit ac mortuus est. Ab his tamen criticis disceptationibus nobis hoc loci abstinendum duximus. Nec omittendus Cyrillus Alexandrinus, praestanti doctrina, & recondita Theologiae cognitione praeditus, christianae religionis acerrimus propugnator. Plurimas homilias composuit, quas magni faciebant Alexandrinae ecclesiae episcopi, atque ad declamandum, ut Gennadius inquit (a), memoriae commendabant. Cyrilli aequalis fuit Theodoretus, episcopus Syrensis, qui eruditione, iudicio, eloquentia, orationisque lepore & perspicuitate, Chrysostomum, quem sibi imitandum proposuit, reddere videtur. Paullo post, medium circiter saeculum V. excellens orator fuit Eucherius Lugdunensis. Eloquentissimas conciones scripsit, si fidem Claudiano (b) habemus. Quas hodie num exstare arbitrantur plurimi, easque, maximam saltem partem, esse, quae Eusebii Emissemi nomine leguntur. Sub idem tempus floruit Petrus, episcopus Ravennas, Chrysologus, ob aureum eloquentiae flumen, cognominatus: tum etiam Leo, Romanus pontifex, eius nominis primus, magnus iure merito dictus: scriptor, ut inquit Photius (c), purus ac suavis, quique ferventi zelo contra impios depugnavit (d). Quibus adiungendi sunt Valerianus, episcopus Cemeliensis, & Salvianus Massiliensis; quem plures conscripsisse homilias, Gennadius & Honorius testantur (e).

Saeculo VI. haud exiguum detrimentum cepit eloquentia sacra: paucissimosque reperias, quos aut rerum divinarum scientia, aut dicendi facultate, prioribus illis, Cypriano, Basilio, Nazianzeno, Chrysostomo, ceteris, conferre possis. Enituerunt vero praeter ceteros Fulgentius, Ennodius, Isaac iunior, & Caesarius Arelatensis. Sed quaedam ex homiliis, quae huius nomen prae se ferunt, iunio-

(a) *De illustr. eccles. script.* cap.

37.

(b) Claudianus Mamertus in lib. *de statu animae*.

(c) In *Biblioth. cod. CCXXVI.*

(d) Idem *cod. LIV.*

(e) Gennad. *de illustr. scriptor.* cap. 67. Honor. Augustod. *de luminar. eccles.* cap. 67.

nioris auctoris esse, ex eo patet, quod in illis de Gregorio papa, atque Isidoro Hispalensi, aetate posterioribus, mentio fiat.

Labente iam VI. saeculo, & sub initium VII. floruit Gregorius Magnus, pontifex sanctissimus, atque inter omnes illius temporis doctissimus. Assiduus, si quis alius, in concionandi officio fuit; adeo ut basilicas & martyrum coemeteria eam in rem frequenter concursaret: quum autem, languentis stomachi causa, hoc munus per se ipse sustinere non poterat, ad alios deferebat, qui homilias, ab eo dictatas, pronuntiabant (a). Quae ad hunc diem superstites, tametsi eloquentia & sermonis nitore parum valeant, pietatis tamen doctrinaeque causa legendae sunt. Post M. Gregorii aetatem episcopi multo, quam antea, remissiores in concionando fuere. Siquidem nec eloquentia humanioresque litterae per haec tempora vel mediocri cura excolebantur, neque ecclesiae disciplina in primigenio robore permanebat. Scripturae quoque studium sensim inclinavit: qui enim eidem operam dederunt, toti in eo fuisse, ut superiorum patrum sententias cogerent ac describerent (b): de suo autem nihil addiderunt. Concionatores vero aut ex eorundem patrum scriptis homilias componebant, aut integras sumebant, totidemque verbis recitabant. Tam altas denique radices ignorantia egit, ut quidam ne grammaticam quidem scirent: immo & necesse fuit, presbyteros interdum ab episcopis interrogari, num evangelium & epistolam bene legere possent, aut saltem ad litteram eius sensum manifestare (c). Ut verissime possimus illa Gregorii verba usurpare, quibus ipse usus fuit, ut eccle-

(a) Gregor. in prol. XL. *homil. in evang.* Iohannes Diaconus in *Greg. vita* lib. II. cap. 18. & lib. IV. cap. 74.

(b) Hoc scriptionis genus *Catenas Patrum* appellabant. Venerabilis Beda primus omnium catenam scripsit. Quem eius discipulus imitatus est Flaccus Alcuinus, ex

cuius disciplina plures profecti sunt viri doctissimi: quorum postremus Walafridus Strabo saec. IX. fuit. Confer. *Launoii de schol. celebr. cap. 2.* Graecos *catenarum* scriptores videtis apud Ioh. Alb. Fabricium in *Biblioth. Gr.* lib. V. cap. 17.

(c) Confer. Baronius in *Annal. eccles.* ad ann. 992. n. 25.

ecclēsiae conditionem circa mundi finem describeret. (a)
 „ Tunc ergo , inquit , quum in diebus illis ecclesia , quasi
 „ quodam senio debilitata , per praedicationem filios pare-
 „ re non valer , reminiscitur fecunditatis antiquae , dicens:
 „ (b) *sicut fui in diebus adolescentiae meae.*

Certe nullo umquam tempore christiani tanta fide , sin-
 ceritate , probitate , industria , sapientia , laborum tole-
 rantia , rerumque humanarum contemtionem claruere , quan-
 tam in aurea illa apostolorum aetate demiramur. Num-
 quam praeterea evangelica praedicatio tam fauste ac felici-
 ter reipublicae christianae evenit. Quis enim non stupeat
 ac miretur , homines & paucos , & imbelles , & egenos ,
 & idiotas , id efficere docendo & patiando potuisse , ut sa-
 pientissimi quique , principes etiam & imperatores , ad piera-
 tem & religionem christianam accederent ? (c) Quamquam
 haud parum divina virtus se se conspiciendam praebeat in
 acerbis tyrannorum vexationibus usque ad IV. saeculum ,
 haereticorum , & schismaticorum usque ad VII. in quibus ec-
 clesia Christi mirum in modum aucta & amplificata fuit. Nec
 illud quoque admiratione vacat , quod , quum a VII. sae-
 culo ad X. quod morum perversitate litterarumque in-
 scientia ferreum appellatur , in communi ferme omnes i-
 gnorantia versarentur (d) ; numquam tamen ecclesiae satis
 docti iuxta ac piissimi homines defuerint , qui exemplo &
 doctrina populum instituerent , atque in officio contine-
 rent. Celebrantur autem hoc nomine saeculo VII. Sophro-
 nius , patriarcha Ierosolymitanus ; Leontius , episcopus Cy-
 prius ; Eligius , episcopus Noviomensis ; & Ildephonsus , e-
 piscopus Toletanus : VIII. Germanus , patriarcha Constan-
 tinopolitanus ; Beda Anglus , presbyter ; Iohannes Dama-
 sce-

(a) *Exposit. Moral.* in Iob lib. XIX. cap. 9.

(b) Iob XXIX. 4.

(c) *Conf. r. Matth. Camariota de fato adv. Gemist. Pletonem* lib. II. apud Fabricium in opere inscripto: *salutaris lux evangelii* , cet. cap. 10. pag. 161. seqq.

(d) Ignorantiae causae per haec tempora , praeter Gentium migrationes , & incursiones Barbarorum , aliae quoque assignantur: quas videsis apud scriptores cum ecclesiasticae , tum litterariae historiae.

scenus; Paullus, diaconus Aquileiensis; Theodorus Studites: IX. Haymo, episcopus Alberstatensis; Simeon iunior, cognomento *Logotheta*; Nicetas Paphlago, David cognominatus: X. Leo sapiens, Orientis imperator eius nominis sextus; & Radulphus Ardens: quorum omnium orationes sacrae ad nostra tempora pervenerunt (a).

Revixere non nihil saeculo XI. studia litterarum. Praecipue vero dialectica magno in honore fuit apud Theologos, qui fere soli litteris vacabant: ex quo illud exstitit, ut dialecticae subtilitates ad theologicas tractationes, sacrorumque librorum explanationem adhiberentur. Quae methodus posterioribus saeculis ad XV. obtinuit, in quibus scholastica Theologia nata, adulta, atque ad summum fastigium perducta est. Per id tempus eloquentia sacra (b) valde iacebat. Scripturarum interpretatio absque ullo ferme eruditionis apparatu, & debita linguarum cognitione instituebatur. Ex quibus fit perspicuum, nec egregios ea tempestate christianos oratores exstitisse. Pietatis tamen, magis quam reconditae eruditionis, causa laudantur saeculo XI. Leo IX. papa; Petrus Damiani; Iohannes Xiphilinus, patriarcha Constantinopolitanus; Ivo, Carnotensis episcopus: XII. Theofridus, abbas Epternacensis; Hildebertus, archi-episcopus Turonensis; Bernardus, abbas Claravallensis (c); Hugo de S. Victore; Richardus eiusdem cognominis; Odo, abbas Moribundi: XIII. Innocentius III. pontifex maximus; Antonius Olisiponensis, *Patavinus* vulgo dictus; Guilielmus, episcopus Parisiensis; Iacobus a Vitriaco; Thomas Aquinas, Bonaventura, Rupertus de Russia: XIV. Iohannes Taulerus; Iordanus de Saxonia: XV. Vincentius Ferrerius (d); Bernardinus Senensis; Aeneas Sylvius, seu Pius II.; Laurentius Iustinianus; Bessarion,

(a) Eas videre est in *Bibliotheca Patrum*: quaedam etiam seorsum editae sunt.

(b) Nec non & profana usque ad saeculum XIV.

(c) Hic inter ceteros & vitae sanctimonia, & sapientiae splen-

dore eminet.

(d) Conciones *de tempore*, & *de sanctis*, quae huius nomine circumferuntur, ab eius discipulis exceptae videntur: quum ipsius Vincentii interdum in illis iniiciatur mentio.

tion, cardinalis; & Ambrosius Camaldulensis.

Pulchrior sane fuit ecclesiae facies saeculo XVI. Nam & humaniora studia, quae iam inde a XIV. instaurari coeperunt, novam lucem & splendorem adepta sunt; & Theologi nostri, quo haereticorum impudentiam frangerent, operam suam in eo posuerunt, ut sacros codices emendatius ederent, ac polyglottas editiones adornarent (a); veterum episcoporum scripta evolverent; historiam, praecipue ecclesiasticam, illustrarent (b); Theologiam denique ab inutilibus quaestionibus repurgarent (c). De sacra etiam oratoria, quae iam per mille annos in squallore ac sordibus iacebat, in antiquum statum restituenda cogitatum est. Nec certe infelici eventu. Plures siquidem exstiterere concionatores, qui munus suum cum dignitate obiverint. Quorum magna pars concilio Tridentino interfuit: ubi conciones varii argumenti, prout res ferebat, habitae sunt; quae, in unum corpus redactae ac editae, ad nostras manus devenerunt.

Ex eo tempore insignes concionatores fuere cum apud externos, tum etiam in Hispania nostra. Hos inter palmam ferunt Thomas Villanovanus, archi-episcopus Valentinus, & Ludovicus Granatensis. Quos malem Hispanos nostros legere, quam ineptos illos homiliarios, qui numquam scripturas, numquam patres attrigerunt; qui vix aliud norunt de Rhetorica praeter nomen; de philosophia, dialecticas argutias; de morum doctrina, virtutum ac vitiorum nomina; de Theologia, inanes de possibili disputationes; de historia, aniles fabellas; de prudentia nihil: quorum non parva seges ubique temporum & locorum fuit (d). Sed illud maxime mirandum est, quum

c

il-

(a) Laudandi hoc nomine praeceteris Hispani duo: nempe *Franc. Ximenius* & *Cisneros*, cui *Biblia Complutensis*; & vir summus *Ben. Arias Montanus*, cui *Antuerpiensis* debemus.

(b) Eminent in his Card. *Baronius*, qui *Annales ecclesiasticos* com-

posuit, ut *Centuriatoribus Magdeburgensibus* se se opponeret.

(c) In Hispania nostra *Franciscus a Victoria*, *Melchior Canus*, *Alphonfus a Castro*, ceteri.

(d) Vix possum mihi temperare, quin Cl. *Lud. Vivis* iudicium

de

illorum libri nullo aut eruditionis, aut acuminis, aut eloquentiae condimento conscripti sint; homines tamen esse tam patientis stomachi, qui eos facile devorare & concoquere possint. Atqui multo maiori sunt in numero, quam vulgo creditur. Quin etiam certo affirmare possum, vel ex paucis illis, qui inter eximios oratores his temporibus numerantur, vix unum esse, qui tanto nomine dignus sit. Quod, tametsi paradoxon prima facie videatur, cuilibet animum advertenti patebit. Quotus enim quisque est, tanto rerum suarum amore abreptus, qui sermonem se adornare posse confidat, cum Basilii aut Chrysostomi homiliis conferendum? Sed esto. Demus hoc illis, quod ne ipsi quidem sibi arrogabunt. Num, quaeso, erit aliquis, tanta dicendi facultate praeditus, ut concionem habeat ex tempore, quae, litteris consignata, attente legentes in admirationem traducat? Negabunt, arbitror, ipsi, nisi si Thrasone iactantiores sint. Atqui veteres episcopos, praecipue Basilium, Chrysostomum, Augustinum, hac ratione magnam homiliarum, seu sermonum, partem habuisse, eruditi homines iam dudum observarunt. Agite vero, an ne in eximios oratores, ac non potius inter logodaedalos eum censebitis, qui sermonem, non numquam etiam centonem, Herculeo labore multisque diebus concinnatum, memoriter complectatur atque pronuntiet? Sed haec satis. Nolo

de sui temporis concionatoribus describam. Quamquam non omnes illius aevi tales fuerint, quales depingit ille lib. IV. de causis corrupt. art. Oper. tom. I. pag. 400. in haec verba: Qui nunc dicunt, quam dispares, imperiti, ignari vitae, immo etiam communis sensus: qui sint affectus, aut quemadmodum vel impellendi, vel revocandi, omnino nesci. Nec, cui rei quae verba, quod genus orationis sit adhibendum, norunt; omnia bene convenire omnibus rati. Sententias habent plumbeas, frigidas,

iacentes, segnes, quae animos deiciant citius, quam excitent: argumentatiunculas colligunt ab illo exercitio scholastico, quae ventilant quidem, & titillant interdum, nunquam feriunt aut caedunt. Dispositio fusa & dissipata: nihil dicunt suo loco: actio immoderata: nihil pro re aut tempore: non in voce, non in oculis & ore, non in manu & digitis, non in gestu & statu corporis universi: quae illi ita habent cognita, ut nulla esse arbitrentur, nec interesse, saltitent dicentes, an sedent.

lo equidem in re, invidiae offensionisque plena, diutius immorari. Quod si quis prodi se ac lace ssiri nostra disputatione sentiat, non me, qui neminem nomino, sua eum cognita mala prodere animadvertat. Quare irasci nemo poterit, nisi qui ante de se voluerit confiteri (a). Nunc vero perstringamus paucis, quo modo ecclesiastes impositum sibi concionandi munus possit cum dignitate explere, amplissimumque christiani oratoris nomen promereri.

Ac principio meditatam dicendi rationem interdum contemnendam existimamus. Neque enim apostoli eorumque discipuli, nec priorum saeculorum patres semper scribebant privatim, quae publice deinde recitarent. Non est suadenda christiana pietas eo sermonis genere, qui lucernam oleat, artisque affectationem & laborem ubique prodatur. Etenim „oratio, ut inquit Seneca, vultus animi est: si circumtorta est, & fucata, & manufacta; ostendit, illum quoque non esse sincerum, & habere aliquid fracti, esse pusillis occupatum (b). „Laudetur, per me licet, hoc nomine Demosthenes (c): at ecclesiastes noster *verba* habeat *vitae aeternae* (d): *non in doctis humanae sapientiae verbis, sed in doctrina spiritus* loquatur (e). Quae non ideo dicimus, quasi aliquid de oratoriae artis studio detractum velimus; absit enim tam praepostera existimatio: sed ut ostendamus, quod aperte Cicero praecepit, „in dicendo vitium vel maximum esse, a vulgari genere orationis, atque a consuetudine, ne communis sermonis abhorrere (f). „

Itaque futurum concionatorem summa ope niti decet, ut Rhetoricae praeceptis imbuatur. Quam in rem

C 2

val-

(a) Cic. *pro lege Manilia* cap. 13.

(b) Epist. CXV. Confer. Quintil. *instit.* lib. VIII. in prol.

(c) De cuius orationibus vulgo dicebatur, quod lucernam oleant: eius videlicet in illis componendis vigilias notantes. Vid. Cic.

Tuscul. quaest. lib. IV. cap. 19. & Erasmus ad adagium: *Lucernam olere.*

(d) Iohan. VI. 69.

(e) 1. ad Corinth. II. 13.

(f) Cic. *de Orat.* lib. I. cap. 3. atque ex eo Quintil. *instit.* lib. VIII. in prol.

valde proderit, aliquod illius compendium primum legere; veluti Gerardi Iohannis Vossii Rhetoricam contractam, aut, quod erit fortasse utilius, Cornificii quatuor libros Rhetoricorum ad Herennium: tum Quintilianii institutiones, atque Oratorem Ciceronis. Quum vero per otium licuerit, haud abs re erit, Aristotelis Rhetorica ad Theodectem, Longini opusculum de sublimi charactere, Ciceronis partitiones, ac Brutum, seu de claris oratoribus tractatum, evolvere. Ceterum, quando eloquentiam popularem oratori sacro vel maxime commendatam volumus, adiungendum superioribus illis censemus, eiusdem argumenti libellum, quem doctissimus Muratorius *contra sublimem loquentes in cathedra* composuit.

Nemo autem existimet, his perlectis, valde se in dicendi arte profecisse. „Est enim & scientia comprehendenda rerum plurimarum, sine qua verborum volubilitas inanis atque irridenda est (a). „Ac mihi quidem, de hac re acrius cogitanti, illud exploratum est, perfecto oratori nihil omnino ignorandum esse, quod vastissimo humanarum cognitionum ambitu contineatur. Quam rem L. Crassus apud Tullium docuit. „Si quis, „inquit, universam & propriam oratoris vim definire „complectique vult, is orator erit, mea sententia, hoc „tam gravi dignus nomine, qui, *quaecumque res incidit*, „*derit*, quae sit dictione explicanda, prudenter, & composita, & ornate, & memoriter dicat, cum quadam „etiam actionis dignitate (b). „Quod si cui nimis infinitum, atque ab homine, cuius & vita brevis, & vis mentis imbecilla, ne optandum quidem videatur; non admodum repugnabo: dum tamen illud teneat, non ideo minus nobis ad summa tendendum esse. „Prima enim „sequentem, honestum est, in secundis tertiisque consistere (c). „Recteque Horatius (d):

Est quodam prodire tenuis, si non datur ultra.

Quapropter si christianus orator talem se futurum mini-

(a) Cic. de Orat. lib. I. cap. 5.

(b) Cic. de Orat. lib. I. cap. 15.

(c) Cic. in Orat. cap. I.

(d) Horat. lib. I. epist. I. vers. 32.

nime speret, qualem animo & cogitatione fingimus; eniti tamen debet, quantum possit, ut fidelis verbi Dei dispensator, dignusque Christi & apostolorum successor fiat.

Hoc vero facile assequetur, si, cuius doctrinam praedicat, vitam etiam imitetur: si cum veteribus christianis vere dicere possit, *non loquimur magna, sed vivimus* (a); si, rerum magis, quam verborum, amator, utilia potius, quam plausibilia, sectetur (b). Tum etiam si totis viribus incumbat in studia litterarum. Haec autem, quod ad concionatorem attinet, tribus continentur; philosophiae, nimirum, Theologiae, atque historiae cognitione. Ac de philosophia quidem Logica primum perdiscenda: non illa scholastica, *quae in abusu est*, quaeque, ut inquit Verulamius, *ad errores, qui in notionibus vulgaribus fundantur, stabiliendos & fingendos valet potius, quam ad inquisitionem veritatis* (c); sed quae mentem dirigit, iudicium format, ac rationem tradit, qua ceterae disciplinae facilius utiliusque discantur. De illa vero consulendos iudico Antonium Genuensem, Aloysium Antonium Verneium, aut Florianum Dalhamum; quorum in hac materia scripta illis superiorum temporum longe praestantiora sunt. Logicae pars est Critica, ars certe praeclarissima, atque oratori sacro penitus necessaria. Cuius ideo mentionem facere voluimus, quod nimis multos animadvertamus, criticis omnibus impietatis notam inurentes. Nempe impii erunt, quot quot verum a falso, pravum a recto in re litteraria diiudicare noverint! *Faciunt nae intelligendo, ut nihil intelligant* (d); qui quum hos accusant, viros divinos, ecclesiae patres scriptoresque accusant, qui illis praeiverunt. Criticus enim fuit Esdras ille *scriba velox in lege Moysi* (e), qui sacros codices descripsit, ordine posuit, & emendavit. Critici fuere Origenes, Ba-

c 3

si-

(a) Minutius Felix in *Octavio* cap. 38. Cyprianus *de bono patientiae* sub init.

(b) Salvianus in proem. lib. I. *de gubernat. Dei*.

(c) *Nov. Organ. scient.* Aphor. XII.

(d) Terentius in *Andriae* prol. vers. 17.

(e) 1. Esdrae VII. 6.

silius Magnus, Gregorius Nazianzenus, Iohannes Chrysostomus, Hieronymus, Synesius, Theodoretus, Photius, ut ostendit clarissimus Valesius (a).

Quod ad Metaphysicam spectat, unum monemus, nempe haud esse rebus Theologicis immiscendas nimias subtilitates; quae dici non potest quantum ecclesiae incommodaverint saeculis XII. & XIII. (b). Nostra vero & patrum aetate multum incrementi cepit haec scientia post Leibnitzium, Wolffium, eorumque sectatores: quorum libri, quamvis valde e re orbis litterarii fuerint, Theologo nostro parce tentandi sunt. Vtilius impenderur tempus in Verneii Metaphysica legenda: quem optarem ceteras illius disciplinae partes, eadem, qua Ontologiam, via & ratione absolvere.

Maiore animo rerum physicarum studium ineundum est. Oportet enim naturae vires perspectas habuisse, ne ab haereticis, aut doctis etiam catholicis irrideamur, dum prodigii & miraculi instar accipimus, quod a naturali aliqua causa, ignota vulgo, proficiscitur. Cuius cognitio, quum ex Arabico-Aristotelica schola haberi nequeat, ex Physicis recentioribus, s' Gravesandio, Musschenbroëchio, ceteris, qui post Newtonum scripsere, petenda est. Prae omnibus tamen disciplinis Ethicam, seu moralem philosophiam, oratori necessariam esse, Aristoteles (c), Tullius (d), & Quintilianus (e) docuere. Quam, quum ab ethnicis diligenter excultam admiramur, dolemus certe a nostris, in his praesertim locis, negligentius tractari. Mutuari autem cum fructu poterit ecclesiastes eam partem, quae de affectibus tractat, ex libro secundo Rhetoricorum Aristotelis: quae vero de praecipuarum virtutum praeceptis agit, ex officiis Ciceronis, Epitheeti enchiridio, & opusculis Plutarchi. Quibus Ambrosii libros de officiis, ob insignem, quam

(a) *De Critica* lib. I. a cap. 23. usque ad 30.

(b) Confer. Natal. Alex. ad saec. XII. cap. 3. art. 8. 9. & Lau- noi. *de varia Arist. fortuna*, &c.

cap. 4. 8.

(c) *Rhetoric. ad Theodect.* lib. II. ubi de affectibus accurate disputat.

(d) *Cic. de Orat.* lib. I. cap. 12.

(e) *Institut.* lib. XII. cap. 2.

quam prae se ubique ferunt, pietatem, christianus homo anteponet. Verum qui tot libris deterreatur, is adire potest Muratorii philosophiam moralem, (quae id unice habet incommodi, quod nempe vulgari Italorum lingua conscripta sit) aut Heineccii Ethicam; cuius & elementa iuris naturae & gentium commendamus.

Pauca nunc de Theologia. Ac primum iuverit, Aloysii Antonii Verneii apparatus secundam partem legere, in qua de sacrae scientiae historia, natura, usu, & clarioribus auctoribus, breviter, perspicue atque eleganter disputatur. Deinde brevem aliquam dogmatum nostrorum notitiam percepisse intererit: quam aut Romanus catechismus, aut Iacobi Benigni Bossuetii expositio doctrinae catholicae in controversiis fidei suppeditabunt. Quibus cognitis, legetur Iohannis Laurentii Berti opus de Theologicis disciplinis. Nihil enim eo videmus melius; etsi non omnibus, immo nec nobis ipsis omnino satisfaciatur. Iam qui Ethica christiana plene erudiri volet, Theologiam dogmaticam moralem Natalis Alexandri; qui iure canonico, Zegeri Bernardi van Espenii ius ecclesiasticum versabit.

Sed ad nullum profecto studium utiliori opera incumbet futurus concionator, quam ad illud sacrarum scripturarum. In quibus plures sensus distinguunt Theologi, litteralem, allegoricum, anagogicum, & moralem (a). Quorum in concionibus usum clarissimi Muratorii verbis docere placuit. „AEquum est, inquit, praedicatorem, qui „prudens sit, cavere, ne divina haec verba, nisi in sensu „litterali, ac per Spiritum sanctum intento, usurpet ... „Certe una est magistrorum Theologiae sententia, ad „substruendam doctrinam Theologicam & moralem, uni- „cum hunc sensum, utpote solidum ac verum, utilem esse „se ... Quamquam in concionibus, ad quas verisimilibus „permittitur accessus, putant & allegoricum & mysticum „posse habere locum ... Nihilo tamen minus absque temeritate dixerim, sensus allegoricos & anagogicos, e scri-
c 4 „ptu-

(a) Vid. Laurentius a Villavincenzio de formandis sacris concionibus lib. III. cap. 1. aliisque Theologi ubi de scriptura disputant.

„ptura elicitos, nec in concionibus quidem valere, ...
 „exceptis, quibus, utpote in scriptura expressis, fidem
 „& auctoritatem Spiritus sanctus facit (a). „ Non sum
 nescius, complures patres, Originem, Hilarium, Basilium,
 Gregorium Nyssenum, Ambrosium, Augustinum, Grego-
 rium Magnum, in mysticis sensibus elaborasse. Verumta-
 men commodius legentur Chrysostomus, Theodoretus,
 Hieronymus, qui, post Diodorum episcopum Tarsensem,
 egregios in sacros libros ad litteram commentarios edide-
 runt. E recentioribus unus pro omnibus valet Augustinus
 Calmetus, cuius commentarios praeftabit legere, si prius ta-
 men, post linguarum, Geographiae, chronologiae, ac ve-
 teris testamenti historiae cognitionem, Sigonius de repu-
 blica Hebraeorum, aut Cl. Fleurius de moribus Israëlita-
 rum, & Bernardi Lamy, alteriusve, apparatus biblicus e-
 volvantur. Laudari etiam video Menochium, Tirinum, a-
 liosque, qui breves in scripturam commentarios scripse-
 runt: quibus, aut dictionario & dissertationibus Calmeti,
 contenti erunt, quotquot multum aut temporis, aut inge-
 nii, aut peculii non habeant.

De historiae autem, &, quae illius faces sunt, Geo-
 graphiae, Chronologiae, Genealogiaeque ad omnes scien-
 tias, nedum Theologiam, necessitate, nemo sanus dubi-
 tat. Est vero historia omnino triplex: sacra, profana, na-
 turalis: quarum unaquaque in varias rursus partes dis-
 pertitur. Longum esset singulas percurrere, aut vel optimos
 dumtaxat auctores (b) designare. Quare, ne praefatio in li-
 brum abeat, de his, aliisque bene multis, quibus adiu-
 vari concionator ad munus suum posset, non amplius dis-
 feremus. Vnum tamen silentio praeterire non possumus,
 numquam scilicet oratorem sacrum extemporalem dicendi
 facultatem, quam maximum studiorum fructum, & veluti
 praemium amplissimum longi laboris putat Fabius (c),
 ade-

(a) Lud. Ant. Muratori in tra-
 ctatu *de eloquentia populari* cap. 9.

(b) Consuli possunt, praeter
 Ger. Ioh. Volsium, *de arte histori-*

ca, qui de studendi methodo, aut
 introductiones in historiam scripse-
 runt.

(c) Quintil. lib. X. cap. 7.

adepturum esse, nisi & diuturnam studiis navarit operam, & PP. scripta legerit, & libros etiam, populari lingua eloquenterque conscriptos, studiose versaverit. Eminent vero inter Hispanos, cum pietate, tum sermonis nitore & elegantia, Granatensis noster, ac Ludovicus Legionensis. Quibus adiungi possunt piissimi, Iohannis Abulensis, Theresiaeque a Iesu, libri; quamvis non sint aut stilo aut eruditione cum superioribus conferendi. Accedat quoque necesse est multa, & numquam intermissa scribendi dicendique exercitatio: atque ita „facilitatem extemporalem a „parvis initiis paullatim perducemus ad summam: quae „neque perfici neque contineri nisi usu potest (a).

Dicendum nunc esset de auctoribus illis, qui aut ecclesiasticam Rhetoricam, aut methodum pro formandis concionibus, aut institutiones oratoris evangelici, aliaque id genus opera lucubrarunt. Et certe constitueramus, omnes, quotquot saltem nobis videre licuit, licuit autem quamplurimos, huiusmodi libros exhibere: sed haec in schedis nostris malumus delitescere, quam longissimo parumque profuturo catalogo molestiam lectoribus afferre. Ut vero ad id, cuius gratia praefati sumus, nostra convertatur oratio, en damus tibi, lector benevole, Ludovici Granatensis Rhetoricam ecclesiasticam, librum, si quis alius, in hac materia praestantissimum. Siquidem artis praecepta ex duobus illis Latinorum Rhetorum coryphaeis, Tullio & Quintiliano, qua ad verbum, qua ad sensum, depromsit auctor: quae vero propria sunt sacri doctoris, ex SS. PP. Augustino potissimum in libris de doctrina christiana. Plurima quoque de suo addidit, nec ea quidem vulgaria, ut erat ille in concionandi arte exercitissimus. Se autem in primis liber hic commendat exemplorum delectu: quae seu ex sacris litteris, seu ex ecclesiae doctoribus, qui ceteris eloquentiae laude praestiterunt, Basilio, Nazianzeno, Chrysostomo, ceteris, &, qui utramque paginam facit, Cypriano, magno cum iudicio desumpta sunt. Vnde non temere dicimus, unam hanc Rhetoricam Aristotelem, Ciceronem, Quin-

(a) Quintil. lib. X. cap. 7.

Quinctilianum, Longinum, Vossium, Muratorium, quos supra (a) commendavimus, supplere posse. Nec immerito post saepius repetitas illius editiones (b), de exemplarium raritate querebamus. Cui sane inopiae nostris demum curis consultum esse gaudemus.

Qua vero ratione hunc librum illustrare studuerimus, paucis indicandum est. Nam, praeter plurima errata quattuor exemplarium (c) auxilio expuncta, quingentas circiter citationes de novo addidimus, alias vero perperam adductas correximus. Innumera deinde scriptorum loca cum optimis editionibus contulimus, suaeque integritati restitimus. Quod ne ipse quidem auctor efficere potuit, illis destitutus. Confecimus etiam indices, quibus carebat opus, locorum sacrae scripturae, auctorum, rerum, & propriorum nominum, quanta maxima fieri potuit accuratione. Neque vero Pampilonensi rerum *notabilium* indice ineptissimo potuimus vel minimum adiuvari. Praefationem denique eo consilio adiecimus, ut apparatus instar illis esset, qui eloquentia sacra instituendi sunt. Quibus si laborem nostrum proficere, atque a bonis viris probari cognoverimus, non erit cur calumniatorum iudicia pertimescamus.

Dabam Valentiae Hedetanorum a. d. III.

Calend. Iulias anni MDCCCLXVIII.

F.

(a) Pag. XXXII.

(b) Nimirum Olisipone A. 1576. 4. Venetiis 1578. 4. Coloniae Agrippinae 1578. 1582. & 1611. 8. Mediolani 1585. 4. Parisiis 1635. 8. Pampilone 1751. 4. Conversa etiam fuit in linguam

Gillicam a Nicolao Iosepho Binctio, & edita Parisiis A. 1698. 8. Sed de his alias fortasse uberius.

(c) Nempe Olisiponense A. 1596. Venetum & Coloniense A. 1578. & Pampilonense A. 1751.

F. LVDOVICI GRANATENSIS
IN LIBRVM ECCLESIASTICAE RHETORICAE
sive de concionandi ratione,

P R A E F A T I O

QVVM per hosce annos decem , candide lector, multis laboribus ac vigiliis concionibus scribendis operam dedissem , iamque divini numinis beneficio opus esset ad calcem fere perductum ; coepi mecum attentius cogitare , quemnam fructum ex hoc tam diuturno & pertinaci labore referre possem, ac illa paene Salomonis verba cum animo meo versare : (a) *cui laboro , & fraudo animam meam bonis?* Quum enim hoc mihi propositum esset , ut opera ac diligentia mea Domini mei gloriam , & animarum salutem his meis concionibus aliqua saltem ratione promoverem ; intellexi tandem , hunc meum laborem parum utilitatis esse allaturum. Cuius rei causam minime silentio praetereundam duxi. Constat enim , tria esse praecipua egregii concionatoris officia : nempe invenire , eloqui , & pronuntiare. Ad inventionem autem pertinet , ut insignes & praeclaras sententias , easque instituto suo accommodatas inveniat : sic enim apte dicet , quae praecipua inventionis virtus est. Ad eloquutionem vero spectat , ut vim omnem eius sententiae , quam invenerit , commode explicet , & animi sui sensus ita verbis efferat , ut , quidquid ipse conceperit , in auditoris animos loquendo transfundat. Ad pronuntiationem vero pertinet , ut vocem , gestum , vultum rebus ipsis , quas dicit , appositissime accommodet.

Et quidem sententiarum insignium inventio , si rerum dignitatem spectes , praestantissima est : cuius studio vel tota optimi concionatoris vita destinanda est. Semper enim inventis aliquid addere curabit , ut, iuxta Servatoris sententiam, (b) proferat de thesauro suo nova & vetera. Eloquutio

12-

(a) *Eccles. 4. 8.* (b) *Matth. 13. 52.*

tamen, & pronuntiatio, si auditorum conditionem inspicias, hoc est, imperitam multitudinem, quae res non pro illarum dignitate, sed pro explicandi atque pronuntiandi ratione concipit, priori loco habenda sunt. Videmus enim, rudes & imperitos auditores, si quid acriter & vehementer dixeris, vehementer etiam commoveri, eundemque affectum, quem verbis, voce, atque vultu praeferas, simili ratione concipere. Contra vero animadvertere licet, multos concionatores eruditione, rerum scientia, & ingenii acumine praestantes, qui tamen, si inculti, barbari, & rudes in eloquendo sint, fastidio auditoribus esse.

Neque vero satis est eloqui, nisi facultas etiam recte pronuntiandi eloquutioni adiuncta sit. Multos enim videmus, & rerum optimarum scientia, & eloquendi ratione insignes, qui, quoniam hac pronuntiandi facultate carent, contemptui habentur: praesertim, si eis vel rauca, vel exilis, vel angusta, vel aspera, vel ingrata vox sit, parumque flexibilis, & perperam rebus, quae dicuntur, accommodata. Itaque attentius mihi harum rerum naturam consideranti apparet, quod quemadmodum philosophi duas materiae formas tribuunt, alteram, quae illi praebet essentiam; alteram, quae existentiam, quam ultimam rei perfectionem esse adstruunt: ita sane apparet, inventionem quidem materiae, eloquutionem vero prioris formae, pronuntiationem autem posterioris loco habendam esse. Constat enim, rudem & indigestam inventionem eloquutione quidem expoliri atque ornari; pronuntiatione vero veluti suam quamdam faciem & vultum induere, quem auditorum mentibus affigit & repraesentat. Quum autem omnibus in rebus potior forma habeatur, quam materia, quae formam recipit; demiror concionatorum multos, quum tantum olei atque operae inventioni, quae instar materiae est, impendant, nullam fere eloquutionis aut pronuntiationis rationem habere: quum sine his formis praeclara etiam inventa facile ab imperita multitudine contemnantur.

Quum igitur, ut ad institutum redeam, meus hic labor,

bor, ut felicissime cederet, quod vix sperare possum, ad solam rerum inventionem pertineat, quae, nisi accedat etiam eloquendi & pronuntiandi ratio, parum utilitatis esset allatura; adieci animum, ut, pro ingenioli mei facultate, de eloquendi quoque & pronuntiandi ratione aliquid scriberem: ne in hac parte, adeo necessaria, concionatorum studiis & utilitati deessem, frustraue tantum in scribendis concionibus laborem insumsissem. Divina igitur ope nixus, aliquid supra vires meas, studio magis iuvandi, quam fiducia ingenii, fretus, aggressus sum. Itaque per oratoriae artis praecepta, quae adolescens attigeram, oculos circumducens, ea, quae ad munus hoc cum primis necessaria esse videbantur, excerpere decrevi. Ut enim orator a dialectico, propter eius artis cognationem, multa sumit; quum finis utriusque sit, fidem dicendo facere: ita multum etiam inter concionandi & orandi munus affinitatis est; quum & concionator, quemadmodum & orator, persuadere studeat, & uterque non in scholis apud eruditos, sed in concione apud populum dicat: qui non solum rationibus evincendus, sed affectibus etiam commovendus, variisque dicendi figuris, & orationis splendore alliciendus est. Ex horum igitur officina non nulla, officio nostro accommodata, delibavi: quae, quantum instituta libelli huius brevitatis patitur, sanctorum patrum exemplis illustranda curavi.

Quia enim Rhetores totum hoc dicendi artificium ad civiles controversias accommodarunt, exempla quoque ad id pertinentia posuerunt, quae parum instituto nostro conveniunt. Equidem voluissem, ut non modo exempla, sed etiam praecepta ipsa ad solam concionandi facultatem pertinerent: neque quidquam in hoc opere esset, quod Gentilium litteras redoleret. Quia tamen tota haec disciplina ex Rhetorum fontibus hausta est, qui eam ad iudiciales causas tractandas excogitarunt; fieri non potuit, quin & dicendi praecepta & exempla, quae ad institutum nostrum minus pertinere videbantur, huic operi admixta fuerint. Quae tamen non prorsus otiosa erunt: quandoquidem

dem facile ex similibus similia intelliguntur. Erit fortasse alius, cui plus otii suppetat: qui, quod nos primum coepimus, ut facile est inventis quaedam adicere, multo plenius atque felicius hoc opus absolvat; & rhetoricam ipsam, ut ita dixerim, ex omni parte christianam nobis efficiat.

Ex sacris autem litteris, ac praecipue ex prophetarum libris, non nulla exempla depromsi. Fuerunt enim prophetae caelestes concionatores, a Deo ad homines erudiendos, & corruptos eorum mores castigandos, destinati: qui tamen sine arte artificiosissime, hoc est, eloquentissime dixerunt; utpote qui non spiritu rhetorico, sed Spiritu sancto, afflati loquuti sunt. Cuius quum (a) perfecta sint opera, eosdem quoque perfectissimo docendi atque dicendi munere donavit. Is enim qui continet omnia, scientiam quoque habet vocis, linguasque infantium disertas facit. Cuius rei quum innumera paene proferre exempla possem, priora quindecim Ieremiae capita pio concionatori spectanda propono. In quibus divinus hic orator tanta vi dicendi fertur, tot figuris orationis, tot affectibus, tot metaphoris, atque aliis id genus tropis redundat, tantaque dicendi acrimonia ardet, totque subinde personas induit, & in tot vultus atque figuras orationem flectit, ut neque Pericles, qui (b) fulgurare & permiscere Graeciam dictus est, cum hoc divino oratore ulla ratione sic comparandus. Cuius spiritum & affectum, divinae gloriae studio flagrantem, utinam concionatores omnes exprimere atque imitari contenderent. Simili quoque orationis imperu pluribus in locis se se Ezechiel propheta effert: praesertim quum Iudaeorum peccata corripit, & quum perfidi & ingrati animi crimen illis impingit: quod mira dicendi copia cap. XVI. facit. Idem argumentum simili magniloquentia, & verborum amplitudine atque affectibus persequitur Moses in sublimi illo cantico, cuius initium est: (c) *audite caeli, quae loquor, audiat terra verba oris mei.*

Quod autem praecepta, quae scribimus, multis interdum

(a) Deuter. 32. 4. (b) Cic. Orat. cap. 9. (c) Deuter. 32. 1.

dum exemplis oneramus, id quidem non temere a nobis factum est. Neque enim pueris, qui Rhetorum cura & magisterio instituuntur, sed concionatoribus scribimus, quibus exempla magistri vice futura sunt: utpote quae praecepta ipsa aptissime declarant. Quum enim haec dicendi facultas, ut Rhetoribus placet, constet arte, imitatione, & exercitatione; exempla quidem imitationis vice sunt, ad quorum normam orationem nostram formare debemus. Nos autem hac etiam re studioso lectori gratificari volentes, ea potissimum exempla delegimus, quae essent gravibus referta sententiis: ut etiamsi artis exempla non essent, digna tamen essent, quae legerentur. In quibus tamen afferendis, quum nihil ex nostro adiecerimus, non nulla tamen, quae minus necessaria videbantur, subtraximus, ne nimia longitudine lectori fastidium pareremus.


Ceterum ut, quem ordinem in hoc opere sequuti sumus, concionator intelligat, animadvertendum est, quinque praecipuas oratoris partes esse; nempe inventionem, dispositionem, eloquutionem, memoriam, & pronuntiationem. Ex his autem partibus memoriam ab arte secernimus, quod ea natura magis, quam arte, constare videatur. Hac vero parte sublata, aliarum rationem tradere instituimus. Quamvis enim hunc laborem, propter eloquutionis & pronuntiationis necessitatem, praecipue susceperimus; tamen de reliquis duabus, nempe inventionem & dispositionem, ea praecepta tradere voluimus, quae non ad civiles controversias, quod Rhetores faciunt, sed ad concionandi munus commodiora videbantur.

Sed prius tamen quam haec ipsa attingamus, de Rhetoricae artis origine, utilitate, & necessitate, deque eius artifice ecclesiaste, hoc est, de eius studiis, moribus, & officii dignitate ante omnia dicendum fuit. Cui quidem argumento primus sane liber deservit: secundus probandi atque argumentandi rationem continet: tertius amplificandi, & affectus concitandi praecepta tradit: quartus varia concionum genera, variosque concionandi modos, partium-

tiumque concionis rationem ordinemque describit : quintus eloquutionem : sextus vero pronuntiandi rationem , & non nulla ad bene dicendum documenta praebet. His igitur sex libris totum hoc dicendi artificium absolvimus.

Quamvis autem in prioribus libris ea , quae ad inventionis rationem , quam primam inter quinque artis huius partes esse diximus , differamus ; tamen quia eloquutio adeo cum inventionem cohaeret & connexa est , ut vix ab ea divelli possit ; multa etiam , quae ad eloquutionis artem pertinebant , illi adiungenda putavimus , ubi hoc ipsum rerum natura atque cognatio exigere videbatur. Haec studiosum concionatorem ante huius operis initium admonenda iudicavimus , ut consilii nostri rationem , quam in eo sequuti sumus , planam illi faceremus.





LIBER PRIMUS ECCLESIASTICAE RHETORICAE, SIVE DE RATIONE CONCIONANDI.

CAP. I. DE RHETORICAE ARTIS origine.



VMMVS ille rerum omnium conditor , & moderator Deus , qui omnia fecit in numero , pondere , & mensura , sic naturam humanam instituit , ut in ea , & disciplinarum omnium , & virtutum semina animis nostris ingeneraret ; quae nos postea partim divina ope , partim industria atque labore nostro adiuti , ex-
 toleremus , & ad suum finem perduceremus. Atque ut religionis , ceterarumque virtutum moralium officia omittamus , quarum in mentibus nostris semina cum ipsa natura orta sunt , quid tam proprium rationali creaturae , quam ratiocinari , ac disputare , & fidem dicendo facere ? Ipsa tamen ratio atque disciplina ratiocinandi atque arguendi artem excogitavit , & varia praecepta invenit , quibus,

A

bus, quod naturae instinctu atque beneficio sine doctore agimus, arte atque doctrina accuratius ageremus. Nec hoc solum in disciplinarum atque virtutum studio, sed in ceteris quoque artibus, quae ad corporis cultum pertinent, locum habet. Initio namque mundi homines, necessitate urgente atque docente, caementariorum, fabrorum, & sarcinatorum officiis fungebantur: postea tamen studio atque diligentia, harum rerum artes inventae sunt, quibus haec ipsa, quae tunc natura sola docente, minus perfecte fiebant, longe perfectius & exactius fierent. Vnde illa ab omnibus recepta sententia manavit, arte perfici & consummari naturam: illa enim initium peperit; haec vero consummationem, & veluti formam rebus addidit, extremamque illis manum apposuit. Quo circa verissima illa Fabii sententia putanda est, (a) qua nihil dicit esse perfectum, nisi ubi natura cura iuветur. Quum igitur persuadere, & fidem contradicentibus & reluctantibus dicendo facere, & in suam sententiam adducere, rudes etiam homines natura docente faciant; ars etiam dicendi a sapientissimis hominibus excogitata est, qua id absolutius & commodius fieri posset. Quum enim hoc rudes & indocti homines imperfecte & indecore faciant; alii autem, peracuto ingenio & doctrina singulari praediti, ornatissime & appositissime, & cum quadam dignitate faciant: utrorumque dicendi rationem primi huius artis inventores diligentissime observarunt, & hac observatione, bene dicendi artem excogitarunt. Nam & qui praeclare a natura ad dicendum instructi sunt, & qui pessime etiam dicunt, non vulgarem huiusmodi observationibus materiam praebent. Ex illis enim virtutes, quas imitari; ex his vero vitia, quae fugere debeamus, auditor minime stupidus colligere poterit. Vnde non ineleganter disertissimus quidam concionator, rudem huius officii tironem, de ratione recte concionandi interrogantem, ad pessimum quemdam concionatorem audientem remisit, & modum, quo ille concionabatur, diligenter adnotare praecepit, nihilque prorsus eorum, quae ille

gef.

(a) *Quintil. instit. orat. lib. 11, cap. 3.*

gessisset , agere consuluit : atque ita demum fieri posse , ut praeclarus dicendi artifex evaderet , si omnia illius vitia studiose caveret. Hac autem ratione primi oratoriae artis scriptores , dicendi peritos & imperitos audiendo , artis praecepta invenerunt. Hoc autem ante Ciceronem , eloquentiae parentem , cumulatissime praestitit Aristoteles. De quo sic idem Cicero ait : (a) veteres quidem scriptores artis , usque a principe illo , atque inventore Tysia repetitos , unum in locum conduxit Aristoteles ; & nominatim cuiusque praecepta , magna conquisita cura , perspicue conscripsit , atque enodata diligenter exposuit ; ac tantum inventoribus ipsis suavitate , & brevitate dicendi praestitit , ut nemo illorum praecepta ex ipsorum libris cognoscat : sed omnes , qui , quod illi praecipiant , velint intelligere , ad hunc , quasi ad quemdam multo commodiorem explicatorem , revertantur. Atque hic quidem ipse , & se se ipsum nobis , & eos , qui ante se fuerant , in medio posuit : ut ceteros , & se ipsum per se cognosceremus. Ab hoc autem qui profecti sunt , quamquam in maximis philosophiae partibus operae plurimum consumserunt , sicut & ipse , cuius instituta sequebantur , fecerat : tamen permulta nobis praecepta dicendi reliquerunt. Atque alii quoque alio ex fonte praeceptores dicendi emanarunt , qui item permultum ad dicendum , si quid ars proficit , opitulati sunt. Haecenus Cicero.

CAP. II.

DE RHETORICAE ARTIS UTILITATE,
& necessitate.

EX his autem , quae diximus , satis liquet , eos , qui ad populum concionantur , plurimum Rhetoricae artis adminiculo iuvare posse. Quum autem aliarum artium studia ad pleniorē sacrae Theologiae intelligentiam necessaria esse credamus ; cur non etiam bene dicendi artem ad concionandi officium feliciter tractandum arripiamus ? Con-

A 2

stat

(a) Cic. de invent. lib. 2.

stat enim, Theologos nostros iam pridem vocasse ancillas ad arcem; hoc est, philosophiam omnem, rationalem, naturalem, ac moralem ad sacrae Theologiae obsequium & stabilimentum attulisse. Gloriatur & nostro saeculo Hieronymus Vidas, poeta clarissimus, quod sordidas gentilium poetarum musas ad Jordanem fluvium adduxerit, easque ab omni spurcitia, quam a gentilium poetis traxerunt, undis Jordanicis expurgasse, & evangelicae historiae, divorumque laudibus celebrandis consecrasset. Quae quum ita sint, cur, quaeso, Rhetoricen, hoc est, bene dicendi artem ab Aristotele scientiarum omnium antistite, ceterisque sapientissimis viris summo consilio excogitatam, multisque posteriorum accessionibus auctam, & locupletatam, non ad concionandi officium accommodabimus? Si enim qui in philosophiae, & Theologiae studiis, atque disputationibus versantur, Dialecticam artem prius sibi comparant, cuius praeceptis instructi, & argumentari, & argumentis respondere, & fidem dicendo facere commodius possint: non minus Rhetorica perdiscenda est, qua populo, quae volumus, suadere possimus, hoc est, non modo ita dicere, ut vera esse, quae dicimus, credat: sed, quod est difficilius, ut quae vera & honesta crediderit, exsequatur. Quo circa si nemo in philosophicis, & Theologicis disputationibus cum laude versari poterit, nisi disputandi arte instructus sit: ita vix quisquam nisi vel divino spiritu afflatus, quod Prophetis, & Apostolis contigit, vel felicissimo ingenio, & ad dicendum appposito natus sit, quod rarissimis contigit, sine huius artis praesidio felix esse in concionando poterit: vel certe multo ornatius, atque commodius munus hoc administrabit, quisquis diligenti huius artis studio fuerit adiutus. Quo circa non immerito multorum concionatorum accusanda negligentia est, qui sine huius artis praesidio ad hoc officium accinguntur. Vehementer enim indignum esse iudico, pulcherrimum hoc munus, maximeque in Ecclesia necessarium, omniumque difficillimum, absque ulla institutione, & dicendi ratione tractari: quum ne artes quidem sedentariae, nisi praevia institutione, atque disciplina exer-

ce-

teri commodè valeant. Quod quidem in causa esse puto, ut inter tam multos concionatores, quibus templa ubique personant, vix unus, aut alter inveniatur, qui apte, copiose, atque ornate dicat: multoque pauciores, qui improbos homines ad veteris vitæ poenitentiam, & virtutis studium dicendo traducant.

Quia vero huius ego rei parum idoneus testis sum, non nulla clarissimorum auctorum exempla in medium proferam, atque in primis gravissimi philosophorum omnium Plutarchi, qui de hac dicendi facultate in politica sic ait: non Rhetoricam suadendi opificem, sed adiutricem esse debemus existimare. Qua ratione illud est corrigendum Menandri: mores dicentis sunt qui persuadent, non oratio. Re enim vera utrumque est, quod rem efficit: mores nimirum, atque oratio: nisi quisquam dicere velit, navem a gubernatore dumtaxat dirigi, non a clavo quoque: & equitem esse, qui equum in giros verset, non etiam frenum: item civitatem quoque oratorum vita, & moribus regi, non & oratione; nempe qua veluti gubernaculis, ac freno utantur, quibus maxime versatile animal homo, ut Plato inquit, tamquam e puppi regatur, atque versetur. Homo certe privatus de veste, atque habitu populari civitatem regere, multitudinis moribus modum facere numquam poterit, nisi oratione, & eloquentiâ præditus sit, qua una suadeat, afficiat, flectat, ducatque multitudinem. Lupum quidem, aiunt, auribus teneri non posse: populum autem inde maxime duci oportet. Hactenus Plutarchus. Hanc autem aptae orationis vim, atque potentiam appositissima similitudine declarat Demetrius Phalereus armis eam, & ferro comparans. Quantum enim in bello valeret ferrum, tantum dicebat in Rep. valere orationem. Illic enim res geritur viribus, hic persuasione. Hinc Pyrrhus Epirotarum rex dicere solebat, plures urbes additas suo imperio oratione Cyneae Oratoris, ac legati, quam suis armis, ut Valerius Max. auctor est.

Sed inter has tamen insignium virorum laudes , adiiciam quid de huius artis utilitate atque praestantia disertissimus Rhetorum Fabius dicat. Primum enim quorundam orationem commemorat , qui hanc artem maledictis incessebant , deinde vero eius defensionem , & insignem utilitatem , & dignitatem exponit his verbis: (a) sequitur quaestio , an utilis Rhetorice : nam quidam vehementer in eam invehi solent , & quod sit indignissimum , in accusationem orationis utuntur orandi viribus : eloquentiam esse , quae poenis eripiat scelestos , cuius fraude damnentur interim boni , consilia ducantur in peius : nec seditiones modo , turbaeque populares , sed bella etiam inexpiabilia excitentur. Quo nomine , & Lacedaemoniorum civitate expulsam fuisse , aiunt , & Athenis quoque , ubi actor movere affectus verabatur , quasi recisam orandi potestatem. Huic igitur calumniae sic Fabius respondet : hoc sane modo , inquit , nec duces erunt utiles , nec magistratus , nec medicina , nec denique ipsa Sapientia : quum in his , qui philosophorum nomine male utuntur , gravissima nonnumquam flagitia deprehensa sint. Cibos adspernemur , attulerunt saepe valetudinis causas : numquam tecta subeamus , super habitantes aliquando procumbunt : non fabricetur militi gladius , potest uti eodem ferro latro. Quis nescit ignes , aquas , sine quibus nulla sit vita , & , ne terrenis immorer , Solem , Lunamque , praecipua siderum , aliquando etiam nocere ? Nonne perterritos militum animos frequenter a metu revocat oratio ? Et tot pugnandi pericula ineuntibus , laudem vita potiore esse persuadet ? Nec vero Lacedaemonii , aut Athenienses me magis moverint , quam populus Romanus , apud quem summa semper oratoribus dignitas fuit. Equidem nec urbium conditores reor aliter effecturos fuisse , ut vaga illa multitudo coiret in populos , nisi docta voce commota : nec legum repertores sine summa vi orandi consequutos , ut se ipsi homines ad
fer-

(a) *Quintil. instit. orat. lib. 2. cap. 17.*

servitutem iuris adstringerent. Quin ipsa vitae praecepta, etiam si natura sunt honesta, plus tamen ad formandas mentes valent, quoties pulchritudinem rerum claritas orationis illuminat. Quare etiam si in utramque partem valent arma facundiae, non tamen est aequum id haberi malum, quo bene uti licet. Verum haec apud eos forsitan quaerantur, qui summam Rhetorices ad persuadendi vim retulerunt. Si vero est bene dicendi scientia, quem nos finem sequimur, ut sit orator in primis vir bonus, utilem certe esse eam confitendum est. Et hercle Deus ille princeps, parens rerum, fabricatorque mundi, nullo magis hominem separavit a ceteris, quae quidem mortalia essent, animalibus, quam dicendi facultate. Nam corpora quidem magnitudine, viribus, firmitate, patientia, velocitate praestantiora in illis mutis videmus; eadem minus egere acquisitae extrinsecus opis. Nam, & ingredi citius, & pasci, & tranare aquas, citra docentem natura ipsa sciunt. Et pleraque contra frigus ex suo corpore vestiuntur, & arma his ingenita quaedam, & ex obvio fere victus, circa quae omnia multus hominibus labor est. Rationem igitur nobis praecipuam dedit, eiusque nos socios esse cum Diis immortalibus voluit. Sed ipsa ratio neque tam nos iuvaret, neque tam esset in nobis manifesta, nisi quae concepissemus mente, promere etiam loquendo possemus: quod magis deesse ceteris animalibus, quam intellectum, & cogitationem quamdam videmus. Nam, & moliri cubilia, & nidos texere, & educare foetus, & excludere; quin etiam reponere in hiemem alimenta, & opera quaedam nobis inimitabilia, qualia sunt cerarum, ac mellis, efficere, nonnullius fortasse rationis est: sed quia carent sermone quae id faciunt, muta, atque irrationabilia vocantur. Denique homines, quibus negata vox est, quantulum adiuvat animus ille coelestis? Quare si nihil a Diis oratione melius accepimus, quid tam dignum esse cultu, ac labore ducaamus, aut in quo malimus praestare hominibus, quam quo ipsi homines ceteris animalibus praestent? Nonne pulchrum vel hoc ipsum est, ex communi intellectu, verbisque,

que, quibus utuntur omnes, tantum assequi laudis, & gloriae, ut non loqui, & orare, sed quod Pericli contingit, fulgurare, ac tonare videaris? Haec Fabius.

Quod si quis haec testimonia, quoniam ethnicorum hominum sunt, parvi facienda putet, in Ecclesiae columnas, & clarissima mundi lumina, nempe sanctissimos Doctores Latinos pariter, & Graecos, oculos coniiciat, videbitque nullam in eorum scriptis eloquentiae partem defuisse. Qua de re Joannes Anglus Episcopus Cicestrensis in Ecclesiasticae historiae praefatione, quam is modo latinam fecit, sic ait: quid de veterum Graecorum scriptis statuemus, qui, & acute ad veritatis disquisitionem, & copiose ad mentes hominum flectendas sacra Dei eloquia explicaverunt? Nemo enim, opinor, est adeo a ratione aversus, qui non illis summam eloquentiam tribuat. Quis enim Chrysostomo, vel verbis disertior, vel crebrior sententiis, vel numeris, & tota orationis circumscriptione iunctior? Aureum flumen Aristotelem olim fuisse dixit Tullius: nos vero Chrysostomum ex aureo ore aureum, & divinum orationis flumen fundere merito dicamus. Cuius verba adeo propria, leniterque fluentia, ut nihil nitidius dulciusve: cuius sententiae adeo sapientes, ut divinitus ad eum delatae, non humana indole inventae videantur: cuius structura verborum sic conclusa, ut non longo anfractu, qui parit obscuritatem, sed ambitu circumscripta terminato incedat. Nihil in eo, quod non praestantius eloquentiae tamquam effigiem repraesentet. Quod si ita aliena lingua loqueretur, ut loquitur sua, quod vel vix, immo ne vix quidem fieri potest, tum ut iam paucis, ita tum plerisque omnibus eius diserta oratio excitaret admirationem. Quis Basilio Magno in polienda oratione exquisitior, in amplificanda uberior, in toto dicendi artificio limatior? Quum deterret a vitiis, nemo commotior: quum ad virtutem incitat, nemo ardentior: quum res ob oculos ponit, nemo, ut ita dicam, pictior. In eo, & nervi sunt ad convincendum, & mira ad leniendum suavitas. In quamcumque partem orationem ita facile torquet, ut in rebus gra-

vio-

vioribus altius in dicendo se tollat , & incitatus feratur , in tenuioribus leniter , & placide fluat , & nonnihil de contentione remittat. Quem sane quidam vir eruditus non veritus est christianum Demosthenem appellare. Quid Gregorium Nazianzenum hoc loco commemorem ? Quis aliquando pungit acutius , quis orationem arctius colligat ? Quem in oratione soluta Thucididis imitatore , in carmine Homeri aemulum rectissime dixeris. Nam in oratione brevis , & compressus est. Verborum numerum , sic Tullius de Thucidide , sententiarum numero consequitur. Non vagum in eo orationis genus , sed constrictum numeris , non longius excurrans , sed brevi circuitu definitum apparet. Carmen plenum , & grande fundit , sententiis Christi locuples , verbis Homeri disertum. Quare sive solum orationis genus , & liberum , sive , ut poetarum mos est , numeris paullo adstrictius sequitur , semper magnus , semper in dicendo excellens videtur. Qua vero is aviditate studiis eloquentiae operam dederit , ipse in oratione funebri super Caesarii fratris obitu explicat , quum illum ait , philosophiae perdiscendae gratia Alexandriam petivisse ; se vero , ut eius verbis utar , oratoriae artis amore inflammatum , in Palaestinae academiis tum florentissimis pedem fixisse. In cuius artis studio tantum profecit , ut Lybanus Sophista clarissimus ea tempestate eius artis professor , a discipulis rogatus , quis illi dignus videretur , qui eius cathedram post mortem susciperet , Gregorius , inquit , ille , nisi christianus esset. Erat enim idolorum cultor Lybanus. Haec de Graecis scriptoribus.

Ex Latinis vero primum Hieronymum proferamus in medium , cuius tanta fuit in scribendo facultas , ut omnes prope eloquentiae numeros expleverit. Quando in aciem cum haereticis prodit , nemo pugnator , aut qui plus habeat lacertorum : quando respondet obrectatoribus , nemo fervidior , nemo acrior : quando res gestas narrat , nemo elegantior : quando funebrem orationem instituit , nemo ad consolandum aptior , ad laudandum copiosior : quando familiariter cum amicis , & necessariis per litteras colloquitur,

tur, nemo suavior, nemo comitior. Mirum est videre, quō pacto in tota oratione, paria paribus, contraria relata contrariis, iam verba duplicata, iam iterata, iam breviter commutata, sententias perpulchre illuminent. Aut igitur pellatur Hieronymus, aut laudetur a Christianis eloquentia: ita tamen ut inde nos non nobis ipsis falsas gloriae umbras, quae de repente evanescunt, aucupati, sed ad Ecclesiae aedificationem, & ad veram Dei gloriam, cui omnis honos, decusque impertiendum est, eam perpetuo retulisse videamur. Haec omnia ex Joanne Anglo. D. autem Hieronymo Beatissimus Martyr Cyprianus merito copulandus est: cuius eloquentiam his verbis Lactantius Firmianus (a) commendat. Unus igitur praecipuus, & clarus exstitit Cyprianus, quoniam & magnam sibi gloriam ex artis oratoriae professione quaesierat, & admodum multa conscripsit in suo genere miranda. Erat enim ingenio facili, copioso, suavi, &, quae sermonis maxima est virtus, aperto: ut discernere nequeas, utrumne ornatior in eloquendo, an faciliior in explicando, an potentior in persuadendo fuerit. Haecenus Lactantius. Eiusdem vero Lactantii eloquentiam D. Hieronym. unice miratur, ipsumque Tullianae eloquentiae flumen appellat. Qui initio statim divinarum institutionum his verbis eloquentiae facultatem commendat. (b) Multum, inquit, nobis exercitatio illa fictarum litium contulit, ut nunc maiori copia, & facultate dicendi causam veritatis peroremus: quae licet possit sine eloquentia defendi, ut est a multis saepe defensa, tamen claritate, ac nitore sermonis illustranda, & quodam modo differenda est: ut potentius in animos influat, & vi sua, & instructa religione, & luce orationis ornata.

§. II.

Sed nequis nos exemplis solum sanctissimorum Patrum, non etiam ipsorum testimoniis eloquentiae causam agere putet, unum Augustinum in medium proferam, qui *III. de*

(a) *Divin. instit. lib. 5.* (b) *Ibid. lib. 1.*

de doctrina Christiana lib. non solum praecepta multa, quae ad hanc artem pertinerent, tradidit, eaque multis exemplis illustravit, sed eam quoque commendat his verbis: quum per artem Rhetoricam, & vera suadeantur, & falsa, quis audeat dicere, adversus mendacium in defensoribus suis inermem debere consistere veritatem: ut videlicet illi, qui res falsas persuadere conantur, noverint auditorem, vel benevolum, vel intentum, vel docilem proe-mio facere, isti autem non noverint? Illi falsa breviter, aperte, verisimiliter: & isti vera sic narrent, ut audire taedeat, intelligere non pateat, credere postremo non libeat? Illi fallacibus argumentis veritatem oppugnent, asserant falsitatem: isti nec vera defendere, nec falsa audeant refutare? Illi animos audientium in errorem moventes, impellentesque dicendo terreat, contristent, exhilarent, exhortentur ardentem: isti pro veritate lenti frigidique dormitent? Quis ita desipiat, ut hoc sapiat? Quum ergo sit in medio posita facultas eloquii, quae ad persuadenda seu prava, seu recta valeat plurimum, cur non bonorum studio comparatur, ut militet veritati, si eam mali, ad obtinendas perversas, vanasque causas, in usus iniquitatis, & erroris usurpant? Sed quaecumque sunt de hac re observationes, atque praecepta, unde fit illa, quae facundia, vel eloquentia nominatur, seposito ad hoc congruo temporis spatio, apta, & convenienti aetate discenda sunt eis, qui hoc celeriter possunt. Nam, & ipsos Romanae eloquentiae principes non piguit dicere, quod hanc artem, nisi quis cito possit, numquam possit omnino perdiscere. Haec August. Cuius tam illustri testimonio non solum novam hanc consilii mei rationem tueri potero, sed gratiam quoque apud huius officii studiosos inire, apud eos praesertim, qui variis occupationibus districti sunt, quod eos duplici molestia liberaverim: altera, evolvendi varia, & perplexa Rhetorum praecepta, quae illi magnis voluminibus tradiderunt: altera, eligendi ea potissimum, quae instituto nostro essent accommodata: quum plurima illi ad civiles controversias in foro, & iudicio tractan-

das

das excogitaverint : quae ad nos minime pertinent;

§. III.

SI quis autem artis observationem impedimento esse dicat , quo minus ex animo , atque impetu divini spiritus concitati dicere videamur ; huic ego respondeo , quod quemadmodum qui latinam linguam ex Grammaticae praeceptis addiscit , quum primum loqui , aut scribere incipit , mentem quidem ad artis leges , & praecepta conii- cit , ne quid contra ea faciat ; ubi vero longo usu , atque exercitatione recte loquendi rationem assequutus est , iam tum non ut ante praecepta consulit , sed sola loquendi consuetudine ductus , ex arte quidem , sed sine arte perfecte , & inoffense loquitur : ita haec oratoriae artis praecepta initio ardorem , atque fervorem spiritus nonnihil refrigera- bunt ; ubi tamen ars dicendi consuetudine in naturam quo- dam modo versa est , egregii artifices sic ex arte dicunt , quasi sola naturae vi instructi dicerent. Habitus enim ille multa exercitatione confirmatus , quem philosophi non mul- tiplicem , sed simplicem qualitatem esse dicunt , sic in na- turam vertitur , ut a natura ipsa inditus , non aliunde adsci- tus esse videatur. An quisquam credat D. Chrysostomo , Ba- silio , eiusque fratri Gregorio Nysseno , & Cypriano , qui omnes , & eloquentissimi fuerunt , & artificiosissime dixe- runt , impedimento artem fuisse , quo minus flagrantissimo studio , atque affectu Dei causam agerent , & homines ab improbitate ad iustitiam revocarent ?

Ceterum ne nihil sit in hac parte , cui oratio nostra non occurrat , illis quoque respondendum est , qui hoc praecipue nomine eloquentiae studia negligunt , quod D. Hieronymum sciant diris plagis vapulasse , quod Ciceronianus esset , non Christianus. Quamvis autem idem D. Hieronymus ad Rufinum scribens , hoc fuisse somnium dicat , me- rito tamen illum vapulasse confitemur , non quod Ciceronianus esset , sed quod ita se Ciceronis studio addixisset , ut sacrarum litterarum studium , quod incultus illi sermo
hor-

horrorem pareret, prorsus negligeret. Quam multa enim sunt in vita necessaria, quorum tamen immodicus usus noxius est? Quid enim magis ad vitam tuendam quam cibus, & potus, & vitalis calor, & sanguis? Nihil tamen horum est, quod ubi modum excessit, non vel perniciem, vel mortem afferat. Sic etiam, & divitias, & honores appetere moderate licet: quorum tamen immodicus amor, quum eo usque hominem perducit, ut divinas leges earum causa violare non vereatur, nocentissimus est. Ad hunc ergo modum sic aliquem Ciceronis lectioni incumbere, ut sacrarum litterarum studia negligat, quis non merito obiurgandum putet? Iure ergo D. Hieronymus hoc nomine vapulavit.

Quod vero nonnulli adversus eloquentiam illud Apostoli afferunt, quod is non in sapientia verbi, hoc est, nequaquam humanae eloquentiae, aut philosophiae disciplinis instructus, annuntiaverit Christum: idem huic accusationi respondet, quum protinus subdit, ne evacuetur crux Christi. Summa enim crucis Christi gloria existit, quod rudium piscatorum opera, atque doctrina, qui nullis terrenae sapientiae disciplinis instructi erant, diaboli aras everterit, Imperatorum potentiam, atque saevitiam fregerit, & mundum imperio suo subiugaverit. Ne igitur haec tanta gloria aliqua ex parte obscuraretur, non debuit utique Christi fides insignium philosophorum, aut clarissimorum oratorum facundia propagari, ne hoc tantum opus magis terrenae sapientiae, quam omnipotentis Dei, & crucis virtuti adscriberetur.

Iam vero quod quidam dicunt, infelices nostri saeculi haereticos solius eloquentiae armis catholicam fidem impugnasse, hoc plane argumentum pro nobis est. Si enim tanta eloquentiae vis est, ut impudentissima mendacia honestare dicendo possit, quanto magis verissima, atque sanctissima catholicae fidei dogmata eadem dicendi vis tueri, & fraudes, atque impietatem haereticorum detegere poterit: quum praesertim illi ea mente sint, ut omnia quae rudi, atque impolita oratione adversus illorum blasphemias

mias scribuntur, exhibilent, rideant, & ne lectione quidem digna putent? Hac enim de causa eloquentiae studia negligere, perinde est, ac si quis ferreis globis sulphureo pulvere iactis uti nos minime debere sentiret, quod his armis Turcarum rex magnam Christiani orbis partem sub imperium, atque ditionem suam subiunxerit. Hac enim de causa multo magis nos eisdem adversus illum armis, quae tantum habeant virium, pugnare debere certum est. Haec de huius artis commendatione praemonenda esse duximus, partim ut quorundam obtrectionibus responderemus, partim etiam ut pius Ecclesiastes maiori se studio, & alacritate huic disciplinae traderet, quae tantum illi opis ad munus suum feliciter exsequendum praebere poterit. Nunc quoniam de artis commendatione satis dictum est; de artifice ipso, nempe Ecclesiaste, de eius studiis, moribus, & officii dignitate, atque facultate pauca prius tradenda sunt, quam ad singularia artis praecepta veniamus.

CAP. III.

DE CONCIONANDI OFFICIO, ET INSIGNI EIUS dignitate.

VT autem Ecclesiastes ex his nostris lucubrationibus, atque adeo ex toto concionandi munere sibi, aliisque salutaris esse queat; visum est ante huius operis initium, documenta quaedam praescribere, quae huius officii candidatis non parum utilitatis allatura sint. Inter ea vero, illud primum, & omnium maximum sit: ut Ecclesiastes ante omnia, huius officii dignitatem, & maiestatem penitus exploratam, atque perspectam habeat. Ea vero primum intelligi poterit ex eorum dignitate, quibus hoc officium a Deo demandatum fuit: qui sanctissimi Prophetae, ac deinde Apostoli Prophetarum filii exstiterunt. Sed multo mirabilius est, quod idem ipse Prophetarum, & Apostolorum Dominus in mundum venire, & per se munus hoc ob-

obire dignatus sit. (a) Multifariam enim , multisque modis olim Deus loquens Patribus in Prophetis , novissime diebus istis loquutus est nobis in filio , quem constituit heredem universorum , per quem fecit & saecula. Hinc ipse de se filius ait : (b) ego in hoc natus sum , & ad hoc veni in mundum , ut testimonium perhibeam veritati. Et apud Isaiam : (c) & erunt , inquit , oculi tui videntes praeceptorem tuum , & aures tuae audient vocem post tergum moventis. Haec est via , ambulate in ea. Et apud Ioëlem : (d) & filii , inquit , Sion , laetamini in Domino Deo vestro , quia dedit vobis doctorem iustitiae. Ex quibus locis , aliisque , quae longum esset recensere , aperte liquet , quanta huius officii dignitas sit ; quando eius ministrum , & principem , ipsum Dei Filium , Verbum , & Sapientiam Patris existisse confitemur. Cui deinde Apostoli successerunt : qui primitias Spiritus accipientes , Ecclesiam doctrina sua fundaverunt. Horum enim est illa vox : (e) pro Christo legatione fungimur , tamquam Deo exhortante per nos.

Nec ministrorum modo dignitas , sed ministerii quoque finis , eius dignitatem aperte declarat. Finis autem est , divinae maiestatis gloria , & pereuntium animarum salus : quas Evangelicus concionator ex teterrimi draconis faucibus ereptas , ad sempiternae felicitatis pascua transmittit : & id perficere studet , quod Christi Domini mors , & sanguis operatus est. Neque hoc ingens beneficium in unum , aut alterum hominem , sed in omnes , ad quos vox eius pervenerit , conferre nititur. Itaque , si ex fine , rei dignitatem , ut par est , metiamur , nihil hoc fine maius , aut sublimius excogitari potest : ut illud etiam adiungam , quod in omnium ore versatur ; nempe , bonum quanto communius , tanto esse divinius. At concionum fructus , & utilitas ad omnes homines quam latissime patet.

Certat autem cum officii dignitate magnitudo meriti. Sic enim spiritualium rerum naturam conditor instituit , ut quae essent dignissima , & honestissima , parem cum digni-

ta-

(a) *Hebraeor. 1.* (b) *Ioan. 18.* (c) *Isai. 30.* (d) *Ioel. 2.*
(e) *2. Corintb. 5.*

tate utilitatem, & meritum haberent, si non in hac vita, certe in altera: quod in hoc officio videre licet, in quo discernere nequeas, maior ne utilitas, an dignitas sit. Quod passim sacrae litterae testantur. Hinc Iacobus Apostolus: (a) qui converti, inquit, fecerit peccatorem ab errore viae suae, salvabit animam eius a morte, & operiet multitudinem peccatorum. Et Dominus in Evangelio: (b) qui fecerit, inquit, & docuerit, hic magnus vocabitur in regno coelorum. Et Daniel Propheta: (c) qui, inquit, docti fuerint, fulgebunt quasi splendor firmamenti: & qui ad iustitiam erudiunt multos, quasi stellae in perpetuas aeternitates. Hac vero de causa, eos Dominus (d) sal terrae, lucem mundi, lucernam super candelabrum, & civitatem supra montem positam appellat. Denique ea est meriti, & dignitatis magnitudo huic ministerio a Domino proposita, ut quemadmodum virginibus, atque martyribus aureola quaedam, ut appellant, in coelis reposita est, quae in illis incorruptae carnis virorem, in his vero invictae virtutis constantiam singulari quadam gloria remunerat, ita doctoribus similis aureola, & corona in coelo parata est: propterea quod non modo ipsi virtutis, & iustitiae propositum tenuerunt; sed alios etiam ad simile virtutis studium doctrinae suae ministerio excitarunt: quae res inter clarissimas praecursoris Domini laudes (e) numeratur: quod videlicet multos filiorum Israël ad Dominum esset doctrina sua pertracturus.

CAP. IV.

DE HVIVS MVNERIS DIFFICVLTATE.

VErum, quum ita natura comparatum sit, ut nihil in rebus sublime, atque magnificum sit, quod non etiam sit arduum, atque difficile: tantum certe in hoc munere, si utiliter, & recte tractari debeat, difficultatis, quantum

(a) *Iacob. 5.* (b) *Matth. 5.* (c) *Daniel. 12.* (d) *Matth. 5.*
(e) *Luc. 1.*

tum dignitatis, & utilitatis est. Quum enim praecipuum concionatoris officium sit non modo pios doctrinae pabulo sustentare, sed improbos etiam a sceleribus, & improbitate revocare; & non modo currentibus calcar addere, sed ad cursum iacentes, atque dormientes incitare; atque postremo non modo viventes in vita gratiae doctrinae ministerio conservare, sed mortuos etiam in peccato, eodem ministerio ad novam vitam traducere; quid hoc studio, & conatu difficilius? Pugnat enim adversus hoc collapsae naturae vis, & potentia, quae communis peccati tabe infecta, proclivis in vitia est. Pugnat depravata, ne dicam inveterata, multorum consuetudo, cuius tanta vis est, ut Seneca dicat: (a) ne universa quidem philosophia, etiam si in hoc omnes vires suas advocet, duram iam, & veterem ab animo extrahet pestem. Quid hic mundum in maligno positum commemorem? Quid sceleratorum hominum, inter quos necessario vivendum est, contubernia, exempla, consilia, iniurias, contumelias, fraudes, & subdolas adulationes referam? Quid antiqui serpentis vires, astus, insidias, variasque nocendi artes, atque tentationes oratione recenseam? An non satis constat verum esse, quod in lib. Iob scriptum est: (b) obstetricante manu eius, nempe Dei, eductus est coluber tortuosus? Quae enim alia nisi omnipotentis Dei manus, ad tortuosum hunc colubrum, qui caudae suae voluminibus improborum animas stringit, foris protrudendum, sufficiens esse valeat? Dum enim fortis armatus (c) custodit atrium suum, nisi fortior illo superveniat, qui arma eius auferat, & spolia distribuat, dictum mirum est, quanta pace atrium suum custodiat, & victos suos retineat. Ita enim omnes sensus, atque aditus, per quos lumen aliquod illis affulgere possit, claudit, & obstruit, ut mirabili quadam, & abstrusa ratione videntes non videant, & audientes non audiant, nec intelligant.

Neque vero exiguo nobis impedimento est utriusque fortunae sive adversae, sive secundae conditio. Dum enim illa vehementer premit, nihil audiunt homines, nisi quod

B

il-

(a) Seneca in *Epist.* (b) *Iob* 26. (c) *Luc.* 11.

illorum inopiam , & laborem levare possit : quod filiis Israël in Ægypto oppressis evenit , qui Moſis verba ex ore Domini , propter operum , quibus premebantur , angustiam audire noluerunt. Vbi vero secundae fortunae aura spirare , & ad votum omnia fluere incipiunt ; sic humani cordis angustia successibus impletur & intumescit , ut ad omnia fere alia obsurdescat. Quam rem D. August. & experimento didicit , & his verbis exposuit : ego quum amatores saeculi huius intueor , nescio quando possit esse ad eorum animos sanandos opportuna praedicatio : quando enim res huius mundi , velut prosperas habent , fastu suo respuunt salubres monitiones , & quasi anilem reputant cantilenam ; quando autem adversis anguntur , magis conantur evadere , unde ad praesens anguntur , quam capere , unde curentur. Sed ut multa brevi oratione complectar , tam ingens & arduum opus est , hominem a peccati servitute ad Dei obsequium revocare , ut D. Gregor. dicat : si invisibilia pensamus , nimirum constat , quia maius est miraculum , praedicationis , & orationis solatio peccatorem convertere , quam mortuum carne suscitare. His igitur argumentis intelligere Ecclesiastes facile poterit , quam ingens provincia sibi demandata , quantumque onus humeris eius impositum sit , quantoque studio contendere debeat , non modo , ut parem huic difficultati animum , studiumque adhibeat ; sed ut multo magis , qua se erga Deum pietate , reverentia , animique summissione gerere debeat , ut divina bonitas , & providentia , quae fere inferiorum causarum ministerio cuncta operatur , eo , tamquam idoneo instrumento , ad hoc tantum opus uti velit. Hinc etiam intelliget , si non suam , sed Domini sui gloriam , & animarum salutem quaerit , quanto magis negotium hoc orationibus , quam sermonibus ; lacrimis , quam litteris ; lamentis , quam verbis ; & virtutum exemplis , quam Rhetorum praeceptis urgere debeat.

CAP.

CAP. V.

*DE PURITATE , ET RECTITUDINE
intentionis in Ecclesiaste.*

ALia quoque non minor fortasse in hoc opere difficultas est , quae non minus coelesti ope indiget ; nempe intentionis puritas , & rectitudo , quam Ecclesiastes in huius muneris functione retinere debet : hoc est , ut sui, suorumque commodorum , atque honoris oblitus , in solam Domini sui gloriam , & animarum salutem tota mente defixus sit , illam solam intueatur , illam capter , illam cogitet , illam semper ob oculos habeat ; nec umquam ab illa ad se mentem convertat. Indignissimum enim est , quum de summi conditoris gloria , & sempiterna animarum sive vita , sive morte agitur , ut homo tantarum rerum momenta negligens , solam gloriolae suae rationem habeat , magisque hanc inanem rumusculi popularis auram periclitari , si minus auditoribus grata sit eius oratio , quam Dei gloriam , & animarum salutem sentiat. Quis vero adeo sui amans , & Dei negligens erit , quem huius tantae perversitatis , & divini contemptus non pudeat , si forte hanc affectuum suorum pravitatem in pectore suo animadvertit ? Armenia clarissima femina , ut Franciscus Senens. memorat ; quum a Cyri convivio domum rediens , Cyri pulchritudinem cunctis laudantibus , interrogata a viro fuisset , quid de Cyri dignitate sentiret , respondit : a te , mi vir , oculos numquam deflexi : itaque qualis alieni viri forma sit , prorsus ignoro. Si igitur femina haec nefas esse putabat , in alium quamvis regem , forma praestantem , oculos conicere ; quanto detestabilius erit , quum de Dei gloria , & summa hominum felicitate agitur , hac prorsus neglecta , de sola gloriola sua , quae umbra citius evanescit , sollicitum esse ? Quum Heliseus Propheta (a) puero suo , quem cum baculo ad mortuum puerum mittebat , praecepisset , ut accinctis lumbis , quanta posset celeritate accurreret , nec

(a) 4. Reg. 4.

illi resalutandi , aut respondendi occurrentibus , & salutantibus facultatem tribuisset : quid aliud , quaeso , innuere voluit , quam eos , quibus haec a Domino cura demandata est , ut mortuas in peccato animas , divinae severitatis , & iudicii baculo ante oculos posito , ad iustitiae vitam revocent , adeo in hoc tam praeclarum , & ingens munus intentos esse debere , ut omnium aliarum rerum , vel necessariarum obliti , hoc unum agant , hoc unum cogitent , in hoc unum dies , noctesque intenti sint , nec ullius terrenae rei commercio ab hoc studio avocentur : quo videlicet muneris amplitudini , par quoque ministri cura , & diligentia respondeat. Si enim pater aliquis , enitenti filiae , & ob difficultatem partus periclitanti , ad medicum accersendum properaret ; num is hoc tempore populares ludos , aut similia ludicra spectare , aut ad ea animum advertere posset ? Quum igitur officii nostri sit , non periclitantia hominum corpora , sed animas , pretioso Christi sanguine redemptas , ab ipsis aeternae mortis faucibus eripere , & immortali vitae reddere : quid esse magis praeposterum , atque detestandum potest , quam hoc tanto munere fungentem ad inanissimae gloriae suae fumum oculos convertere ?

Ceterum , quamvis hoc adeo damnabile sit , ut vix ullis verbis tantae rei indignitas amplificari possit ; difficillimum tamen est , in hanc foveam non incidere. Haec enim intentionis puritas , quam ab Ecclesiaste requirimus , potentissimum intra praecordia nostra hostem sibi adversantem , videlicet honoris , & propriae excellentiae appetitum habet : qui in plerisque hominibus adeo vehemens est , ut insitus a natura vitae amor , & carnalis commercii cupiditas , quam Theologi inter ceteros corruptae naturae affectus dominari dicunt , ac ceterae deinde cupiditates huic honoris , & gloriae appetitioni cedant. Quam multos enim quotidie cernimus , vitam , qua nihil in rebus humanis homini carius est , in summum discrimen adducere ; immo , & mortem oppetere , ne ullam honoris iacturam patiantur ? Quam multos , qui illibatum carnis pudorem ,
non

nōn tam divini timoris , quam humani dedecoris metu conservant ? Nec vero multis , ad huius affectus vim , atque tyrannidem explicandam opus est. Res gestas omnium temporum homo sibi ante oculos ponat , omnes orbis terrarum vastationes consideret : & quae bella Alexander Magnus, Iulius Caesar , ceterique Romanorum , aliarumque nationum reges , & imperatores susceperint , & quotidianas item hominum pugnas inspiciat : facileque deprehendet , omnes fere has flammās ab huius cupiditatis igne excitaras.

Quod si parum externis testimoniis credit , se ipsum introspiciat , affectus suos scrutetur , & quantam vim hic morbus habeat , facile deprehendet. Haec autem generis humani tabes intentionis puritatem , quam ad hoc munus integre obeundum requiri diximus , magnopere inficit. Hic enim affectus tanto est vehementior , quanto est honor , & gloria maior , & ad plures permanat. At eximii concionatoris gloria , non modo eius civitatis , in qua degit , finibus continetur , sed ad exterās etiam nationes , & regna pervadit. Sic audimus , Romae , aut Mediolani esse concionatorem quemdam praestantissimum , qui plurimum dicendi facultate ceteros antecellat. Neque vero haec corporis virium , & fortitudinis fama est , qua a multis etiam brutis longe superamur : nec divitiarum , & formae gloria , quae fluxa , & fragilis est : sed ingenii , dexteritatis , eloquentiae , liberalis eruditionis , atque adeo probitatis , quae in egregii concionatoris oratione elucere debet. Quae quidem gloria quanto dignior , atque praestantior , tanto cupiditas nostra gloriae avida ardentius in eam rapitur , & concitatur. Quid vero de metu ignominiae dicam , qui initio dicendi , ita quorundam mentes obsidet , ut corporis etiam membra solvantur , & tremant genua dicturis , nec ulla ratione hunc a se metum excutere possint ? Vnde autem hic adeo impotens affectus , nisi ex ignominiae metu , & periculo , qui tunc dicturis impendit , proficiscitur ? Vnde vero ingens hic metus ignominiae , nisi ex immodica gloriae cupiditate nascitur ? His igitur duobus affectibus occupata , & oppleta mens , quem in animo locum relin-

B 3

quet,



quet, ut in unam Dei gloriam, & animarum salutem, omni mente & studio, spretis omnibus aliis, defixus sit? Liquet igitur ex his, quam non sit facile, hanc intentionis puritatem in hoc munere obeundo retinere, nisi illam concionator a Deo multis lacrimis, multaque vi precum, & virtutum meritis tamquam rarum aliquod, & singulare eius donum impetrare contendat. Et ne si hoc quidem studiose, ac diligenter fecerit, ab huius labis periculo se prorsus immunem credat: semper enim in hac parte suspectus sibi esse debet. Vt enim sapienter D. Gregor. ait: (a) saepe mens sibi mentitur, & fingit de bono opere amare, quod non amat; de mundi autem gloria non amare, quod amat. Huius autem intentionis periculum idem vir sanctus illa beati Iob verba explanans, (b) si simplex fuero, hoc ipsum ignorabit anima mea, exponit his verbis: sed sunt nonnulla, quae sciri a nobis facile nequeunt, etiam quum geruntur.

Saepe officium praedicationis assumimus, ut per hoc fraternae utilitati serviamus: sed nisi placeamus illi, cui loquimur, nequaquam libenter accipitur, quod praedicamus. Quumque placere mens utiliter studet, ad amorem laudis propriae defluit turpiter: & quae a captivitate vitiorum alios curabat eruere, ipsa suis favoribus incipit captiva servire. Quasi latrunculus quippe est appetitus laudis humanae, qui recto itinere gradientibus ex latere iungitur, ut ex occultis, educto gladio, gradientium vita trucidetur: quumque propositae utilitatis intentio ad studia privata deducitur; horrendo modo unum, idemque opus culpa peragit, quod virtus inchoavit. Saepe & ab ipsis exordiis aliud cogitatio expetit, aliud actio ostendit. Haetenus Gregorius. Hoc autem periculum concionatores multi, ac praesertim iuniores adeo non cavent, ut nec etiam agnoscant. Sicut enim in quibusdam regionibus deformis ebrietatis vitium, nec vitium aut dedecus esse putatur, propterea quod prava hominum consuetudo huic vitio horrorem detraxerit: ita multis concionatorum adeo familiaria-

(a) *Gregor. in Pastor.* (b) *Iob 9.*

liaris, & innata haec vanitas est, ut vix eam advertant, & nec inter peccata quidem numerent. At qui divino timore acti, se ipsos, & interiora sua omnia diligenti examine scrutantur, seque ex omni parte circumspiciunt, vehementer sibi ab hoc periculo timent. Fuit olim mihi arctissima familiaritate coniunctus concionator quidam, vir pius, qui, ut ipse narravit, quum primum concionandi munus aggressus est, parum vanitatis huius periculum aliorum more praevidebat. At ubi processu temporis oculos magis aperuit, & ea, quae ante diximus, cum animo suo reputavit, adeo perterrefactus fuit, ut concionandi munus omnino relinquere destinaverit, & multo etiam tempore ab eo munere destiterit. Vbi vero ad illud, parendi necessitate coactus rediit, multis se rationibus, multisque precibus adversus communem hunc concionatorum hostem munire studiosissime curabat. Haec a me paucis dicta sunt, quae multis plane dici debuerunt; ut occultissimi huius periculi, rei que omnium maxime ad hoc munus exsequendum necessariae, divini verbi ministros admonerem. Quum enim in iis, quae ad finem aliquem ordinantur, ratio omnis ex fine petenda sit, efficitur plane, ut fine perperam constituto, omnia ordine, ratione, & merito etiam destituantur.

CAP. VI.

DE PROBITATE, ET MORIBVS
concionatoris.

IAm nunc quid ex iis, quae dicta sunt, sequatur, expendere incipiamus. Primum, si ea officii dignitas, & maiestas est, ut ipsum Dei filium principem, & auctorem habeat, pro eoque Ecclesiastes legatione fungatur in terris: qualis eius puritas, & integritas futura est, qui huic tanto muneri destinatur? Neque enim natura rerum patitur, ut in tantae dignitatis splendore vita sordeat: sed illud exigit, ut cum ministerii dignitate, vitae puritas, & integritas ceteret. Hinc quum Dominus Ieremiam Prophetam,

ad depravatos populi sui mores castigandos mitteret, in matris etiam utero delitescens, nec dum in lucem editum Spiritu sancto replevit. Isaïae vero labia, (a) Cherubini ad ipsum volantis ministerio, coelestique igne, ex altari Dei sumto, ab omni pollutionis, & peccati labe purgavit: quo idoneus minister esset, per quem puritatis auctor scelerati, & rebellis populi crimina obiurgaret. Quid Apostolos memorem, quos tanta Spiritus sancti gratia in die Pentecostes (b) Dominus replevit, ut idoneos Evangelicae doctrinae magistros efficeret? Quid Paullum referam, quem non modo eodem spiritu replevit, sed (c) in tertium usque coelum sustulit; ut inter Angelos disceret, quod inter homines doceret? Sed haec omnia exempla illud mihi superare videtur, quod ipse Dei filius non ante munus hoc docendi suscepit, quam se ad illud, quadraginta dierum ieiuniis, orationibus, & solitudinis secessu praepararet: non quod is hac praeparatione indigeret, qui puritatis, & sapientiae fons erat; sed ut hoc exemplo Ecclesiae Doctores discerent, qua vitae puritate, & innocentia ad hoc coeleste munus obeundum accedere deberent. Intelligebat enim summus ille magister, quanto essent ad fidem faciendam, & vitam hominum instituendam efficaciora praeclara virtutum exempla, quam exulta, & perpolita verba. Vnde, quum idem concionatores lucernam supra candelabrum positam appellasset, (d) ut praelucerent omnibus, qui in Ecclesiae domo essent, subdit continuo: sic luceat lux vestra coram hominibus, ut videant opera vestra bona, & glorificent Patrem vestrum, qui in coelis est.

Quibus verbis non obscure indicavit, quanto magis egregia virtutum opera, quam selecta, & limata verba gloriam Domini illustrarent: quod illud quoque Isaïae vaticinium declarat: (e) & vocabuntur in ea fortes iustitiae, plantatio Domini ad glorificandum. Quid enim magis divinae gloriae splendorem, quam probitatis, & iustitiae pulchri-

(a) *Isai.* 6. (b) *Actor.* 2. (c) *2. Corinth.* 12. (d) *Matth.* 5.
(e) *Isai.* 61.

virtutis, atque constantia, quae divinae bonitatis imaginem refert, declarare potest? Denique si Ecclesiae annales, & incrementa ad memoriam revocemus, falice inveniemus longe magis Ecclesiam Sanctorum exemplis, quam disertorum hominum verbis auctam, & locupletatam fuisse. Quam multorum monachorum, coelestem in terris vitam meditantium, pater exstitit illiteratus Antonius? De quo illa D. August. verba iactantur: (a) surgunt indocti, & rapiunt nobis paradisum, & nos cum doctrinis nostris in carne, & sanguine volutamur. Quid illiteratum etiam Franciscum referam, qui tot virtutum plantaria in Ecclesiae paradiso, sanctitatis exemplis magis, quam disertis verbis consevit? Quid Simeon ille cognomento stilites litterarum omnium rudis, cuius vitam coetaneus, & familiaris eius amicus Theodoretus conscripsit: quam multas nationes in columna illa manens, admirandae vitae suae exemplis ab idolorum cultu, ad fidem Christi revocavit? Vicina quoque nostro saeculo D. Catherina Senensis, & femina, & litterarum ignara, tam multos homines a scelerata vita ad iustitiam, & pietatem convertit, ut quattuor confessarii, qui illi, annuente Gregor. XI. Pont. Max. iugiter assiscebant, vix tempus ad quietem haberent; dum eorum confessiones audiunt, quos illa splendore magis vitae, quam doctrinae, ad virtutis, & iustitiae studium traducebat. Haec a me breviter dicta sunt, non quo doctrinae munus aliqua ratione extenuarem, sed quo vitae splendorem, & dignitatem pio concionatori plurimum commendarem.

Quam rem brevi oratione Seneca complexus est, quum ad Lucilium scribens ait: eum elige doctorem, quem magis admireris quum videris, quam quum audieris. Hinc Lactantius Firmianus. (b) Qui dat, inquit, praecepta vivendi, debet amputare omnium excusationum vias: ut imponat hominibus parendi necessitatem, non vi aliqua, sed pudore. Quo modo vero amputari poterit excusatio, nisi ut qui docet, faciat, quae docet, & sit quasi prae-

vius,

(a) August. lib. 8. Confess. (b) Lactantius in 4. diu. inf. lib.

vius , & manum porrigat sequuturo. Nam habere non possunt , quae doceas , firmitatem , nisi ea prior feceris : quia natura hominum proclivis in vitia , videri vult , non modo cum venia , sed cum ratione peccare. Haecenus ille. Hoc autem , ut ceteros eius officii consortes praeteream , ita praestabat Paullus , ut se ipsum in imitationis exemplum , fidelibus , quibus verbum vitae tradebat , non semel proponeret. Alibi enim ait : (a) imitatores mei estote , fratres , sicut & ego Christi : & alibi : (b) capite nos : neminem laesimus , neminem corrupimus , neminem circumvenimus. Et ad Philipp. rursum : (c) de cetero , inquit , fratres , quaecumque sunt vera , quaecumque pudica , quaecumque iusta , quaecumque sancta , quaecumque amabilia , quaecumque bonae famae , haec cogitate , quae & didicistis , & accepistis , & audistis , & vidistis in me. Non ergo solis auribus , quae utiliter audirent , sed oculis etiam admirantes viderent , atque imitarentur , bonus magister exempla proponebat.

Ceterum de his , qui alia via gradiuntur , qui videlicet aliter vivunt , quam vivendum esse praecipiunt , sic D. Gregor. ait : (d) sunt nonnulli , qui solerti cura spiritualia praecepta perscrutantur : sed quae intelligendo penetrant , vivendo conculcant. Repente docent , quae non opere , sed meditatione didicerunt : & quod verbis praedicant , moribus impugnant. Vnde idem vir sanctus concionatores graviter admonet his verbis : mundari prius oportet , & sic alios mundare : sapientem prius fieri , & sic alios facere sapientes : lumen fieri , & sic alios illuminare : ad Deum accedere , & sic alios ad Deum adducere : sanctificari , & ita sanctificare : manus habere rectas , & sic aliis porrigere manum. Quia vero hoc sanctissimi viri praeceptum multi negligunt , merito D. Bernard. queritur , (e) canales nos hodie in Ecclesia habere plurimos , conchas vero perpaucae. Tanta enim caritatis esse , ait , eos , per quos ad populum divinatorum eloquiorum fluentia manant , ut prius ef-

fun-

(a) 1. Corinb. 4. (b) 2. Corinb. 7. (c) Philipp. 4. (d) Gregor. in Pass. (e) Bernard. sup. Cant.

fundere, quam infundi velint: quum tamen longe alia ratione hoc fieri debere, vel ille Davidis versiculus moneat: eructavit cor meum verbum bonum. Quid enim aliud est eructare, nisi animum divinatorum eloquiorum epulis saginatum, de plenitudine cordis verbum bonum pronuntiare? Eosdem etiam Seneca gravissime notavit his verbis: (a) nullus quidem peius mereri de omnibus mortalibus iudico, quam qui philosophiam, velut aliquod artificium venale didicerunt: qui aliter vivunt, quam vivendum esse praecipunt. Exempla enim se ipsos inutilis disciplinae circumferunt: nulli non vitio, quod insequuntur, obnoxii. Non magis mihi potest quisquam talis prodesse praeceptor, quam gubernator in tempestate nauseabundus. Tenendum est rapiente fluctu gubernaculum: luctandum cum ipso mari: eripienda sunt vento vela. Quid mihi potest adjuvare rector navigii attonitus, & vomitans? Quanto maiori putas vitam tempestate iactari, quam ullam ratem? Non est loquendum, sed gubernandum. Haecenus ille.

Sed quid tam multis argumentis ad hoc probandum in re tam aperta opus est, quum ipsi etiam rhetores oratorem definiant, esse virum bonum, dicendi peritum? Si ergo orator, qui de stillicidiis arcendis, deque depositis reddendis, ut fidem apud iudices faciat, vir bonus esse debet, priusque illi vitae probitas, quam artis peritia tribuitur: quid de concionatore dicendum, cuius tota cura, & officium est, homines ad virtutis, & probitatis studium non modo loquendo, sed etiam recte vivendo traducere? Rectissime enim dictum est: (b) ab immundo quis mundabitur? Ex quibus omnibus intelligere facile possumus, quid sit in causa, cur quum hoc nostro saeculo omnia fere templa quotidianis concionatorum vocibus, & clamoribus resonent, tam paucos homines videamus, qui eorum clamoribus perterrefacti, pravos mores, & inveteratam peccandi consuetudinem deserant. Quum enim verbum Dei ignis sit, & quasi malleus conterens petras, quid in causa est, ut

(a) *Seneca Epist.* 109. (b) *Eccli.* 34.

ut nec hic coelestis ignis algentia hominum pectora incendat, nec hic malleus ferrea corda molliat: nisi quod maxima concionatorum turba negotium hoc, magis verbis, quam exemplis, magis litteris, quam lamentis, magis eloquentiae studiis, quam piis precibus urgeat: maioremque popularis plausus captandi, quam vitia eliminandi; ac postremo maiorem nominis sui celebrandi, quam divinae gloriae, & salutis humanae procurandae curam habeat? Hoc autem quid aliud est, quam talentum in terra recondere: quando hi commissi muneris ministerium non ad Dei gloriam, & hominum salutem, sed ad terrena commoda referunt: ut videlicet liberius, & indulgentius vivant, ut amplioris dignitatis locum obtineant, ut popularem famam aucupentur, & pinguiora Ecclesiae stipendia percipiant? Haec dum omni studio captamus, Dei gloriam, & animarum salutem, vel negligimus, vel in postremis habemus. Quo modo autem se dominus adversus huiusmodi operarios gerere debeat, satis aperte vates sanctus indicavit, quum ait: (a) peccatori autem dixit Deus: quare tu enarras iustitias meas, & assumis testamentum meum per os tuum? &c. quae sequuntur. Quicumque vero tales sunt, ad eorum sortem pertinent, de quibus Salvator in Evangelio ait: (b) dicunt enim, & non faciunt: alligant onera gravia, & importabilia: digito autem suo nolunt ea movere.

CAP. VII.

DE STUDIO CARITATIS IN ECCLESIASTE.

Verum, quum haec vitae probitas, & virtutum studium non ad concionatores modo, sed ad omnes in universum pertineat, caritatis tamen virtus, a qua concionandi munus proficiscitur, in Ecclesiae maxime emere debet. Ex ea namque oritur flagrantissimus divinae gloriae amor, ardentissimumque salutis humanae desiderium, quod huius officii caput, & fundamentum est. Sic enim
huic

(a) *Psalms*. 49. (b) *Matth.* 23.

huic muneri destinatus, Dei gloriam, & animarum salutem fitire debet, ut nullus avarus divitias, nullus ambitiosus honores, nullus denique imperator de hostibus triumphum, atque victoriam tanta aviditate desideret, quanta is animarum salutem deperire, & earum interitum lamentari debet. Hoc enim flagrantissimum desiderium, quod a caritatis radice proficiscitur, adeo Evangelici concionatoris proprium, adeoque illi ad munus suum utiliter obeundum necessarium est, ut qui hoc ardore, ac desiderio destitutus sit, meo iudicio, officium hoc attingere minime debeat. Hoc desiderio sancta illa mulier in Apocalyp. flagrabat, (a) quae cruciabatur ut pareret: propterea quod tanto desiderio pariendi filios sponso suo tenebatur, ut nullus corporis cruciatus, nulla tyrannorum supplicia formidaret, dum modo spiritualem hanc sobolem coelesti sponso generaret. Cuius ardentissimum desiderium Rachel olim adumbravit, quae tanto filiorum amore flagrabat, ut ad virum suum diceret: (b) da mihi liberos, alioquin moriar.

Iam vero David rex, quo animarum ardore aestuabat, qui tam acri doloris sensu earum interitum, & ruinam deflebat? Vidi, inquit, (c) praevaricantes, & tabescebam; quia eloquia tua non custodierunt. Et (d) zelus domus tuae comedit me, & opprobria exprobandium tibi ceciderunt super me. Quibus verbis significat, non minus se divinae gloriae conviciis torqueri, quam si his omnibus probris, & maledictis incesceretur. Apostolus vero quam multis in locis hoc animi sui studium, desiderium, zelum, & caritatem ostendit? Quis, inquit, (e) infirmatur, & ego non infirmor? Quis scandalizatur, & ego non uror? Et ad Galatas: (f) filioli, inquit, mei, quos iterum parturio, donec formetur Christus in vobis. Hoc est, quos iterum magno perditionis vestrae dolore faucius, magnoque studio, atque conatu iterum eniti, & Christo reddere paro. Ex hoc autem interno igne faces illae verborum prodierunt:

(a) Apoc. 12. (b) Genes. 30. (c) Psalm. 118. (d) Psalm. 68.
(e) 2. Corintb. 11. (f) Galat. 4.

runt : (a) vellem esse apud vos modo , & commutare vocem meam , id est , in omnes me dicendi figuras transformare , quoniam confundor in vobis. Hoc est , quoniam inops consilii , & plenus maeroris , atque angustiae sum , nec quo me vertam , aut quid consilii capiam , scio. Ad Corinth. vero , (b) quo dolore , quibus lacrimis se priorem epistolam scripsisse profitetur , quod eos ab Evangelica simplicitate descivisse intelligeret ? Quid vero illa eiusdem verba : (c) omnia sustineo propter electos , ut & ipsi salutem consequantur ? Et (d) omnibus omnia factus sum , ut omnes facerem salvos ? Et ad Thess. scribens : (e) volebamus , inquit , vobis tradere non solum Evangelium , sed etiam animas nostras , quoniam carissimi nobis facti estis.

Neque vero illud mihi quisquam obiiciat , hanc mentem Apostolorum tantum fuisse , qui Spiritus plenitudinem acceperunt : nos vero in hac mundi faece non eam coelestium donorum ubertatem percepisse , ut simili ardore flagrare possimus. Sit ita sane. Sed simili tamen studio , & desiderio prophetarum pectora ante gratiam quoque Evangelii aestuabant , quod eorum lacrimae , quas propter hominum peccata fundebant , eorumque cruciatus , & mortes , quas propter obiurgandi severitatem , & acrimoniam pertulerunt , facile declarant. Sequentibus vero saeculis , quam multi ex sanctis patribus , & doctoribus hoc eodem desiderio arserunt ? De beato patre nostro Dominico inter eximias eius laudes haec etiam praedicatur ; quod arderet quasi facula zelo pereuntium. Quo ardore incensus , novum in Ecclesia Praedicatorum ordinem , Spiritu sancto instigante , primus excogitavit , erexit , ac fundavit. Tanto autem erga homines caritatis igne , tantoque pereuntium animarum dolore torquebatur , ut nulli incommodo , nullique labori parceret , quo minus die , noctuque opportune , atque importune saluti earum invigilaret ; adeo , ut aliquando integram quadragesimam solo pane , & aqua vitaret , noctibusque fessa diurno labore membra supernu-

(a) Galat. 4. (b) 2. Cor. 2. (c) 2. Timoth. 2. (d) 1. Cor. 9. (e) 1. Thess. 2.

nudam tabulam reclinarer : quo feminas , apud quas hospitabatur , haereticorum dolis seductas , ad fidei sinceritatem hoc exemplo revocaret : quod & obtinuit.

Haec igitur mens , hic affectus , hoc flagrantissimum divinae gloriae , & humanae salutis desiderium praecipuus huius officii magister est. Neque tantum universae rhetorum scholae , atque praecepta , quam hic unus ardor concionantem iuvare in dicendo poterit. Hic enim unus affectus , qui velut mens , & anima quaedam huius artificii est , dicenti paene omnia praestat. Hic enim docet ea negligere , quae aures magis tinnitu verborum , & acumine sententiarum oblectant , quam mentes erudiant , atque sanent. Hic omnes persuadendi rationes excogitare , & omnes dicendi machinas auditorum mentibus admove facit , ut eas ad timorem Domini , & sceleratae vitae odium traducere possit. Hic etiam , ubicumque illi orationis cursus occasionem praebuit , & affectus excitare , & singularia vitae documenta tradere , & ad mores instituendos , quae dicuntur , accommodare , & languentes auditorum animos dicendi vi , & acrimonia suspensos tenere , & dormitantes excitare facit. Hic exclamat , arguit , obsecrat , increpat , terret , stupet , admiratur , & in omnes se affectus , & figuras dicendi transformat ; defunctos excitat , absentes alloquitur , Dei opem implorat , coelum , terras , maria permiscet , & , quasi quodam prophetico furore percitus , clamat : terra , terra , terra , audi sermonem Domini. Et , obstupescite coeli super hoc , & portae eius desolamini vehementer. Et , generatio prava , atque perversa , haecine reddis Domino , popule stulte , & insipiens ?

Haec igitur , & multa alia flagrantissimum hoc desiderium concionatoris animo inspirat , qui interdum se ipse non capit , ac paene disrumpitur : quum spreto religionem , sceleratos hominum mores , caecitatem mentis , obduratum , & insensibile pectus , ac tot pereuntium animarum extremum periculum contemplatur : ideoque nullum non movet lapidem , nihil intentatum relinquit , quo homines , quos in ipsis paene draconis faucibus iam iam dev-

vorandos videt, revocare inde possit: tanta est huius ardoris, quem solus Spiritus ille coelestis excitare, & inflammare solet, vis atque potentia. Quo circa non abs re dictum a nobis fuit, hunc esse praecipuum huius operis, & artificii magistrum. Hic est enim spiritus ille robustorum, qui turbinis instar impellit parietem: hoc est, qui pectora, etiam diuturna peccandi consuetudine obdurata, dirumpit, & concutit. Haec illa Domini vox, quae confringit cedros, quae intercidit flammam ignis, quae parere facit prae metu cervas, & omnia tandem sibi obstitentia perumpit. Hanc ergo vocem, hunc animum, hoc ardens, & incitatum desiderium habere debet, quisquis hoc Propheticum, & Apostolicum munus exercere pro dignitate parat. Vnde, quum quidam vir pius, qui tum primum concionandi munus aggrediebatur, a veterano, eius artificii principe, quaereret, quid sibi maxime ad id munus obeundum necessarium esset: ille nihil, inquit, magis, quam ut is, qui dicit, ardentissimo Domini Iesu amore flagret.

Qui enim sic erga illum affectus est, vehementer illius gloriam, & animarum salutem, pro quibus ille vitam profudit, fitiet, & quae ille maxime odit, nempe hominum peccata, & flagitia, simili affectu detestabitur: atque ita fiet, ut quum hisce de rebus agendum erit, non perfuntorie, non oscitanter, aut segniter, sed vehementer, acriter, & pro dignitate rerum dicat: eumque affectum animis auditorum imprimat, quem ipse voce, vultu, gestu, acrimonia, & tota dicendi contentione praeferat. Quum autem hic affectus, & ardor, ut antea diximus, a Spiritu sancto sit, non enim hunc natura, sed gratia, & magna quidem gratia praestat, non potest populus audiens hoc ardore declamantem, non mirari, suspicere, & revereri: propterea quod intelligat, maius aliquid, & supra hominis facultatem, atque naturam ibi latere, ibique Dei digitum esse. Cuius rei cognitio humana pectora vehementer commoveret, & concutit: sive quod Deum intelligant humano ore loquentem, ipsosque ad se vocantem, sive quod

quod ex inusitata illa dicentis acrimonia , rei dignitatem , de qua agitur , agnoscant. Quum autem Cicero , nullam esse eloquentiam dicat , quae admiratione careat , nulla re magis , quam hac dicendi vi auditorum admiratio concitatur.

Quaeret hic fortasse studiosus concionator , qua ratione hunc animum , atque affectum induere aliquis possit. Cuius rei facilis admodum responsio , sed non facilis ad hoc via est. Quum enim , ut dictum est , hic mentis ardor ab inflammata in Deum caritate proficiscatur , quae non nisi intra virtutum omnium sinum , atque complexum inveniri potest , aperte liquet , innocentia , & puritate vitae hunc animum esse comparandum. In quo quidem studio vehementer adiuvat intentionis puritas , de qua paulo ante loquuti sumus , qua homo non suam , sed Domini sui gloriam casto pectore quaerit. Adiuvat in hoc etiam vera animi submissio , qua pius Ecclesiastes , atque is praesertim , qui ex maiorum suorum imperio hoc munus exsequitur , supplicem se Deo exhibet ; & hinc quidem indignitatem suam professus , inde vero parendi necessitatem proponens , spiritum , atque animum ad eius officii functionem clementer sibi a Domino impartiri postulat. Ad hanc autem humilitatem pertinet , ut homo omnem a se sui fiduciam ad hoc munus obeundum depellat : nec vel eruditione , vel eloquentia , vel vocis , & pronunciationis elegantia , vel opinione , & fama populari , vel diuturna concionandi consuetudine , atque dexteritate fretus , aliquid se effecturum putet , nisi coelitus adiuvetur , virtuteque ex alto induatur.

In mentem vero operis huius difficultatem revocet , de qua satis multa superius diximus , intelligetque , hoc unum sibi superesse remedium , ut cum Iosaphat rege sanctissimo totum spiritum suum conferat ad rogandum Dominum. Ab illo felicem laboris successum , ab illo animarum salutem , ab illo dicendi vim , & facultatem , non ab humanis eloquentiae , aut eruditionis praesidiis speret. Si enim unigenitus Dei filius Patri suo , & doctrinam ,

C

quam

quam praedicabat , & doctrinae fructum tribuebat , quum diceret : (a) mea doctrina non est mea , sed eius , qui misit me. Et : (b) verba , quae ego loquor vobis , a me ipso non loquor. Et : (c) sermonem quem audistis , non est meus , sed eius , qui misit me , Patris : quis adeo impudens , & insolens erit , qui sibi aliquid in docendi officio arrogare audeat ? Depulsa ergo hac impia sui fiducia , pius Dominus obedientiae , atque verae humilitatis amator nihil vere humili , atque obedientiae filio deneget.

Multum praeterea conferet ad salutis alienae sitim acuendam , ea , quae paullo ante de huius officii dignitate , & meriti magnitudine diximus , considerare. Quum enim , auctore D. Gregor. nullum sacrificium Deo gratius sit , quam salus animarum ; illeque , ut idem ait , in maiori apud Deum amore sit , qui ad eius amorem plurimos trahit : quisquis huius divini erga se amoris studiosus est , vehementer optabit , ad eius amorem plurimos adducere , ut ipse tandem voti sui compos efficiatur. Huc pertinet insigne quoque huius operis meritum simul , & praemium , quod ubique piis concionatoribus sacrae litterae pollicentur. Hoc declarat Iacobus Apostolus , quum ait : (d) fratres mei , si quis ex vobis erraverit a veritate , & converterit quis eum , scire debet , quoniam qui converti fecerit peccatorem ab errore viae suae , salvabit animam eius a morte , & operiet multitudinem peccatorum. Item Prov. 11. Salomon , anima , inquit , quae benedicit , impinguabitur : & quae inebriat , ipsa quoque inebriabitur. Iustum quippe apud aequissimum iudicem Deum est , ut in omni opere par pari hominibus referatur : & ita , qui opera , atque doctrina sua aliorum animas reficit , & spiritualibus bonis ditat , ipse quoque a Domino reficiatur , & similibus bonis locupletetur , quibus ornatus , & auctus ante supremi iudicis tribunal tutus apparere possit , & cum Apostolo dicere : quae est enim nostra spes , aut gaudium , aut corona gloriae ? Nonne

(a) *Iean. 7.* (b) *Iean. 14.* (c) *Ibid.* (d) *Iacob. 5.*

ne vos ante Dominum nostrum Iesum Christum estis in adventu eius?

Iuvabit & illud, si Ecclesiastes nominis sui rationem considerans, meminerit se hominum piscatorem a Domino appellari. Sicut autem piscator quum rete iacit, hoc unum praecipue curat, ne vacuum rete domum referat: sic animarum piscator, hoc praecipue captare, in hoc nervos omnes intendere debet, ut eo modo actionem suam instituat, qua huiusmodi praeda Evangelicam sagemam impleat: hoc est, ut pereuntium animas Christo Domino lucrificiat. Hoc autem consequetur, si ea dicat, & eo modo dicat, quo possit obdurata corda concutere, & in tenebris, & coeca peccati nocte iacentes, doctrinae suae luce ad veritatis notitiam trahere: quo miserandum animae suae statum, & periculum agnoscentes, & animo compungantur, & ad iter salutis revocentur. Ad quod, & incertam mortis horam, & divini iudicii severitatem, & horrendas gehennae flammam, aeternitatemque poenarum non raro ponere ante oculos debet. Quamvis non semper adversum hos orationis stilus dirigendus est: quando is sapientibus, & insipientibus, piis, & improbis debitor sit, & ad pietatem, & iustitiam alios quidem potenter trahere, alios vero blande, & leniter erudire, & instruere debeat. Quemadmodum vero piscator tristis abscedit, ubi vacuum sagemam ab undis extulit: sic animarum piscator, si adeo languide se in officio gessit, ut conicere hoc indicio possit, se nihil prehensisse, de hac iactura, non de ignominia sua dolere debebit.

Nec levis etiam stimulus ad dicendum est, si quas forte animas ab huius magni maris fluctibus ad portum salutis revocavit. In his namque venustissima virtutis, & iustitiae species, mirabiles in animo pii concionatoris amores excitat, & ad eam docendi rationem stimulat, qua hunc incomparabilem animarum thesaurum augere queat. Qui accipitres ad capiendas aves nutriunt, hoc ante omnia curant, ut aliqua primum facili praeda inescantur, quo avidius deinde ad insequendas eius generis aves rapiant.

piantur, quarum iam gustum perceperunt. Ad hunc igitur modum concionatores, qui aliquot animas, e diaboli faucibus ereptas, in libertatem asseruerunt, ad alias simili studio, atque labore capiendas excitari solent. Sic enim Agesilaus Lacedaemoniorum rex, militum suorum animos ad praelium acuebat, pulcherrima illis hostium spolia, quae paullo ante in bello ceperant, ostentans. Hoc ergo modo Ecclesiastes inclita animarum spolia, quae a diaboli potestate eripuit, sibi ante oculos ponat, quo se studiosius, & alacrius huic tanto muneri accingat. Quisquis autem huiusmodi spolia Christo Domino obtulit; hoc est, qui verbi semine spirituales Christo Domino filios parturivit, cum Lia utique gloriari, eiusque verba usurpare poterit, dicens: nunc quoque copulabitur mihi maritus meus, eo quod pepererim ei tres filios.

Supra omnia vero ad hunc caritatis affectum consequendum, mire adiuvat sanctae orationis, & contemplationis studium, quo mens nostra spiritualia, atque divina contemplatur. Ita enim fiet, ut earum amore accendatur, atque omnes pios affectus spiritualibus rebus contemplandis nutriat, & foveat. Qua de re iam iam dicemus. Porro autem, qui sine hoc interno divini Spiritus sensu, & motu, eam dicendi vim, & acrimoniam, quam haecenus descripsimus, consequi volunt, & arte, atque ficta, simulataque acrimonia, hunc veritatis affectum se assequuturos putant, saepe ridiculi sunt, & se ipsos multis modis produnt: praesertim si ipsorum vita parum cum hac dicendi ratione cohaereat. Si ne Apelles quidem puerum ferentem uvas sic ad vivum pennicillo exprimere potuit, ut aviculae picturae fraudem non intelligerent: qua fronte quisquam se arte consequuturum putat, quod singulare Spiritus sancti donum, & maximum quidem donum est? Si enim ars nondum eo pervenire potest, ut naturam perfecte exprimat: quo modo divini Spiritus energiam, quae supra naturam est, exprimere poterit?

CAP.

CAP. VIII.

*DE STUDIO SANCTAE ORATIONIS,
& meditationis, quod in Ecclesiaste esse debet.*

SVpra vitae integritatem, & intentionis sinceritatem, quas in Ecclesiaste esse debere docuimus, singulare etiam sanctae orationis studium requiro: quod non poterit non habere is, qui hac vitae, & intentionis puritate praeditus est. Nemo autem me aut nimium, aut superstitiosum in tam multis virtutibus exigendis iudicabit, si huius officii rationem prudenter expenderit. Plura enim D. Bernard. in Ecclesiastico doctore requirit: qui posteaquam graviter, ut ante diximus, questus esset, quod multos in Ecclesia canales haberemus, conchas vero perpaucas, quod videlicet concionatores prius effundere, quam infundi vellent, quae sint autem, quae habere debeant, explicat his verbis: en quanta prius infundenda sunt, ut effundere audeamus: de plenitudine, non de penuria largientes. Primo quidem compunctio, deinde devotio, tertio poenitentiae labor, quarto pietatis opus, quinto orationis studium, sexto contemplationis otium, septimo plenitudo dilectionis. Haec ille.

Vides ergo inter haec, devotionis spiritum, orationis studium, & contemplationis otium à viro sanctissimo requiri? Idemque rursus in epist. 201. ad Abbatem quemdam scribens, tria illi esse necessaria ad hominum salutem promovendam docet: nunc, inquit, manent tria, verbum, exemplum, & oratio: maior autem horum, oratio. Ea namque operi, & voci gratiam, & efficaciam promeretur. Haec ille. Verum ut omittam, quod haec ipsa vitae, & intentionis puritas, nisi in pectore divinarum rerum contemplatione saginato vix umquam reperitur: constans tamen sanctorum Patrum sententia est, Evangelicos doctores in contemplatione haurire, quod postea populis effundant: quod in Prophetis, qui huius officii principes existerunt, cernere licet, qui a Domino accipiebant, quod

populo nuntiabant. Hoc enim illa Prophetæ verba innuunt : (a) suscipiant montes pacem populo , & colles iustitiam.

Hinc D. Gregor. humani , inquit , generis Redemptor , per diem miracula hominibus exhibebat , & ad orationis studium in monte pernoctabat : ut perfectis videlicet prædicatoribus innuat , quatenus nec activam amore speculationis funditus deserant , nec contemplationis gaudia operationis nimietate penitus contemnant : sed quieti contemplantes sorbeant , quod occupati erga proximos loquentes refundant. Præterea quum salus animarum , & perditorum hominum poenitentia , & conversio , ministerii huius finis sit , quæ res nisi singulari Dei auxilio perfici non potest , ut paulo ante diximus , opus est , ut Ecclesiastes non solum verbis , sed multo etiam magis precibus , & lamentis opem Domini imploret , ut pios conatus , & labores suos provehat , atque secundet. Meminisse enim debet , quid piscanti Petro evenit : qui tota nocte cum sociis laborans , nihil cepit : quum autem in verbo Domini reria laxasset , copiosam piscium multitudinem conclusit. Qua de causa D. August. (b) concionatorem monet , si voti compos fieri velit , ut precibus magis , quam verbis munus suum urgeat. Sic enim ait : prædicator labore , ut intelligenter , ut libenter , ut obedienter audiatur : & hoc se posse magis pietate orationum , quam sermonis facultate non dubitet : ut orando pro se , ac pro illis , quos est alloquuturus , sit prius orator , antequam doctör , & ipsa hora accedens , prius quam exserat proferentem linguam , ad Deum levet animam sitientem , ut ructet quod biberit , vel quod impleverit , effundat.

His etiam adde , quod quum ex eiusdem P. August. disertorumque omnium sententia , tam oratoris , quam concionatoris triplex esse officium dicatur , nempe docere , delectare , & flectere ; & docere quidem necessitatis , delectare suavitatis , flectere autem , & auditorum animos commovere , victoriæ sit : quonam modo Ecclesiastes aliorum


rum

(a) *Psalms. 71.* (b) *August. in 4. de Doctrin. Christ.*

rum affectus excitare poterit, nisi ipse etiam commotus sit? Hinc D. Gregor. ad supernum, inquit, desiderium inflammare auditores nequeunt verba, quae frigido corde proferuntur: nec enim res, quae in se ipsa non ardet, aliam accendit. Qua de re non gravabor, Quinctiliani rhetorum principis sententiam hoc in loco attexere: qui institutionum oratoriarum lib. 6. de concitandis affectibus differens, sic ait: summa, quantum ego quidem sentio, circa movendos affectus in hoc posita est, ut moveamur & ipsi. Nam, & luctus, & irae, & indignationis ridicula fuerit imitatio, si verba, vultumque tantum, non etiam animum accommodaverimus. Quid enim aliud est causae, ut lugentes utique in recenti dolore disertissime quaedam exclamare videantur, & ira non numquam indoctis quoque eloquentiam faciat: quam quod illis inest vis mentis, & veritas ipsa morum? Quare in his, quae verisimilia esse volumus, simus ipsi similes eorum, qui vere patiuntur, affectibus: & a tali animo profisciscatur oratio, qualem facere iudicem volet. An ille dolebit, qui audiet me, quum hoc dicam, non dolentem? Irascetur, si nihil ipse, qui in iram concitat, idemque exigit, simile patiatur? Siccis agenti oculis iudex lacrimas dabit? Fieri non potest. Neque incendit nisi ignis, nec madescimus nisi humore, nec res ulla dat alteri colorem, quem ipsa non habeat. Primum est igitur, ut apud nos valeant ea, quae valere apud iudicem volumus: afficiamurque, antequam afficere conemur. Haftenus Fabius.

Ex huius ergo praestantissimi artificis sententia liquet, ad affectus excitandos praecipuum esse, ut afficiamur ipsi. Quaero igitur, quoniam sint, in quorum mentibus magis hi affectus erga res divinas dominantur, sive illi acres, & concitati, sive mites, & lenes sint; quam in iis, qui divinarum rerum assidua consideratione, & sanctae orationis studio devotionis affectum fovere, nutrire, & augere diu, noctuque student? Horum enim praecipua cura est, huiusmodi exercitatione mentem in Deum attollere, devotionem alere, piosque erga divina affectus incendere.

Quorum multi ita animo dispositi, & constituti sunt, ut, instar pulveris sulphurei, vel unius verbi Dei scintilla tacti, protinus inflammentur. Vnde, cuidam ex beatissimi patris Francisci sociis, qui totus erat divinarum rerum contemplationi addictus, illud saepe evenisse memoratur, ut vel sola paradisi voce audita, paene in extasim, prae desiderii, & gaudii magnitudine, raperetur. Denique sicut ligna arida facile ignem concipiunt, viridia vero, atque humentia non item: sic concionatores divinarum rerum, & devotionis studio dediti, facile velut exsiccata ligna, devotionis, atque dilectionis igne inflammantur, quo auditorum animos afficiunt: qui vero devotionis expertes sunt, tamquam humentia ligna; ut neque se ipsos incendunt, ita nec alios incendere possunt. Haec autem omnia quae diximus, breviter Prosper lib. i. de vita contemplat. complectitur his verbis: praedicator, non in verborum splendore, sed in operum virtute totam praedicandi fiduciam ponat: non vocibus delectetur populi clamantis, sed fletibus: nec plausum a populo studeat expectare, sed gemitum: lacrimasque, quas vult a suis auditoribus fundi, ipse primitus fundat: & sic eos compunctione sui cordis accendat. Haec igitur de concionatoris officio, eiusque dignitate praefati, artem ipsam a primis, quod dicitur, incunabulis in sequenti libro tradere incipiemus.





LIBER SECUNDUS
 ECCLESIASTICAE
 RHETORICAE,
 SIVE DE RATIONE CONCIONANDI.

CAP. I.

*QVID SIT RHETORICA , QVAE EIVS MATERIA,
 quod officium , & finis , & quae sint eius partes.*

RHETORICA est bene dicendi ratio ; seu de qua-
 que re proposita , prudenter , ornatèque dicen-
 di scientia. Quamvis autem Rhetoricae nomen
 eam eloquentiae partem significet , quae sola artis praece-
 pta continet , nos hic Rhetoricam pro eloquentia accipi-
 mus : quae quidem est vis illa prudenter , explicare , abun-
 danter , numerosèque dicendi , id est , eloquentia , quae
 nihil aliud est , quam copiose loquens sapientia. Qua qui-
 dem ex re liquet , quantum illi decipiantur , qui eloquen-
 tiam putant esse tumultuariam verborum idem significan-
 tium congeriem , & affectatum dicendi leporem , & ve-
 nustatem ; quum nihil tamen verae eloquentiae magis con-
 trarium sit. Eloquentia enim non est illa inanis , & pro-
 pe puerilis verborum volubilitas , quae saepe in populo
 insolenter se venditat ; sed , ut diximus , diserte & copio-
 se loquens sapientia , quae in prudentum animos cum
 suavitate illabatur. Tolle enim sapientiam , eloquentiae
 sequetur interitus. Quo enim quis prudentius , & gravius
 loquutus fuerit , eo praeclarius eloquentiae specimen , mo-
 do sermo purus una accesserit , cuique dare videbitur.

Materiam porro huius artis eam dicimus , in qua o-
 mnīs

mnis ars , & ea facultas , quae conficitur ex arte , versatur : ut si medicinae materiam dicamus morbos , ac vulnera , quod in his omnis medicina versetur : item , quibus in rebus versatur ars , & facultas oratoria , eas res materiam artis Rhetoricae nominamus. Has autem res alii plures , alii pauciores existimaverunt. Nam Gorgias Leontinus antiquissimus fere rhetor , omnibus de rebus oratorem optime posse dicere , existimavit. Hic infinitam , & immensam huic artificio materiam subiicere videtur. Aristoteles autem , qui huic arti plurima adiumenta , atque ornamenta subministravit , tribus in generibus rerum versari rhetoris officium putavit , demonstrativo , deliberativo , iudiciali. Demonstrativum est , quod tribuitur in alicuius certae personae laudem , aut vituperationem. Deliberativum est , quod positum in disceptatione , vel consultatione civili , habet in se sententiae dictionem. Iudiciale est , quod positum in iudicio , habet in se accusationem , & defensionem ; vel petitionem , & recusationem. Et , quemadmodum nostra quidem fert opinio , oratoris ars , & facultas in hac materia tripartita versari existimanda est. Hanc nos quoque Ciceronis sententiam libenter amplectimur : sic tamen , ut intelligamus , quod quamvis huius artis materia his terminis circumscripta sit , praecipua tamen eius pars , hoc est , eloquutio , unde eloquentia ipsa nomen accepit , ad omnes omnium generum disciplinas quam latissime patet. Nam , & philosophi , & medici , iurisconsulti , & mathematici , & multi etiam sacrarum litterarum tractatores , huius partis , nempe eloquutionis praeceptis instituti , ornatissime , & eloquentissime dicunt.

Ex his autem tribus causarum generibus iudiciale , quod praecipue apud Rhetores in usu fuit , qui in hoc bene dicendi artem excogitarunt , ut civiles causas in iudicio tractarent , nos tamquam ab hoc instituto nostro , qui non causarum actoribus , sed concionatoribus praecepta comparamus , abdicandum duximus : atque deliberativo , hoc est , suasorio , & demonstrativo contenti erimus:

mus : quorum altero in suadendis virtutum officiis , ac vitiis dissuadendis , altero in divorum laudibus celebrandis utimur.

Officium vero huius facultatis videtur esse , dicere apposite ad persuasionem : finis , persuadere dictione. Inter officium autem , & finem hoc interest ; quod in officio, quid fini ; in fine , quid officio conveniat , consideratur: ut medici officium dicimus esse , curare ad sanandum apposite : finem , sanare curatione. Item oratoris quid officium , & quid finem esse dicamus , intelligemus , quum id , quod facere debet , officium esse dicemus : illud , cuius causa facere debet , finem appellabimus.

Quum autem eorum , quae ad finem aliquem consequendum instituta sunt , ratio ex ipso fine sumenda sit , ex hoc ipso fine , quid orator efficere , & quas res habere debeat , commodissime intelligitur. Primum enim , ut apposite ad persuadendum dicat , oportet eum docere , flectere , & delectare. Dialectico namque , qui rei dubiae fidem facere contendit , sufficit ut doceat , hoc est , ut argumentis , quod voluerit , evincat. Ceterum quum orator non modo fidem facere , sed etiam ad aliquid agendum excitare soleat ; non solum argumentis probare , sed etiam orationis venustate , & rerum varietate delectare , atque affectibus concutere auditores , & ad agendum impellere debet. Itaque docere , necessitatis est ; delectare , suavitatis ; flectere victoriae. De quibus suo loco copiosius. Et docere quidem , Rodolphus ait , (a) rem facilem esse , & quam quisque tantum non inertissimae mentis praestare possit : concutere autem affectibus audientem , & in quemcumque velis animi habitum transformare ; allicere item , audiendique voluptate tenere suspensum , non nisi summis , & maioris quodam musarum afflatu instinctis contingere ingeniis.

Ex eodem etiam siue officio , siue fine colligimus , quas partes habere orator , siue concionator debeat. Oportet enim , in oratore esse inventionem , dispositionem , elo-

quu-

(a) *Rodol. Agricol. lib. 1. topi.*

quationem, memoriam, & pronuntiationem. Inventio est excogitatio rerum verarum, aut verisimilium, quae causam probabilem reddant. Dispositio est ordo, & distributio rerum, quae demonstrat quid, quibus in locis sit collocandum. Eloquentio est idoneorum verborum, & sententiarum ad inventionem accommodatio. Memoria est firma orationis perceptio. Pronuntiatio est vocis, & vultus, & gestus moderatio cum venustate.

Ad haec autem omnia paranda, tria sunt necessaria, ars, imitatio, exercitatio. Ars est praeceptio, quae dat certam viam, rationemque dicendi. Imitatio est, qua impellimur cum diligenti ratione, ut aliquorum similes in dicendo velimus esse. Exercitatio est assiduus usus, consuetudoque dicendi. Artis autem praeceptis opus est; primum ad iudicandum, non solum de scriptis eloquentium virorum, quos nobis proponimus imitandos, verum etiam de nostris commentationibus: deinde ad naturam iuvandam, quae si non optima sit, corrigi tamen aliquantum potest: &, ut scribit Cicero, licet ingeniis magnis praediti quidam dicendi copiam sine ratione consequantur, ars tamen est dux certior, quam natura. Quod enim naturali tantum fretus lumine facis, id arte multo melius ac certius efficies. Nemo tamen existimet, tantum opis in praeceptis artis positum esse, ut per ea satis se ad dicendum instructum esse, arbitretur. Nisi enim reliquae duae partes accesserint, scilicet imitatio, & exercitatio, quarum altera multa eloquentium virorum lectione, altera assiduo scribendi usu constat, nemo eloquentiae palmam assequetur. Neque vero satis est, multa legere; nisi in eo, quod legis, omnes dicendi figuras, sententias, phrasas, tropos, & quidquid postremo ad inveniendi, vel eloquendi rationem pertinet, diligenter animadverteris: ut hac ratione artis praecepta familiaria tibi efficias, & in promptu, & veluti ad manum posita semper habeas. Multi enim sunt, qui disertissimorum virorum scripta legentes, quia sola rerum cognitione contenti, nihil de dicendi ratione advertunt, nihil prorsus in ea proficiunt.

CAP.

CAP. II.

QVO MODO RHETORICA A DIALECTICA
differat?

Ceterum ut Rhetoricae diffinitionem, quae magnam lucem ad eius rationem, atque naturam penitus cognoscendam affert, apertius intelligamus; qua in re cum dialectica conveniat, & ab ea item differat, paullo fusius explicandum est. Diffinitio namque, exposita rerum inter se finitimarum similitudine, & differentia, colligitur. Constat autem ex Aristotelis sententia, (a) finitimam esse dialecticae rhetoricam, & sub illa, tamquam superiori disciplina, quemadmodum musica sub arithmetica, contineri. Qua de re sic Arias Montanus ait:

*Huic soror est ventre ex uno concepta gemella,
Praecipuo logicen dixerunt nomine Grali,
Quae rationis opes, vires, nervosque ministrat
Dicenti, vivos adhibet germana colores:*

Haec vincit, victum illa sequi, parereque suadet.

Illud certe constat, utriusque disciplinae eundem esse finem, easdemque rationes, quibus ad hunc finem pervenitur. Vtriusque finis est, persuadere, & rei dubiae fidem facere, ad quod variis utitur rationibus, & argumentis. Vtraque tamen, tum dissimiles quaestiones, tum dissimiles auditores, tum etiam dissimilem dicendi rationem sequitur. Quum enim quaestionum aliae ad intelligendum, aliae ad agendum destinatae sint, quarum illae speculativae, istae practicae nuncupantur, dialectica prioris generis quaestiones frequentius versat, Rhetorica vero nostra, hoc est, Ecclesiastica, de qua sermonem instituimus, posterioris generis saepius tractat. Semper enim, quamvis aliud prima fronte videatur, suadere, aut dissuadere intendit, dum auditores aut ab improbitate deducit, aut ad virtutis, & pietatis studium incitat.

Est & maxima inter auditores differentia, apud quos
dia-

(a) Lib. 1. Rhetor. ad The.

dialecticus, & Ecclesiastes dicunt. Ille enim fere in scholis apud sapientiae studiosos disputat, hic apud populum, qui magis exemplis, & affectibus, quam philosophicis rationibus capitur. Vnde etiam illa differentia nascitur, quam Zeno inter dialecticam, & rethoricam compressa, & extensa manu assignavit: dialecticam compressae, rethoricam vero protensae manui similem esse dicens; quod illius oratio brevior, haec fusior, & latior sit. Dialectica enim oratio velut nervos, & ossa corporis tantum compingere, & suis locis assignare videtur: rethorica vero orationis splendore, & copia veluti sanguinem, & carnem, & cutem, & colorem, ac speciem, & ornatum addit. Quibus rebus qui carent, aridi, ac ieiuni a rethoribus appellantur. Haec autem postrema differentia ex antecedentibus colligitur. Nec minus apte hoc ipsum pictorum exemplo explicatur: qui primum quidem rudi, ut ita dixerim, crassaque minerva omnia simulachri membra delineant; deinde vero varios & colores, & ornatum, & cetera, quae ad perfectam, & absolutam imaginem requiruntur, addunt. Prius autem illud dialecticae officium; posterius vero rethoricae declarat. Haec autem postrema differentia, ex duabus superioribus, quae paullo antea diximus, proficiscitur. Nam rudis, atque imperita multitudo longiori oratione capienda est: quoniam non solum ut sciat, & intelligat, sed ut agat quod volumus, non syllogismis tantum, sed etiam affectibus, & magna vi dicendi concutienda, & exagitanda est: quae non angustam, & brevem, sed acrem, & vehementem, atque copiosam orationem desiderat.

Cuius rei commodissimum exstat apud Senecam exemplum, quod docendi gratia hoc in loco attexere libuit. Sic enim ait: (a) vult nos ab ebrietate detertere Zeno, vir maximus, & huius sectae fortissimae, ac sanctissimae conditor. Audi ergo quemadmodum colligit virum bonum non futurum ebrium. Ebrio secretum sermonem nemo committit, viro autem bono committit: ergo vir bonus ebrius non

(a) *Seneca Epist.* 83.

non est. Non est animus in sua potestate ebrietate devinctus. Quemadmodum musto dolia ipsa rumpuntur, & omne quod in imo iacet, in summum vis caloris eiecit: sic vino aestuante, quidquid in imo iacet abditum, effertur, & prodit in medium. Onerati mero, quemadmodum non continent cibum, vino redundante; ita ne secretum quidem, quod suum, alienumque est, pariter effundunt. Interim si hoc colligere vis, virum bonum non debere ebrium fieri, cur syllogismis agis? Dic quam turpe sit, plus sibi ingerere, quam capiat, & stomachi sui non nosse mensuram: quam multa ebrii faciant, quibus sobrii erubescant. Nihil aliud esse ebrietatem, quam voluntariam insaniam. Extende in plures dies illum ebrium habitum: numquid de furore dubitabis? Nunc quoque non est minor, sed brevior. Refer Alexandri Macedonis exemplum, qui Clitum carissimum sibi, ac fidelissimum inter epulas transfodit, & intellecto facinore mori voluit, certe delituit. Omne vitium ebrietas & incendit, & detegit: obstantem malis conatibus verecundiam removet. Plures enim pudore peccandi, quam bona voluntate, prohibitis abstinere. Vbi possedit animum nimia vis vini, quidquid male latebat, emergit. Non facit ebrietas vitia, sed protrahit. Tunc libidinosus ne cubiculum quidem exspectat, sed cupiditatibus suis, quantum petierint, sine dilatione permittit. Tunc impudicus morbum profitetur, ac publicat. Tunc petulans non linguam, non manum continet. Crescit insolenti superbia, crudelitas saevo, malignitas livido, omne vitium detegitur, & prodit.

Adiice illam ignorationem sui, dubia, & parum explanata verba, incertos oculos, gradum errantem, vertiginem capitis, tecta ipsa mobilia, velut aliquo turbine circumagente totam domum: stomachi tormenta quum effervescent merum, ac viscera ipsa distendit. Tunc tamen utcumque tolerabile est, dum illi vis sua est. Quid quum somno vitiatur, & quae ebrietas fuit, cruditas facta est? Cogita quas clades ediderit publica ebrietas. Haec acerri-
mas gentes, bellicosasque hostibus tradidit. Haec multo-

rum

rum annorum pertinaci bello defensa moenia patefecit: haec contumacissimos, & iugum recusantes, in alienum egit arbitrium: haec invictas acies mero domuit. Alexandrum, cuius modo feci mentionem, tot itinera, tot praedia, tot hiemes, per quas, victa temporum, locorumque difficultate, transierat, tot flumina ex ignoto cadentia, tot maria tutum dimiserunt; intemperantia bibendi concidit. Haftenus Seneca. Cuius verba omnia referre hoc in loco volui, quoniam rhetoricae, ac dialecticae orationis discrimen apertissime docent. Nec tamen hoc modo rhetor loqui semper debet, nisi quum res amplificationem magis, quam probationem desiderat. In probationibus namque rhetor brevitatem, & acumen dialecticorum imitatur: sed sic tamen, ut oratio non nervis tantum, & ossibus, ut antea diximus, constet; sed etiam carne, & cute, hoc est, oratorio ornatu vestiatur.

Adde, quod auditor non solum oratione flectendus, sed etiam eiusdem suavitate, & elegantia delectandus, qua, ut August. docet, (a) & libentius audit, & facilius capitur, & quo impellis, ducitur. Nemo enim ad agendum flectitur, si gravate, & moleste audiat. Hoc autem angusta, & ieiuna oratione, qualis dialecticorum est, fieri nequaquam potest. Hinc D. August. (b) si qui audiunt, inquit, movendi sunt potius, quam docendi: ut in eo, quod iam sciunt, agendo non torpeant, maioribus dicendi viribus opus est. Ibi obsecrationes, & increpationes, concitationes, & coercitiones, & quaecumque alia valent ad commovendos animos, sunt necessaria. Haec vero dicendi ratio non brevem, & angustam, sed vehementem, acrem, & copiosam orationem desiderat. Ex his liquido constat, qua in re hae duae artes inter se conveniant, & quibus in rebus distent, & quanto sit difficilius voluntatem hominum impellere ad agendum, quam intellectum rationibus convincere ad assentiendum.

CAP.

(a) *Lib. 4. de Doct. Christ.* (b) *Vbi supra.*

CAP. III.

ORATIONEM OMNEM IN TRIPLICI
genere versari, expositione, argumentatione, aut amplificatione.

QVVM oratio, rhetoricae artis instrumentum sit, quod munus suum orator exsequitur; quisquis orationis rationem, & partes omnes diligenter expenderit, inveniet plane, omnes homines oratione aut simpliciter aliquid exponere, aut probare, vel improbare, aut rem aliquam ad motum animi excitandum amplificare. Exponimus autem simplici oratione, aut historica narratione, quam mentem nostram, vel id quod gestum est, vel geri potest, explicamus. Probamus vero argumentis, & rationibus, quibus rei dubiae fidem facere conamur. Amplificamus autem, quum amplo orationis genere, rem esse in genere suo maximam declarantes, ad iram, misericordiam, moerorem, odium, amorem, spem, metum, admirationem, vel ad quemvis alium affectum auditoris animum concitamus. Non sum autem nescius, communia esse probandi atque amplificandi loca, & argumenta, ut paullo post videbimus; sed quoniam tractandi ratio diversa est, docendi gratia alterum ab altero secernere maluimus.

Quia vero nullus inter homines sermo, nullaque oratio est, quae non in his tribus generibus versetur, quo pacto unumquodque horum confici debeat, diligenter a nobis in hac arte aperiendum est. Sic enim fiet, ut Ecclesiastes, ubi quid horum in concione occurrerit, facile intelligat, quia id ratione tractare commodius possit. Et quoniam inter tria haec, probandi, & argumentandi ratio praecipua est, ex qua etiam, ut modo diximus, vis amplificandi manat: de hac primo loco, mox de aliis dicendum erit. Quia vero rectus dicendi ordo exigit, ut communiora prius, deinde minus communia, quae sub illis continentur, tradamus, prius quidem communem hanc probandi methodum, atque rationem, quae ad omnia concionum genera pertinet,

D

net,

net; deinde vero propria singularum concionum praecepta, & argumenta exponemus. Quem ordinem & Cicero in rhetoricis, & in topicis Aristoteles sequuti sunt: ille enim veluti silvam quamdam ad omnia argumentorum genera invenienda proposuit, deinde ad singulares causas tractandas descendit: hic vero simili ratione locos omnes descripsit, qui ad omnem quaestionem tractandam pertinerent; deinde ad singulares quaestiones explicandas transitum fecit, in quibus, vel de genere rei, vel diffinitione, vel de proprio, aut accidenti aliquid quaeritur.

CAP. IV.

DIVISIO QVAESTIONIS.

QVoniam omnis argumentandi, atque probandi ratio, de qua in hoc secundo libro dicere instituimus, ad quaestionem aliquam terminandam, destinata est, quotuplex sit quaestio, quae in disceptationem venit, explicandum prius videtur. Quaestionum ergo genera duo sunt, unum infinitum, quod graece thesis, latine propositum; alterum finitum, quod graece hypothesis, latine causa sive controversia dicitur. Thesis de genere universo quaerit sine designatione personarum, temporum, locorum, & similium: hypothesis vero de rebus singulis, quae personis, temporibus, & locis implicitae sunt. Thesis est, sit ne ducenda uxor. Hypothesis, sit ne philosopho, aut seni, hoc tempore, illo loco, illis moribus, peregrina, indotata, vetula, puella, Iulia Pompeio ducenda? Circumstantias vocant, quibus fit quaestio finita: qualia sunt persona, res, causa, tempus, locus, & modus, de quibus commodiori loco dicemus.

Infinita quaestio duplex est: vel enim ad cognitionem pertinet, cuius finis est scientia, ut, sit ne terra globosa? vera ne sit usquam amicitia? vel ad actionem, ut, sit ne gubernanda Respublica? quibus rebus amicitia colenda sit? Superioris genera sunt tria: an sit, quid sit, quale sit, &

si.

similia, quae traduntur a dialecticis in tractatione thematicum simplicium, & copulatorum: ut, sint ne pygmaei? fuerit ne semper mundus? idem ne semper sit futurus? Quid sit; ut, quid anima? Quale sit? ut, an coelum sit coloratum? sit ne laudabile, sit ne utile philosophiae operam dare?

Alterius vero quaestionis, cuius videlicet finis non scientia, sed actio est, duo sunt genera: unum ad officium, alterum ad motum animi, vel gignendum, vel sedandum, planeve tollendum. Ad officium, sicut quum quaeritur, suscipiendi ne sint liberi? Ad movendos animos, quum fiunt cohortationes ad defendendam remp. ad gloriam, ad laudem. Quo ex genere sunt, quaerellae, incitationes, miserationesque flebiles. Rursusque oratio, tum iracundiam restringens, tum metum eripiens, tum exultantem laetitiam comprimens, tum aegritudinem abstergens.

Ex hac autem quaestionis divisione tria intelligimus, quae ad hanc artem maxime necessaria sunt. Primum quidem alium inventionis fontem ad infinitam quaestionem, alium ad finitam, quas thesim, & hypothesim graece appellari diximus, requiri. Ad thesim quippe tractandam argumenta ex iis praecipue locis depromuntur, quae graece topica vocantur: ad hypothesim vero ex circumstantiarum locis, quae vel rebus, vel personis attributa sunt: quando quidem huiusmodi quaestiones, ut paullo antea diximus, rerum, & personarum circumstantiis implicitae sunt. Quamvis autem argumenta, quae ex circumstantiis oriuntur, ad topicorum quoque loca referantur, utpote quae ambitu suo omnia argumentorum genera comprehendant, quia tamen multiplices, & variae circumstantiae sunt, multaque ex illis argumenta eruuntur, singularis earum tractatus a locis illis seiungi debuit, quo ea, quae illic breviter in adiutorum, & causarum loco insinuantur, copiosius, & latius tractarentur.

Haec eadem quaestionis divisio facit, ut intelligamus, quod & Cicero, & ceteri huius artis scriptores docent,

nempe, ut quaestionem finitam ad infinitam, hoc est, hypothese[m] revocemus ad thes[e]m. Quod ut exemplo pateat, finita quaestio est, an Aristotelis philosophia sit perdiscenda? eius quasi pars quaedam est illa infinita: an philosophia sit perdiscenda? ad quam orator finitam transferet; verum hac de re suo loco latius.

Eadem etiam quaestionis divisio valet, ut pernoscamus aliter quaestiones, quarum finis est scientia, aliter eas, quae actionis appellantur, esse tractandas. In illis namque satis est, ut vel rei naturam explicemus, vel dubiae fidem faciamus: in his vero non ad sciendum modo, sed ad aliquid agendum, vel aliquem motum in animis excitandum, auditor impellendus est: quod maiorem vim, & impetum orationis requirit, ut docuimus, quum rhetoricae, & dialecticae differentiam traderemus. His ita constitutis, de argumentorum inventionem, quibus infinitae quaestiones, sive theses tractantur, dicere incipiamus.

CAP. V.

*DE LOCIS VNDE ARGUMENTA DUCUNTUR,
quibus praecipue infinita quaestio tractatur.*

Quia omnis argumentorum inventio, vel ad probandum, vel ad amplificandum destinatur, necesse est, ut omnia, quae rem probant, aut amplificanc, rebus ipsis, quas probare, vel amplificare volumus, aliqua ratione conveniant, vel illis etiam adversentur: quum contrariorum eadem sit disciplina. Rebus autem ipsis quaedam intrinsecus, quaedam vero extrinsecus conveniunt. Nam genus, species, differentia, diffinitio, propria, accidentia, partes, totum, causae, & effectus, rebus omnibus natura insunt. Nulla enim res his velut affinibus, & attributis destituitur. Est enim haec velut communis rerum omnium genealogia, & veluti quaedam consanguinitatis arbor, qualem Theologi pingunt, quae ante se, & post se, a dextra, laevaue velut affines suos habeat. Et quidem anteriori lo-

ca

to ponuntur genus rei , & totum , & partes , & causae , a quibus res profecta est : posteriori vero loco effectus , qui ex causis consequuntur : a dextra vero , laevaue differentia rei , diffinitio , propriae qualitates , & accidentia eius, nisi malis, haec duo posteriora inter effectus collocare; quoniam a forma rei tamquam a causa prodeunt.

Haec vero quae rebus accidunt, alii adiacentia , alii adiuncta vocant , & in tria tempora partiuntur , antecedentia , concomitantia , & consequentia. Quorum quaedam necessario , quaedam vero non necessario rebus cohaerent : atque haec posteriora , dialectici communiter accidentia vocant. Haec igitur omnia , quae varie rebus adiuncta sunt , intrinsecus eis convenire dicuntur. Extrinsecus vero , similia , dissimilia , maiora , minora , paria , exempla , testimonia , & oracula , quae ea de re prolata sunt , rebus ipsis convenire dicimus. Haec autem rerum omnium attributa , tam dialectici , quam rhetores locos appellarunt ; quod ex iis tamquam a locis , & veluti promptuariis argumenta omnia , si ve ad probandum , si ve ad amplificandum eruantur. De quibus, & Aristoteles, & Cicero , & Boëthius , multique alii insignes scriptores , & nostro saeculo Rodolphus Agricola copiose scripserunt.

Et hi quidem prima divisione loca omnia in artificialia , & artis expertia , si ve inartificialia distribuunt. Ad hoc autem posterius genus variae auctoritates , & testimonia , tum divina , tum humana , & varia item exempla , hoc est , praeclare dicta , aut facta pertinent. Ad prius autem illud genus , alia omnia loca , quae enumeravimus , referuntur : quae vel in ipsa rei substantia insunt , vel cum ea aliqua ratione , si ve necessario , si ve non necessario coniuncta sunt. Dicuntur autem haec artificialia , quoniam ab eis probationes , & argumenta arte , & ingenio dicentis eruntur : illa vero artis expertia , quoniam ab his argumenta non dicentis ingenio , sed aliunde assumpta , ad causam afferuntur : quamvis eorundem commoda , & venusta tractatio maxime ad artem pertineat ; nisi sine arte , ut Rodolphus ait , putemus dixisse Lucanum.

*Quis iustius induat arma,
Scire nefas : magno se iudice quisque tuetur.
Victrix causa Diis placuit , sed victa Catoni.*

Haec autem posteriora loca , quamvis sola exempla , & testimonia , partim divina , partim humana comprehendant , infinitum tamen probationum , & argumentorum campum nobis aperiunt , quando quidquid ubique , sive in divinis litteris , sive in sacris canonibus , & conciliis , sive in philosophorum , historicorum , & cunctorum sapientium libris , atque disciplinis continetur , huic loco deservit. Probationes quippe ab his locis manantes , nequaquam arte , & ingenio dicentis ; sed varia , & multa omnis generis auctororum lectione comparantur.

Sed ad institutum redeunt , summa huius artis est , ut propositionem aliquam , seu veram , vel falsam , probaturus , aut improbaturus , omnia quae eius propositionis subiecto , & praedicato , ut dialectici loquuntur , conveniunt , hoc est , omnem , ut ita dicam , utriusque vocis genealogiam , diligenter exploret , nempe genus , speciem , definitionem , & cetera , quae superius commemoravimus. Ex his namque omnibus veluti locis argumenta promuntur. Quum enim aliquid subiecto , & praedicato convenire in debita terminorum collocatione probatur , non dubium quin vere alterum de altero affirmetur : quando , quae in uno tertio conveniunt , inter se quoque convenire necesse sit : contra vero si dissentiant , ipsa quoque inter se dissentire opus est. Quam rem commodissimo exemplo Rodolphus ostendit. Si enim diiudicare velis , an duae , verbi gratia , columnae , quae longe a se distant , aequales , an inaequales sint , virgam utrique parti adhibes : quae si utrique par sit , aequales eas esse iudicas : si impar , inaequales. Eadem ergo ratio argumentandi est. Tertiumque illud utrique parti applicandum , medium appellant : quod quidem ex his omnibus rerum attributis , quae supra commemoravimus , desumitur.

Sed operae pretium erit , haec ipsa propositis aliquot exemplis illustrare. Sumamus exempli gratia , pium sanctae

Etæ orationis studium, quod hominibus commendare volumus, & quae illi convenient, exploremus, ut ex eis ad persuadendum argumenta ducamus. Genus huius virtutis est religio, quae virtutum moralium praestantissima est. Diffinitio est, elevatio mentis in Deum, vel petitio rei decentis à Deo. Causa orationis praecipua est Spiritus sanctus, nos ad orandum inducens, & postulans pro nobis gemitibus inenarrabilibus. Causae vero ad orandum impellentes sunt quotidianae huius vitae miseriae, & praesentissima pericula, & maxima humani cordis ad malum proclivitas, quae continua divini numinis ope eget, & summa item Dei nostri bonitas, quae, ut petamus, praecipit, & petentibus auxilium pollicetur. Effectus orationis sunt primum quidem gratiae, & gloriae augmentum, sicut cetera virtutum opera in caritate edita, promereri. Deinde pro commissis Deo satisfacere. Tertio, id quod petimus, si debite, & religiose petamus, impetrare. Quarto demum, animo corroborari, & coelesti luce, atque spirituali dulcedine refici, atque compleri: & non nulli item alii, quos longum esset enumerare. Partes vero eius, oratio vocalis, atque mentalis; seu malis partes eius esse, quas Apostolus enumerat, quum ait: (a) obsecro primum omnium fieri orationes, obsecrationes, postulationes, gratiarum actiones, &c. Quae verba Calsianus in collationibus patrum (b) diligenter explicat.

Adiuncta orationi sunt, quae necessario cum ea cohaerent, fides, spes, caritas, & attentio, ceteraeque virtutes; sine quibus oratio grata Deo non fit. Adiuncta vero quae frequenter illam consequuntur, sunt vitae puritas, solitudinis amor, sanctorum desideriorum seges, & robur animi adversus peccatum, devotio, & alacritas ad omnia pietatis opera, contemptus rerum humanarum. Gustata enim spirituali suavitate, quae devotae orationis comes est, sordet omnis caro. Haec autem dixi frequenter orationi adiuncta esse, quoniam non nullos orare videmus, qui tamen in virtutis, & iustitiae cultu negligentiores sunt. Similia

(a) 1. *Timoth.* 2. (b) *Collat.* 9. cap. 8.

vero orationi sunt lectio, meditatio, & contemplatio, quod his etiam officiis mens elevetur in Deum. Orationi autem adversatur oblivio Dei, quae malorum omnium origo, sicut oratio bonorum omnium fons, & initium est. Iam vero exempla, & testimonia, sive sacrarum litterarum, sive Sanctorum Patrum, quae orationem commendant, eiusque utilitates, & necessitatem declarant, innumera sunt, & passim obvia. Haec enim argumenta, quae artis expertia esse diximus, non dicentis ingenium, sed memoria, & varia omnis generis auctorum lectio praestat. Dei etiam oblivio, quae orationi adversatur, non minus nos, quam quivis aliorum locorum iuvare ad inveniendum poterit. Quum enim explicuerimus, quae mala ex Dei oblivione consequantur, facile erit intelligere, quam sit oratio commendanda, quae nos a tot malis liberat, dum assidue mentem in Deum attollit. Hoc igitur exemplo aperte liquet, quanta argumentorum copia hac arte quaeratur. Ex his namque precationi attributis, quae adnotavimus, facile ad eam commendandam varia argumenta promuntur.

Sed inter hos tamen locos, qui ab effectibus, & adiunctis ducitur, sive illa necessario, sive non necessario cum re cohaereant, ut modo diximus, secundissimus est. Quamvis enim melius sit res ex causis, & principiis cognoscere, frequentius tamen, & facilius ex effectibus ad causas philosophamur; quoniam notiores nobis effectus, quam causae sunt. Ab hoc igitur effectuum, & adiunctorum loco, & virtutes commendamus, quum earum fructus, & effectus, & quaecumque illis adiuncta sunt, explicamus; & vitia quoque perstringimus, quum effectus, & mala omnia, quae secum afferunt, commemoramus, & amplificamus.

Seneca, ex his duobus locis plurima adversus iram argumenta adducit (a) his verbis: exegisti a me, Novate, ut scriberem, quemadmodum posset ira leniri: nec immerito mihi videris hunc praecipue affectum pertinuisse, maxime ex omnibus tetrum, ac rabidum. Ceteris enim aliquid quieti, placidique inest, hic totus concitatus, & in impetu est, dum al-

(a) Seneca lib. 1. de Ira, cap. 1.

alteri nóceat , sui negligens , in ipsa irruens tela , & ultionis secum multa tractare avidus. Quidam itaque e sapientibus viris iram dixerunt brevem insaniam : aequae enim impotens sui est , decoris oblita , necessitudinum immemor , in quod coepit pertinax , & intenta , rationi , consiliisque praecclusa , vanis agitata causis , ad conspectum aequi , verique inhabilis , ruinis simillima , quae super id , quod oppressere , franguntur. Vt autem scias insanos esse , quos ira possidet , ipsorum habitum intueri. Nam ut furentium certa indicia sunt , audax , & minax vultus , tristis frons , torva facies , citatus gradus , inquietae manus , color versus , crebra , & vehementius acta suspiria : ita irascentium eadem signa sunt. Flagrant , & micant oculi , multus ore toto rubor , exaestuante ab imis praecordiis sanguine , labia quatiuntur , dentes comprimuntur , horrent , ac subriguntur capilli , spiritus coactus , ac stridens , articulorum se ipsos torquentium sonus , gemitus , mugitusque , & parum explanatis vocibus sermo praeruptus , & complosae saepius manus , & pulsata humus pedibus , & totum concitum corpus , magnasque minas agens , foeda visu , & horrenda facies depravantium se , ac intumescantium. Nescias utrum magis detestabile vitium sit , an deforme. Cetera licet abscondere , & in abdito alere : ira se profert , & in faciem exit , quantoque maior est , hoc effervescit manifestius.

Iam vero si effectus eius , damnaque intueri velis , nulla pestis humano generi pluris stetit. Videbis caedes , ac venena , & reorum mutuas sordes , & urbium clades , & totarum exitia gentium , & principum sub civili hasta capita venalia , & subiectas rectis faces , nec intra moenia coërcitos ignes , sed ingentia spatia regionum hostili flamma relucientia. Adspice nobilissimarum civitatum fundamenta vix notabilia : has ira deiecit. Adspice solitudines per multa millia sine habitatione desertas : has ira exhaustit. Adspice tot memoriae proditos duces , mali exempla fati. Haec omnia ex Seneca , qui multa alia his similia enumerat. Quo exemplo apparet , quam sit fecundus hic
lo.

locus, qui ab effectibus, & adiunctis rerum sumitur.

Simili quoque ratione Architas ille Tarentinus apud Ciceronem, (a) voluptatem ex iisdem locis accusat, & dissuadet: ait enim, nullam capitaliorem pestem, quam voluptatem corporis hominibus a natura datam, cuius voluptatis avidae libidines, temere, & effrenate ad potiundum incitarentur. Hinc patriae proditioes, hinc rerum publicarum everfiones, & cum hostibus clandestina colloquia nasci. Nullum denique scelus, nullum magnum facinus esse, ad quod suscipiendum non libido voluptatis impelleret. Stupra vero, adulteria, & omne tale flagitium, nullis aliis illecebris excitari, nisi voluptatis. Quumque homini, sive natura, sive quis Deus nihil mente praestabilius dedisset, huic divino muneri, ac dono nihil tam esse inimicum, quam voluptatem. Nec enim libidine dominante, temperantiae locum esse omnino, nec in voluptatis regno virtutem posse consistere. Quod quo magis intelligi posset, fingere animo aliquem iubebat tanta incitatum voluptate corporis, quanta percipi posset maxima: nemini censebat fore dubium, quin tamdiu dum ita gauderet, nihil agitare mente, nihil ratione, nihil cogitatione consequi posset. Quo circa nihil esse tam detestabile, tamque pestiferum, quam voluptatem. Siquidem ea, quum maior esset, atque longinquior, omne animi lumen extingueret. Haftenus ille.

D. vero Cyprianus (b) his duobus locis definitionem, & comparisonem adiungens, nos ab invidiae peste deterret his verbis: qualis animi tinea est, aut quae cogitationum tabes, invidere in altero virtutem eius, aut felicitatem; odisse in eo vel merita propria, vel beneficia divina; in malum proprium bona aliena convertere, aliorum gloriam facere suam poenam. Non cibus talibus laetus, non potus potest esse iucundus; suspiratur semper, & gemitur, & doletur. Dumque ab invidis numquam livor exponitur, diebus, ac noctibus sine intermissione pectus obsessum dilaniatur. Mala cetera habent terminum; & quodcumque delin-

qui-

(a) Cic. de senect. in oratione Architae contra voluptatem. (b) Cyprian. Sermon. de livor.

quitur, delicti consummatione finitur. In adultero cessat facinus perpetrato stupro; in latrone conquiescit zelus homicidio admissio; & praedoni rapacitatem statuit possessa praeda; & falsario modum imponit impleta fallacia: zelus terminum non habet: permanens iugiter malum, ac sine fine peccatum est. Quantoque ille, cui invidetur, successu meliori profecerit, tanto invidus in maius incendium livoris ignibus inardescit. Hinc vultus minax, torvus adspectus, pallor in facie, in labiis tremor, stridor in dentibus, verba rabida, effrenata convicia, manus ad caedis violentiam promptae, etiam si gladio interim vacuae, odio tamen furiosae mentis armatae. Haecenus Cyprianus. Haec autem ideo tot a me exemplis explicata sunt, ut studiosus concionator aperte videret, argumenta omnia, quibus aliquid vel probamus, vel amplificamus, ex iis, quae rebus attributa, & natura cum illis coniuncta sunt, esse sumenda.

CAP. VI.

DE DVOBVS ALIIS ARGVMENTORVM
fontibus, nempe genere rei, & eius contrariis.

Hic igitur primus, ac praecipuus argumentorum fons, qui ex attributis earum vocum, quae in quaestione ponuntur, hoc est, subiecti, & praedicati, ut appellant, proficiscitur. Sunt autem duo alii, e quibus etiam, ad eandem quaestionem tractandam, argumenta sumuntur, nempe genus rei, sive unum, sive multa sint, & contrarium, sive unum, sive multiplex sit. De genere, hoc sit exemplum. Si quis ab adulterii crimine detertere velit, adulterii genera inspiciat. Eius enim genus proximum est impudicitia, remotius vero lethale peccatum. Qui igitur ab adulterio dehortatur, primum, quam ingens periculum sit, in lethali peccato diu permanere, declarare poterit, mala omnia, quae peccatum secum affert, commemorando; quae ex omnibus locis, hoc est, ex omnibus iis, quae peccato attributa sunt, colligi poterunt. Deinde ad proximum im-
pu-

pudicitiae genus descendens, illud Apostoli proferre poterit: (a) omne peccatum, quodcumque fecerit homo, extra corpus est: qui autem fornicatur, in corpus suum peccat: illud videlicet foedando, ac turpiter inquinando. Cetera quoque mala, quae impudicitiae attribuuntur, simili ratione tractari poterunt. Tertio vero loco ad propria adulterio attributa tractanda perveniet, ut ex rei propriis, quod est multo commodius, argumentetur. Argumenta vero, quae a rerum generibus ducuntur, ex illa Aristotelis regula, quae in antepraedicamentis ponitur, vim habent: quando alterum de altero praedicatur, tamquam de subiecta sibi specie; quaecumque de eo, quod praedicatur, dicuntur, de subiecta quoque sibi specie dicuntur. Hoc est, quidquid generi convenit, speciei quoque subiectae convenit. Constat enim superiora omnia inferioribus convenire, & de illis, ut dialectici loquuntur, praedicari.

Neque vero ea, quae rebus ipsis, de quibus dicimus, contraria sunt, minorem argumentorum materiam suppeditabunt; quando quidem, ut philosophi tradunt, eadem contrariorum disciplina est. Quod plane non in ceteris rebus modo, sed in moribus praecipue locum habet. Quo enim derestabiliorem superbiam, impudicitiam, avaritiam, & iracundiam ostenderis, hoc magis humilitatem, castitatem, liberalitatem, & mansuetudinem commendabis, quae nos a tot malis, & incommodis liberant. Hinc D. Cyprian. serm. de patientia, ubi huius virtutis utilitatem, necessitatem, ceterasque eius laudes exposuisset, impatientiae mala commemorat, ut patientiae laudes amplificet, quae nos a tanto malo liberat. Sic enim ait: atque ut magis, fratres dilectissimi, patientiae bonum luceat, quid mali e contrario impatientia importet, consideremus. Nam, ut patientia bonum Christi est, sic e contra impatientia Zabuli malum: & sicut, in quo habitat, & manet Christus, patiens invenitur; ita impatiens semper existit, cuius mentem Zabuli nequitia possidet, &c. Et paullo post ita concludit: & ne longum sit singulatim recensere omnia; omnino quae patientia

(a) 1. *Corinth.* 6.

tia aedificat ad gloriam, impatientia destruit ad ruinam; quare, fratres dilectissimi, & bonis patientiae, & impatientiae malis diligenter expensis; patientiam, per quam in Christo manemus, ut venire cum Christo ad Deum possimus, plena observatione teneamus. Haecenus Cyprian.

CAP. VII.

*NECESSARIAM ESSE CONCIONATORI
absolutam earum rerum scientiam, de quibus est dicturus,
quo supra dictis locis uti possit.*

QUum igitur argumenta ex his omnibus, quae natura ipsa rebus conveniunt, eruenda sint, liquet sane, plenam earum rerum, de quibus dicturi sumus, scientiam nos ad hoc prius habere, oportere. Quum enim dialecticus me admoneat, ut rei genus, definitionem, proprias passiones, & affectiones, causas, effectus, ac partes rei, ceteraque his similia explorem, quid mihi haec admonitio proderit, nisi prius ego ista omnia noverim? Quo modo autem ea nosse poterō, nisi plenam eius rei scientiam habuero, quae haec omnia tradit? Itaque attentius mihi hanc topicorum artem consideranti apparet, eam similem iis artibus esse, quae methodum quidem, & rationem rerum faciendarum tradunt; quae tamen materiam aliunde oblatam sumunt: qualis pharmacopolarum ars est, quae docet, ex quibus herbis hoc aut illud pharmacum confici debeat, quum aliunde tamen herbas accipiat, quibus ea pharmaca componant. Ad hunc ergo modum dialecticus in quaestionibus, quas tractat, ea, quae rebus natura ipsa conveniunt, & attribuntur, explorare docet, ut ex eis argumenta instituto suo accommodata eruat. Haec tamen attributa non ipse, sed illae disciplinae praestant, quae hisce de rebus tamquam de propria materia disputant.

Ex hac autem animadversione colligitur, totius moralis philosophiae, & christianae doctrinae concionatorem peritum esse debere. Quum enim illi de virtutibus & vitiis,
de

de legis divinae praeceptis, de Sacramentis, de Christianae fidei mysteriis, quae in symbolo continentur, dicendum perpetuo sit, debet utique is, quoad eius fieri poterit, absolutissimam harum rerum scientiam habere, ut ex iis, quae hisce rebus attribuuntur, atque conveniunt, argumenta sumere possit, quae ad suadendum, vel dissuadendum, probandum, aut improbandum, & amplificandum, vel extenuandum conducere valeant. Vnde autem haec copia, nisi ex varia sanctarum scripturarum, veterumque patrum lectione colligi potest? Debet igitur priusquam hoc munus attingat, varia, & multiplici lectione refertum pectus habere, ut tamquam scriba doctus in regno coelorum, proferat de thesauro suo nova, & vetera. Qui enim quum primum munus hoc aggrediuntur, sanctorum patrum scripta legere incipiunt; hi non vetera, & nova, sed nova solum, contra hoc Christi Domini consilium, proferunt. Qua in re vermiculos, quos bombices appellamus, imitari debet; qui pluribus diebus nihil aliud faciunt, quam arborum foliis corpora saginare; deinde, ubi in iustam corporis magnitudinem excreverint, serica filanectere die, noctuque non desistunt. Eos vero, qui sine hac studiosa praeparatione munus hoc obeunt, D. Gregor. castigat his verbis: videant, quos a praedicationis officio aetas, vel imperfectio prohibet, & tamen praecipitatio movet, ne quum intempestive arripiunt, quod non valent, perdant illud, quod tempestive aliquoties implere possent. Nam & pulli avium, si ante pennarum perfectionem volare appetant, unde in alta ire cupiunt, inde in ima cadunt: sic, & conceptam sobolem, si priusquam formetur, femina profert, non tam domum, quam tumultum replet. Haec ille.

In hoc autem studio primum est, ut in lectione delectum adhibeat: ut non trita, & vulgaria, & passim obvia sed praestantissima quaeque eligat, & quae non tam tinnitu, & illecebra verborum aures mulceant, quam quae acumine, & gravitate sententiarum vim, & pondus habeant, & multa paucis comprehendant; ut in iis eruendis, & ponderandis paullulum operae suae concionator ponat. Proxi-
mum

num vero, idque maxime necessarium est, ut albiolo ad hoc ante parato, & titulis rerum omnium, quae in concionis argumenta cadunt, insignito, quae inventa fuerunt, in his locis collocet: & multa etiam, quae ad Evangelia, quae vel dominicis, vel festis diebus ab Ecclesia leguntur, pertinent, simili ratione adnotabit. Hos ergo proprios & singulares locos concionatori maxime utiles & necessarios duco: ut si de humilitate, caritate, patientia, abstinencia, precandi studio; contraque si de superbia, avaritia, inhumanitateque dicendum sit, hos locos consulat, & ex huiusmodi penu, ac veluti promptuario sumat, quod sibi ad dicendum commodius visum fuerit.

Neque sola lectione contentus esse debet: sed quaecumque ab aliis, sive concionatoribus, sive cuiusvis ordinis hominibus, graviter & sententiose dicta fuerint, vel ipsi aliud etiam agenti in mentem venerint, quae vim & pondus aliquod ad munus suum habeant, nullo modo negligenda putet; sed protinus schedulis breviter committat, ut, opportunitatem nactus, ea in supradictis locis reponat. Quae enim nostra sunt, multo & copiosius & vehementius, tamquam arma viribus & corpori nostro accommodata, tractamus. Hac enim cura atque diligentia fit, ut thesaurus noster paullatim augeatur, & post aliquot annos ingens deinde selectarum rerum cumulus tam multis accessionibus surgat.

Ex lectione autem sanctarum scripturarum reconditiora loca seligere curemus, quae novitate & dignitate sua auditores excitent: quorum multa ex Prophetarum, & Sapientiae libris colligere licet. Loca enim ab aliis paene detrita, & passim obvia minus movent, nisi ea insigni aliqua expositione ex communibus nova quodam modo faciamus. Danda etiam opera est, ut pleraque scripturae loca insigni aliqua expositione, aut commentatione illustremus: vel sententiae vim & gravitatem ponderantes, vel tropum, si quis est, aut emphasim, quae frequenter in una voce latet, excutientes. Neque tamen oportet, multis scripturae testimoniis ad unum aliquid probandum uti: quod non nul-

li faciunt , ostentandae magis memoriae & eruditionis, quam aedificationis gratia : sed modus , atque delectus habendus est, neque , quid insidiosus inventionis nostrae amor suggerat , sed quid res postulet, cogitandum. Non enim locus deerit , quo iis , quae eo tempore reticemus , uti postea valeamus.

Qui igitur diligenti studio , lectione , & meditatione hunc sibi thesaurum opportuno tempore comparaverint; graves & acres in dicendo erunt , uberrimumque laboris sui fructum referent. Qui vero vacui, ieiuni , & steriles hoc munus aggrediuntur , quam frugem referre poterunt, nisi ut tales auditores suos relinquant , quales ipsi ad dicendum accesserunt ? Quocirca summum concionatoris studium in divinarum scripturarum , & sanctorum patrum lectione infumi debet : quorum inventis , sua quoque inventa augere & locupletare debet. Est enim valde angusta humani ingenii vena : quae nisi aliorum studiis , velut lucernarum accessione , iuветur , exiguum sane lumen praeferet. Hinc tot homilarii nostro saeculo prodierunt , in quorum lectione vix insigne aliquid legentes invenimus , propterea quod eorum auctores ingeniorum suorum inventis , & labore contenti , & rerum suarum amore allekti , quae ipsis, velut ingenii sui fetus , placuerunt , aliis etiam placitura credebant. Eget ergo Ecclesiastes multa , variaque lectione, & insignium sententiarum observatione. Non enim alia ratione dictum a veteribus esse credo , poetam nasci , oratorem fieri ; nisi quod facultas illa praecipue naturae beneficio , haec vero studio , meditatione , assidua lectione , multa exercitatione & imitatione comparetur.

Ex sacris autem auctoribus Ieremias , ut ceteros Prophetas sileam , quamvis , ut D. Hieronymus ait , minus in verborum delectu cultus , quam Isaias , sit ; admirabilis mihi concionator esse videtur. Tot enim dicendi figuris & affectibus , tantaque vi & acrimonia verborum utitur , totque modis & furorem Domini amplificat , & in pravos hominum mores invehitur ; ut vix quidquam aut gravius , aut vehementius , aut pro rei magnitudine convenientius ex-

co-

cogitari possit. Ex Ecclesiae vero patribus D. Chrysostomus maxime legendus, quod sit eloquentissimus, populi-que auribus ita accommodatus, ut vix umquam a salutari eius institutione orationem flectat. Hic autem vir admirandus, non modo ad sententiarum gravitatem, sed ad vim etiam eloquendi, & tractandorum animorum rationem plurimum conferet: praesertim si assidua lectione Ecclesiastes eum sibi familiarem fecerit. Recte enim D. August. in lib. 4. de doctr. christ. Si ex consuetudine loquentium, fiunt homines loquentes; cur ex consuetudine eloquentium, non fiant eloquentes? Vnde enim eloquentiae praecepta manarunt, nisi ex observatione eorum, qui optime ab ipsa natura ad dicendum compositi erant? Hinc D. August. (a) si acutum, inquit, & fervens adsit ingenium, facilius adhaeret eloquentia legentibus & audientibus eloquentes, quam eloquentiae praecepta sectantibus, accedente maxime exercitatione scribendi, vel dictandi.

CAP. VIII.

DE LOCIS EX CIRCVMSTANTIIS RERVM
& personarum.

PRaeter hos communes locos, alii quoque assignantur ex personarum & rerum circumstantiis: qui ad superiores quoque referuntur, & ab illis manant. Tractantur autem seorsum ab eis, quoniam ad certa genera quaestionum pertinent: quorum naturam propius, quam communia illa loca, attingunt, quae latissime vagantur. Hoc autem in loco ad mentem revocare oportet, quod initio huius secundi libri diximus, nempe duo esse genera quaestionum: quaedam enim ex communibus vocibus constant; quas rhetores infinitas, sive theses appellant: quaedam vero, quae rerum & personarum circumstantiis implicitae sunt, quae videlicet ex propriis & singularibus nominibus constant; quas finitas, vel hypotheses nuncupari diximus. Priorum exemplum est, quum de adul-

E

re-

(a) *Vbi supra.*

terii deformitate in communi; posteriorum vero, quum de Davidis adulterio dicimus, utriusque deformitatem amplificantes. Sic etiam obedientiam, & pudicitiam in communi laudamus, & Abrahae obedientiam, & Iosephi pudicitiam sigillatim amplificamus. Ad eas igitur quaestiones, quas theses appellari diximus, priores illi loci accommodati sunt: ad has vero posteriores non illi solum, sed hi, qui a circumstantiis rerum & personarum ducuntur, maxime deserviunt: quum ea complectantur, quae singulis rebus atque personis conveniunt. Quae autem illa sint, iam explicabimus.

Personis undecim hae circumstantiae tribuuntur: (a) nomen, natura, victus, fortuna, habitus, affectio, studia, consilia, facta, casus, orationes. Nomen est, quod unicuique personae datur, ut Petrus, Ioannes, &c. In natura huiusmodi consideratur, sexus, natio, patria, cognatio, aetas, dignitas. Sexus, vir, an mulier sit. Natio, Graecus, an Barbarus. Patria, Atheniensis, an Lacedaemonius. Cognatio, quibus maioribus, quibus consanguineis sit. Aetas, puer, an adolescens; natu grandior, an senex. In dignitate autem, commoda & incommoda considerantur, a natura data animo aut corpori, hoc modo: valens, an imbecillis; longus, an brevis; formosus, an deformis; velox, an tardus sit; acutus, an hebetior; memor, an obliviosus; comis, officiosus, pudens, patiens, an contra. Et omnino quae a natura data animo & corpori considerabuntur, in natura considerata sunt. Nam quae industria comparantur, ad habitum pertinent: de quo posterius dicendum est. In victu, sive educatione, considerare oportet, apud quem, & quo more, & cuius arbitratu sit educatus; quos habuerit artium liberalium magistros, quos vivendi praeceptores, quibus amicis utatur, quo in negotio, quaestu, artificio sit occupatus, quo modo rem familiarem administret, qua consuetudine domestica sit.

In fortuna quaeritur, servus sit, an liber; pecuniosus, an tenuis; privatus, an cum potestate: si cum potestate,

iu-

(a) *Ex Cic. lib. I. de inv.*

Iurē, an iniuria; felix, clarus, an contra; quales liberos habeat. Ac si de non vivo quaeretur, etiam, quali morte sit affectus, erit considerandum. Habitum autem hunc appellamus animi aut corporis constantem & absolutam aliqua in re perfectionem; ut virtutis, aut artis alicuius perceptionem, aut quamlibet scientiam. Et item corporis aliquam commoditatem, non natura datam, sed studio & industria comparatam. Affectio est, animi aut corporis ex tempore aliqua de causa commutatio, ut laetitia, cupiditas, metus, molestia, morbus, debilitas, & alia, quae genere in eodem reperiuntur. Studium autem est animi assidua & vehemens ad aliquam rem applicata magna cum voluntate occupatio, ut philosophiae, poëticae, geometriae, litterarum. Consilium est, aliquid faciendi aut non faciendi excogitata ratio. Facta autem, & casus, & orationes, tribus ex temporibus considerabuntur, quid fecerit, aut quid ipsi acciderit, aut quid dixerit; aut quid modo faciat, quid ipsi accidat, quid dicat; aut quid postea facturus sit, quid ipsi casurum sit, qua sit usus oratione. Ac personis quidem haec videntur esse attributa: a quibus omnibus argumenta sive ad probandum, sive ad amplificandum duci possunt.

Ceterum a personae nomine, quod primo loco posuimus, raro argumenta sumuntur, nisi quum nomen ipsum singulari aliqua ratione personae sit impositum, ut gloriosum Iesu nomen. Item Abrahae, Sarae, Isaac, Iacob, Israëlis, Ioseph, Ioannis, Petri, & similia. At vero a nominibus appellativis recte argumenta ducuntur, & ab etymologia nominis appellantur. Qui locus definitioni proximus est, & inter prioris ordinis locos numeratur. Ex hoc autem loco sic D. Hieron. cum Heliodoro argumentatur: (a) quid facis in turba, qui monachus es? Et ad Nepotianum, clericus, inquit, interpretetur primo vocabulum suum: &, nominis sui definitione probata, nitatur esse, quod dicitur. Si enim *cleros* graece, latine *fors* dicitur; propterea vocantur clerici, quia vel ipsi sunt de

E 2

for.

(a) *Hieron. in epist.*

forte Domini , vel Dominus fors illorum est. A genere hortamur ad virtutis studium , ne videlicet homo a parentum moribus & nobilitate degeneret. Et ab hoc item amplificamus eorum pravitatem , qui ab hac nobilitate degenerarunt : eorumque mores conicimus , qui a sceleratis parentibus orti sunt. Vnde est illud : mali corvi , malum ovum. Improbis est , quoniam improbis natus parentibus.

A natione : Poenus est , ergo perfidus. Cretensis est , ergo mendax. Cretenses enim , ut Apost. quoque meminit , (a) semper mendaces , malae bestiae , ventres pigri. Daniel quoque ad impudicum senem ait : (b) semen Chanaan , & non Iuda , species decepit te. Et per Prophetam Dominus : (c) radix tua , & generatio tua de terra Chanaan , pater tuus Amorrhaeus , & mater tua Cethaea. Hic ex patria impiorum colligit depravatos populi mores , quales harum gentium erant. A sexu probamus feminarum inconstantiam , iuxta illud : varium & mutabile semper femina. Item , affectuum vehementiam : est enim femina animal vehementer affectibus obnoxium. Vnde est illud Publī Mīmi : aut amat , aut odit mulier : nihil est tertium. A sexu etiam amplificamus mirabilem illam fortitudinem matris septem Machabaeorum , (d) & beatae item Felicitatis , ac Symphorosae : quae filiorum necem plusquam virili animo tulerunt. Sic D. Cyprianus de feminis fortiter supplicia perferentibus : femina , inquit , torta , viris torquentibus fortior invenitur. Ab aetate : ignoscendum , quoniam puer est. Terent. (e) amavit , dum aetas tulit. Consilio valere hunc credibile est , vel attentum esse ad rem , quoniam senex est. Ab educatione & institutione : pravus est , quoniam male educatus , & ab ineunte aetate mala didicit , malis operam dedit magistris , atque ineptis.

Ab animi affectione : quum sceleratissimus hic semper fuerit , quid mirum , si creditum abiurarit ? Huc animi bona referuntur , & vitia. A conditione & fortuna : huic , quo-

(a) *Ad Tit.* 1. (b) *Daniel.* 12. (c) *Ezech.* 16. (d) 2. *Machab.* 7. (e) *Terent. in Andria actū II. scena 6.*

quoniam plusculum accessit pecuniae, sublati sunt animi. Pauper ubique iacet. Huc pertinet illud Ecclesiastici: (a) si dives fueris, non eris immunis a delicto. Et illud item eiusdem: (b) dives loquutus est, & omnes tacuerunt, & verbum illius usque ad nubes perducent. Pauper loquutus est, & dicunt: quis est hic? A victu: improbus est, quoniam cum improbis versatur. Sic Salomon: (c) qui cum sapientibus graditur, sapiens erit: amicus stultorum similis efficietur. Item: (d) qui tangit picem, inquinabitur ab ea: & qui communicat superbo, induet superbiam. A studiis: non est voluptarius, quoniam litterarum studiosus. A rebus gestis: mandandum est Pompeio bellum Mithridaticum, quoniam multa bella felicissime confecit.

Rebus autem & negotiis septem haec attributa sunt, res, causa, locus, tempus, occasio, modus, facultates, sive instrumenta. Res, sive negotium, est brevis complexio totius negotii: quae summam continet facti hoc modo, parentis occisio, patriae proditio. Causa est, per quam, & quam ob rem, & cuius rei causa aliquid factum sit, quaeritur. Quo nomine & efficientem causam, & finem, qui ad opus aggrediendum impulerit, complectimur. Locus etiam, sacer, an profanus; publicus, an privatus; alienus, an ipsius, de quo agitur, locus sit, aut fuerit. Tempus autem est pars quaedam aeternitatis, cum alicuius annui, menstrui, diurni, nocturnive spatii certa significatione. Occasio autem est pars temporis, habens in se alicuius rei idoneam faciendi, aut non faciendi opportunitatem. Quare cum tempore hoc differt: nam genere quidem utrumque idem esse intelligitur; verum in tempore spatium quodam modo declaratur, quod in annis, aut in anno, aut in aliqua anni parte spectatur: in occasione autem ad spatium temporis quaedam faciendi opportunitas intelligitur adiuncta. Modus autem est, in quo, quemadmodum, & quo animo factum sit, quaeritur. Eius partes sunt prudentia, & imprudentia. Prudentia autem quaeritur

E 3

tur

(a) *Eccli.* 11. (b) *Eccli.* 13. (c) *Prov.* 13. (d) *Eccli.* 12.

tur ex his, quae clam, palam, vi, persuasione fecerit. Imprudentia vero in purgationem confertur, cuius partes sunt inscientia, casus, necessitas; & in affectionem animi, hoc est, molestiam, iracundiam, amorem, & cetera, quae in simili genere versantur. Facultates, aut quibus facilius fit, aut sine quibus aliquid confici non potest. In quo genere instrumenta quoque ponuntur, quibus res facta est. Facultas autem, & occasio magnam ad aliquid gerendum opportunitatem praebere solent.

Hae sunt igitur circumstantiae, quae personis, & negotiis singularibus tribuuntur; a quibus argumenta in propositionibus, quas hypotheses appellari diximus, manant. Quae aliis nominibus hoc modo brevius designantur. Quis, quid, quam ob rem, quando, ubi, quo modo. Quis? Vt Graecus, fortis, ignavus, & cetera, quae personis attributa esse diximus. Quid vel quale, vel quantum? Vt furtum, sacrilegium, honestum, turpe, utile, novum, atrox, &c. Quam ob rem? Odio, ira, spe lucri, &c. Quando? Die, noctu, &c. Vbi? In templo, in silva, &c. Quo modo? Palam, gladio, dolo, veneno, laqueo, incantationibus, internuntiis, &c. Praecipuus tamen circumstantiarum usus in amplificando, & minuendo cernitur. Nulla enim circumstantia est, quae alicui rei addita, non eam vel amplificet, vel extenuet. Quam rem suo loco propositis exemplis declarabimus; quibus studiosus concionator intelliget, quantam ex hoc circumstantiarum tractatu frugem colligere poterit.

Ceterum quamvis argumenta ad eas quaestiones tractandas, quas hypotheses appellari diximus, ex his circumstantiarum locis, quos modo enumeravimus, ducantur; danda tamen opera est, sicut initio admonuimus, ut hypothesim reducamus ad thesim; hoc est, ut singularem quaestionem ad communem revocemus; quae fere priorem orationis partem occupare solet. A communioribus enim ad minus communia, & a genere in speciem philosophi descendere docent. Exempli gratia: si amicum aliquem ad Cartusiani instituti professionem adhortari volumus, prius
in

in communi de monasticae vitae laudibus, & commendatione dicemus; deinde ad singulares amici, & Cartusiae circumstantias, quae ad hanc exhortationem conducere videbuntur, veniemus. Sunt enim, ut ait Cicer. (a) ornatissimae orationes eae, quae latissime vagantur, & a privata ac singulari controversia se ad universi generis vim explicandam conferunt; ut ii, qui audiunt, natura, & genere, & universa re cognita, de singulis rebus statuere possint. Quod ut facere queat orator excellens, a propriis personis, & temporibus semper, si potest, advocat controversiam, & ad universi generis orationem traducit.

Ut autem, quoties argumenti ratio occasionem nobis praebet, hypothese[m] revocamus ad thesim; ita contra non numquam thesim deflectimus ad hypothese[m]: ut si quis in universum ab impudicitiae flagitio homines deterrere velit, ubi mala, quae hoc vitium comitantur, exposuerit, poterit ad singulares personarum circumstantias descendere, & quibus eas incommodis afficiat, explicare. Verbi gratia: si homo senex fuerit, si adolescens, si nobilis, si litterarum studiis addictus, si officium publicum gerat, si sacris initiatus sit, si femina fuerit, ac praecipue si nupta, &c. In his igitur omnibus, quam sit hoc vitium unicuique harum personarum foedum, atque deforme, ex ipsis personarum circumstantiis sigillatim demonstrare conabimur, hoc modo: si senex fueris, canos intueri, qui te continentiae & honestatis admonent; docentque, eam aetatem non amatoriiis levitatibus deformandam, sed virtutis & sapientiae studiis decorandam. Si juvenis, ne committas, ut pulcherrimus iste aetatis flos huius vitii turpitudine maculetur, quod te captivum post se trahat, & cum ipsa aetate adolescens ad senectutem usque persequatur. Ad hunc modum ceterae personarum circumstantiae brevius aut longius tractari poterunt.

(a) Cicer. 3. de Orat.

DE FORMIS ARGUMENTORVM, ATQVE
in primis de inductione.

§. I.

Quemadmodum res omnes, quae vel natura vel arte constant, ex materia & forma compositae sunt: ita argumentatio, quae ab arte excogitata est, suam quoque & materiam & formam continet; & materiam quidem argumentum, formam autem argumentationem appellant. Argumentum quippe est inventum rei dubiae faciens fidem: argumentatio vero est apta & conveniens argumenti per orationem explicatio. Quia igitur de fontibus, unde argumenta promuntur, breviter a nobis dictum est; res ipsa exigere videtur, ut de formis, quibus argumenta ipsa explicanda sunt, differamus. Quamvis autem hoc ad eloquutionis rationem magis, quam ad inventionem, spectare videatur; tamen propter utriusque rei affinitatem & conjunctionem, hoc in loco de illis tractare visum est: similique ratione non nulla, quae ad argumentorum dispositionem pertinent, his quoque adiiciemus; quo absoluta huius partis doctrina, uno in loco tradita retineatur.

De his igitur argumentandi formis sic Cicero ait: (a) omnis argumentatio aut per inductionem tractanda est, aut per ratiocinationem. Inductio est oratio, quae rebus non dubiis captat assensionem eius, quicum instituta est: quibus assensionibus facit, ut illi dubia quaedam res, propter similitudinem earum rerum, quibus assensit, probetur. Exstat huius rei exemplum apud Cyprianum, (b) quo similium inductione, Deum esse probat his verbis: ad divinum imperium, etiam de terris mutuemur exemplum. Quando umquam regni societas aut cum fide coepit, aut sine cruore desit? Sic Thebanorum germanitas rupta: sic Ro-

(a) Lib. 1. de Inv. (b) Contra Idola Gentium.

Romanos geminos unum non capit regnum, quos unum uteri cepit hospitium. Pompeius, & Caesar affines fuerunt: nec tamen necessitudinis foedus in aemula potestate tenuerunt. Neque hic tu de homine mireris, quum in hoc omnis natura consentiat. Rex unus est apibus, & dux unus in gregibus, & in armentis rector unus: multo magis mundi unus est rector, qui universa, quaecumque sunt, verbo iubet, ratione dispensat, virtute consummat. Haec tenus Cyprianus. Idem rursus eodem modo argumentatur. (a) Delicata, inquit, iactatio est, quum periculum non est: conflictatio in adversis, probatio est veritatis. Arbor, quae alta radice fundata est, ventis incumbentibus non movetur: & navis, quae forti compage solidata est, pulsatur fluctibus, nec foratur: & quando area fruges terit, ventos grana fortia & robusta contemnunt, inanes paleae flatu portante rapiuntur. Hoc eodem modo argumentamur, quum plura exempla, quae idem efficiunt, congerimus. Sic Mathathias, Machabaeorum pater, morti proximus, filios suos ad religionis & iustitiae defensionem hortatus est; propositis Abrahae, Ioseph, Phinaees, Iosue, Caleb, Davidis, Ananiae, Azariae, Misaelis, atque Danielis exemplis. Subiungitque in fine: (b) & ita cogitate per generationem & generationem: quia omnes, qui sperant in eum, non infirmantur.

§. II.

SYLLOGISMVS, SIVE RATIOCINATIO.

Proxima atque perfectissima argumentandi forma syllogismus est, quem Cicero ratiocinationem vocat: cuius leges atque naturam dialectica ars, quae de eo praecipue differit, plenissime tradit. Hoc vero solum, quod ad institutionem nostram pertinet, admonendum: quod quum dialectici tribus pronuntiatis omnem syllogismum constare dicant, videlicet propositione, assumptione, & conclusione,

(a) *Serm. de mortalit.* (b) *1. Machab. 2.*

ne , quarum duas priores , maiorem & minorem vocant; rhetores tamen , quoniam probationes propositioni , & assumptioni adiungunt , quinquepartitam illam faciunt. Quae tamen esse quadripartita potest , quum altera solum pars eger probatione. Potest & tripartita esse , quum neutra eger. Plenissima tamen est, quae quinque partibus constat. Cuius exemplum subiicit Cicero his verbis : (a) melius accurate , quae consilio geruntur , quam quae sine consilio administrantur. Hanc primam partem numerant ; eam deinceps rationibus variis , approbari putant oportere , hoc modo : domus ea , quae ratione regitur , omnibus instructior est rebus & apparatior , quam ea , quae temere & nullo consilio administratur. Exercitus is , cui praepositus est sapiens & callidus imperator , omnibus partibus commodius regitur , quam is , qui stultitia , & temeritate alicuius administratur. Eadem navigii ratio est. Nam navis optime cursum conficit ea , quae scientissimo gubernatore utitur.

Quum propositio sit hoc pacto approbata, & duae partes transferint ratiocinationis , tertia in parte , aiunt , quod ostendere velis , id ex vi propositionis oportere assumere, hoc pacto : nihil autem omnium rerum melius , quam omnis mundus administratur. Huius assumptionis quarto in loco aliam porro inducunt approbationem , hoc modo: nam & signorum ortus , & obitus definitum quemdam ordinem servant ; & annuae commutationes non modo quadam ex necessitate semper eodem modo fiunt , verum ad utilitates quoque rerum omnium sunt accommodatae ; & diurnae , nocturnaeque vicissitudines , nulla in re umquam mutatae , cuiquam nocuerunt. Quae signo sunt omnia , non mediocri quodam consilio naturam mundi administrari. Quinto inducunt loco complexionem eam , quae aut id infert solum , quod ex omnibus partibus cogitur , hoc modo : consilio igitur mundus administratur ; aut unum in locum quum conduxerit breviter propositionem , & assumptionem , id adiungit , quod ex his conficiatur , ad hunc mo-

(a) *Lib. I. de Inv.*

modum : quod si melius geruntur ea , quae consilio , quam quae sine consilio administrantur ; nihil autem omnium rerum melius , quam omnis mundus administratur : consilio igitur mundus administratur. Quinquepartitam igitur hoc pacto putant esse argumentationem. Haecenus Cicero: qui recto ordine ratiocinationis partes collocavit.

Qui tamen ordo non ineleganter saepe invertitur, quum ab assumptione cepta ratiocinatio , in propositionem maiorem definit, quae illationem conclusionis ex assumptione probat. Idque fit, quum propositio generalem sententiam continet, quam, ceu communem locum, tractare copiose possumus. Verbi gratia: si quis ad carnis macerationem adhortetur, quod per eam Deo pro admissis sceleribus satisfaciamus, syllogismus hoc modo conficiet: necesse est, ut Deo pro commissis satisfaciamus; at hoc maxime praestat ieiunium, & carnis maceratio: studiose igitur ac diligenter haec virtus a nobis colenda est. Hic ordo rectus est. Potest autem maior illa propositio ad finem reservari, & in locum communem coniici, in quo de satisfactionis necessitate differamus, ut acerbissimas ignis purgatorii poenas evadere possimus. Quarum acerbicatem poterimus ad hoc ipsum amplificare. Qua propositione latius, si videbitur, tractata, rursus ad priorem conclusionem regrediemur, ut quorsum evagati fuerimus, aperte intelligatur. Ex hoc autem fonte digressiones saepe oriuntur, quae orationem splendidiorum faciunt; quum ea, quae singularia sunt, ad communes virtutum, & vitiorum locos referimus. Simili ratione quum ad misericordiae opera adhortamur, quam sit Deo misericordiae virtus grata, late persequi possumus. Quam quidem sententiam, vel ante conclusionem, vel post illam tractare possumus. Sic Dominus in evangelio, ubi hanc sententiam pronuntiasset: (a) qui scandalizaverit unum de pusillis istis, qui in me credunt, &c. Digreditur in locum communem de scandalii gravitate differens; subdit enim: (b) vae mundo a scandalis. Necesse est enim, ut veniant scandala, & cetera, quae

(a) *Matth.* 18. (b) *Ibidem.*

quae deinde in hanc sententiam subiecit. Quae oratio maioris propositionis vicem gerit. Ex hac enim sententia recte sequitur conclusio illa, initio proposita: nempe, qui scandalizaverit unum de pusillis istis, &c.

Potest autem ratiocinatio brevissima oratione comprehendendi: qualis illa:

..... *finem qui quaeris amor:*

Cedit amor rebus: res age, tutus eris.

Hic omnes syllogismi partes brevissime comprehensae sunt. Illud etiam observandum, ut concionator non semper exactam illam dialecticorum formam, qua in disputationibus uti solent, sequatur. Alium enim habitum, aliamque loquendi figuram popularis argumentatio postulat. Exemplo sit illa nobilis poetae ratiocinatio: (a)

Credo equidem, nec vana fides, genus esse Deorum.

Haec propositio sequenti syllogismo probatur. (b)

Degeneres animos timor arguit: heu, quibus ille

Iactatus fatis, quae bella exhausta canebat!

Maior enim propositio simpliciter prolata est. At quum ad minorem ventum est, exclamat: heu, quibus ille iactatus fatis, &c. Quanto enim hoc vehementius est, quam si simplici oratione dixisset: multis ille iactatus fatis, multa bella confecit? Nec etiam necesse est, tres illas partes semper adhibere: non numquam enim duabus contenti erimus, quando una illarum perspicua est, quod enthymema vocant. Interdum etiam una constat; quod epichereuma appellant. Sic D. Ambrosius, Virginis intemeratae cruciatum in morte filii exaggerans, ait: nec illud Virgo solatium habebat, quod alium esset filium paritura. Quo in loco pro Mariae nomine Virginem posuit: quo in hac argumentatione, ut dialectici loquuntur, medium erat, in quo tota vis argumentationis sita est.

§. III.

COMPLEXIO, SIVE DILEMMA.

PRaeter has argumentandi formas, quae principem inter ceteras locum obtinent, aliae quoque numerantur, quas, quoniam non vulgarem vim & acumen habent, hoc in loco attexere libuit. Est autem dilemma, in quo utrumlibet concesseris, reprehenditur. Cicero patriam cum Catilina sic agentem inducit: (a) quam ob rem discede, atque hunc mihi timorem eripe. Si verus, ne opprimar: sin falsus, ut tandem aliquando timere desinam. Et in epistola ad Quintum fratrem: si implacabiles sunt iracundiae, summa est acerbitas: sin autem exorabiles, summa levitas. Dictum est autem dilemma, quod ita utrimque premat ac urgeat, ut ex altera parte capiat adversarium: qua de causa cornutus etiam syllogismus vocatur. Sic enim argumentationis cornua in eo disponuntur, ut qui alterum effugerit, in alterum incurrat. Cicero complexionem appellat. Ea si vera est, numquam reprehenditur: sin falsa, duobus modis diluetur, aut conversione, aut alterius partis infirmatione.

Quum viderem, inquit Varro apud Ciceronem, (b) philosophiam graecis litteris diligentissime explicatam, existimaui, si qui de nostris eius studio tenerentur, si essent graecis litteris eruditi, graeca potius, quam nostra, lecturos: sin a Graecorum artibus & disciplinis abhorrent, ne haec quidem curaturos, quae sine eruditione graeca intelligi non possunt. Itaque ea scribere nolui, quae nec indocti intelligere possent, nec docti intelligere curarent. Hoc dilemma deinde Cicero in eum convertit hoc modo: immo vero & latina legent, qui graeca non poterunt: & qui graeca poterunt, non contemnent sua. Ad hunc modum Ecclesiastes, Herodem propter Michaeae vaticinium innocentes pueros iugulare praecipientem, hoc dilemmate convenire poterit: dic mihi, perfide, an stellae nuntian-

ri.

(a) In *L. Catil.* I. (b) *Acad. quaest. lib. I.*

ti, & vaticino Prophetæ fidem habes, an non habes? Si non habes, ride insana hæc hominum commenta & somnia: si vero habes, ut habere te ostendis, quandoquidem Prophetas consulis; quæ dementia est, te viliissimum vermiculum divinæ maiestatis consilia atque decreta infringere velle, & te ipsa divinitate superiorem facere? Item Cyprian. contra Demetrianum: quæ est, inquit, hæc insatiabilis carnificinæ rabies, quæ inexplebilis libido sævitiae? Quin potius elige tibi alterum de duobus: Christianum esse, aut est crimen, aut non est: si crimen est, cur non interficis confitentem? Si crimen non est, quid persequeris innocentem? Torqueri enim debui, si negarem.

§. IV.

S O R E S.

ESt & alia argumentationis forma, quam soritem Graeci appellant, quæ multas argumentationes acervatim complectitur: unde & nomen invenit. Cicero (a) hac forma probat, quod sit honestum, id solum esse bonum. Etenim quidquid sit, quod bonum sit, id expetendum: quod autem expetendum, id certe approbandum: quod vero approbandum, id gratum acceptumque habendum. Ergo etiam dignitas ei tribuenda est. Bonum igitur omne laudabile. Ex quo efficitur, ut, quod sit honestum, id sit solum bonum. Hactenus Cicero. Hoc argumentandi genus dialectici de primo ad ultimum vocant. Quo D. Hieronym. in epistola ad Heliodorum utitur his verbis: nemo Propheta in patria sua honorem habet. At ubi honor non est, ibi contemptus est: ubi contemptus, ibi frequens iniuria: ubi autem iniuria, ibi & indignatio: ubi indignatio, ibi quies nulla: ubi quies non est, ibi mens a proposito sæpe deducitur: ubi autem per inquietudinem aliquid auferitur ex studio, minus sit ab eo, quod tollitur: & ubi minus est, perfectum non potest dici. Ex hac supputatione,

(a) *Tuscul. quæst. lib. V.*

ne, illa summa nascitur, monachum perfectum in patria sua esse non posse. Perfectum autem esse nolle, delinquere est.

§. V.

ENUMERATIO, SIVE EXPEDITIO.

Est etiam enumeratio, in qua, pluribus rebus expositis, & ceteris infirmitatis, una reliqua necessario confirmatur, hoc pacto. Necesse est, quum constet, hominem occisum inimicitarum causa ab hoc esse occisum, aut metus, aut spei, aut alicuius amici gratia: aut si horum nihil est, ab hoc non esse occisum. Nam sine causa maleficium susceptum esse non potest. Sed neque inimicitiae fuerunt, nec metus ullus, nec spes ex morte illius, alicuius commodi, neque ad amicum huius aliquem mors illius pertinebat: reliquum est igitur, ut ab hoc non sit occisus.

§. VI.

SUBIECTIO.

Finitima est enumerationi subiectio. Quidquid enim enumeratione tractatur, multo elegantius per subiectionem reddi potest. Ea vero est, ut Cornificius ait, (a) quum quaerimus ipsi, quid contra nos dici possit: deinde subiicimus id, quod dici oportet, hoc modo. Quaero igitur, unde iste tam pecuniosus factus sit? Amplum patrimonium relictum est? At patris bona venierunt? Hereditas aliqua obvenit? Non potest dici: sed etiam a necessariis omnibus exheredatus est. Praemium aliquod ex lite, aut iudicio cepit? Non modo id non fecit, sed etiam insuper ipse grandi sponcione victus est. Ergo si his rationibus locupletatus non est, sicut omnes videtis, aut isti domi nascitur aurum, aut, unde licitum non est, pecunias accepit.

Oso-

(a) Cic. lib. III. ad. Heren.

Oforius episcopus, ex diuturna Iudaeorum captivitate eos a Deo derelictos propter ipsorum perfidiam colligens, hac argumentandi forma acriter & eleganter utitur. Sic enim ait: (a) quam rem gerunt? quod scelus conflant? quae maleficia suscipiunt? propter quae a Deo, quem tam propitium olim habebant, omnino deferantur? Simulacris immolant? Immo eorum contactum perhorrescunt. Commenticios Deos adsciscunt? At eo nomine, quod Deum colant, efferuntur. Et id verum. Sed moribus immanibus efferati sunt? At ipsi summam sibi laudis, aequitatis, & pietatis assumunt. Quid ergo est? parum ne supplices ad Deum preces adhibent? Immo in precibus assidui sunt, nec tamen exaudiuntur. Si igitur nec simulacra colunt, nec vanos Deos invocant, nec humanum sanguinem fundunt, nec se impiae fraudis impuritate contaminant: cur illos Deus, quos in fidem suam recepit, tam diuturno tempore ope sua destituit? cur gentem, illius numini consecratam, tam diuturnis plagis insequitur? Haecenus ille.

CAP. X.

DE COLLECTIONE ET EIVS PARTIBVS.

INter has autem argumentandi formas collectio praecipue numeratur: utpote quae plenissima argumentatio sit. Ea namque, & quid ad probationem assumere debeamus, & quo ordine disponamus, edocet. Quocirca, ut ego quidem sentio, non tam ad eloquutionis, quam ad inventionis, ac dispositionis rationem hoc genus argumentationis pertinere videtur: quod res ipsa non obscure declarat. Ea namque quinque partibus constat, videlicet, propositione, ratione, rationis confirmatione, exornatione, complexione, sive conclusione. Propositio est, per quam ostendimus summatim, quid sit, quod probare volumus. Ratio est causa, quae demonstrat, id verum esse, quod intendimus, brevi subiectione. Rationis confirmatio est

(a) Hieron. Ofor. lib. I. de Sapient.

est ea, quae pluribus argumentis corroborat breviter expositam rationem. Exornatio est, qua utimur rei honestandae & locupletandae causa, confirmata argumentatione. Complexio, sive conclusio, est, quae concludit, breviter colligens partes argumentationis. Ex hac distributione apparet, quid oratoria argumentatio supra dialecticam addat: dialecticus enim, sola propositione, ratione, & conclusione contentus est: his enim tribus praecipue partibus pugnat, quamvis interdum confirmationes ex loco praecipue ab auctoritate adiiciat. Orator vero confirmationibus & exornationibus praecipue nititur: quorum alterum ad vim, alterum ad ornatum & elegantiam maxime pertinet. Nunc de his quinque partibus singulatim dicamus.

Et quidem de propositione, atque ratione, quoniam hae duae partes ad dialecticum praecipue pertinent, hoc in loco dicere supersedeo. De ceteris autem, quae orator supra dialecticum, & concionator supra oratorem addit, quoniam haec propria instituti nostri sunt, paullo fusius dicemus.

Confirmatio igitur, qua rationem munimus & stabilimus, a locis externis, quae extrinseca dialectici appellant, potissimum peti solet. Quum enim dialectici tria locorum genera esse statuunt: interna, quae ex natura & substantia rei ducuntur; & externa, quae aliunde extra rem assumuntur; & media, quae partim a re, partim extra rem posita sunt: rationes quidem a locis internis & mediis frequentius; confirmationes autem ab externis potissimum ducuntur, nempe a similibus, dissimilibus, repugnantibus, exemplis, variisque auctorum testimoniis & auctoritatibus. Ut autem erudita sit oratio, his externis locis, quantum cuiusque facultas suppetit, locupletanda est. Hoc enim eruditae conciones ab ineruditis potissimum distant, quod istae solis propositionibus & rationibus, quae a quovis facile inveniuntur, refertae sunt: illae vero selectis divinarum scripturarum & sanctorum patrum sententiis & testimoniis illustrantur. Quae, ut suo loco diximus, multa lectione, & assiduo studio paranda & in locos communes coniicienda sunt: ut, quoties causa postulaverit, in promptu sint. Hos enim locos multo magis probo, magisque con-

cionatori necessarios & proprios duco, quam illos, qui topica appellantur. Haec enim topica quum latissime pateant, non facile, quid proposito nostro conveniat, praebent: hi vero rem ipsam multo propius attingunt.

§. I.

D E E X O R N A T I O N E .

Quartam argumentationis oratoriae partem diximus esse exornationem, sive, ut alii vocant, expolitionem. Utroque enim nomine sic appellata est, quod in ea totus fere argumentationis cultus & ornatus sit, & in qua maxime orator artis & ingenii sui vim ostendit. Ceterarum enim partium eloquutio prudentis hominis; exornatio autem non nisi disertis & eloquentis est. Ea vero praecipue locum habet, quum ratio, aut confirmatio, aut etiam propositio latentem vim habet, quae brevi oratione explicari non potuit: tunc enim prudens orator, ubi, quidquid in illa virium aut gratiae latebat, sollerter & acute penetravit, id auditoribus inspiciendum & veluti spectandum proponit. Huius rei infinita apud sanctos doctores exempla reperiuntur: quorum ego non nulla, quo res fiat dilucidior, hoc in loco attexere volui. D. Eusebius Emislenus, de innocentium caede agens, hanc propositionem sic exornat: occiduntur, inquit, pro Christo parvuli, pro iustitia moritur innocentia. Haec propositio est. Sequitur deinde expolitio. Quam beata aetas, quae necdum Christum potest eloqui, & iam pro Christo meretur interfici! Nondum opportuna vulneri, & iam idonea passioni. Quam feliciter nati, quibus in primo nascendi limine aeterna vita obviam venit! Incurrunt quidem inter ipsa principia acceptae lucis periculum, & finem salutis: sed de ipso protinus sine capiunt principia aeternitatis. Immaturi quidem videntur ad mortem, sed feliciter moriuntur ad vitam. Vix dum degustaverant praesentem, statim transeunt ad futuram. Nondum ingressi infantiae cunas, iam perveniunt ad coronas. Rapiuntur quidem a complexibus matrum; sed red-

redduntur gremiis angelorum. Haftenus ille.

Idem etiam hanc Isaiae sententiam : (a) parvulus natus est nobis , & filius datus est nobis , quorum alterum ad sacram humanitatem , alterum ad divinitatem refert, hoc modo exornat. Parvulus , inquit , natus est nobis , & filius datus est nobis. Datus est ergo ex divinitate , natus ex Virgine : natus , qui sentiret occasum , datus , qui nesciret exordium : natus , qui & matre esset iunior , datus , quo nec pater esset antiquior : natus , qui moreretur , datus , ex quo vita nasceretur. Ac sic , qui erat , datus est : qui non erat , natus est. Illic dominatur , hic humiliatur : sibi regnat , & mihi militat. D. autem Gregorius parabolam mercatoris quaerentis bonas margaritas ad hunc modum & proponit & exornat : caeleste regnum negotiatori homini simile dicitur , qui bonas margaritas quaerit , sed unam pretiosam invenit : quam videlicet inventam , omnia vendens , emit. Haec proposito est. Sequitur deinde eius exornatio atque explicatio. Quisquis enim caelestis vitae dulcedinem , in quantum possibilitas admittit , perfecte cognoverit , ea , quae in terris amaverat , libenter cuncta derelinquit. In comparatione eius vilescunt omnia , deserit habita , congregata dispergit , inardescit in caelestibus animus , nihil in terrenis libet : deforme conspicitur , quidquid de terrenae rei placebat specie ; quia sola pretiosae margaritae claritas fulget in mente. His exornationibus D. Gregorius ubique scattet : quae enim semel exposuit , iterum latius explicat : & quidquid in sententia virium latebat , arguta quadam & peculiari phrasi sua in lucem profert.

Sic D. Bernardus in sermone : gaudete , inquit , in Domino , dilectissimi ; qui inter continua suae pietatis beneficia indulsit beatum Victorem mundo , cuius multi salvarentur exemplo : iterum dico , gaudete , quia sublatus de medio appropinquavit Deo , ut multo plures eius intercessionem salventur. Haec propositio bipartita est , quae duplicem nobis utilitatem a sanctis viris manare testatur , nempe suffragii , & exempli. Deinde addit expolitionem , quae id , quod breviter dictum erat , explicat & exornat his verbis:

F 2

in

(a) *Isai. 9.*

in terris visus est, ut esset exemplo; in caelum levatus est, ut sit patrocinio. Hic informavit ad vitam; illic invitat ad gloriam: factus est mediator ad regnum, qui fuit incitator ad opus. Haftenus Bernard. Sic etiam D. Cyprian. dum exemplo viduae Sareptanae, quae Eliam modica farinula pavit, nos ad eleemosynam invitat, eam huic exemplo addit expolitionem. Nec Eliae cibum perenti obtemperare illa dubitavit, aut Eliae, filios mater in fame & egestate praeposuit, nec de abundantia portio, sed de modico totum datur: &, esurientibus liberis, alter prius pascitur, nec in penuria & fame cibus ante, quam misericordia, cogitatur: ut dum in opere saluari carnaliter vita contemnitur, spiritualiter anima reseretur. Neque filiis abstulit mater, quod Eliae dedit: sed magis contulit filiis, quod benigne & pie fecit. Et illa nondum Christum sciebat, nondum praecepta eius audierat, non cruce & passione eius redempta, cibum & potum pro sanguine rependebat: ut ex hoc appareat, quantum in Ecclesia peccet, qui, se & filios Christo anteponens, divitias suas servat, nec patrimonium copiosum cum indigentium paupertate communicat. Hoc exemplum ostendit, quonam modo exempla, vel similia, quae a minori vel maiori ducuntur, exornare & amplificare debeamus: dum per contentionem imparitas rerum, & circumstantiarum explicatur; ut, quanta sit in argumento vis, apertius intelligatur.

Subiiciam elegantissimum aliud ex vita B. Eduardi regis exemplum: qui virginitatis florem simul cum sanctissima uxore ad finem usque vitae incorruptum conservavit. Sic enim in eius vita, ab Arrhievalo, monacho & abbate, scripta, legimus: convenientes igitur in unum rex & regina, de castitate servanda paciscuntur: nec huc fidei alium, quam Deum, testem aestimant adhibendum. Haec velut propositio est, quae rem simpliciter breviterque exponit. Sequitur deinde expolitio, quae eam eleganter amplificat & exornat his verbis: fit illa coniux mente, non carne; ille maritus mente, non opere. Perseverat inter eos sine actu coniugali coniugalis affectus, & sine defloratione virginitatis, castae dilectionis amplexus. Diligitur ille, sed non cor-
rum-

rumpitur : diligitur illa , nec tangitur : & quasi nova quaedam Abisag regem calefacit amore , sed non dissolvit libidine : mulcet obsequiis , sed desideriis non emollit.

Illud autem hoc in loco admonendum puto , ut quum argutas brevesque , vel sacrarum litterarum , vel sanctorum patrum & philosophorum sententias adducimus , quae multa brevi comprehendant ; demus operam , ut ea nos in lucem eruamus , & auditoribus velut spectanda proponamus. Quae res ad hoc genus exornationis pertinet. Huius generis est illa D. Bernardi sententia : vae his , qui vocantur ad opera fortium , & non aluntur cibo fortium ! Idemque de sponsa innixa supra dilectum suum ait : frustra nititur , si non innititur. Item Seneca : qui desiderium clausit , cum ipso Iove de felicitate contendat. Idem , tantum scis , quantum non metuis , non concupiscis. Et alibi idem , nihil refert , an habeas , an non concupiscas. Hae sententiae , aliaeque similes , multa , eademque observatione dignissima , paucis comprehendunt : quarum vim Ecclesiastes & diligenter inspicere & ponderare , ac deinde in lucem edere & proferre debet : quod quidem ad hoc genus expolitionis pertinet. Quod tamen nemo facile assequetur , nisi ad hoc ingenii acumine , & diligenti rei indagine atque consideratione iuvetur.

Haec a me tam multis exemplis exposita sunt , ut concionator vim , & , ut ita dicam , fecunditatem sententiarum acute perspicuens , eam verbis eruere & explicare norit. Sunt enim quidam adeo steriles atque ieiuni , quos rhetores aridos appellant , qui res non oratorio , sed dialectico more , simplicibus verbis , sine ulla amplificatione enuntiant. Quae res ad scholas magis , & munus disputandi , quam concionandi , accommodata est. Aliter enim in scholis apud viros doctos , aliter in concione apud populum agendum est. Alii contra , dum hoc vitium fugere student , rem eandem aliis verbis idem significantibus , sine ulla figurarum aut sententiarum varietate enuntiant : quae res ostentationi magis , quam utilitati , servit. Si quis enim exempla , quae proposuimus , attentius consideret , facile deprehen-

det, in his exornationibus, rem quidem eandem non tam aliis verbis, quam aliis sententiis & figuris explicari. Alii vero multo foedius atque fastidiosius eandem sententiam eisdem verbis frequenter repetunt: quod vitium rhetores tautologiam appellant: nec his in mentem venit, quod vulgo dici solet, Crambebis posita mors.

Exornationem sequitur conclusio: quae quando sit adicienda, dicentis iudicio relinquitur. Non enim semper necessaria est, nisi quum longius oratio vagata fuerit: tunc enim velut in viam reducere auditores oportet, & totius argumentationis summam, quam brevissime fieri poterit, complecti; ne, si longa id oratione fiat, auditorum aures, eisdem saepe repetitis, obtundamus.

CAP. XI.

DE AFFECTIBVS PER TOTVM CORPVS *argumentationis, atque adeo per totam orationem adspargendis.*

Quemadmodum autem orator supra dialecticum duas partes, nempe confirmationem, & exornationem, addit, quibus potissimum tota eius argumentationis vis & elegancia continetur: sic Ecclesiastes duas item supra oratorem addit; nempe affectus, & accommodationem, sive ad singularia descensum. Liceat enim mihi his uti nominibus. Quamvis enim rhetor, per totius causae corpus adspergi affectus, ubicumque rei magnitudo postulaverit, praecipiat: hoc tamen singulari ratione ad Ecclesiastem pertinet; cuius praecipuum munus potius in movendis, quam docendis auditorum animis positum est: quum homines magis peccent affectu corrupto, quam ignorantia veri. Affectus autem pravi, velut clavus clavo, contrariis affectibus pellendi sunt.

Quum sint autem duplices affectus, mites scilicet, & acres, quos Graeci Ithi, & Pathi nuncupant, utrique pro rerum, quae dicuntur, natura concitandi sunt. Ubicumque enim

enim aliquid in suo genere magnum, hoc est, vel maxime miserabile, vel admirabile, vel detestabile, vel indignum, vel etiam periculosum esse, fuerit argumentatione vel quavis alia ratione comprobatum; tunc affectus, quos ipsa rei natura exigit, movendi sunt. Exempli causa. Quum Maria, Mosi soror, insigne illud miraculum, quo patefacta maria iter tutum populo Dei ab Aegypto egredienti praeberunt, commemorasset, sic erga Deum pio affectu concitatur: (a) quis similis tui in fortibus, Domine, quis similis tui? Magnificus in sanctitate, terribilis, atque laudabilis, & faciens mirabilia. Verum hoc ad affectus pertinet mitiores. Vehementius tamen ex eodem miraculo Habacuc propheta assurgit; qui, ubi dixisset, (b) viam fecisti in mari equis tuis in luto aquarum multarum; inclamat protinus: audivi, & conturbatus est venter meus: a voce contremuerunt labia mea. Magnum enim animi sui timorem, maximamque huius tantae rei admirationem stuporemque his verbis testatus est. Sic etiam ubi immensam Servatoris nostri benignitatem exposuimus, qui pro hominibus, quos in se ingratos & sceleratos expertus fuerat, terras invisere, humanam formam induere, seque in sacrificium pro omnibus offerre constituit, ut Patris numen eis propitium redderet; illosque, iam morti sempiternae destinatos, in vitam sempiternam revocaret: ubi haec, inquam, ampla oratione exposuimus, sic amoris & grati animi affectus excitamus.

Haec igitur benignitas Dei animadversa, non amoris incendium concitabit? Non animos ardore pietatis inflammabit? Non omnia vitae pericula adire compellet, ut caritatem, sanguinis profusione ostensam, sanguinis effusione pensamus? An non hoc Apostolus insinuavit, quum ait: (c) caritas Christi urget nos? Hoc est, tanta vis dominicae caritatis non modo excitat & suadet, sed impellit & urget, & vim obduratis etiam mentibus infert, ut si amare pigebat, redamare sic amantem non pigeat. Quis enim tam ferreus est, cuius praecordia haec tanta vis dilectionis non

F 4

mol-

(a) *Exod.* 15. (b) *Habac.* 3. (c) *2. Corintb.* 5.

molliat? Sed hi affectus mitiores. Multo tamen acriores illi, in quos idem Apostolus, eiusdem beneficii magnitudine proposita, exarsit, quum ait: (a) qui nos separabit a caritate Christi? Tribulatio, an angustia, an fames, an nuditas, an periculum, an gladius? Certus sum, quod neque mors, neque vita, & cetera quae sequuntur: quae certe admirabilem apostolicae caritatis vim & ardorem pari verborum acrimonia & asseveratione prae se ferunt. Neque minori affectu, quamvis in dissimili causa, Ieremias, post expositum idololatriae peccatum, ipsum Dominum, quod est multo acrius, inducit loquentem: (b) obstupescite caeli super hoc, & portae eius desolamini vehementer. Duo enim mala fecit populus meus: me dereliquerunt fontem aquae vivae, &c. Neque minus Moses in Canticum exarsit, quum ait: (c) generatio prava atque perversa! Haecine reddis Domino, popule stulte & insipiens? Nonne ipse est pater tuus, qui possedit, & fecit, & creavit te? Et iterum: (d) gens absque consilio, & sine prudentia est. Utinam saperent, & intelligerent, ac novissima providerent.

Sed commodissimum huius rei exemplum exstat primo de Sapient. lib. in quo Orosius episcopus, post nefarium illud scelus, quod Iudaei in Christi Domini morte commiserunt, expositum & amplificatum, sic in indignationis affectus erumpit: omnia crimina odii, invidiae, crudelitatis, immanitatis, & impietatis, non dico, quae in homines concipi, sed quae in Deum ipsum ab hominibus audacissimis & profligatissimis committi possunt, unum in locum collata, minime partem aliquam tam infandi sceleris consequentur. Si muta elementa loqui possent, scelestissimi facinoris crimen illis intenderent: quod interitum rerum omnium moderatori, per quem elementa consistunt, attulerint. Caelum contra illos testimonium diceret, quorum scelere factum est, ut in tenebris & caligine versaretur. Terra illos immani scelere damnaret, quae motibus horrendis, quantum facinus ab impiis hominibus in Christi nece commissum fuisset, indicavit. Mare gentem rebellem & immanem

(a) Rom. 8. (b) Jerem. 2. (c) Deuter. 32. (d) Ibidem.

nem fluctibus obrueret, quod viderit, illius Domini maiestatem contemni, cuius imperio id in omni turbida tempestate obedivit. Haecenus ille.

D. vero Cyprianus sermone de eleemosyna, proposita illa Domini sententia, (a) respicite volatilia caeli, quae non serunt, neque metunt; contra avaros & inhumanos his verbis incandescit: volucres Deus pascit, & passeribus alimenta diurna praestantur, & quibus nullus divinae rei sensus est, eis nec potus nec cibus deest. Tu Christiano, tu Dei servo, tu operibus bonis dedito, tu Domino suo caro aliquid putas defuturum? Nisi si putas quia qui Christum pascit, a Christo ipse non pascitur, aut eis terrena deerunt, quibus caelestia & divina tribuuntur. Vnde haec incredula cogitatio? & unde impia & sacrilega ista meditatio? quid facit in domo fidei perfidum pectus? quid? qui Christo omnino non credit, appellatur & dicitur Christianus? Et mox: quid tibi, inquit, istis ineptis & stultis cogitationibus plaudis, quasi meru & sollicitudine futurorum ab operibus retarderis? quid umbras & praestigias quasdam vanae excusationis obtendis? confitere immo, quae vera sunt; &, quia scientes non potes fallere, secreta & abdita mentis exprome. Obsederunt animum tuum sterilitatis tenebrae, &, recedente inde lumine veritatis, carnale pectus alta & profunda avaritiae caligo caecavit: pecuniae tuae captivus & servus es: catenis cupiditatis, & vinculis alligatus es, & quem iam solverat Christus, denuo victus es. Servas pecuniam, quae te servata non servat: patrimonium cumulas, quod te pondere suo onerat; nec meministi, quid Deus responderit diviti exuberantium fructuum copiam stulta exultatione iactanti: (b) stulte, inquit, hac nocte expostulatur anima tua a te: quae ergo praeparasti, cui erunt? Quid divitiis tuis solus incubas? quid in poenam tuam patrimonii tui pondus exaggeras, ut quo locupletior saeculo fueris, pauperior Deo fias?

Idem de habitu virginum, proposita illa Domini apud Isaiam formidanda sententia, (c) pro eo quod elevatae sunt
fi-

(a) *Matth. 6.* (b) *Luc. 12.* (c) *Isai. 3.*

filiae Sion , & ambulaverunt extento colo ; sic adversus corruptum virginum ornatum insurgit : (a) exaltatae , inquit, ceciderunt : comtae turpitudinem , foeditatemque meruerunt ; serico & purpura indutae , Christum induere non possunt , auro & margaritis & monilibus adornatae , ornamenta corporis & pectoris perdiderunt. Quis non id exsecratur & fugiat , quod aliis fuerit exitio ? Quis id appetat & assumat , quod ad necem alterius pro gladio fuerit & telo ? Si hausto poculo moreretur ille , qui biberat ; venenum scires esse , quod ille potavit. Si accepto cibo , qui acceperat , interiret ; scires , esse lethale , quod acceptum potuit occidere : nec ederes inde , nec biberes , unde interiisse alios ante conspiceres. Nunc quanta ignorantia veri est animi , quanta dementia , id velle , quod & nocuerit semper , & noceat ? Et putare , quod inde ipsa non pereas , unde alios periisse cognoscas ? &c. quae in hanc sententiam ibidem sequuntur. Haecenus Cyprianus.

Hac igitur ratione nos , ubi vel lethalis peccati gravitatem , vel suppliciorum , quae in gehenna damnati patiuntur , atrocitatem & aeternitatem amplificaverimus ; vehementer adversus eos incandescere poterimus , qui tam facile , sine ullo mordentis conscientiae stimulo , tot lethalia crimina pro rebus nihili committunt. Qui plane licet non verbis , tamen operibus ipsis & moribus testari videntur , se neque divinae iustitiae severitate commoveri , nec magnifica Dei promissa aestimare : immo ea pro nihilo ducere , atque rerum omnium Domino quodam modo dicere : neque tuam , Domine , gratiam & amicitiam & paternam curam & providentiam , quam mihi in praesenti vitam offers , magni facio : nec caelestem hereditatem , quam in futuram mihi polliceris , accipio. Tua tibi dona habeto , & cui volueris , donato : ego enim momentaneam carnis voluptatem , aut exiguum pecuniae lucrum omnibus istis tuis promissis , & sanguini etiam , a te in cruce profuso , antepono. Quid igitur hoc contemptu & mentis caecitate horribilius ? Quid execrabilius ? An sensum ullum habere existi-

man-

(a) *Cyprian. tract. 2. de habitu Virg.*

mandi sunt, qui in tam horrendam caecitatis noctem inciderunt? Hoc igitur modo, post rei alicuius magnitudinem argumentis probatam aut amplificatam, excandescere, & auditorum affectus incendere, pro rerum, de quibus agimus, natura, valebimus.

Quam rem, quoniam est in dicendo potentissima, Quintilianus, de ratione movendi affectus differens, commendat his verbis: (a) huc igitur incumbat orator, hoc opus eius, hic labor est: sine quo cetera nuda, ieiuna, infirma & ingrata sunt. Adeo ut velut spiritus operis huius atque animus est in affectibus commovendis. Haec ille. Quod si agentibus in foro causas hoc officium tantopere commendatur, quum tamen in quibusdam bene institutis civitatibus sine prooemio, & sine affectibus oratores dicere iuberentur: quid de concionatore dicendum, cuius vel solum vel praecipuum munus est, auditorum animos commovere, & ad timorem Domini, peccati odium, mundi contemptum, & caelestium rerum amorem, ceterosque pios affectus auditorum animos inflammare? Quo modo autem hoc fieri debeat, sequenti libro, in quo de amplificandi ratione, & affectibus concitandis agendum nobis est, paullo latius explicabimus.

CAP. XII.

DE ACCOMMODATIONE, SIVE AD SINGVLARIA
descensu.

ALteram vero concionatoris partem, accommodationem, sive ad singularia descensum, appellare volui: quod eius proprium sit, ubi aliqua moralis sententia generatim definita & probata est, ad singulares virtutum aut vitiorum actiones descendere; ad illas exhortando, & ab his deterrendo. Hic enim, ut ante docuimus, totius concionis scopus est, ad quem omnia referenda sunt. Quum enim moralis doctrinae finis non speculatio, sed actio sit, quae circa singularia opera versatur: debet utique is, qui
uti-

(a) *Quintil. instit. lib. VI.*

utiliter doctrinam hanc tractare velit, quaecumque hac de re in communi dixerit, ad singulares actiones accommodate. Hinc apud Isaiam Dominus, quum gravissimis verbis Iudaeorum pravitatem & impietatem accusasset, & futuram regni vastitatem praenuntiasset, quid illis faciendum esset, quo infensum sibi numen placarent, subiungit his verbis: (a) lavamini, mundi estote, auferite malum cogitationum vestrarum ab oculis meis, quiescite agere perverse, discite benefacere, quaerite iudicium, subvenite oppresso, iudicate pupillo, defendite viduam; & venite, & arguite me, dicit Dominus.

Iam vero magister caelestis hoc idem in Evangelio facit: ubi enim multa de formidabili iudicii die praenuntiasset; ex iis, quae dixerat, salutaria protinus documenta intulit his verbis: (b) attendite autem vobis, ne forte graventur corda vestra in crapula & ebrietate & curis huius vitae, & superveniat in vos repentina dies illa: tamquam laqueus enim superveniet in omnes, qui sedent super faciem omnis terrae. Vigilate itaque omni tempore orantes, ut digni habeamini fugere ista omnia, quae futura sunt, & stare ante filium hominis. Ad hunc quoque modum regius propheta, ubi potentiam & iustitiam regni Christi exposuisset, eam sententiam ad vitae institutionem transtulit, dicens: (c) & nunc reges intelligite, erudimini, qui iudicatis terram: servite Domino in timore, & exultate ei cum tremore: apprehendite disciplinam, &c. D. autem Gregorius locum illum beati Iob enarrans, (d) si fructus terrae comedi absque pecunia; propositionem, exornationem, & accommodationem breviter his verbis complexus est: fructus terrae absque pecunia comedere, est ex Ecclesia quidem sumtus accipere, sed eidem Ecclesiae praedicationis pretium non praebere. Terrae igitur fructus absque pecunia comedit, qui Ecclesiae commoda ad usum corporis percipit, sed exhortationis ministerium non impendit. Quid ad hoc nos pastores dicimus, qui adventum districti iudicis praecurrentes, officium quidem praeconis susce-

(a) *Isai.* 1. (b) *Luc.* 21. (c) *Psal.* 2. (d) *Iob* 31.

Icepimus, sed alimenta ecclesiastica muti manducamus.

Sed haec breviter dicta sunt. Nos in concione quadam (a) paullo fusius locum illum Ioan. 6. *hoc autem dicebat tentans eum*, latius persequuti sumus. Vbi enim docuimus, tentationes a Deo permitti, cum ob varias causas, tum vel maxime ut homines firmitatem, vel infirmitatem suam agnoscerent, sic intulimus: perfecta enim virtus est, quae tentata non corrumpitur, quae laesisa non vincitur, quae nec secundis rebus effertur, nec angustiis contrahitur: quaeque tam firmas in anima radices egit, ut quemadmodum ignis vehementi aura exagitatus, adeo non exstinguitur, ut magis etiam accendatur; ita ipsa multis modis impugnata, non modo victa non succumbit, sed etiam, ut quidam eleganter dixit, inflicto vulnere virescit. Ex hac autem doctrina, quae vera, quae falsa, quae consummata, quae imperfecta virtus sit, coniectura colligere licet. Itaque non est perfecte pudica mulier, quae a nemine impetita pudicitiam retinet; sed quae multis modis tentata, illibatum & integrum conservat pudorem. Non est item perfecte mansuetus, qui nulla laesissus contumelia non irascitur; sed qui conviciis affectus, nihil acerbum respondet. Non est perfecte humilis, qui honores non appetit; sed qui sublati etiam & erepti non indignatur. Non est perfecte pateriens, cui ad votum omnia cedunt; sed qui in mediis calamitatibus positus, cum Propheta dicere potest: (b) *probasti, Domine, cor meum, & visitasti nocte, &c.* Non est perfecte obediens, qui nullum inobedientiae crimen admittit; sed qui, propria voluntate & iudicio reluctante, alienum sequitur imperium atque iudicium. Hoc exemplo aperte liquet, quantum lucis & utilitatis doctrinae adiiciatur, quum ad haec singularia descenditur. Hac enim ratione, qui audiunt, se ipsos explorare sciunt, & quid de se ipsis sentire debeant, iudicare.

Illud etiam hoc in loco admonendus concionator est, ut non solum peracta argumentatione ad hanc singularium rerum enumerationem descendat: sed frequenter etiam
alias,

(a) *Dominic. 4. quadrag.* (b) *Psalms. 139.*

alias, ubicumque se illi occasio docendi obtulerit. Quicumque enim vere & ex animo prodesse ceteris student, hanc praecipue docendi rationem sequi debent. Sic Paullus, doctor gentium, multa virtutum officia in epistolis suis fidelibus commendat. Quam multa enim ad Romanos cap. 12. congerit, quum ait: obsecro vos, fratres, per misericordiam Dei, ut exhibeatis corpora vestra hostiam viventem, sanctam, Deo placentem, & cetera, quae usque ad finem capitis sequuntur? Quae vir divinus, humanae eloquentiae expers, tanta eloquentia persequitur, totque sententiarum & verborum luminibus exornat, ut nihil nec uberius, nec elegantius dici potuisse videatur.

Sed ne exemplis omnia ex sacris litteris petamus, duo adiiciam ex una D. Eusebii Emissemi homilia. (a) Illum namque evangelicae lectionis locum, quo Magi per aliam viam in regionem suam reversi memorantur, explanans, sic ad singulares actiones accommodat. Illud quoque quod per aliam viam regressi sunt, intelligamus, utilitati ac saluti nostrae peculiarius convenire. Viae enim immutatio, vitae intelligitur emendatio. Nos ergo per alias incedimus vias, quando veterem abnegamus hominem; quando superbiam, suscepta humilitate, deponimus; quando ad patientiam ab iracundia mentem deflectimus; quando veteres voluptates & consuetudines pristinas ac desideria antiqua damnamus. Ad viam utique aliam de errore transimus, quando universas concupiscentias, honestatis ac paupertatis amore, calcamus: quando castitate luxuriam subiugamus, sinistras semitas relinquentes, dextro tramite iter spirituale conficimus. Haec ille. Et paullo inferius, quum nos ad Christi imitationem, & vias eius sequendas hortatur, sic rem universam in partes distribuit. Certum est, inquit, quia Christi carpinus vias, quum, relicto itinere terreno, iter spiritale conficimus: quando obedientia & humilitas, mentis gubernaculum moderantur: quando, terrenis cupiditatibus repudiatis, spes futurorum illuminatam occupat mentem: quando illam bonorum caelestium pulchritudinem cordis
ima

(a) *Homil. Epiphan.*

ima suspirant. Per salutiferas, inquam, gradimur vias, quando anima, damnatis omnibus praesentium rerum voluptatibus, id potius cogitat; quando sepositura sit tabernaculum corporis sui, rursusque illud resurrectionis tempore receptura, ut cum eodem recipiat, prout gessit, sive bonum, sive malum.

Videbor cuiquam fortasse longior in hac admonitione fuisse: desinet tamen mirari, quisquis concionatorum officium, & quorundam ex ipsis abusum consideraverit. Molestissime enim fero, non nullos ita muneris & instituti sui oblitos, ut nihil minus agant, quam quod ex praescripto sibi munere agere tenentur. Quum enim hoc sit concionatori propositum, ut quaecumque dicit, ad animarum salutem, ad castigandos hominum mores, ad virtutis praecepta tradenda, ad mundi contemptum, ad divini numinis timorem pariter & amorem, ceteraque his similia dirigere debeat; quidam per res otiosas & supervacaneas ita vagantur, ut miseri auditores, qui eo confluxerant, quo salutarem aliquam doctrinam haurirent, aridi prorsus atque ieiuni a concione redeant. Quis autem ferat medicum, cui aeger commendatus est, aliud agere, & officii sui curam negligere? Quisquis igitur apte dicere, & officio suo satisfacere cupit, instar periti sagittatoris, nusquam oculos a ministerii sui scopo deflectat, ut ad illum totam orationis suae vim dirigat. Itaque ut caementarii numquam vel unum lapidem in aedificio collocant, quin statim amulum & regulam adhibeant, qua, recte, an secus collocatus sit, explorent: ita fidelis ac prudens divini verbi dispensator, quaecumque dicere instituit, ad hanc regulam expendere debet. Itaque quum aliquid ad dicendum excogitavit, a se ipso inquirat, quid hoc ad animarum salutem? quid ad bonos mores componendos? quid ad vitam hominum rectis institutis moderandam? Quod si ad hoc minus pertinet, quamlibet illud sibi subtiliter & acute excogitatum videatur, si recte sapit, nec se populo venditare cupit, tamquam otiosum, & ab instituto suo alienum, repudiabit. Sed operae pretium tamen me facturum puto, si omnia ea, quae
ad

ad orationem suam Ecclesiastes accommodare atque deflectere debeat, hoc in loco, velut in tabella quadam, spectanda proposuero.

§. I.

VBi concionator suggestum conscenderit, & circumfusam ex eo turbam fuerit contemplatus, proponat sibi in animo, illam esse aegrotorum multitudinem, qui piscinam olim circumsiscebant, ut a morbis suis liberarentur: se vero velut angelum esse caelitus missum, qui variis divini verbi medicamentis non unum aliquem, sed omnes, qui adsunt, sanare studet. Fingat igitur animo, multos ibi esse claudos, qui viam quidem veritatis agnoscant; inertia tamen & langore animi, ac laboris metu deterriti, per eam ingredi detrectent. Alios vero esse aridos, qui nullum devotionis, nullum humanitatis & misericordiae succum habeant. Alios autem caecos, qui nulla divinarum rerum cognitione illuminati, in tenebris ambulent, & passim offendant. Sunt & alia his finitima vitia, quae pius concionator saepe lamentatur. Cernit enim alios avaritiae & ambitionis facibus inflammari: qui videlicet pecuniam & inanes saeculi honores pro Deo colunt: alios livore & invidia contabescere: alios fraterno odio & vindictae cupiditate aestuare: alios superbiae spiritu efferri, ceterosque prae se ipsis fastidire atque despiciere: alios libidinis concupiscentia uri: alios ira praecipites ferri, ceterosque aut conviciis & maledictis insectari, aut diris omnibus devovere: alios contra servili animo blandiri, & turpiter maioribus adulari: alios, qui animas suas venales habent, quas pro rebus nihili sub daemonis & peccati iugum mittunt. Quid vero illos referam, qui fluxum cogitationum & affectuum quodam modo patiuntur; qui nullum eis obicem ponunt, neque ullum iusti & iniusti delectum habent? Quid illos commemorem, qui eodem, ut ita dixerim, fluxu in oculis & lingua laborant: qui videlicet nullam oculis custodiam, nullum linguae frenum adhibent, sed quidquid illis in buccam venerit, effutiunt; & quidquid vident, concupiscunt? Quid

Quid illos, qui, paralyſis morbo diſſoluti, ad omnia ſpiritualia atque divina adeo inſenſibiles effecti ſunt, ut non modo ſine ullo doloris ſenſu peccent, ſed (a) laetentur, etiam quum malefecerint, & exſultent in rebus peſſimis? Quid illos, quorum Deus venter eſt; qui omnia vitae ſtudia ad corporis indulgentiam & voluptatem referunt, nullamque aut animae ſuae, aut futurae vitae rationem habent, perinde atque omnia ſimul cum vita finirentur, nullamque futurorum ſpem haberent?

Adde his etiam ſex illa ſcelera, (b) quae odit Dominus, & ſeptimum, quod deteſtatur anima eius: nempe oculos ſublimes, linguam mendacem, manus effundentes innoxium ſanguinem, cor machinans cogitationes peſſimas, pedes veloces ad currendum in malum, proferentem mendacia, teſtem fallacem, & eum, qui ſeminat diſcordias inter fratres. Sed in his fere omnibus adverſus homines delinquimus. Quid vero illa, quanto atrociora, quae adverſus caeleſtem Patrem committimus: quem ſupra omnia diligere, in quo ſpem omnem & felicitatem noſtram collocare, cuius mandatis obedire, cuius ſanctum nomen venerari, quem rebus omnibus anteporre, cui immortales pro innumeris eius in nos beneficiis gratias agere, quem in ore & corde ſemper habere, ac de eo dies nocteſque cogitare deberemus? Quam longe autem Chriſtianorum multi ab hoc officiorum obſequio diſtant, qui, ut Apoſtolus ait, (c) ſine Deo in hoc mundo vitam agere videntur? His igitur morbis, reputet Eccleſiaſtes, pleroſque eorum, qui illum audiunt, laborare; qui omnes ſunt ad mortem, & mortem quidem ſempiternam. Quid ergo indignius, quam eum, qui tot tantique malis curandis deſtinatus ſit, per aëra quodam modo volitantem muſcas venari, & aliud agere, quo tempore tantis malis ſalutarem opem ferre deberet?

Quia vero ad medicum ſpectat, non ſolum morbos curare, ſed integris etiam tuendae ſanitatis praecepta dare; in hoc quoque Eccleſiaſtes medici curam & ſollertiam i-

G

mi-

(a) *Prov. 2.* (b) *Prov. 6.* (c) *Epheſ. 2.*

mitabitur: praesertim quum non satis ad perfectam iustitiam sit, a malo declinare, nisi bonum facias. Vbi ergo a malis deterruerit, ad bona quoque opera, hoc est, ad omnia virtutum officia exhortari debet: maxime quum vitia adversarum virtutum actionibus superanda sint. Ad ea vero praecipue stimulare debebit, quae, praeter quam quod virtutes egregiae sunt, ad aliarum quoque virtutum studia plurimum iuvant. In hoc autem genere primas tenent assiduum precandi officium, dominicae passionis, ceterorumque divinorum beneficiorum sedula meditatio, sacramentorum frequentior usus, devota piorum librorum lectio, affectuum cohibitio diligens, ac sollicita cordis custodia, carnis castigatio, externorum sensuum, ac praecipue oculorum & linguae, moderatio, & omnia misericordiae & humanitatis opera, sive quae corporibus, sive quae animabus proximorum impendimus.

Postremo Ecclesiastes, exemplo Paulli, (a) omnibus omnia fieri, & in omnes se formas, velut alter Protheus, transformare debet, ut omnes faciat salvos. Alios enim terrere, alios in spem allicere, alios consolari studeat, qui videlicet variis calamitatibus & aerumnis premuntur: quum omnia, quae scripta sunt, (b) ad nostram doctrinam scripta sint, ut per patientiam, & consolationem scripturarum spem habeamus; stantes confirmet, lapsos erigat, pusillanimes confortet, currentibus calcem addat, obfirmatos in sceleribus suis divini iudicii metu perterreat, & singulis quibusque convenientia salutis medicamenta adhibeat. Deinde vero ad varios hominum status atque fortunas, variaque vitae officia inclinanda oratio est. Quod quidem Apostolus in fine epistolarum suarum facere solet, quum dominis & servis, parentibus & filiis, viris & uxoribus, viduis, atque divitibus huius saeculi, quid quisque in statu suo facere debeat, sollicitè praescribit. Quod etiam Ioannes Baptista fecit, dum omnibus ad se confluentibus, pro cuiusque personae conditione, varie tradidit praecepta vivendi. Ad haec igitur, & his similia,

quae-

(a) 1. *Corinth.* 9. (b) *Rom.* 15.

quaecumque dicimus , flectere debemus , si pie , fideliter , atque prudenter caelestis doctrinae panem esurientibus frangere , non populi plausum captare , volumus. Nec tamen sic dicenti salutaris plausus deerit. Multis namque experimentis constat , nulla magis re populum capi , nullamque attentius audire , quam quae vulneribus suis curandis accommodata est.

CAP. XIII.

DE SENTENTIARVM ET EPIPHONEMATVM
ornamentis.

Sententiae & epiphonemata inter varia eloquutionis ornamenta numerantur. Quae tamen , quoniam cum inveniendi ratione maxime coniuncta sunt , hoc in loco adscribere libuit : praesertim quod quemadmodum affectus & accommodationes argumentationi oratoriae adiunximus , & velut partes eius fecimus ; ita & sententias & epiphonemata cum ipsa argumentatione frequenter commiscentur. Quod tamen ornamenti genus , qui brevitati nimium student , negligere solent : qui nesciunt , quantam non modo decoris , sed etiam utilitatis partem orationi detrahant. Hac autem in re mihi etiam concionator ab oratore distare videtur , quod hic raro & verecunde admodum his ornamentis utitur , ne magis vitam hominum instituere , quam causam agere videatur ; concionator autem , quum non causas agat , sed mores hominum instruat , his duabus orationis virtutibus maxime utitur : idque adeo , ut sanctorum evangeliorum enarrationes in hac praecipue re positae sint , ut ubicumque occasio tulerit , sententias & epiphonemata eruamus , quibus mores & vitam hominum instituamus , quas quum variis scripturarum & sanctorum patrum testimoniis confirmamus , plenam concionem efficimus. Quo minus mirandum est , si nos hisce duabus virtutibus magis , quam oratores , utamur , easque inter inventionis praecepta numeremus.

Sententia autem est oratio sumpta de vita, quae, aut quid sit, aut quid esse oporteat in vita, breviter ostendit, hoc modo: difficile est primum virtutem revereri, qui semper secunda fortuna sit usus. Item, liber is est existimandus, qui nulli turpitudini servit. Item, egens aequae est is, qui non satis habet, & is, cui nihil satis potest esse. Item, optima vivendi ratio est eligenda; eam iucundam consuetudo reddet. Huiusmodi sententiae simplices non sunt improbandae, propterea quod habet brevis expositio, si rationis nullius indiget, magnam delectationem. Sed illud quoque probandum est genus sententiae, quod confirmatur subiectione rationis, hoc modo: omnes bene vivendi rationes in virtute sunt collocandae, propterea quod sola virtus in sua potestate est: omnia, praeter eam, subiecta sunt fortunae dominationi. Item, qui fortunis alicuius inducti, amicitiam eius sequuti sunt, hi, simul ac fortuna dilapsa est, devolant omnes. Quum enim recessit ea res, quae fuit consuetudinis causa, nihil superest, quare possint in amicitia retineri.

Sunt item sententiae, quae duplices efferuntur, vel sine ratione, vel cum ratione. Sine ratione, hoc modo: errant, qui in prosperis rebus omnes imperus fortunae se putant fugisse. Sapienter cogitant, qui temporibus secundis casus adversos reformidant. Cum ratione, hoc pacto: qui adolescentium peccatis ignosci putant oportere, falluntur, propterea quod aetas illa non est impedimento bonis studiis: at hi sapienter faciunt, qui adolescentes maxime castigant, ut quibus virtutibus omnem vitam tueri, eas in aetate maturissima velint comparare. Haec omnia ex Herenniana rhetorica.

His porro sententiis, quae ex contrariis rebus constant, Salomon in Proverb. frequentissime utitur. Lege cap. 10. cuius est initium: filius sapiens laetificat patrem; filius vero stultus maestitia est matris suae. Undecimum quoque eisdem sententiis refertum est: statera dolosa abominatio est ante Deum, & pondus aequum voluntas eius, &c. quae sequuntur.

Quin-

Quintilianus sententiis addit, quas graece *gnomas* vocant: quod nomen ex eo acceperunt, quod similes sint consiliis atque decretis. Sub hoc autem nomine adagia, quae insignem aliquam sententiam continent, comprehendimus; quae non vulgarem orationi & fidem & ornamentum addunt, quorum non esse inops Ecclesiastes in lingua sua debet. Quamvis in hoc genere quaedam nimium humilia ac paene sordida sunt, quae dicentis auctoritatem & gravitatem minuunt.

Sunt item sententiae ad rem tantum relatae, ut, nihil est tam popolare, quam bonitas: interim ad personam, quale est illud: princeps, qui vult omnia scire, necesse habet, multa ignoscere. Sunt autem sententiae rectae, sunt & figuratae. Rectae sunt: tam deest avaro, quod habet, quam quod non habet. Figuratae autem, ut, usque adeo ne mori miserum est? Recte enim dixisset, mors misera non est, sed illud tamen acrius. Rectum est: nocere facile, prodesse difficile. Sed vehementius Medea apud Ovidium dicit: servare potui, perdere an possim rogas? Verit autem hanc paene sententiam ad personam Cicero: nihil, inquit, habet Caesar, nec fortuna tua maius, quam ut possis; nec natura melius, quam ut velis conservare quam plurimos.

Est sententiarum genus, non illud quidem petatum ab auctoribus, sed a nobis ad praesentis rei commoditatem confictum. Eas licebit omnibus orationis partibus admiscere. Atque adeo unus locus complures saepe numero sententias parit. Incidunt enim, & in enarrando, & in movendis affectibus, non solum in probationibus. Quin etiam haud raro transitiones per sententias fiunt. Quae si in loco adhibeantur, haud mediocrem orationi copiam adiungent, neque id sine gravitate aut gratia. Sunt etiam sententiae, quae catholicae dicuntur, vulgo iam ab omnibus receptae, qualis illa: invidentia ipsa sui supplicium est. Et, ira est brevis ad tempus stultitia.

Est & aliud tacitum & acutum sententiae genus, quod frequenter epithetis conficitur: ut, praeceptum iuven-

ta, inconsultus amor, esca malorum voluptas, morosa, ac difficilis senectū, vitiorum expultrix philosophia, humanae vitae speculum comoedia, vitae magistra historia. Sic Virg. & caeco carpitur igne. Quod Ovid. explicuit, dicens, rectus magis aestuat ignis. Item in narrando: pars maior vincit meliorem: explicabis, si dixeris: fere fit, ut pars maior vincat meliorem.

Quisquis igitur concionem suam huiusmodi sententiis ornare vult, omnes autem velle debent, rerum naturam, de quibus dicit, prudenter exploret, & quidquid in illis, quod ad vitae institutionem faciat, introspexerit, brevi oratione explicet. Vt enim ante diximus, sententia est, quae, quid sit in vita, aut quid esse oporteat, breviter ostendit. Aliquando enim ex his, quae dicuntur, sententiae manant: aliquando vero, ut causae & rationes eorum, quae dicimus, afferuntur. Sic D. Gregorius (a) ex Phariseorum murmure adversus Dominum, quod peccatores reciperet, in hunc modum philosophatur. Ex qua re colligimus, quia vera iustitia compassionem habet, falsa vero indignationem. Interdum etiam ex una aliqua ratione plures sententiae consequuntur. Sic Seneca in epistola ad Polyb. consolatoria de morte fratris: illud quoque... te adiuvet cogitantem, non iniuriam tibi factam, quod talem fratrem amisisti, sed beneficium datum, quod tam diu pietate eius tibi uti fruique licuit. Iniquus est, qui muneris sui arbitrium danti non reliquit: avidus, qui non lucri loco habet, quod accepit, sed damni, quod reddidit. Ingratus est, qui iniuriam vocat finem voluptatis: stultus, qui nullum fructum esse putat bonorum, nisi praesentium, qui non & in praeteritis acquiescit, & ea iudicat certiora, quae abierunt, quia de illis, ne desinant, non est timendum. Nimis angustat gaudia sua, qui eis tantum modo, quae habet ac videt, frui se putat, & habuisse eadem pro nihilo ducit.

D. vero Cyprianus sententiis pro rationibus utitur ad confirmanda ea, quae suadet, his verbis: (b) neque perfe-

(a) *Gregor. in Homil.* (b) *Cyprian. in Epist.*

Tequitio sola metuenda est, & ea, quae subruendis ac deiiciendis Dei servis aperta impugnatione grassantur. Facilior cautio est, ubi manifesta formido est. Et ad certamen animus ante praestruitur, quando se adversarius confitetur. Plus metuendus est & cavendus inimicus, quum latenter obrepit; quum, per pacis imaginem fallens, occultis accessibus serpit. Idem in epist. ad Confess. ut felicibus confessionis suae initiis finem adiungant, sic ait: danda vobis opera est, ut post haec initia ad incrementa quoque veniatur, & consummetur in vobis, quod iam rudimentis felicibus esse coepistis. Haec propositio est, cui rationes ex sententiis subiiciuntur, hoc modo: parum est, adipisci, aliquid potuisse: plus est, quod adeptum est, posse servare. Sicuti & fides ipsa & nativitas salutaris, non accepta, sed custodita vivificat. Nec statim consequutio, sed consummatio hominem Deo servat. Haec fere de sententiarum ornamentis rhetores praecipunt: in quibus qui volet esse dives, legat ex ethnicis quidem scriptoribus Senecam, ex nostris vero D. Gregorium, qui in hac virtute principes exstiterunt.

§. I.

DE EPIPHONEMATE.

Sententiis epiphonemata, quod tenui limite ab illis dividantur, adiunximus. Est autem epiphonema, ut Fabius ait, (a) rei narratae vel probatae summa acclamatio. Quale est illud: (b)

Tantae molis erat, Romanam condere gentem.

Quia vero haec definitio subobscura est, illam ego rudi, quod aiunt, Minerva explicandam curabo. Cuius explanationem facile intelliget, quisquis vel paullulum in dialectica arte versatus fuerit. Ea enim, quae dialectici vel ex definitionibus, vel expositionibus, aut conclusionibus

G 4

bus

(a) *Quintil. instit. lib. VIII. cap. 5.* (b) *Virg. AEneid. lib. I. v. 37.*

bus inferunt, corollaria vocant. At epiphomena, de quo nunc agimus, quaedam corollarii species est. Corollarium namque latissime patet. Omnia enim, quae ex ante dictis referuntur, sive unum, sive multa sint, corollaria appellantur: epiphonema autem corollarium quidem est, sed ad certam definitamque materiam contractum. Non enim quidquid ex rebus, quas tractavimus, elicitur, epiphonema est: sed id solum, quod admirationem, vel rei, de qua agitur, amplificationem, vel insignem aliquam sententiam continet, epiphonema est. Sic Cicero pro Milone: pudicitiam quum eriperet militi tribunus in exercitu C. Marii, propinquus eius imperatoris interfectus ab eo est, cui vim afferebat. Hic breviter res gesta narrata est. Subdit protinus Cicero epiphonema hoc modo: facere enim probus adolescens periculose, quam perpeti turpiter maluit. Haec sententia ex re narrata aperte consequitur, quae adolescentis constantiam atque virtutem amplificat: quando is, cum periculo etiam vitae, flagitium a se propulsavit. Interdum etiam epiphonema causam continet facti. Quum videlicet ex natura rei causa colligitur. Vt enim ex causis effectus, ita ex effectibus intelliguntur causae. Tale est illud Ioannis: (a) multi etiam ex principibus crediderunt: sed propter Phariseos non confitebantur, ne de synagoga eiicerentur: hic effectus est. Subdit autem Evangelista causam: dilexerunt enim magis gloriam hominum, quam gloriam Dei. Haec oratio & causam continet facti, & sententiam ad personas relata. Sulpitius Severus in vita D. Martini, postea quam illam sancti viri in agone mortis constituti orationem commemorasset: Domine, si adhuc populo tuo sum necessarius, non recuso laborem, fiat voluntas tua; huiusmodi epiphonema subiecit: o virum infabilem, nec labore victum, nec morte vincendum; qui nec mori timuit, nec vivere recusavit.

Hac eadem ratione, in quavis evangelica lectione, multa similia his epiphonemata colligere licet. Sumamus, exempli gratia, Matthaei evangelistae vocationem, eiusque

(a) *Ioan.* 12,

que obedientiam, & publicanorum convivium. Quam multa ex hac sacra lectione epiphonemata, quae admirationem & amplificationem continent, colligere licet! Quam larga enim illa Domini pietas & misericordia, quae publicanum ad apostolici & evangelici muneris dignitatem vocavit! Item, quam stupenda iudicia Dei, qui, multis aliis iustitiae cultoribus praetermissis, hominem turpi negotio victitantem ad tantam gloriam eligere voluit? Quanta item vis illa divini Spiritus, qui unico verbo ita cor hominis immutavit! Quanta rursus illa obedientia, quae, ad unum vocantis Domini verbum, quae habebat, omnia deseruit! Quanta item eiusdem caritas & alacritas, quae amicos & publicanos ad Domini convivium invitavit; ut eius monitis & exemplis, suavissimoque convictu, in eius amorem raperentur, & exemplo suo relictis omnibus eundem Dominum sequerentur!

Praeterea, quanta eiusdem Domini benignitas, caritas, & humilitas, qui neque peccatorum convivia dignatus est, quo illos ad se benigne traheret, neque Pharisaeorum obtestationes curavit! Ac deinde, quanta Pharisaeorum malitia, qui virtuti, qua ipsi carebant, vitii nomen imposuerunt; ne in hoc caritatis officio Christo Domino inferiores viderentur! Haec omnia non dubium quin epiphonemata sint, quae ex sacra hac historia colliguntur: quae nos fusius persequentes, integram concionem in eiusdem apostoli festo confecimus.

Mirus est in hoc genere D. Ambrosius, qui Agnetis virginis fortitudinem atque constantiam in tam tenera aetate, hac potissimum orationis virtute illustrat & amplificat. Sic enim ait: nomen virginis titulus est pudoris: appellabo martyrem: praedicavi satis. Prolixa laudatio est, quae non quaeritur, sed tenetur. Hanc senes, hanc iuvenes, hanc pueri canant. Nemo est laudabilior, quam qui ab omnibus laudari potest. Quot homines, tot praecones, qui martyrem praedicant, dum loquuntur. Haec duodecim annorum martyrium fecisse traditur. Quo detestabilior crudelitas, quae nec minusculae pepercit aetati?

Im-

Immo magna vis fidei, quae etiam ab illa testimonium invenit aetate. Fuitne in illo corpusculo vulneri locus? Et quae non habuit quo ferrum reciperet, habuit quo ferrum vinceret. Novum martyrii genus! Nondum idonea poenae, & iam matura victoriae: certare difficilis, facilis coronari. Non sic ad thalamum nupta properaret, ut ad supplicii locum. Flere omnes, ipsa sine fletu. Mirari plerique, quod tam facile vitae suae prodiga, quam nondum hauserat, iam quasi perfuncta donaret. Stupere universi, quod iam divinitatis testis existeret, quae adhuc arbitra sui per aetatem esse non posset. Effecit denique, ut ei de Deo crederetur, cui de homine adhuc non credebatur: quia quod ultra naturam est, de auctore naturae est. Stetit, oravit, cervicem inflexit. Cerneret trepidare carnificem, quasi ipse addictus fuisset: tremere percussoris dextram, pallere ora alieno timentis periculo, quum puella non timeret suo. Haecenus Ambrosius.

In cuius oratione facile studiosus lector epiphonemata singulis paene periodis adiecta deprehendet: quae non vulgari acumine rem, per se alioqui illustrem, illustriorem atque mirabiliorem reddunt. Est autem hoc pulcherrimum orationis ornamentum, in quo quidem abundant, qui ingenii acumine plurimum valent. Quo enim plenius rei naturam comprehendunt, eo plura ex his, quae dicta sunt, colligunt: quae ubi rem amplificunt, epiphonemata dicuntur. Narratio quippe & expositio rerum, cuique vel rudi etiam ingenio in promptu est. At sententias, & quidquid admirationem vel amplificationem continet, quod e rebus iam expositis aut probatis infertur, animadvertere, & argute breviterque proferre, quod epiphonematis est proprium, non vulgaris ingenii est. Eius autem praecipuus usus in clausulis est. Ideo enim epiphonema esse dicitur, rei narratae vel probatae summa acclamatio. Denique quidquid in clausulis aurem acute ferit, epiphonema est.

Sic D. August. exposita breviter beatissimi martyris
Vin-

Vincentii passione , adiecit epiphonemata , quae insuperabilem martyris constantiam mire attollunt , & rem expositam amplificant. Si consideretur in hac passione humana patientia , incipit esse incredibilis : si agnoscat divi-
na potentia , desinet esse mirabilis. Tanta grassabatur crudelitas in martyris corpore , & tanta tranquillitas proferebatur in voce : tanta poenarum asperitas saeviebat in membris , tanta securitas sonabat in verbis ; ut putaremus , Vincentio patiente , alium loqui , alium torqueri. Clariorem nobis martyrem tormenta faciebant. Multiplici enim vulnerum varietate confossus , non deserebat pugnam , sed acrius iterabat. Putares , quod eum duraret flamma , non ureret. Haestenus August. In cuius verbis , quidquid , exposita martyris constantia , acute colligitur , quod rem amplifcet , atque mirabilem faciat , merito epiphonema esse dicitur.

CAP. XIV.

*DE PROLEPSI , QVAE LATINE PRAESVMTIO,
vel anticipatio , dicitur.*

Post sententias & epiphonemata , prolepsim quoque addere libuit. Quae quamquam inter sententiarum figuras , quae ad eloquutionem pertinent , sicut epiphonemata & sententiae , numeratur ; quia tamen plurimum cum inveniendi ratione , sicut & illa , convenit , plurimumque & ornatus , & utilitatis , & consilii continet : hoc in loco adscribendam , & argumentationi adiungendam duxi ; quamvis ea non minus in ceteris inventionis partibus locum habeat. Quemadmodum enim ea , quae dicimus , tum sententias , tum epiphonemata parant ; ita ex iisdem haec orationis virtus oritur. Quid autem Fabius de hac figura dicat , primo loco subiiciam. Ait igitur : (a) mire vero in causis valet praesumptio , quae prolepsis dicitur , quum id , quod obiici potest , occupamus. Id neque
in

(a) *Quintil. instit. lib. VIII. cap. 2.*

in aliis partibus parum est, & praecipue prooemio convenit. Sed quamquam generis unius, diversas tamen species habet. Est enim quaedam praemunitio, qualis Ciceronis contra Q. Caecilium, quod ad accusandum descendat, qui semper defenderat. Quaedam confessio, ut pro Rabirio Posthumo, quem sua quoque sententia reprehendum fatetur, quod pecuniam regi crediderit. Quaedam praedictio, ut: dicam enim, non augendi criminis gratia. Quaedam emendatio, ut: rogo ignoscatis mihi, si longius sum evectus: frequentissima praeparatio, si pluribus verbis, vel quare facturi quid simus, vel quare fecerimus, dici solet. Verborum quoque vis ac proprietas confirmatur, vel praesumptione, cuiusmodi est illud: quamquam illa non poena, sed prohibitio sceleris fuit; aut reprehensione, quale est illud: cives, inquam, si hoc eos appellari nomine fas est. Haftenus Fabius.

Sed quoniam is breviter hunc locum absolvit, quid ego de hac virtute sentiam, familiari dialecticorum exemplo indicabo. Duos hi rerum conceptus esse statuunt, quos directum, & reflexum appellant. Et directum quidem esse dicunt, quum simpliciter id solum concepimus, quod proposita vox aut oratio significat: reflexum autem, quo supra id, quod directe concepimus, reflectimur, singulare aliquid in eo, quod concepimus, expendentes, aut commentantes, aut etiam obiicientes. Ex hac enim posteriori animi conceptione haec virtus manat: quo videlicet prudens concionator prudentis auditoris personam quodam modo induit; & quidquid ille tacita cogitatione vel adnotare, vel ponderare, vel obiicere poterit, ipse propter tardiores adnotat, ponderat, aut diluit. Itaque duas quodam modo personas suscipit, & dicentis, & audientis: atque tacitis huiusmodi cogitationibus prudenter occurrit. Verbi gratia. Ex iis, quae dicimus, quaedam prima fronte apparent arroganter, aut sordide, aut obscure, aut minus utiliter, aut subtiliter, aut longius, aut brevius, aut asperius atque liberius, aut minus apte dicta.

His igitur veluti querelis prudentis auditoris breviter

ter occurrendum est, & ratione ostendendum, nos id non temere, sed consilio dixisse, aut aliter fieri minime potuisse. Sic D. Chrysoft. accusare eos volens, qui sorores adoptivas domi foverent, parumque honestam huius cohabitationis causam esse contenderent, obiurgationis asperitatem hac figura mollivit. Sic enim ait: afferemus autem in medium, quam nos potissimum causam huius cohabitationis suspicemur. Et quaenam illa? Omnino si a scopo aberravero, fas vobis esto, ut me redarguatis. Et quaenam causa? Quis ille praetextus? Videtur mihi mulieris convictus, etiam absque nuptiis ac congressu, voluptatis habere non nihil. Quod si non recte sentio, non est quod dicam. Meam vobis sententiam narro, mox autem non meam solum, sed & illorum dicam: nam & illis sic videtur. Quod inde colliquescit. Tantam enim gloriam, & tanta scandala neutiquam despicerent, nisi ingens quaedam & vehemens cohabitandi voluptas esset. Precor, ut nobis venia detur, desitque indignatio. Neque enim temere & simpliciter inimicos vellem. Non sum tam miser atque aerumnosus, qui temere omnes offendere velim: sed valde doleo ac crucior, & gloriam Dei blasphemari, & multorum salutem propter voluptatem hanc paullatim perire. Et habet voluptas haec maiorem cohabitandi amorem, quam legitimae nuptiae. Quod nunc forte vobis mirum videtur: sed ubi, quod auditis, declarabo, eritis & vos mihi testes.

Et paullo inferius, obiurgationis acrimoniam iterum mollire volens, his verbis utitur: nec valde succenseamus eis, neque difficiles simus & importuni. Nam qui aegrum vult restituere, non hoc agit ira & verberibus; sed aptat magis pharmaca magna cura, & blanda adhortatione. Nobis quamvis illos punire, & eis indignari liceret, utpote in iudicium adscitis ordinem, non tamen hoc facimus: sed medicorum magis, & eorum, qui curare solent, morem sequi lubet. Vnde obsecramus & adhortamur, & eorum, si opus est, genua attingimus, si forte, quod agendum suscepimus, perficiamus. Haecenus Chrysoft.

soft. In cuius verbis satis liquet, quanta arte & consilio occurrat omnibus, quae causae, quam tractabat, obistere possent.

Praeter haec autem, quum res paullo obscurior, aut subtilior, aut etiam illustrior est dicenda, attentio ab auditoribus sine ulla arrogantia & ostentatione petenda est. Breves etiam exclamatiunculae, quae rerum dignitatem, necessitatem, & pondus ostendant, interiici non incommode hac virtute solent. Quum autem quaedam ex iis, quae dicimus, ad viros, quaedam ad uxores, quaedam ad dominos, quaedam ad servos, non nulla ad divites, alia ad pauperes magis pertineant; hoc quoque breviter indicandum est, quo eorum excitet attentionem, ad quos ea potissimum spectant. Iam vero quum aliquid mirabile, incredibile, supraque communem hominum fidem positum narramus, non modo affectus ex rei magnitudine concitandi, sed veritas etiam rei aliqua ratione munienda est, & interdum etiam iureiurando confirmanda. Sic D. Hieronym. sancta, inquit, Melania nostri temporis inter Christianos vera nobilitas, calente adhuc mariti corpusculo, duos simul perdidit filios. Rem dicturus sum incredibilem, sed, teste Christo, non falsam. Lacrimae gutta non fluxit, sed ad pedes advoluta Christi, expeditius, inquit, tibi, Domine, servitura sum, quia tanto me onere liberaisti.

Iam vero B. Iob, rem omnium maxime mirabilem, praesertim suo tempore, dicturus, nempe resurrectionis corporis, & incarnationis dominicae sacramentum, quam apposita praefatiuncula usus est? (a) Quis, inquit, mihi tribuat, ut scribantur sermones mei? Quis mihi det, ut exarentur in libro stilo ferreo, & plumbi lamina, vel celte sculpantur in silice? Subdit deinde rem maxime mirabilem. Scio enim, quod Redemptor meus vivit, & novissimo die de terra surrecturus sum, & quae sequuntur. Id interdum longiori etiam oratione fit. Sic Theodoretus in vita Simeonis Stilitis, quum novum illud & inauditum vitae genus in altissima columna sub dio confidentis, narrare vellet, ne res

adeo

(a) Iob 19.

adeo nova ac mirabilis fide careret, hac similitudine rei fidem fecit. Quemadmodum, inquit, ii, quibus obtigit, ut essent reges hominum, post aliquam temporis conversionem, mutant imagines nummorum, aliquando quidem leonum exprimentes imagines, aliquando autem stellarum, & aliquando angelorum, novo charactere tentantes aurum reddere pretiosius; ita etiam summus rex universorum, veluti quasdam figuras ac characteres, haec nova & multiplicia vivendi instituta pietati veraeque religioni adiiciens, non solum Christianorum, sed infidelium etiam ad laudandum linguas excitat. Haftenus ille.

Sic etiam quisquis beatissimae Catherinae Senensis virtutes celebrare, & admiranda illa divinae familiaritatis indicia, quibus illam sibi Dominus devinxit, narrare parat; quod videlicet illam sibi Christus Dominus mira ratione desponsaverit, quod ab eius pectore abstractum cor tri-duo apud se retinuerit, quod cum ea canonicas horas recitaverit: haec omnia, quae humanam fidem superare videntur, ex immensa Dei bonitate, & mira in sanctos suos caritate, eiusque aliis operibus, maiori admiratione dignis, credibilia facere debet. Haec exempli gratia dicta sint: praeceptio enim haec latissime patet. Quam tamen dicentis acumen & prudentia, & auctorum observatio magis, quam praecepta, explicabunt. Haec enim virtus concionatoris & oratoris propria est: qui, cum rudi frequenter & indocta multitudo agentes, his eam rationibus erudire & excitare debent. Mirus est in hac figura Gregor. Theolog. Ex cuius lectione prudens lector observationis huius rationem magis, quam ex ullis artis praeceptionibus, intelliget, si illius tamen scripta non oscitanter legerit. Quisquis igitur ea, quae Fabius de hac figura praecepit, & quae nos admonuimus, diligenter adnotaverit, & legendis auctoribus observaverit; facile eius rationem & naturam comprehendet.

Ex his ergo, quae haftenus a nobis dicta sunt, liquet, nos collectioni, quam rhetores quinque partibus constare dicunt, quinque alias concionatori maxime utiles

les & necessarias addidisse: nempe affectus, accommodationem, sententias, epiphonemata, & prolepsim: quae tamen non omnes in omni argumentatione cadunt. Quae autem cadant, ex natura rerum, quas tractat, prudens concionator colligere poterit.

Harum autem partium cognitio mire utilis est. Ea namque admonetur concionator, ut, propositionem aliquam probaturus, primum ex locis, quos ante commemoravimus, rationes quaerat, praecipueque ex iis, quos intrinsecos appellari diximus. Deinde rationum confirmationes investiget, quae ab extrinsecis potissimum locis oriuntur. Tertio loco, si natura rei exigat, exornationem adhibebit; quae non ad solam confirmationem, sed ad quamvis aliam argumentationis partem, pertinet. Quarto, inspecta diligenter rerum natura, de quibus dicit, videat, an materiam ei ad tractandos affectus, accommodationes, sententias & epiphonemata suppeditent. Haec enim omnia ex ipsa rerum natura oriuntur: quemadmodum philosophi, ex potentia materiae formam educi, aiunt.

Prolepsis vero, quae confutationis naturam refert, non solum ex natura rerum, quas dicimus, quando videlicet ex illis dubitandi materia nascitur; sed ex auditorum etiam ingeniis & conditione colligitur, quemadmodum paullo ante a nobis est dictum. Has autem figuras, quae ad eloquutionem pertinent, ideo cum inventionis praeceptis copulare voluimus, quoniam, ut paullo ante diximus, ex ipsis, ut ita dixerim, rerum visceribus, de quibus dicimus, oriuntur: quarum materiam res ipsae concionatori dabunt, si eas penitus altiusque consideraverit. Quibus non gravabor exclamationem adiungere, quae etiam inter eloquutionis figuras numeratur, quae tunc aptissime cadit, quum ex ipsa rerum natura velut sponte sua incurrit; ut magis ab ipsa nata, quam dicentis ingenio adscita, esse videatur.

CAP.

CAP. XV.

DE ELOQVVTIONIS GENERE, QVO
argumentationes supra positaë tractandae sunt.

AD plenam absolutamque partis huius tractationem hoc unum desiderari videtur, ut, quando tum de inventione argumentorum, tum de formis earum disseruimus, quo eloquutionis genere, quibusque dicendi figuris in argumentatione uti debemus, breviter aperiamus; ne quidquam sit, quod ad huius doctrinae partem desiderari possit. Qua de re ubi Fabius de syllogismis, ceterisque argumentationum formis, multa dixisset, sic in fine ait: (a) peregrisse mihi videor sacra tradentium artes, sed consilio locus superest. Namque ego ut in oratione syllogismo quidem aliquando uti, nefas non duco; ita, constare totam, aut certe confertam esse aggressionum & enthymematum stipatione, minime velim.

Dialogis enim & dialecticis disputationibus erit similior, quam nostri operis actionibus, quae quidem inter se plurimum differunt. Namque illi homines docti, & inter doctos verum quaerentes, minutius & scrupulosius scrutantur omnia, & ad liquidum confessumque perducunt, ut qui sibi & inveniendi & iudicandi vindicent partes. Nobis ad aliorum iudicia, componenda est oratio, & saepius apud omnino imperitos, atque aliarum certe ignaros litterarum, loquendum est: quos nisi & delectatione allicimus, & viribus trahimus, & non numquam turbamus affectibus, ipsa, quae iusta ac vera sunt, tenere non possumus. Locuples & speciosa vult esse eloquentia: quorum nihil consequetur, si conclusionibus certis, & crebris, & in unam prope formam cadentibus, concisa, & contemptum ex humilitate, & odium ex quadam servitute, & ex copia satietatem, & ex amplitudine fastidium tulerit. Feratur igitur non semitis, sed campis: non uti fontes angustis fistulis colliguntur, sed ut latissimi omnes totis vallibus, fluat,

H

ac

(a) *Quintil. instit. lib. V. cap. 14.*

ac sibi viam , si quando non acceperit , faciat.


Nam quid illa miserius lege velut praeformatas infantibus litteras persequentium , ut Graeci dicere solent , quem mater amictum dedit , sollicite custodientium ? Propositio , ac conclusio , ex consequentibus & repugnantibus non inspiret , non augeat , non mille figuris variet ac verset ; ut ea nasci , & ipsa provenire natura , non manufacta , & arte suscepta , magistrum fateri ubique videantur ? Quis umquam sic dixit orator ? Nonne apud ipsum Demosthenem paucissima huiusmodi reperiuntur ? Quae apprehensa Graeci magis , nam hoc solum nobis peius faciunt , in catenas ligant , & inexplicabili serie connectunt , & indubitata colligunt , & probant confessa , & se antiquis per hoc similes vocant. Deinde interrogati , numquam respondebunt , quem imitentur. Sed de figuris alio loco.

Nunc illud adiiciendum , ne his quidem consentire me , qui argumenta sermone puro & dilucido & distincto , ceterum minime lato ornatoque putant esse dicenda. Namque ea distincta quidem ac perspicua debere esse confiteor : in rebus vero minoribus etiam sermone ac verbis quam maxime propriis , & ex usu. At si maior erit materia , nullum ornatum his , qui modo non obscuret , subtrahendum puto. Nam & saepe plurimum lucis affert ipsa translatio , quum etiam ipsi iurisperiti , quorum summus circa verborum proprietatem labor est , litus esse audeant dicere , qua fluctus alludit. Quoque quid natura magis asperum , hoc pluribus condiendum est voluptatibus , & nimis suspecta argumentatio dissimulatione , & multum ad fidem adiuvat audientis voluptas. Nisi forte existimamus , Ciceronem male in hac ipsa argumentatione dixisse : (a) silere leges inter arma , & gladium nobis interim ab ipsis porrigi legibus. His tamen habendus modus , ut sint ornamento , non impedimento.

Haecenus de praecipua inventionis parte , hoc est , proban-

(a) *Cic. pro Milone.*

bandi ratione , & argumentorum formis , quae in commune dicenda videbantur , perstrinximus : nunc consequens est , ut in sequenti libro de ratione amplificandi , quae huic finitima est , quaeque concionatoribus cum primis necessaria est , differere incipiamus.





LIBER TERTIVS

ECCLESIASTICAE
RHETORICAE,
SIVE DE RATIONE CONCIONANDI:
IN QVO DE AMPLIFICANDI RATIONE,
& affectibus agitur.

CAP. I.

*QVID AMPLIFICATIO AB ARGUMENTATIONE
differat.*

Amplificationem, quam inventionis partem esse constat, ab argumentatione, & probandi ratione, de qua haecenus loquuti sumus, secernere volumus: non quod ab ea modis omnibus seiuncta sit, sed quod argumentatio ad omnia quaestionum genera latissime pateat: in quibus quaerimus, sitne res, an non sit, quid sit, qualis item sit, & cuius rei gratia talis sit, & multa his similia. Amplificatio autem ad certa quaestionum sive propositionum genera contrahitur in quibus de sola rei magnitudine & amplitudine quaeritur. Hoc est, quum ostendere nitimur, aliquid esse in genere suo vehementer indignum, calamitosum, laetum, triste, miserabile, amabile, detestabile, formidandum, vel optandum, & quae sunt eius generis. Hac enim ratione ad affectus concitandos, ad suadendum vel dissuadendum, ad laudandum aut vituperandum viam munimus: ad haec enim tria amplificandi ratio potissimum conducit.

Ita-

Itaque amplificatio, velut argumentatio quaedam, ad certum genus contracta est. Differunt etiam hae duae orationis partes argumentorum tractatione. Argumentatio enim syllogismis utitur, hoc est, genere orationis in orbem quodam modo redacto, quamvis fusius orator, quam dialecticus, syllogismum tractet. Amplificationis autem oratio expositioni & enumerationi, quam argumentationi, similior est. Sic Paullus propositionem hanc, ministri Christi sunt, ut minus sapiens dico, plus ego, laborum suorum enumeratione amplificat his verbis: (a) in laboribus plurimis, in carceribus abundantius, in plagis supra modum, in mortibus frequenter, & cetera, quae deinceps sequuntur. Postremo differunt etiam fine. Argumentationis enim est, fidem facere, & intellectum ad assensum vi argumentationis perducere. Amplificationis autem est, non solum intellectum convincere, ut rem esse in suo genere maximam credat, sed etiam voluntatem ad amandum vel detestandum, vel in quemvis alium affectum inducere.

Inventio autem earum rerum, quae ad amplificandum pertinent, ex eisdem locis, unde argumenta petuntur, sumenda est. Si enim amplificatio, ut paullo ante diximus, velut species quaedam argumentationis est; efficitur sane, ut utriusque inventio ex eisdem locis oriatur. Sed ex his tamen locis quaedam magis ad amplificandum valent, ea videlicet, quae multa in una aliqua re esse ostendunt. Unde loci a partibus, a causis, ab affectibus, & quae his finitima sunt, nempe ab adiunctis, hoc est, antecedentibus & consequentibus, quae omnia exemplis, similibus, & scripturarum, vel sanctorum patrum testimoniis augentur & confirmantur. Quarum rerum exempla paullo post subiiciemus.

Verumtamen hoc in loco ad memoriam revocare necesse est, quod ante diximus, videlicet duplices esse propositiones, quae probantur vel amplificantur; hoc est, hypotheses aut theses, quae latine finitae aut infinitae dicuntur. Finita, sive hypothesis, est, si quis vel obedientiam

H 3

Abra-

(a) 2. Corinib. 11.

Abrahae, filium immolare parantis, vel adulterium, a Davide Vriae uxori illatum, amplificare velit; utraque propositio finita erit, quae videlicet ad has tantum personas pertineat. Contra vero, si quis obedientiam in commune laudare, adulterium vituperare velit; propositio infinita erit, quae videlicet late ad omnia personarum genera pateat. Haec igitur propositio infinita, ex his praecipue locis, quos supra memoravi, argumenta, hoc est, amplificandi rationes, quaerit. Finita vero, quae circumstantiis implicita est, non modo ab his locis, sed ab omnibus etiam circumstantiis rem attollit & amplificat. Quae res in augenda peccatorum gravitate Theologis valde nota est: qui duplices esse circumstantias statuunt: alias, quae in infinitum peccata aggravent, & interdum etiam eorum speciem mutant; quas necessario in peccatorum confessione detegendas aiunt. Alias vero, quae citra infinitum aggravent; quae tamen non sint necessario confitendae. Hoc autem peccatorum exemplo, facile Theologi intelligent, quonam modo virtutum quoque officia, quae certis personis ac temporibus tribuuntur, ex circumstantiis quoque augenda & amplificanda sint, quum eadem contrariorum disciplina sit. Sed operae pretium erit, ut haec ipsa, quae diximus, propositis exemplis illustremus.

CAP. II.

A PARTIBVS AMPLIFICATIO.

A Partibus, prophetae variorum regnorum casus miserandos amplificat: qui, non contenti simplici oratione regni excidium & vastitatem indicasse, calamitates omnes enumerant, quas una illa vastatio complectitur. Sic Ieremias in Threnis (a) Ierosolymorum ruinam, sic etiam Babylonis everSIONem cap. 50. & 51. amplificat. Sic etiam Ezechiel (b) Tyri, & Aegypti, & Assiriorum vastationem lamentatur: dum opes omnes horum regnorum, quae diripien-

(a) *Thren.* 1. (b) *Ezech.* 26. 27. *seqq.*

piendae erant, longa oratione enumerat. Sic etiam Ioab servorum Davidis beneficium, & intempestivas eius lacrimas hac ratione amplificat: (a) confudisti hodie vultus omnes servorum tuorum, qui salvam fecerunt animam tuam, & animam filiorum tuorum, & filiarum tuarum, & animam uxorum tuarum, & animam concubinarum tuarum. Hic aperte videmus rem ab eius partium enumeratione auctam.

Sic etiam Gregorius Theologus, homilia de septem Machabaeis, matris eorum constantiam amplificat; quae, omnibus tormentorum generibus ante illam propositis, de gradu virtutis & constantiae depelli non potuit. Vnde ait: matris vero robur, animique constantiam nihil flectere & emollire ac debilitare potuit. Non instrumenta luxandis artubus accommodata, non rotae propositae, non exquisitissima quaeque tormentorum genera, non ferrearum ungularum acies, non furentes bestiae, non enses, qui acuebantur, non ferventes ollae, non ignis, qui excitabatur, non miscellanea turba, non urgentes satellites, non generis adspectus, non membra, quae discerpebantur, non carnes, quae lacerabantur, non defluentes sanguinis rivi, non flos aetatis, qui absumebatur, non praesentia mala, non imponentes acerbitates. Haecenus ille. Quo in loco a partibus, hoc est, ab enumeratione omnis generis tormentorum, mirabilem huius mulieris constantiam amplificavit.

Ad hunc etiam modum Lactantius Firmianus (b) dominicae crucis acerbitatem ex eius partibus, hoc est, ex cunctis eius membris sauciatis, amplificat. Sic enim Christum Dominum hoc modo loquentem inducit:

*Vertice ad usque pedes me lustra, en adspice crines
Sanguine concretos, & sanguinolenta sub ipsis
Colla comis, spinisque caput crudelibus haustum,
Undique diva pluens vivum super ora cruorem.
Compressos speculari oculos, & luce carentes,
Afflictasque genas: arentem suspice linguam,*

H 4

Fel-

(a) 2. Reg. 19. (b) Carmina sunt incerti auctoris, Lactantio aliquando adscripta.

*Felle venenatam , & pallentes funere vultus.
 Cerne manus clavis fixas , tractosque lacertos,
 Atque ingens lateris vulnus : cerne inde fluorem
 Sanguineum , fossosque pedes , artusque cruentos.
 Fleete genu , lignumque crucis venerabile adora.*

Haecenus ille. Quo in loco vides totum , enumeratis partibus , quas integrantes appellant , amplificatum.

Magis enim rem auget singularum partium distincta enumeratio , quam confusa totius rei propositio. Hac eadem ratione secundus de rerum copia commentarius hanc propositionem amplificat : rem omnem luxu perdidit. Eam sententiam in summa comprehensam , quasque convolutam , hunc ad modum licebit evolvere , si plurimas possessionum formas enumeremus , & varias perdendae rei vias explicaverimus. Quidquid vel matris , vel patris nomine hereditate obvenerat , quidquid aliorum affinium morte contigerat , quidquid ex uxoris dote , quae quidem neutiquam erat vulgaris , accesserat , quidquid ex legatis accreverat , accreverat autem permultum , quidquid ex principis acceperat liberalitate , quidquid peculii castrensis conflaverat : pecuniam omnem , vasa , vestes , fundos , agros , una cum ipsis villis & pecoribus : breviter , rem omnem seu mobilem , seu soli , denique familiam etiam ipsam in foedissimis scortorum amoribus , quotidianis comestationibus , sumptuosis obsonationibus , nocturnis perpotationibus , popinis , cupediis , unguentis , alea , lusibus , paucis diebus ita absumsit , abligurivit , absorbit , ut ne teruntium quidem sibi reliquum fecerit. Hic duo illa verba , *rem omnem* , & *luxu perdidit* , suis partibus explicantur.

His igitur rationibus totum , enumeratione partium , quae sub illo continentur , augetur. Totum autem appellamus , primum quod multas sub se partes claudit , ut in hoc exemplo proposito luxus ; quae vox , quam multa in se vitia complectatur , explicatum est. Deinde totum appellamus , quod universale signum habet adiunctum , ut in eodem exemplo , rem omnem perditam , dicimus : in quo omnia , quae sub illo universitatis signo continentur , enumeramus.

Hoc

Hoc dialectici descensum & ascensum appellant : quibus vel a toto ad singularem enumerationem , vel a singularibus ipsis ad totum argumentamur. Postremo totum appellamus , quod non singularibus rebus , sed partibus , quas dialectici integrantes vocant , complectitur. Cuius rei exemplum ex Lactantio proposuimus : ubicumque igitur totum aliquod ex his tribus generibus inciderit , si res ita exigat , hoc modo amplificari poterit. Exempla sunt vel negligenter attendentibus , in sanctis litteris , & sanctorum patrum scriptis , praesertim apud Chrysostom. & Gregor. Theol. passim obvia.

CAP. III.

AB ADIVNCTIS : HOC EST , ANTECEDENTIBVS , comitantibus , & consequentibus.

AB antecedentibus , quae sub adiunctorum ambitu continentur , rem amplificamus , quoties non contenti semel exitum rei protulisse , ex quo reliqua , quae praecesserunt , intelligi possunt , sed singulatim ea quoque commemoramus , per quae ad eum exitum perventum est. Huius praeceptionis in eodem commentario hoc proponitur exemplum. Ex ea virgine perditissimus & profligatissimus adolescens filium sustulit. Hanc sententiam ab antecedentibus sic & dilatare & amplificare licebit. Eam virginem , quod esset singulari forma , misere deperibat. Deinde , amoris impatiens , simplicem puellae animum promissis sollicitavit , muneribus corrupit , blanditiis delinquit , officiis in mutuum amorem pellexit , improbitate vicit , denique consuetudinem cum ea habuit. Aliquanto post tempore uterus virginis coepit intumescere , fetu videlicet concepto : demum puerum peperit. Aliud exemplum. Cicero Catilinae conatus oppressit. Eam sententiam hac ratione dilatare atque amplificare licebit. Catilinae nefarios conatus per iuvenes perditissimos , totius Romanae civitatis exitum atque internecionem molientes , M. Tullius Cicero consul sua

sagacitate statim odoratus est, singulari vigilantia peruestigavit, summa prudentia deprehendit, miro in rempub. studio prodidit, incredibili eloquentia convicit, gravissima auctoritate repressit, armis exstinxit, magna felicitate sustulit.

Hac autem amplificandi ratione, ut ante diximus, in iis praecipue rebus uti poterimus, in quibus, explorata eius natura, multa alia praecessisse intelliguntur. Causae enim, sive naturales, sive morales, effectus suos antegrediuntur, per quas ad eos explicandos pervenimus. Hac autem ratione locum illum Luc. 2. tractare poterimus, responsum acceperat Simeon a Spiritu sancto, non visurum se mortem, nisi prius videret Christum Domini. Ante hoc enim divinum responsum multa praecessisse credendum est. Nam primum vir sanctissimus, divinae gloriae & salutis animarum amore incensus, vehementer angebantur, quum universum paene mundum infidelitatis tenebris obrutum animadvertet, & in parvo illo Iudaeae angulo iustitiam paene exstinctam, & pro vera religione superstitionem fere & hypocrisim dominari. Sciebat autem, summum tantorum malorum remedium in unius Salvatoris adventu positum esse, qui evangelii lumen ad revelationem gentium erat praelaturus. Clamabat igitur, & gemitibus inenarrabilibus eius adventum accelerari postulabat, sciens scriptum esse: (a) qui reminiscimini Dominum, ne taceatis, & ne detis silentium ei, donec stabiliat, & ponat Ierusalem laudem in terra.

His ergo sancti viri precibus, his gemitibus, his continuis lacrimis pius & misericors Dominus, qui (b) respicit orationem humilium, & non spernit preces eorum, hunc gratissimum & iucundissimum illi responsum dedit, non visurum se mortem, nisi prius videret Christum Domini. Hac item ratione beatissimi patris Dominici mentem atque propositum, quo praedicatorum ordinem in Ecclesia erigi postulavit, amplificare licebit. Neque enim hoc tam praeclarum inventum vir sanctissimus excogitare potuit, ni-

(a) *Isai. 62.* (b) *Psalms. 101.*

nisi prius arderet, quasi facula, animarum pereuntium zelo, multisque ieiuniis, precibus & lacrimis hoc ipsum a Domino assidue postularer.

A comitantibus vero & consequentibus rem amplificamus, quum ea, siue mala, siue bona, siue commoda, siue incommoda, quae rem aliquam semper aut frequenter comitantur aut consequuntur, enumeramus. Vt si quis accusare aliquem velit, quod is alicuius belli auctor exstiterit, hoc modo eius temeritatem amplificabit. Exhaustum in barbaros milites aerarium, fractam laboribus iuventutem, proculcatas segetes, abacta pecora, incensos passim vicos ac villas, desertos agros, everfa moenia, compilatas domos, direpta fana, tot orbos senes, tot orphanos liberos, tot viduas matronas, tot virgines indigne constupratas, tot adolescentium licentia depravatos mores, tantum funerum, tantum luctus, tantum lacrimarum: praeterea extinctas artes, oppressas leges, oblitteratam religionem, confusa divina, humanaque omnia, corruptam civitatis disciplinam. Universum, inquam, hoc malorum agmen, quod ex bello nascitur, tibi uni feremus acceptum, si quidem belli fueris auctor.

Est autem hic a comitantibus & consequentibus locus mire utilis, vel ad virtutes ex iis, quae illis conveniunt, amplificandas, vel ad vitia quoque exaggeranda, quum ea mala, quae ab illis proficiscuntur, enumeramus. Qui quidem locus, ab eo, qui est ab effectibus & adiacentibus, oriri videtur. Est autem haec amplificandi ratio concionatori valde necessaria, praesertim quum ad virtutis studium & amorem hortatur, aut a vitiis deterret: quod ad genus suavorum vel dissuasorum pertinet. Sic D. Cyprianus, sermone de zelo & livore, invidiae virus elegantissime exaggerat his verbis: late patet zeli multiplex & fecunda perniciēs, radix est omnium malorum, fons cladum, seminarium delictorum, materia culparum: inde odium surgit, animositas inde procedit. Avaritiam zelus inflamat, dum quis non potest suo esse contentus, videns alterum ditio-
rem: ambitionem zelus excitat, dum cernit quis alium in
ho-

honoribus altiore. Hinc dominicae vinculum pacis rumpitur, hinc caritas fraterna violatur. Hinc adulteratur veritas, unitas scinditur, atque in haereses & schismata profilitur, dum obrectatur sacerdotibus, dum episcopis invidetur, dum quis queritur, aut se non ordinatum, aut indignatur, alterum se ferre praepositum. Haëtenus ille.

Ab his autem tribus locis, nempe ab antecedentibus, comitantibus, & consequentibus, Oforius episcopus humanae vitae miseriam elegantissime describit his verbis: quam gravis & acerba sit humanae vitae conditio, quam multis incommodis agitata, nemo poterit vel explicando consequi, vel enumerando percernere. Vt enim a natali cuiusque die capiamus exordium, omnesque vitae partes oratione perstringentes, ad exitum tandem illius veniamus, horam nullam videbimus aut dolore vacuam, aut labore solutam, aut metu liberam; sed omnem aetatem infinitis difficultatibus affectam, & summis curis & angoribus implicatam.

Vitae namque principium a fletu ducimus, devinctisque membris omnibus, in terram abiecti, labores imensos & ploratus auspicamur. Quum autem reliqua animantia praesidiis naturae tecta atque vestita in lucem prodeant, solum hominem nudum, & ab omnibus rebus inopem, cernimus, atque miserabiliter impeditum in vitae primordio vagientem, statusque sui miseriam in ipso statim initio lamentantem. Quis autem poterit morborum vim & multitudinem, qui in illam naturam teneram, & imbecillam confestim incurrunt, oratione complecti? Quae cura nutrices, quae sollicitudo parentes afficiat? Quae pericula sint pueris infantibus primis illis mensibus intenta? Iam vero quum aetate progressi, metu & cupiditate magis atque magis turbari incipiunt; omnia mala, quae minus antea sentiebant, fiunt eis quotidie graviora. Quum autem ad pubertatem perveniunt, tunc ingens vis tempestatis existit, quae miseros homines exagitat, nec eos ullo in loco consistere patitur.

Hinc enim acerbi amores invadunt, inde turbulenta dis-

diffidia statum animi convellunt. Quid quum amarissimae voluptates, multis doloribus emtae, nervos omnes incidunt? Quid quum dolores admoti totum hominem impetu prosternunt? Quid deinde quum adulta aetate dominandi libido inflammat animum? Quid quum invidia eundem conficit atque consumit? Adde, si lubet, nuptiarum molestias, familiae labes, vitae sollicitudines, fori contentiones. Adde lubricam amicorum fidem, sociorum prodiciones, rerum civilium turbines atque procellas. Quid autem ipsius aetatis extremae morbos atque molestias, & corporis exhausti deformitatem referam? Quid denique cadaveris ipsius horrificam speciem commemorem? Est ne aliquid in vita vel odore tetrius, vel adspectu truculentius, vel contagio pestilentius? Sic igitur in summa vitae brevitate, vis ingens malorum circumquaque volitat: laborem labor excipit, dolor ex dolore necitur, maerorem atque luctum gravior quidam luctus saepe consequitur. Vnde colligitur, nihil esse in terris homine calamitosius. Haecenus Orosius. In hoc autem exemplo primum quidem ab humanae vitae partibus, suo ordine descriptis, deinde ab adiunctis unicuique parti miseriis tota res amplificatur.

CAP. IV.

DE CAUSIS RERUM AMPLIFICATIO.

A Causis D. Basilii passionis ac doloris magnitudinem sanctorum quadraginta martyrum amplificat, diligenter causas omnes, quae dolorem illum augere possent, ob oculos ponens. Quum enim, inquit, (a) tyrannus, martyrum constantiam & respondendi libertatem vidisset, in iram excanduit: expendebatque secum, quamnam machinam excogitaret, ut longam simulque amaram ipsis mortem construeret. Invenit itaque, & videte quam gravem. Quum enim considerasset regionis naturam, quod frigore horrida esset, & anni tempus, quod hibernum: observa-

ta

(a) *Homil. 40. init.*

ta nocte , in qua maxime malum ipsum augesceret , & alias tunc aquilo in ipsa spiraret , iussit omnes denudatos sub dio in media urbe congelatos mori. Novistis autem omnes, qui hiemem experti estis , quam intolerabilis ea tormenti species existat. Neque enim possibile est , aliis ipsam demonstrari , quam iis , qui iam experimento exempla eius apud se reposita habent. Nam corpus , frigori expositum, primum quidem totum lividum est, sanguine congelato. Deinde agitur ac effervescit ; dentes colliduntur , fibrae convelluntur , & tota moles involuntarie contrahitur.

Dolor autem quidam acris , & afflictio inenarrabilis, usque ad medullas ipsas progrediens , intolerabilem facit his, qui congelantur , doloris sensum. Deinde extremitates ipsius amputantur , quum extremae partes velut ab igne exurantur. Caliditas enim ab extremis corporis fugata , & ad profundum diffugiens , partes , a quibus discedit , mortuas relinquit : eas vero , ad quas detruditur , doloribus affligit, morte paullatim per congelationem procedente. Tunc itaque sub dio pernoctare condemnati sunt , quando stagnum, circum quod urbs habitatur, in qua hoc certamen sancti decertarunt , velut planities aliqua ad agitandos equos , expositum erat : quum glacies ipsum transmutasse , & per frigus ad continentem ac firmam terram redactum , accolis securam super dorsum viam exhibebat. Fluvii vero perpetuo fluentes , glacie ligati , a fluxu cessarant ; teneraeque aquae natura ad lapidum duritiam transmutata erat. Acres autem aquilonis flatus omne animatum ad mortem urgebant. Tunc itaque ubi mandatum audivissent , vide mihi , virorum hic insuperabilem constantiam , cum gaudio , abiecta etiam postrema tunica , unusquisque ad mortem per frigus procedebant , velut ad spolia diripienda se mutuo inhortantes. Haecenus Basilus: qui hac ratione, causis omnibus doloris explicatis , doloris magnitudinem , ac proinde martyrum constantiam , exaggeravit.

§. I.

AB EFFECTIBVS AMPLIFICATIO.

AB effectibus autem, qui interdum consequentibus, vel comitantibus adnumerantur, frequentissime rem amplificamus, quum omnem, ut ita dicam, eius sobolem & fecunditatem ob oculos ponimus. Hoc modo D. Bernard. considerationis studium ex fructibus, quos illa parit, commendat. Sic enim ait: primum quidem consideratio ipsum fontem suum, id est, mentem, de qua oritur, purificat: deinde regit affectus, dirigit actus, corrigit excessus, componit mores, vitam honestat & ordinat. Postremo divinarum pariter & humanarum rerum scientiam confert. Consideratio est, quae confusa discriminat, sparsa colligit, secreta rimatur, verum investigat, verisimilia examinat, ficta & fucata explorat. Haec est, quae agenda praecordinat, acta recogitat, in prosperis adversa praesentit, in adversis quasi non sentit. Haecenus ille.

Hoc autem loco ab effectibus ducto, quo commoda aut incommoda, quae ex rebus consequuntur, enumeramus, cum alias, tum maxime in suasoriis & dissuasoriis concionibus utimur. Ex iis namque rem, de qua agimus, vel esse amplectendam, si suademus, vel fugiendam, si dissuasus, probare contendimus.

§. II.

*DE AMPLIFICATIONE A COMMVNIBVS LOCIS,
& circumstantiis simul.*

Plenissima tamen amplificatio est, quae a locis, quos supra recensuimus, simul & ab omnibus rerum & personarum circumstantiis proficiscitur. Eius commodissimum exemplum exstat apud D. Thom. 3. *part. quæst. 46.* in quo, dominicae passionis dolorem omnium maximum fuisse, ex omnium partium & causarum & circumstantiarum enumeratione probat.

F. Q.

Est autem hoc ipsum exemplum commodissimum, quodque apertissime, quaecumque haecenus diximus, declarat. In quo etiam manifeste apparet, amplificationem esse argumentationem quamdam, qua idem sanctus doctor hanc propositionem probat, nempe dominicae passionis dolorem fuisse omnium maximum. Itaque studiosum lectorem ad hoc exemplum remitto.

Eadem ratione mundi conversionem, per apostolos factam, cum ex locis, quae ante commemoravimus, tum ex rerum & personarum circumstantiis amplificamus. Ex persona quidem apostolorum, quod exigui numero, genere infimi, lingua barbari, armis, opibus, & potentia, atque terrena sapientia destituti, quique profiterentur, se nihil scire, nisi Christum, & hunc quidem supplicio crucis affectum. A re vero, quod ea praedicarent, quae essent ad agendum aspera, multoque magis ad credendum difficilia: nempe hominem, inter latrones crucifixum, esse summum Deum, rerum omnium conditorem, & alia, quae de beatissima Trinitate, & sacra Eucharistia, & corporum resurrectione fides nostra praedicat. Praemia vero, quod ad movendis causae rationem pertinet, vix ulla in hac vita proponebant, nisi vincula, verbera, exsilia, bonorum proscriptiones, mortes, & cruciatus religionis gratia sustinendos. Contra vero ex persequentium personis rei magnitudo augetur: quod essent reges, imperatores, populi, nationes, ac postremo omnes omnium ordinum homines. Sed quonam modo? Ferali crudelitate, immani odio, & incredibili furoris impetu. Patres etiam in filios, & viri in uxores atrocissime saeviebant.

Sed quibus machinis & instrumentis adversus illos dimicabant? Hoc D. Cyprianus explicat his verbis: innoxios, iustos, Deo caros, domo privas, patrimonio spolias, catenis premis, carcere includis, gladio, bestiis, ignibus punis. Admoves laniandis corporibus longa tormenta, multiplicas lacerandis visceribus numerosa supplicia: nec feritas & immanitas tua usitatis potest contenta esse tormentis. Excogitat novas poenas ingeniosa crudelitas. Sed videamus

ta-

tamen, quid iis tot machinis atque tormentis mundus profecerit. Tantum abest, ut virtutem sanctorum, apostolorum atque martyrum infringere potuerit; ut vincas illis manus porrexerit, atque, idolorum templis everfis, Christi crucem adoraret, eius paupertatem & patientiam imitari, & omnes mundi opes atque divitias & carnis oblectamenta respuere, & cruciatus omnes propter Christi amorem amplecti cœperit. Hoc exemplo cernere licet, quantum ad res insignes amplificandas conducat, varias, tum rerum, tum personarum, circumstantias diligenter excutere.

Simili ratione D. Chrysostomus ex omnibus circumstantiis, diligentissime congestis, calamitatem sancti patriarchae Iacob exaggerat, quum ei Ioseph filii mors a ceteris filiis nuntiata esset. Sic enim ait: quum autem adolevisset amantissimae uxoris filius, solarique illius desiderium huius praesenti & iugi contubernio speraret, tunc sibi multiplices parantur clades: fratres enim illius, tunicam intinctam sanguine patri ostendentes, vario illum luctu confecerunt. Neque enim solam lugebat mortem, sed ipsum quoque mortis genus: plurimaeque erant, quae illius animum confunderent; quod amatae illius coniugis filius, quod melior reliquis, quod maxime dilectus, quod in ipso aetatis flore, quod ab eo missus, quod nec in domo, neque in lecto, nec patre coram assistente, nec discens aliquid & audiens, quod non communi morte omnium, quod vivens a ferarum immanitate discerptus fuerat, quod ne reliquias quidem illius reperire poterat, & humo condere: ista illi non in iuventute contigissent, quando melius ferre potuisset, sed in senectute ultima. Erat miserandum omnino spectaculum, videre canos verendos pulvere foedatos, simileque pectus discisa tunica nudatum, lamentaque admittentia consolationem nullam: (a) scidit enim, inquit, Iacob vestimenta sua, & circumposuit cilicium lumbis suis, lugebatque filium diebus plurimis. Haec tenus Chrysostomus: qui in excutiendis omnibus circumstantiis mirus artifex est.

I

Si

(a) *Genes. 37.*

Si quis autem appositissima, & elegantissima huius amplificationis exempla videre cupit, legat eiusdem sancti patris secundum & tertium de providentia libros, in quibus, ut Stagiritem, monachum arrepticium, consolaretur, sanctorum patriarcharum Noë, Abrahæ, Iacob, Moysi ac Davidis labores & calamitates & persecutiones, expositis & amplificatis omnibus personarum & rerum circumstantiis, divina quadam orationis ubertate & facundia exaggerat. His namque exemplis multo magis, quam artis praeceptionibus, concionator amplificandi rationem, quae maxime ad omnia valet, adicere poterit.

Ceterum quae haecenus dicta sunt, ad inveniendi rationem pertinent: hoc est, unde argumenta sumi debeant, quibus, quod volumus, amplificare valeamus. His autem varias amplificandi rationes adiungemus, quas Quintilianus enumerat, quae huius loci propriae esse videntur.

C A P. V.

DE MODIS AMPLIFICANDI ex Quintiliano.

Prima est igitur amplificandi vel minuendi species, in ipso rei nomine, ut quum eum, qui sit caesus, occisum: eum qui sit improbus, latronem; contraque eum, qui pulsavit, attigisse; qui vulneravit, laesisse dicimus. Haec autem prima amplificandi ratio ad hyperbolem pertinere videtur, de qua suo loco dicemus, quae rebus dare solet excedentia fidem nomina. Quod maxime naturale & usitatum est his, qui aliquid augere aut minuire conantur; ut supra, vel citra id, quod res habet, oratio feratur.

Hoc autem genus increfcit, ac fit manifestius, si ampliora verba cum ipsis nominibus, pro quibus ea positi sumus, conferantur. Vt Cicero in Verrem: (a) non enim

(a) *Accus. lib. III.*

enim furem , sed ereptorem : non adulterum , sed expugnatorem pudicitiae ; non sacrilegum , sed hostem sacrorum , religionumque ; non siccarium , sed crudelissimum carnificem civium , sociorumque in vestrum iudicium adduximus. Illo enim modo , ut sit multum , hoc etiam plus ut sit , efficitur.

Quattuor tamen maxime generibus video constare amplificationem , incremento , comparatione , ratiocinatione , congerie. Incrementum est potentissimum , quum magna videntur , etiam quae inferiora sunt. Id aut gradu uno fit , aut pluribus : per id venit non modo ad summum , sed interim quodam modo supra summum. Omnibus his sufficit vel unum Ciceronis exemplum : (a) facinus est , vincere civem Romanum ; scelus , verberare ; prope parricidium , necare : quid dicam , in crucem tollere ? Verbo satis digno tam nefaria res appellari non potest. Nam etsi tantum verberatus esset , uno gradu increverat , ponendo etiam id esse facinus , quod erat inferius. Et si tantum occisus esset , per plures gradus adscenderat. Quum vero dixerit : prope parricidium necare , supra quod nihil est ; adiecit : quid dicam , in crucem tollere ? Ita quum id , quod maximum est , occupasset ; necesse erat , in eo , quod ultra est , verba deficere.

Hac autem amplificandi ratione in iis rebus uti possumus , quae multa etiam in eodem genere magna sub se comprehendant : quale est admirandum atque omni laude praedicandum redemptionis nostrae beneficium. Magnum est enim , quod propheta quoque miratur , quum ait : (b) quid est homo , quod memor es eius , aut filius hominis , quoniam visitas eum ? Maius autem , quod Moses inauditum ab exordio mundi fuisse ait , ut populus Deum audiret de medio ignis ad homines loquentem , & caelestibus ipsum praeceptis imbuentem. Quod si hoc adeo magnum & mirabile est ; quid erit , Deum ipsum propter hominum salutem mortale corpus induere , cum hominibus in terra versari , ab hominibus vinciri , caedi & re-

(a) *Accus. in Verrem, lib. VII.* (b) *Psal. 8.*

probari? Quid vero in crucem inter maleficos & sceleratos homines suspendi? Hanc tantam divinae bonitatis dignationem quae vis orationis pro meritis amplificare queat?

Fit & aliter supra summum adiectio: ut apud Virgilium de Lauso: (a)

..... *quo pulchrior alter*

non fuit, excepto Laurentis corpore Turni.

Summum est enim, quod pulchrior alter non fuit. Huic deinde aliquid supra positum est.

Tertius quoque est modus, ad quem non per gradus itur; ut quod non est plus, quam maximum, sed quo nihil maius est: matrem tuam occidisti. Quid dicam amplius, matrem tuam occidisti? Nam & hoc augendi genus est, tantum aliquid efficere, ut non possit augeri.

Crescit oratio minus aperte, sed nescio an hoc ipso efficacius, quum citra distinctionem in contextu & cursu semper aliquid priore maius insequitur, ut de vomitu Antonii Cicero: (b) tu istis faucibus, istis lateribus, ista gladiatoria totius corporis firmitate, tantum vini in Hippiae nuptiis exhauseras, ut tibi necesse esset, in populi Romani conspectu vomere postridie... Si inter coenam intuitis immanibus illis populis hoc tibi accidisset, quis non turpe duceret? In coetu vero populi Romani, negotium publicum gerens, magister equitum, cui ructare turpe esset, vomens frustis esculentis, vinum redolentibus, gremium suum, & totum tribunal implevit. Singula incrementum habent: per se enim deforme erat, vel non in coetu vomere, in coetu etiam non populi, populi etiam non Romani, vel si nullum negotium ageret, vel si non publicum, vel si non magister equitum. Sed alius divideret haec, & circa singulos gradus immoraretur: hic in sublime etiam currit, & ad summum pervenit, non nixu, sed impetu.

Verum ut haec amplificatio in superiora tendit, ita, quae fit per comparisonem, incrementum ex minoribus

pe-

(a) *AEneid. lib. VII. vers. fin.* (b) *In M. Antonium Philip. II.*

petit. Augendo enim quod est infra, necesse est, ut extollat id, quod supra positum est. Haec autem amplificandi ratio ab imparium comparatione sumitur, quae dialectici argumenta a minori vel maiori ducta vocant: nisi quod quum argumenta sunt, probant aliquid, hic vero probando amplificant, & rem maiorem esse, demonstrant. Hac autem amplificandi ratione qui dicit, pictorum artem atque sollertiam imitatur; qui ubi insignem aliquem colorem eminere inter ceteros volunt, alium ei substernunt, qui illum magis conspicuum reddat.

Ad hunc ergo modum qui dicit, exempla & similia requirit: quorum comparatione res, quam attollere cupit, maxima videatur. Huius rei exempla in litteris sanctis passim reperiuntur. Sic enim Dominus apud Ieremiam, (a) exemplo Rechabitarum, populi sui intemperantiam & inobedientiam amplificat. Idemque apud eundem, eiusdem populi perfidiam acri & figurata oratione, gentilium exemplo, amplificat, quum ait: (b) transite ad insulas Cethim, & in Cedar mittite, & considerate vehementer, & videte, si factum est huiusmodi, si mutavit gens Deos suos, & certe ipsi non sunt Dii, populus autem meus mutavit gloriam suam in idolum. Obstupescite caeli super hoc, &c. Sic etiam Dominus, Iudaeorum caecitatem & ingratitudinem, exemplo Ninivitarum, & reginae Sabaeorum, declarat, praesertim quum personae circumstantiam subdit: (c) ecce plusquam Ionas hic. Et: (d) ecce plusquam Salomon hic.

Illud autem in huiusmodi comparationibus curandum, ut utriusque partis circumstantias, quae rem attollere possunt, diligenter excutiamus. Non solum enim tota totis, sed etiam partes partibus comparantur. Sic in Catilinam Cicero: (e) an vero vir amplissimus Scipio, pontifex maximus, Tiberium Graccum, mediocriter labefactantem statum reipublicae, privatus interfecit: Catilinam vero, orbem terrae caede atque incendio vastare cupientem, nos con-

I 3

su-

(a) *Ierem.* 35. (b) *Ierem.* 2. (c) *Matth.* 12. (d) *Ibidem.*
(e) *Orat.* I.

sules perferemus? Hic & Catilina Graccho, & status reipublicae orbi terrarum, & mediocris labefactatio caedi, incendiis & vastationi; & privatus consulibus comparatur: quae si quis dilatare velit, plenos per singula locos habent.

Sic D. Cyprianus (a) hoc argumentum, a minori ductum, nempe, si Dominus delinquentem servum punit, cur Deus de peccante homine supplicium non sumat; collatis circumstantiis, hoc modo amplificat. Ipse de servo tuo exigis servitium; & homo hominem parere tibi & obedire compellis; & quum sit vobis eadem sors nascendi, conditio una moriendi, corporum materia consimilis, animarum ratio communis, aequali iure & pari lege vel veniatur in hunc mundum, vel de hoc mundo postmodum recedatur: tamen nisi pro arbitrio tuo tibi serviatur, nisi ad voluntatis imperium pareatur, imperiosus, & nimius servitutis exactor, flagellis verberas; fame, siti, nuditate, frequenter ferro & carcere, affligis & crucias, & non agnoscis Dominum Deum tuum, quum sic exerceas ipse dominatum. Haecenus Cyprianus.

Hac eadem amplificandi ratione, & virtutes virtutum, & vitia vitiorum comparatione, ex omnibus circumstantiis amplificare solemus. Ad hunc enim modum idem Cyprianus, gravius schismaticorum, quam lapsorum, hoc est, eorum, qui idolis sacrificarent, crimen esse, demonstrat his verbis: peius hoc crimen est, quam quod admisisse lapsi videntur: qui tamen, in poenitentia criminis constituti, Deum plenis satisfactionibus deprecantur. Hic Ecclesia quaeritur & rogatur, illic Ecclesia impugnatur. Hic potest necessitas fuisse, illic voluntas tenetur in scelere. Hic qui lapsus est, sibi tantum nocuit, illic qui haeresim vel schisma facere conatus est, multos secum trahendo decepit. Hic animae unius est damnum, illic periculum plurimorum. Certe, peccasse se, & hic intelligit, & lamentatur, & plangit: ille, tumens in peccato suo, & in ipsis suis delictis placens, a matre filios segregat, & oves a pastore sollicitat, & Dei sacramenta disturbat. Et quum
la -

(a) *Contra Demetr.*

lapsus semel peccaverit, ille quotidie peccat. Postremo lapsus, martyrium consequutus, potest regni promissa percipere: ille, si extra Ecclesiam fuerit occissus, ad Ecclesiae non potest praemia pervenire.

Est & alius amplificandi modus, cui Fabius ratiocinationis nomen imposuit: (a) quod videlicet haec amplificatio, alibi posita, alibi valeat; &, ut aliud crescat, aliud augeatur: atque inde ad id, quod extolli volumus, ratio deducitur. Obiecturus Antonio Cicero merum & vomitum, (b) tu, inquit, istis faucibus, istis lateribus, ista gladiatoria totius corporis firmitate. Quid fauces & latera ad ebrietatem? Minime sunt otiosa. Nam respicientes ad haec possumus aestimare, quantum ille vini in Hippiae nuptiis exhausit, quod ferre & concoquere non posset illa gladiatoria corporis firmitate. Ergo si ex alio colligitur aliud, nec improprium, nec inusitatum nomen est ratiocinationis... qua ex insequentibus amplificatio ducitur. Siquidem tanta vis fuit vini erumpentis, ut non casum afferret aut voluntatem, sed necessitatem, ubi minime deceret, vomendi, & cibus non recens, ut accidere interim solet, redderetur, sed qui usque in posterum diem redundaret.

Idem hoc praestant, quae antecesserunt. Nam quum Aëolus a Iunone rogatus, (c)

..... cavum conversa cuspide montem
impulit in latus, ac venti, velut agmine facto,
qua data porta, ruunt;

apparet, quanta sit futura tempestas.

Huc etiam pertinet, quum res atrocissimas, quasque in summam ipsi extulimus invidiam, elevamus consulto, quo graviora videantur, quae sequutura sunt, ut a Cicerone factum est, quum diceret: (d) levia sunt haec in hoc reo crimina: metum virgarum navarchus nobilissimae civitatis pretio redemit, humanum est: alius, ne securi feriretur, pecuniam dedit, usitatum est. Non vult populus

I 4

Rom.

(a) *Instit. lib. VIII. cap. 4.* (b) *In M. Ant. Philip. II.* (c) *Æneid. lib. I.* (d) *Accus. in Verrem, lib. V.*

Rom. obsoletis criminibus accusari Verrem : nova postulat , inaudita desiderat ; non de praetore Siciliae , sed de crudelissimo tyranno fieri iudicium arbitratur. Hoc in loco Cicero ratiocinatione usus est , qua colligerent audientes , quantum illud esset , quod inferebatur ; cui comparata haec , humana viderentur , atque usitata. Hoc quidam concessionem vocant : quum is , qui dicit , iniquum aliquid pati atque concedere videtur , ut quae deinde dicturus est , graviora appareant.

Sic D. Cyprianus contra Christi hostem Demetrianum , parum est , inquit , quod furentium varietate vitiorum , quod iniquitate feralium criminum , quod cruentarum compendio rapinarum vita vestra maculatur , quod superstitionibus falsis religio vera subvertitur : adhuc insuper Dei servos , & maiestati ac nomini eius dicatos , iniustus persecutionibus flagellatis. Satis non est , quod tu ipse Dominum non colis : adhuc insuper eos , qui colunt , sacrilega infestatione persequeris ? Hic augendi modus dissimili ratione idem efficit , quod incrementum , de quo superius diximus. In incremento enim magna facinus , quae antecesserunt ; ut maius appareat , quod deinde augere volumus. Hic autem , quae vere maxima sunt , leviamus & extenuamus , ut eorum comparatione longe maius esse videatur , quod amplificare volumus. Sic etiam (a) solet ex alio aliud augeri , ut quum Annibalis bellicis laudibus , ampliatur virtus Scipionis ; & fortitudinem Gallorum Germanorumque miramur , quo sit maior C. Caesaris gloria.

Illud quoque est ex relatione ad aliquid , quod non eius rei gratia dictum videtur , amplificationis genus. Tale est illud : (b) non putant indignum Troiani princeps , Graios , Troianosque propter Helenae speciem tot mala , tanto temporis spatio sustinere. Quenam igitur illa forma credenda est ? Non enim hoc dicit Paris , qui rapuit , non aliquis iuvenis , aut unus e vulgo , sed senes , & prudentissimi , & Priamo assidentes. Verum & ipse rex , decenii bello exhaustus , amissis tot liberis , imminente summo

dis-

(a) *Quintil. instit. lib. VIII. cap. 4.* (b) *Homer. Iliad. lib. III.*

discrimine, cui faciem illam, ex qua tot lacrimarum origo fluxisset, invisam atque abominandam esse oportebat, & audit haec, & eam filiam appellans, & iuxta se locans, & excusat etiam, atque sibi esse malorum causam negat.Quin ex instrumento quoque heroum illorum magnitudo aestimanda nobis datur. Ad hoc pertinet Clypeus Aiakis,(a) & hasta Achillis.(b) Qua virtute egregie est usus in Cyclope Virgilius:(c) nam quod illud corpus mente concipiam, cuius trunca manum pinus regit? Quid? quum vix lorica duo multiplicem connixi humeris ferrent; quantus Demoleos, qui, indutus eam, (d) cursu palantes Troas agebat? Ad hunc autem modum in lib. Reg. (e) proceritas corporis & fortitudo Goliae ex hasta eius, quod esset quasi liciatorium textentium, & lorica, quae erat quinque millium siclorum ponderis, demonstratur. Et Deuter. 3. eadem corporis proceritas regis Basan, ex ferrei lecti eius magnitudine, qui novem cubitos longitudinis, & quatuor latitudinis haberet, ostenditur. Haec autem corporum & virium amplificatio, aliam quoque parit amplificationem, nempe Davidis, qui Goliath interfecit, & Israëliti populi, immo divinae virtutis, qua is regem adeo potentem superavit. Est hoc simile illi, quae emphasis dicitur, sed illa ex verbo, hoc ex re coniecturam facit; tantoque plus valet, quanto res ipsa verbis est firmior.

Potest adscribi amplificationi congeries quoque verborum ac sententiarum idem significantium. Nam etiamsi non per gradus ascendant, tamen velut acervo quodam allevantur. Tale est illud Ciceronis: (f) quid enim tuus ille Tubero districtus in acie pharsalica gladius agebat? Cuius latus ille mucro petebat? qui sensus erat armorum tuorum? quae tua mens, oculi, manus, ardor animi? quid cupiebas? quid optabas? Simile est hoc figurae, quam Synathrismum vocant. Sed illic plurium rerum est congeries, hic unius multiplicatio. Haec etiam crescere solet, verbis omnibus altius atque altius insurgentibus: (g) aderat ianitor car-

(a) *Hom. Iliad. lib. VI.* (b) *Iliad. XVI.* (c) *AEnsid. lib. III.* (d) *AEnsid. lib. V.* (e) *1. Reg. 17.* (f) *Pro S. Roscio Amerino.* (g) *Cic. in Ver. VII.*

carceris , carnifex praetoris , mors terrorque sociorum , & civium Romanorum , liſtor Sextius.

Eadem fere eſt ratio minuendi : nam totidem ſunt aſcendentibus , quot deſcendentibus gradus. Scio poſſe videri quibuſdam ſpeciem amplificationis, hyperbolem quoque. Nam & haec in utramque partem valet , ſed quia excedit hoc nomen , in tropos differenda eſt. Facit etiam ad vim & amplitudinem rerum oſtendendam aſſeveratio: quum vel adverbiis , vel nominibus , vel aliis partibus appoſitis amplificamus , vel in laudem , vel in vituperium. Maiorem in modum me Senecae lectio delectat. Dici non poteſt quam tibi faveat ſocer. Verbis conſequi nequeo, quam me delectet Cicero. Notus & uſitatus eſt & ille modus amplificandi , quum ſpeciem augemus generi collatam. Ut quum omnes diſciplinae liberales plurimum homini concilient vel ornamenti vel commodi , tum in primis philoſophia.

Haec fere rhetores de ratione amplificandi, cuius praecepta proſoſitis exemplis apertiora & illuſtriora ſiunt. Quae ſtudioſus concionator legendis ſacris doctores , atque his praecipue, qui eloquentiae laude floruerunt , quales fere Graeci ſunt , obſervare debet : ut hac virtute, quae praecipua in dicendo eſt , plurimum valeat. Eius autem praeceptionis , quam Fabius (a) ratiocinationem vocat, quae quum aliud dicat , alio tendat , tria commodiſſima exempla apud Ezechielem invenies. Amplificaturus enim caſum & ruinam Tyri , primum eius gloriam , immenſas opes , & emporii celebritatem cap. 27. longa & magnifica oratione amplificat. Simili ratione cap. 31. regni Aſſyriorum vaſtationem praenuntiaturus , primum quidem gloriam extollit : ſimilique ordine cap. ſequenti Aegypti everſionem amplificat. Eademque ratione, verbisque ſplendidiffimis , Iſraëlitici populi ingratum animum & ſcelera exaggerat , divinis beneficiis primum longa oratione enumeratis. Sic enim cap. 16. populum ſuum Dominus ſub mulieris nomine alloquitur : tranſiens per te , vidi, te concu-

(a) *Inſtit. lib. VIII. cap. 4.*

Culcarî in sanguine tuo : & dixi tibi, quum esses in sanguine tuo, vive. Multiplicatam quasi germen agri dedi te, & multiplicata es, & grandis effecta : & cetera, quae sequuntur. Simili quoque modo Nathan propheta (a) Davidis adulterium accusavit, divinis beneficiis, quae in illum Dominus contulerat, primum expositis. Sed his exemplis prophetarum libri pleni sunt.

CAP. VI.

DE RERVM DESCRIPTIONIBVS.

Quemadmodum quum de argumentorum inventionem diceremus, formas etiam argumentationum, quae ad eloquutionem magis pertinere videbantur, exposuimus, ut quae simul in oratione coeunt, simul etiam ab arte traderentur : ita nunc quum de locis, unde omnis amplificandi inventio petatur, dictum a nobis sit, figuras etiam, quae amplificationi maxime deserviunt, quae ad eloquutionem magis spectant, his locis adnectere volumus : ut res inter se finitimae simul collocarentur ; & concionator, ubi aliquid amplificare voluerit, & quid dicere, & quemadmodum dicere debeat, in prospectu habeat. Inter ea vero eloquutionis ornamenta, quae amplificationi deserviunt, rerum & personarum descriptiones praecipue numerantur : quae quamvis ad alia quoque valeant, saepe enim huiusmodi descriptiones delectationis gratia adhibentur ; frequentissimus tamen earum usus in re amplificanda & exaggeranda est. Quum enim amplificatio ad commovendos affectus instituta sit, nihil hos magis excitat, quam si ita res verbis exprimatur, ut non tam dici, quam geri, & ante oculos poni videatur. Constat enim, affectus omnes, rei magnitudine ante oculos posita, potissimum concitari. Quod quidem tum rerum, tum personarum descriptionibus fit. De quibus iam dicere incipiemus.

DE-

(a) 2. Reg. 12.

DEscriptio est, quum id, quod fit, aut factum est, non summatim aut tenuiter exponimus, sed omnibus figurarum coloribus ob oculos ponimus, ut auditorem sive lectorem, iam extra se positum, velut in theatrum avocet. Hanc, ab effingenda rerum imagine, Graeci vocant hypothyposin. Etiam si vocabulum hoc commune est, quoties aliquid oculis subiicitur. Hoc autem genus praecipue constat circumstantiarum explicatione, earum praesertim, quae rem oculis maxime subiiciunt ac moratam reddunt narrationem: hoc est, quae singularum personarum affectus, mores & ingenium ostendunt. Non mediocriter tamen adiuvatur collationibus, similibus, dissimilibus, imaginibus, metaphoris, allegoriis, & si quae praeterea sunt figurae, quae rem illustrent. Quin epitheta quoque in hunc usum plurimum valent. Verum ut ista probe exprimas, non modo confert ars & ingenium, verumetiam oculis spectasse, quae velis effingere, aut ipsis interfuisse, aut etiam, si natura rei ita ferat, in persona sua expertum fuisse. Vt si quis hominis in agone mortis constituti, & de salute sua solliciti, & peccatorum conscientia anxii, trepidationem & maerorem describere vellet, non parum conducere, hoc ipsum periculo & experimento suo didicisse.

Hoc modo Gregorius Theologus vitae contemplativae tranquillitatem & felicitatem, quam expertus ipse fuerat, his veluti coloribus in Apologetico depingit. Nihil enim mihi fortunatius eo homine esse videtur, qui, clausis compressisque corporis sensibus, atque extra carnem mundumque positus, in seque collectus, nec nisi summa necessitate impellente, quidquam humanarum rerum attingens, & secum in se, & cum Deo, colloquens, superiorem rebus in adspectum cadentibus vitam agit; divinasque species & imagines puras semper, nec ullis terrenis & errabundis formis permixtas, in se ipso circumfert, ac Dei rerumque divinarum purum omnino speculum est,

est, in diesque efficitur; lucique lucem, obscuriori videlicet clariorem, adiungit, ac iam futuri aevi bono fruitur, & cum angelis versatur; & licet adhuc in terris agens, terram deserit, atque a spiritu in caelo collocatur: si quis vestrum hoc amore correptus tenetur, quid dicam, intelligit; atque affectui ei, in quem tum incidi, facile ignosceret. Haftenus ille.

D. quoque Cyprianus, tract. de habitu virg. quarundam feminarum lasciviam descriptione amplificat his verbis: quasdam non pudet nubentibus interesse, & inter illam lascivientem libertatem sermonum colloquia incesta miscere, audire quod non decet, quod non licet dicere: observare, & esse praesentes inter verba turpia, & temulenta convivia, quibus libidinum fomes accenditur, sponsa ad patientiam stupri, ad audaciam sponsus animatur. Quis illi in nuptiis locus est, qui animus ad nuptias non est? Aut voluntariae illic, & laetae esse quae possunt, ubi & studia & vota diversa sunt? Quid illic dicitur? quid videtur? Quantum a proposito suo virgo deficit, quando pudica quae venerat, impudicior discedit? Corpore licet virgo ac mente permaneat, oculis, auribus, lingua minuit illa, quae habebat.

Quid vero quae promiscuas balneas adeunt, quae oculis ad libidinem curiosis pudori ac pudicitiae corpora dicata prostituunt? Quae quum viros, atque a viris, nudae, vident turpiter, ac videntur; nonne ipsae illecebram vitii praestant? nonne ad corruptelam & iniuriam suam desideria praesentium sollicitant & invitant? Viderit, inquis, qua illuc mente quis veniat: mihi tantum reficiendi corpusculi cura est, & lavandi. Non te purgat ista defensio, nec lasciviae & petulantiae crimen excusat. Sordidat lavatio ista, non abluit; nec emundat membra, sed maculat. Impudice tu neminem conspicias, sed ipsa conspiceris impudice. Oculos tuos turpi oblectatione non polluis, sed dum oblectas alios, ipsa pollueris: spectaculum de lavacro facis: theatra sunt foediora quo convenis: verecundia illic omnis exiit: simul cum amictu vestis, ho-

honor corporis ac pudor ponitur, denudanda & contrectanda virginitas revelatur. Haëtenus Cyprianus.

Sed commodissimum huius rei exemplum exstat apud D. Gregor. Nissenum homil. de nativitate Domini, in qua puerorum innocentum crudelissimam stragem copiose describit his verbis: quare horrendum illud edictum emittitur, ut miselli puelli trucidarentur? quid maleficii commiserunt? quam mortis ac supplicii causam adversus se se praebuerunt? Quibus unum illud solum crimini datur, quod scilicet nati sunt, & in lucem prodierunt: atque hac de causa civitatem carnificibus repleri oportebat? Quis vero oratione calamitates delineaverit atque descripserit? quis ante oculos ponere narrando clades & funera possit? promiscuam illam lamentationem, flebilem concentum puerorum, matrum, cognatorum, patrum ad carnificum minas miserabiliter exclamantium? Quo modo quis cum ense nudo carnificem, iuxta infantem stantem, torvis ac caede micantibus oculis intuentem, atque alias consentaneas voces edentem, sinistra manu puellum ad se trahentem, suasque proprias cervices ensis mucroni submittentem, ne suis oculis videat, miserum filium carnificis manibus trucidari? Qua ratione quis affectus patrum exposuerit? Implorationes, exclamationes, gemitus, extremos filiorum amplexus, quum multa etiam talia eodem tempore simul acciderent? Quis multiplices ac varias calamitatis facies ac modos deploraverit, ut miser infans simul & mammae adhaeresceret, & per viscera lethale vulnus acciperet? Vt misera mater & papillam ori infantis admove-ret, & sanguinem filii sinu exciperet? Saepe autem alicubi carnifex, ruente manu, uno impetu gladii, filium una cum matre transfixit, atque unum sanguinis flumen exstitit, quod tam ex materna plaga, quam ex lethali vulnere filii commisceretur.

Quoniam autem etiam hoc scelestæ vox Herodis adiecit, ut non solum adversus modo genitos infantes funesta capitalisque sententia proferretur, verum etiam si quis ad alterum annum progressus esset, ut is quoque de medio tol-

tolleretur; scriptum est enim, (a) bimatu, & infra: alteram ex verisimilitudine cladem in his ratio cernit, quod saepe tempus interiectum, duorum filiorum matrem fecerit eandem. Quale igitur rursus in talibus spectaculum erat, duobus circa matrem unam carnificibus occupatis, uno quidem praetercurrentem ad se trahente; altero vero eum, qui mammae etiam nunc admoveretur, a sinu revellente? Quo modo miseram matrem hac de causa affectam fuisse credibile est, quum adversus duos filios natura quasi finderetur, utroque aequaliter maternis visceribus ignem accendente; quum ambigeret, utrum ex improbis carnificibus sequeretur, uno quidem hinc, altero autem illinc ad caedem attrahentibus infantes? Accurrat ad recens natum, obscurum adhuc & indistinctum ploratum emittentem? At alterum audit iam loquentem, ac voce balbutiente matrem cum lacrimis implorantem. Quid agat? quo evadat? quo se vertat? ad utrius vocem clamorem referat? utrius gemitui opploret? Utrius morti illacrimabitur, quum ex aequo naturae stimulis utriusque nomine urgeatur?

§. I.

Possimus autem descriptionibus, ubi res postulaverit, vel longioribus, vel brevioribus uti. Longiores sunt illae descriptiones, quibus D. Chrysost. lib. 6. de sacerdotio indignitatem suam ad episcopale ministerium Basilio probare contendit. Quas, quoniam & singularem doctrinam continent, & virtutis huius, quae est in dicendo maxima, rationem apertissime demonstrant, hoc in loco attexere libuit. Is igitur volens se purgare Basilio, quod episcopi dignitatem refugisset, muneris amplitudinem & difficultatem, suamque infirmitatem & indignitatem eius rei causam exstitisse, ait. Tum deinde, quo metu atque maerore animi contabuerit, quum ea res tractari coepta est, incredibili dicendi facultate amplificat his verbis: ab eo ipso die, quo tute mihi episcopatus suspicionem

(a) *Matth. 24.*

nem hanc iniecisti; factum est idemtidem, ut corpus hoc ab anima propemodum dissolveretur: tam ingens pavor, tam ingens maestitia animum meum occupavit. Nam quum apud me considerare Christi sponsae gloriam, sanctimoniam, venustatem spiritualem, prudentiam, ornatum; tum vero animi mei vitia expenderem: fiebat, ut assiduus tum illam, tum etiam me, gemitibus luctibusque prosequerer. In tanto ego aestu antea vixi, quum id tute ignorares, meque in tranquillitate victitare existimares. Ego vero tibi hic animi mei aestum detegere tentabo: hinc enim fortasse veniam mihi dabis, meque tandem insimulare desines. Qui igitur illum detegam? Nam si eum aperte oculis istis cernere velis, id nimirum haud aliter liceat, quam corde hoc tibi per me prius detecto, nudatoque. Quod quia fieri non potest, tibi hunc ego per obscuram quamdam imaginem, utcumque potero, experiar, maestitiae meae fumum repraesentare.

Fingamus puellam aliquam regis filiam, & eius quidem, cui terra ea universa, quae sub Sole posita est, pareat, a proco quodam expeti: tum vero demus, novam quamdam in ea inesse formae venustatem, quae sic humanam naturam transcendat, ut per eam puella muliebri genus universum magno admodum discrimine superet. Praeterea tantam illi inesse animi virtutem, ut virorum genus, eorum, inquam, qui vel antea fuere, vel futuri olim sunt, longo per se intervallo relinquat: tum autem & morum honestate tanta eandem excellere, ut vel omnes philosophiae terminos excedat: denique talem esse, ut proprii adspectus gratia, oculorumque venustas, universam illam corporis totius elegantiam obscuret.

Addamus item, si placet, ipsius procum, non ex iis tantum, quae diximus, virginis amore ardere, sed furore item nescio quo erga illam affici: quo quidem insanissimos quosque, qui antea umquam exstiterint, amatores superet. Postea procum hunc, dum hoc philtro ac furore deflagrat, alicunde accepisse, futurum, ut puellam illam, quam miro amore depereat, homuncio nescio quis humilis, abiectus obscuro atque ignobili genere natus, quique

que idem corpore sit mutilo, denique mortalium omnium nequissimus in uxorem ducat. Tibine hic exiguum doloris nostri partem repraesentavimus? Satin tibi a me facturum putas, vel finita hic a nobis imagine? Equidem satis me fecisse puto, quod ad animi mei maestitiam repraesentandam spectat, cuius unius rei gratia imaginem ipsam adhibuimus. Atque ut tibi item hic metus stuporisque nostri modum oculis subiiciam, ad aliam rursus hypothesim descriptionemque me confero.

Ponite ante oculos exercitum, ex militibus, tum peditibus, tum equitibus, tum nauticis viris constantem, ac mare quidem obtegit triremium numerus. Rursum ipsas camporum planities, ipsos montium vertices hinc peditum, hinc equitum phalanges contegant: aes item armorum, oppositum Soli, splendorem reddat, atque a solaribus radiis, & galearum, & clypeorum coruscatio vibretur: hastarum fragor, equorumque hinnitus in caelum feratur, neque mare, neque terra appareat; ubique aes, ubique ferrum. Tum sint contra hos instructi, armati, efferi quidam ac truces viri. Instet iam & conflictus tempus: postea rapiat quis de repente adolescentem aliquem in agro educatum, ac qui nullius prorsus artis alterius gnarus sit, quam lyrae pastoricae ac pedi: eundemque armatura aerea quum induerit, per totum illum exercitum circumiens deducat, ostendatque manipulos, manipulorum ductores, sagittarios, funditores, centuriones, duces, cataphractos, equites, iaculatores, triemes, triremium ductores, milites inibi confertos, navalium machinarum copiam: ostendat hostium procinctam aciem universam, & averandos formidolososque quosdam in illis adspectus, & armorum apparatus ab aliorum apparatu diversum, & immensam multitudinem, & convalles, & alta praecipitia, & montium iniquitates. Ostendat & adversarios in equis volantibus incantatione quadam insidere, & cataphractos per aërem ferri, explicata etiam ei incantationis illius vi ac forma.

Recenseat porro & belli calamitates, missilium, iaculorum, nivis instar ingruentium, impetum, multam illam ca-

liginem & tenebras, obscurissimam noctem, quam sagittarum multitudo efficiat, Solis radios densitate sua avergens, pulverem, tenebris non minore; omnium oculos obcaecantem, sanguinis torrentes, cadentium gemitus, stantium clamores, iacentium acervos, rotas sanguine tinctas, equos, prae cadaverum multitudine, una cum suis sessoribus in caput praecipites, terram universam mixtim haec omnia continentem, sanguinem, arcus, sagittas, equorum ungulas, hominum capita simul iacentia, & brachia, & collum, & tibiam, & pectus transfixum, cerebella ensibus traiecta, iaculi cuspidem effractum, cui hominis oculus tamquam infibulatus haereat.

Recenseat item & classis mala atque incommoda. Triremes alias in mediis aquis conflagrantes, alias cum cataphractis ipsis pessum euntes, fluctuum fragorem, natatum tumultuationem, militum clamorem, spumam tum undarum, tum sanguinis mixtam, eandemque in naves simul omnes irrumpentem, cadavera alia super ipsa navium transtra iacere, alia submergi, alia adnatatare, alia ad litora aestuantis maris impetu eiici, alia intra ipsos fluctus sic obrui, ut navibus iter veluti obsepian. Postremo quum exacte belli tragoedias omnes edocuerit, addat item & captivitatis calamitates, & servitutem, nulla non morte duriores. At, secundum haec omnia, iubeat illum continuo in equum ascendere, universique illius exercitus ducem agere. Hic tu adolescentulum illum censes, vel nudae harum rerum narrationi sustinendae parem esse posse; ac non potius, vel a primo statim adspectu, animo defecturum? Proinde, ne me ipse hic putes rem oratione attollere, neque hoc ipso quod corpore, sicut carcere aliquo inclusi, nihil prorsus rerum invisibilium cernere possimus, magna ea esse ducas, quae a me dicta sunt.

Videas enim eo praelio longe tum maius, tum horribilius, si tibi forte caliginosissimam illam diaboli aciem, conflictumque insanum oculis istis cernere liceat. Non enim illic aut aes, aut ferrum, non equi, non currus, non rotae, non ignis, non iacula ista, quae cernimus; verum alia quaedam

dam machinamenta, iis, quae dixi, longe terribiliora. Certe adversariis istis nequaquam opus est thorace, non scuto, neque ensibus, neque hastis: sed vel nudus execrandae illius militiae aspectus talis est, ut humanam animam a corpore ipso dissolvere possit, nisi ea admodum generosa fuerit; atque adeo, antequam a viribus ipsa suis auxilium petat, divinae in se clementiae providentiam senserit.

Ac sane, si liceret, corpore hoc exuto, aut una etiam cum ipso corpore perspicue atque intrepide universam illius aciem, bellumque contra nos instructum ipsis oculis coram contueri; videres utique non sanguinis torrentes, neque corpora demortua, sed animarum lapsus tam multos, sed vulnera sic gravia, ut tibi statim belli universa illa pictura, quam modo expressi, puerorum delectamenta, & ludicrum potius, quam bellum, videri possit: tam multi certe ac frequentes ii sunt, qui in dies singulos feriuntur, quorum vulnera non idem mortis genus pariunt; sed quantum inter se dissident anima atque corpus, tantum est certe inter mortem hanc atque illam discrimen. Nam quoties plagam anima accipit, eademque cadit, hic prostrata quidem iacet, malae iam conscientiae cruciatu contabescens: postea vero quam separata a corpore hinc emigrarit, aeterno crucianda supplicio traditur. Quod si quis existat, qui diaboli plagas non persentiat, nimirum illius morbus ex ea indolentia ingravescit. Quemcumque enim plaga una inflicta non mordet neque attristat, is certe facile & alteram excipit; itemque &, hac accepta, tertiam: neque enim intermittit ad extremum usque spiritum feriens nefarius ille, quoties invenit animam supinam, prioresque plagas contemnentem.

Porro autem si congressus modum expendere velis, hunc vero longe acriorem ac magis diversum comperies. Neque enim quisquam est, qui tam multas fraudis, doli, artificii formas norit, quam multas sceleratus ille hostis. Qua quidem in parte maior illius vis ac potentia inest: neque inimicitias, quis tantas, tamque inconciliabiles adversus hostes sibi infensissimos gerere potest, quantas ille

adversus humanam naturam gerit.

Porro si quis examinet, quanta cum inhumanitate is depugnet; ridiculum certe fuerit, homines hoc in loco conferre. Sin iracundissimas ac truculentissimas quasque feras delegeris, quas cum huius furore atque insania conferas; re vera mansuetissimas, humanissimasque eas hac comparatione comperies: tantum ille in animas nostras furorem spirans evomit.

Adde, quod & pugnae inter homines gestae tempus breve quidem esse solet, qua etiam in temporis brevitate multae dantur induciae. Nam & natura sic comparatum videmus, ut & noctis superventus, & iugulandi labor, & cibi capiendi tempus, & multa id genus alia, militi respirandi potestatem sic faciant, ut & armaturam exuere, tum verò paullulum respirare, seque & cibo & potu reficere, multisque rebus aliis pristinas vires recuperare valeat. Adversus autem diabolum dimicanti numquam licet, arma ipsa ponere, somnumve ullum capere, ei praesertim, qui perpetuo invulneratus praelio excedere volet. Ex duobus enim necessario alterum consequitur, ut aut cadat quis, ac pereat armis spoliatus; aut continenter vigilet, armatusque stet. Siquidem ille continenter cum sua ipsius acie stat, scordias nostras observans, ac maius quidem afferens studium ad nostram internecionem, quam ad nostram ipsi nos salutem afferamus.

Postremo, ut semel finiam, quod a nobis hostis ille minime cernatur, quodque de repente atque improvise nos adoriatur; quae res iis, qui non assidue in excubiis vigilantes fuerint, infinitorum malorum causa esse solet: facit nimirum, ut bello hoc aegrius, ac maiore cum negotio, quam illo, defungi possis. In hoc ergo campo voluisti nos Christi militibus duces esse? Hoc ipsum vero quid aliud erat, quam diabolo potius duces esse? Quum enim is, qui ceteros debet tum in ordines partiri, tum militaribus armis instruere, omnium simul infirmissimus, simul & imperitissimus fuerit; fit nimirum, ut suae fidei creditos prodatur, & diabolo magis, quam Christo, ducem agat. Haetenus Chryso-

sofotomus. Cuius verba huic praeceptioni inferere libuit, non solum quod describendi rationem apertissimo exemplo doceant, sed etiam quod singularem doctrinam contineant.

In quo quidem exemplo illam quoque amplificandi rationem animadvertere licet, quam Quinētilianus adnotavit: in qua impari exemplo, hoc est, a maiori vel minori ducto, omnes circumstantias excutimus: quo, id de quo agimus, multo esse maius, comprobemus. Sic enim hoc in loco D. Chrysostomus, collatione facta, aperte ostendit, quanto acies daemonum instructissimo quovis exercitu formidabiliores sint.

§. II.

Illud tamen hoc in loco admonendum est, fermocinationes personarum, & illud similitudinis genus, quod a rhetoribus imago similis appellatur, de quibus suis in locis differemus, ad has rerum descriptiones plurimum lucis afferre. Quod sequenti descriptione, qua in amplificanda matris septem Machabaeorum constantia D. Gregorius Theologus usus est, aperte liquet. Sic enim ait: (a) at vero egregia mater gaudio simul ac maerore afficiebatur, atque in duorum affectuum meditullio posita erat. Nam ut filiorum fortitudine, certaminumque spectaculo mirifice delectabatur; sic rursus quum incertum pugnae eventum, incredibilemque tormentorum magnitudinem secum reputaret, timore commovebatur. Ac proinde illos, non secus atque avicula, pullos suos arripiente angue, aut alia quamquam insidiatrice bestia, circumvolabat, stridebat, obsecrabat, certantes adiuvabat: nihil denique non dicebat ac faciebat, quo illos ad victoriam paratiores instructioresque redderet. Cruoris guttas rapiebat, fragmenta membrorum excipiebat, reliquias adorabat, hunc colligebat, illum porrigebat, alium parabat. Omnibus acclamabat: euge filii mei, euge strenui milites, euge in corporibus ferme incorporei, euge legis, canaeque senectutis meae, atque ci-

K 3

vi-

(a) *Gregor. Homil. de VII. Machab.*

vitatis, quae vos aluit, atque ad eam virtutis magnitudinem evexit, antistites atque patroni. Paullum adhuc & vicimus: paullum adhuc & ego inter mulieres beata, & vos inter adolescentes beati. Haëtenus Theologus. Hoc autem genus similitudinis ad rem oculis subiiciendam maxime pertinet.

Alia quoque similitudinum genera & exempla, quae a pari, maiori vel minori, simili, dissimili, & contrario ducuntur; plurimum ad res amplificandas valent, ut suo loco (a) ex Fabii sententia exposuimus. Quo in genere prudens lector duo praecipue in D. Chrysostomo, qui in hac parte maxime excellit, animadvertere poterit. Alterum, quod in exemplis imparibus, hoc est, a maiori vel minori deductis, personarum circumstantias, quae imparitatis rationem continent, diligenter excutit & amplificat. Deinde, non contentus rem maximam cum alia maxima comparasse, dat etiam operam, ut ea, quam augere vult, adhuc longe maior appareat. Hac autem ratione in sermone, quo eos accusat, qui domi sorores adoptivas foverent, quo eorum periculum ostendat, beati Iob exemplum inducit, oculos suos, ne virginem viderent, custodientis: & apostoli Pauli, (b) corpus suum castigantis, & in servitutem, ne reprobus fieret, redigentis.

Sic igitur ait: sanctus ille Iob, qui omnem transcendebat virtutem, ex omnibus diaboli retibus extractus, qui & primus & solus tantam fortitudinem demonstravit, & omne ferrum & adamantem sua continentia praetergressus, subnervavit diaboli potestatem: sic veritus erat talem pugnam, & putavit, impossibile esse, cohabitare virgini purum & sine damno; adeo ut non solum a cohabitatione tali procul & longe se ipsum, sed & ab adspectu prorsus & occurso subduxerit, legemque posuerit oculis suis, omnino in virginem ne respicere quidem: sciebat enim manifeste, quod non solum cohabitantem, sed & videntem curiose in faciem virginis, difficile, forte autem & impossibile esset, effugere damnum, quod inde oritur. Propter quod

(a) Cap. praecedenti. (b) 1. Corinth. 9.

quod & dicebat: (a) ne cogitarem quidem de virgine. At si parvus videtur vobis ad certamen Iob, quamvis re vera neque stercore illius simus digni; verumtamen, licet minus tua magnanimitate esse putas exemplum, cogita vocalissimum praeconem veritatis, qui totum orbem circuiit; & dicere potuit verba illa multa sapientia referta, quod non iam ipse sit vivens, sed Christus in ipso: & quod crucifixus sit mundo, & mundus sibi: & quod quotidie moriatur.

Post tantam ergo spiritus gratiam, & tanta certaminum specimina, post tam innumera pericula, post tam eximiae diligentiae & sapientiae studium, declarat nobis & commonstrat, quod donec spiraverimus, & hac carne fuerimus circumdati, certaminibus nobis opus est & laboribus: neque umquam otio temperantia paratur, sed multis sudoribus & laboribus opus est. Ad hoc enim tropaeum parandum dicebat: (b) castigo corpus meum, & in servitutem redigo: ne, dum aliis praedicavero, ipse reprobus fiam. Haec autem dicebat, declarans seditionem carnis, & concupiscentiae rabiem, praeliumque continuum, ac vitam semper in agone constitutam. Haecenus ille. In quibus exemplis aperte liquet, quam studiose personarum circumstantias, beati scilicet Iob & Pauli, excusserit & amplificaverit: ut facile quisque intelligeret, in quo periculo versarentur, qui tam longe ab ea animi firmitate & perfectione distarent.

Superioris autem observationis in eodem sermone clarissima exstant exempla: quae, ne in re satis aperta sim longior, studioso concionatori legenda relinquo. Est enim hic sermo adversus eos, qui sovent domi sorores adoptivas, dignissimus, qui ab omnibus legatur, ut qui sit tum magno divinae gloriae studio, tum maxima eloquentia refertus. Exemplo item huic observationi erit navalis praelii similitudo, paullo ante a nobis ab eodem auctore inducta: in qua hic vir divinus, post utriusque militiae collationem, exponit etiam, quanto spiritualis militiae certamen & periculum sit atrocius, magisque pertimescendum.

K 4

CAP.

(a) *Job* 31. (b) *1. Corinth.* 9.

DE PERSONARVM DESCRIPTIONIBVS.

Post rerum descriptiones, sequitur personarum descriptio, quae varias habet species. Quamvis autem non omnes ad amplificandi rationem, de qua nunc sermonem instituimus, pertineant; ratio tamen praecipendi exigit, ut, quoniam rerum descriptiones tradidimus, personarum quoque tradamus. Primum autem earum genus est, quum personae ingenium, mores, ceterasque circumstantias, quas personis attributas superius diximus, sive laudis, sive vituperationis gratia, brevi oratione depingimus: quemadmodum Sallustius Catilinae, Caesaris, & Catonis personas descripsit. Sic in litteris sanctis vita sanctissimi Iob, Tobiae, Iudith in veteri testamento, & Simeonis, & Annae viduae in novo mores & vita breviter describuntur. Hoc autem genus descriptionis docendi magis gratia, quam amplificandi, solet adhiberi.

Est aliud proposito nostro accommodatius, quod notationem appellant: quoties amantis, luxuriosi, avari, voracis, remulenti, somniculosi, garruli, gloriosi, ostentatoris, invidi, sycophantae personam depingimus. Mirus est in hoc descriptionis genere Ioannes Cassianus: in iis enim libris, quos de octo principalium vitiorum remediis scripsit, ingenium, mores, facta, dicta eorum, qui his vitiis contaminati sunt, appositissime depingit. Duci autem huiusmodi notationes videntur a concomitantibus, & consequentibus, & effectibus, & ab eo loco, quem dialectici a communiter accidentibus appellant. Docendi autem gratia, duo solum exempla hic adscribam: reliqua autem in iis libris studiosus concionator videre poterit. Is igitur in X. de accidia libro, eum, qui hoc morbo laborat, quem non nulli seniorum, meridianum daemonem appellabant, ita describit. Quum hic daemón miserabilem obsederit mentem, horrorem loci, fastidium cellae, fratrum quoque, qui vel cum eo, vel eminus commorantur, tamquam neg-

ligentium ac minus spiritualium , adspersionem gigni atque contemptum. Ad omne quoque opus , quod intra septa sui cubilis est , facit desidem & inertem. Non eum in cella residere , nec operam sinit impendere lectioni ; nihilque se proficere , tanto tempore in eadem commorantem , crebrius ingemiscit ; & ab omni se dolet spiritali quaestu inanem in eo loco vacuumque consistere : utpote qui , quum posset etiam alios regere , ac prodesse plurimis , nullum aedificaverit , nec quemquam institutione sua doctrinaque lucratus sit. Absentia longeque posita magnificat monasteria : loca etiam illa magis ad profectum utilia , & saluti congruentiora describit : consortia quoque ibidem fratrum suavia & plena spiritali conversatione depingit.

Contra , universa, quae habentur in manibus, aspera : & non solum aedificationem nullam esse in fratribus , qui morantur in loco , sed ne ipsum quidem victum corporis absque ingenti labore conquiri. Postremo , non posse se salvam putat in eo loco durantem , nisi relicta cella , cum qua sibi , si adhuc in ea fuerit remoratus , pereundum erit , exinde semetipsum quamtocius adsportaverit. Deinde lassitudinem corporis , cibique esuriem , quinta sextaque hora tantam suscitatur , ut velut longo itinere , gravissimoque labore confectus sibi met lassusque videatur ; aut quasi refectorem cibi biduano ieiunio , triduanove distulerit. Tum praeterea huc illucque anxius circumspectat , & nec fratrem sibi quempiam adventare suspirat : saepiusque egreditur , & ingreditur cellam : ac Solem , velut ad occasum tardius properantem , crebrius intuetur. Et ita quadam irrationabili mentis confusione , velut tetra impletur caligine , omnique actu spiritali redditur otiosus ac vacuus : ut nulla re alia tantae oppugnationis remedium , quam visitatione fratris cuiuspiam , seu somni solius solatio posse existimet inveniri. Deinde honestas idem morbus ac necessarias suggerit salutationes fratribus exhibendas , visitationesque infirmorum , vel eminus , vel longius positorum. Quaedam etiam pia ac religiosa dictat officia : illos vel illas debere parentes inquirere , & ad salutandos eos crebrius properare : illam

lam religiosam , devotamque Deo feminam , omni praesertim parentum praesidio destitutam , magnum opus esse pietatis , frequentius invisere : ac si quid ei sit necessarium , quae a propriis parentibus negligitur atque despicitur , sanctissimum procurari , magisque oportere in his operam pietatis impendi , quam infructuose ac sine ullo profectu in cellula residere. Haecenus Cassianus.

Idem etiam lib. XII. superbi monachi mores & ingenium hoc modo describit : quisquis superbiae morbo fuerit occupatus , non solum nullam subiectionis aut obedientiae regulam custodire dignatur , verum ne ipsam auribus quidem suis doctrinam perfectionis admittit : tantumque con- crescit in corde eius spiritalis verbi fastidium , ut quum forte talis fuerit oborta collatio , uno in loco stare nesciat eius obtutus ; sed huc illucque stupidus circumferatur intuitus , & aliorsum , atque in obliquum , quam moris est , oculi defigantur. Pro suspiriis enim salutaribus sputa de sicco gutture contrahuntur , excreationis etiam sine ulla interpellatione flegmatum provocantur , digiti ludunt , & in modum scribentis volitant , & ita huc atque illuc universa membra corporis commoventur : ut dum spiritalis agitur collatio , totum se vel scatentibus vermibus , vel acutissimis sudibus credat insidere : & quidquid simplex collatio ad aedificationem protulerit audientium , ob suam suggillationem aestimet esse prolatum : totoque tempore , quo spiritalis vitae examinatio ventilatur , suis suspicionibus occupatus , non , quid inde ad profectum suum capere debeat , aucupatur ; sed causas , cur unum quodque sit dictum , sollicita mente perquirat ; vel quid eis possit obiicere , tacita intra se cordis volutatione coniecat.

Deinde post haec , excelsa vox , sermo rigidus , amara & turbulenta responsio , incessus erectus ac mobilis , lingua facilis , procax loquela , nec umquam taciturnitatis amica , nisi quum contra fratrem rencorem quemdam in suo corde conceperit : sitque silentium eius non compunctionis nec humilitatis ullius , sed superbiae & indignationis indicium : ita ut , quid in eo detestabilius sit , haud facile discer-

cernatur, utrum diffusa illa petulansque laetitia, an dira haec virulentaque feritas. In illa namque sermo non opportunus, risus levis ac fatuus, effrenata ac indisciplinata cordis elatio: in ista vero ira plenum, virulentumque silentium; & quod ob hoc tantum concipitur, ut adversus fratrem rancor, taciturnitate servatus, protelari diutius possit, non ut ex eo virtus humilitatis ac patientiae praebeatur. Et quum ipse, tumore possessus, facile cunctis tristitias inferat, atque ad satisfactionem laesi fratris semetipsum submittere dedignetur; etiam ab illo sibimet oblatam respuit atque contemnit. Haecenus Cassianus, qui suis quasi coloribus & accidiosi & superbi monachi mores & ingenium ad vivum depinxit.

D. vero Bernardus detractorum mores, qui quodam simulato verecundiae fuko, conceptam malitiam, quam retinere non possunt, adumbrare conantur, describit his verbis: (a) videas a detractore alta suspiria praemitti, sicque cum quadam gravitate & tarditate, vultu modesto, demissis superciliis, & voce plangenti egredi maledictionem: quae quidem tanto persuasibilior est, quanto creditur ab his, qui audiunt, corde invito, & magis condolentis affectu, quam malitiose, proferri. Doleo, inquit, vehementer, pro eo quod diligo eum, ut scitis, & numquam potui de hac re corrigere eum: & alias mihi bene comperum fuerat; sed per me numquam innotuisset, per alterum patefacta res est. Veritatem negare non possum, dolens dico, re vera ita est: nam alias quidem in pluribus valer, ceterum in ista parte, ut verum fateamur, minime excusari potest. Haec Bernardus. D. vero Hieronymus in epistola quadam fictam humilitatem hac eadem figura describit his verbis: (b) fictam humilitatem fugiens, illam sectare, quae vera est, quam Christus docuit, in qua non sit superbia inclusa. Multi enim huius virtutis umbram, veritatem pauci sequuntur. Perfacile est, aliquem habere vestem contemtam, salutare submissius, manus & genua deosculari, inclinato in terram capite, oculisque deiectis, humilitatem atque man-

(a) *Super Cantic. serm. 24.* (b) *Hieron. in epist.*

mansuetudinem polliceri , lenta voce tenuique sermones infringere , suspirare crebrius , & ad omne verbum peccatorem ac miserum se clamare : sed si vel levi sermone offensus fuerit , continuo videbis attollere supercilium , levare cervicem , & delicatum illum orationis sonum insano clamore repente mutare. Haftenus ille. His exemplis , quid haec orationis figura postulet , facile erit intelligere.

CAP. VIII.

DE SERMOCINATIONE.

ESt etiam sermocinatio , quae inter personarum descriptiones numeratur : qua nescio quid magis ad concionatoris officium pertinere putem , non modo ad rationem amplificandi , sed ad multa quoque alia. Quo est mihi eius ratio & natura diligentius aperienda , & exemplis illustranda. Prius tamen Cornificii definitionem & exempla subiiciam : (a) sermocinatio est , quum alicui personae sermo attribuitur ; & is exponitur cum ratione dignitatis , hoc pacto : quum militibus urbs redundaret , & omnes , timore oppressi , domi continerentur ; venit iste cum sago , gladio succinctus , tenens iaculum : quinque adolescentes hominem simili ornatu subsequuntur. Irrumpit in aedes subito : deinde magna voce , ubi est iste beatus , inquit , aedium dominus ? quin mihi praesto fit ? quid tacetis ? Hic alii omnes stupidi timore obmutuerunt. Vxor illius infelicissimi cum maximo fletu ad istius pedes abiecit se se. Parce , inquit , & per ea , quae tibi dulcissima sunt in vita , miserere nostri : noli extinguere extinctos. Fer mansuete fortunam : nos quoque fuimus beati : nosce te esse hominem. At ille : quin illum mihi datis , ac vos auribus meis applorare desinitis ? Non abibit. Illi nuntiatur interea , venisse istum , & clamore maximo mortem minari.

Quod simul ut audivit , heus , inquit , Gorgia pedissequa puerorum , absconde pueros , defende , fac ut incolumes

(a) *Apud Cic. ad Heren. lib. IIII.*

mes ad adolescentiam perducas. Vix haec dixerat, quum ecce iste praesto: sedes, inquit, audax? Non vox mea tibi vitam ademit? Exple meas inimicitias, & iracundiam satura tuo sanguine. Ille, cum magno spiritu: metuebam, inquit, ne plane victus essem: nunc video, in iudicio mecum contendere non vis, ubi superari turpissimum est, superare pulcherrimum. Interficere me vis: occidar equidem, sed victus non peribo. At ille: in extremo vitae tempore etiam sententiose loqueris; neque ei, quem vides dominari, vis supplicare? Tum mulier: immo quidem iste rogat & supplicat: sed tu, quaeso, commoveare; & tu, per Deos., inquit, hunc amplexare. Dominus est, vicit hic te, vince tu nunc animum. Cur non desinis, inquit, uxor, loqui? Quae me digna non sunt, tace, & quae curanda sunt, cura. Tu cessas mihi vitam, tibi omnem bene vivendi spem mea morte eripere? Iste mulierem repulit a se lamentantem: illi nescio quid incipienti dicere, quod dignum videlicet illius virtute esset, gladium in latere defixit. Puto in hoc exemplo datos esse unicuique sermones ad dignitatem accommodatos: quod oportet in hoc genere observare. Sunt item sermocinationes consequentes hoc genus. Nam quid putamus illos dicturos, si hoc iudicaveritis: nonne hac omnes utentur oratione? Deinde subiicere sermonem.

Est quidem haec figura frequens in libro Sapientiae. Lege secundum eius libri caput, in quo longa quaedam perditorum hominum sermocinatio continetur. Sic enim se ipsos ad luxum & impietatem adhortantur: exiguum, & cum taedio est tempus vitae nostrae, & non est refrigerium in fine hominis, & non est qui agnitus sit reversus ab inferis: quia ex nihilo nati sumus, & post haec erimus tamquam si non fuimus, &c. Venite ergo, fruamur bonis quae sunt, & utamur creatura tamquam in iuventute celeriter. Vino pretioso & unguentis nos impleamus, & non praetereat nos flos temporis. Coronemus nos rosis, antequam marcescant: nullum pratum sit, quod non pertranseat luxuria nostra, & quae sequuntur. Item eiusdem libri cap. V.

ti-

timor & horror impiorum in extremo iudicii die, & sermo eorum describitur his verbis: tunc stabunt iusti in magna constantia adversus eos, qui se angustiaverunt, & qui abstulerunt labores eorum. Videntes turbabuntur timore horribili, & mirabuntur in subita & insperata eorum salute, gementes prae angustia spiritus, dicentes intra se, poenitentiam agentes: hi sunt, quos habuimus aliquando in derisum, & in similitudinem improperii: nos insensati vitam illorum aestimabamus insaniam, & finem illorum sine honore. Ecce quo modo computati sunt inter filios Dei, & inter sanctos fors illorum est. Ergo erravimus a via veritatis, & lumen iustitiae non luxit nobis, & Sol intelligentiae non ortus est nobis, &c. Quid nobis profuit superbia? aut divitiarum iactantia quid contulit nobis? Transierunt illa omnia tamquam umbra volans, & cetera quae sequuntur.

Simili modo in Proverbiis Salomon procacitatem adulterae feminae primum describit, deinde sermonem illi convenientem tribuit. Sic enim ait: (a) considero vecordem iuvenem, qui transit per plateas iuxta angulum: & prope viam domus illius graditur in obscuro advesperascente die: & cetera, quae sequuntur. Sic etiam in eodem libro Salomon improborum sermones, quibus simplicem hominem ad pravitatis suae consortium inducere contendunt, ita describit: (b) fili mi, si te lactaverint peccatores, ne acquiescas eis: si dixerint, veni nobiscum, insidiemur sanguini, abscondamus tendiculas contra insontem frustra; omnem pretiosam substantiam reperiemus, implebimus domos nostras spoliis; sortem mitte nobiscum, marsupium unum sit omnium nostrum: fili mi, ne ambules cum eis. Eadem dicendi figura Isaias regis Assyriorum superbiam amplificat: postquam enim de eo Dominus dixerat: (c) vae Assur virga furoris mei, & baculus ipse: in manu eorum indignatio mea, &c. Ipse autem non sic arbitrabitur, sed ad conterendum erit cor eius, & ad internecionem gentium non paucarum. Dicet enim: numquid non principes mei simul reges sunt? & cetera.

Nec

(a) *Prov.* 7. (b) *Prov.* 1. (c) *Ijai.* 10.

Nec solum, quid personae dicant, sed quid etiam dicere merito debuissent, hac figura significamus. Sic Ieremias, ut filiorum Israël ingratum animum exaggeraret, quid ii dicere debuissent, exprimit his verbis: (a) & non dixerunt: ubi est Dominus, qui ascendere nos fecit de terra Aegypti; qui traduxit nos per desertum, per terram inhabitabilem & inviam? & cetera. Et infra idem: (b) & non dixerunt, metuamus Dominum, qui dat nobis pluviam: temporaneam & serotinam, plenitudinem annuae messis custodientem nobis. Et iterum: (c) sacerdotes non dixerunt, ubi est Dominus? &c. Hoc etiam modo sermonem tribuimus homini se ipsum admonenti, atque ad opus aliquod virtutis adhortanti. Vnde Eusebius Emissenus fidelem virum, vitam & mores suos expendere, adhortatur his verbis: (d) unusquisque conscientiam suam ante conspectum interioris hominis constituat: ipsi nosmetipsos quotidie castigemus, ipsi nobiscum rationem de quotidiana conversatione faciamus. Alloquatur se in secreto cordis unaquaeque anima, & dicat: videamus, si hanc diem sine peccato, sine invidia, sine obtreptione, sine murmuratione transégi: videamus, si aliquid hodie, quod ad profectum meum, quod ad aedificationem aliorum pertinet, operatus fui: puto, quod hodie mentitus sum, peieravi, ira vel concupiscentia victus suum, nec alicui benefeci, nec pro timore aeternae mortis ingemui. Quis mihi reddet hanc diem, quam in vanis rebus perdidi, quam in cogitationibus noxiis pessimisque consumsi? Haecenus ille.

Hoc etiam modo tacitam Spiritus sancti exhortationem describere solemus, sermonem eidem Spiritui accommodantes, quo nos, proposito vitae nostrae periculo, mortis incerta conditione, gehennae suppliciis, caelestibusque praemiis, divinisque beneficiis commemoratis, ad ostium cordis nostri pulsans, a scelerata vita ad poenitentiam revocare conatur. Similique ratione varias daemonum suggestiones describere possumus, sermonem illis, malitiae eorum con-

(a) *Ierem. 2.* (b) *Ierem. 5.* (c) *Ierem. 2.* (d) *Euseb. Emissen. in Homil.*

convenientem, tribuentes. Ad hunc quoque modum rationes, quibus improbi homines in sceleribus suis se ipsos consolantur, salutemque sibi pollicentur, describere licet; quid quisque eorum intra se dicat, sermocinatione exprimentes. Longam enim sibi vitam pollicentur, Dei misericordiam, Christi sanguinem, beati latronis exemplum, extremam in fine vitae poenitentiam, ceteraque his similia in consolationem suam adhibent. Hac etiam virtute commodissime in amplificandis martyrum certaminibus utimur: quum explicamus, quibus ipsi sermonibus partim iudicibus respondebant, partim se ipsos ad fidei constantiam & patientiam adhortabantur. Exstant commodissima huius rei exempla apud Basilium in homilia quadraginta martyrum. Itemque apud D. Gregorium Theologum in homilia de septem Machabaeis: in qua sermones describit, quibus mater filios ad patientiam adhortabatur, quibusque ipsi se ad eiusdem virtutis constantiam excitabant. Ad quae exempla studiosum concionatorem remitto.

CAP. IX.

DE CONFORMATIONE.

Sermocinationi finitima est conformatio, quae maiorem adhuc vim habet in loco adhibita. De qua sic idem Cornificius: (a) conformatio est, quum aliqua, quae non adest persona, confingitur, quasi adsit: ut quum res muta aut informis fit eloquens & formata: & ei oratio attribuitur ad dignitatem accommodata, aut actio quaedam, hoc pacto: quod si nunc haec urbs invictissima vocem emittat, nonne hoc pacto loquatur? Ego illa plurimis tropaeis ornata, triumphis ditata certissimis, clarissimis locupletata victoriis, nunc vestris seditionibus, o cives, vexor: quam dolis malitiosa Carthago, viribus probata Numantia, disciplinis erudita Corinthus labefactare non potuit; eam patiemini nunc ab homunculis teterrimis proteri atque con-

(a) *Cic. ad Heren. lib. III.*

conculcari? Item: quod si nunc L. ille Brutus reviviscat, & hic ante pedes vestros adsit, non hac utetur oratione? Ego reges eieci, vos tyrannos introducitis: ego libertatem, quae non erat, peperit; vos partem servare non vultis: ego capitis mei periculo patriam liberavi; vos liberi sine periculo esse non curatis. Haec conformatio licet in plures res mutas atque inanimatas transferatur, proficit plurimum in amplificationis partibus, & commiseratione. Cicero vero adversus Catilinam, patriae proditorem, sic eandem loquentem inducit: (a) quae tecum, Catilina, sic agit, & quodam modo tacita loquitur: nullum iam tot annis facinus exstitit, nisi per te, nullum flagitium sine te: tibi uni multorum civium necesse, tibi vexatio, direptioque sociorum impunita fuit ac libera. Tu non solum ad negligendas leges & quaestiones, verumetiam ad evertendas perfringendasque valuisti. Superiora illa quamquam ferenda non fuerunt; tamen, ut potui, tuli: nunc vero me totam esse in metu propter te unum, quidquid increpaverit, Catilinam timeri, nullum videri contra me consilium iniri posse, quod a tuo scelere abhorreat, non est ferendum. Haec tenus Cicero.

Ad hunc etiam modum Oforius episcopus eidem patriae sermonem adversus parentes tribuit, qui liberorum suorum licentiam, & corruptos mores minime castigant. Sic igitur ait: (b) quod si patria eiusmodi verbis tecum expostulet, quid illi respondebis? Homo, cur, quantum est in te, mihi moliris exitium? cur in me pestem nefarie machinaris? cur parentem, quam omni pietate complecti debebas, iugulandam suscipis? Meis enim legibus & institutis in lucem editus & enutritus fuisti; per me non solum a feris, sed etiam a morum feritate revocatus, & omni humanitate cultus exstitisti; meo praesidio vitam non solum clementer atque benigne, verumetiam secure traduxisti. Si enim in solitudine & vastitate vitam ageres, non modo belluarum laniatus extremisceres, sed nihil inter te & belluas immanes interesset: mea igitur ope factum est, ut in periculis auxilium, in morbis remedium, in aeru-

L

mnis

(a) *In Catil. orat. L.* (b) *De regis instit. & disc. lib. VII.*

mnis solatium, in perturbatione disciplinam, in curis allevamentum invenires. Quum vita tua tam multis simul rebus indigeat, omnes illae fuerunt a me tibi large atque munifice suppeditatae. Quod si ita non esse putas, a me secede, lucem meam atque celebritatem fuge, & te in solitudinem abde; & videamus, quo tandem modo possis absque meo praesidio vitam sustentare. Quod igitur opibus abundas, quod humanitatem retines, quod secure vitam degis, quod lucis iucunditate frueris, id totum mihi est in acceptis referendum. Magis igitur sum mater tua, quam illa, quae te peperit, existimanda. Si igitur mihi necem attuleris, non modo te improbum hominem, sed impium & sceleratum parricidam fateare, necesse est.

Sed dices fortasse, te numquam de meo interitu cogitasse. An non intelligis, vitam atque salutem meam civium moribus & honestate contineri? adeo sine mente es, ut non videas, si illi, quum ad aetatem maturam pervenerint, flagitiis efferati fuerint, esse mihi eorum scelere miserum funestumque fatum necessario subeundum? Nec illud quidem recogitas, te non tam tibi, quam mihi, filios genuisse? cur igitur illos flagitiis obrui sinis? cur illorum peccatis indulges? cur illorum inconsideratam cupiditatem alis? cur eorum pudorem exstingui pateris? cur denique illos honestatis studium negligere, & libidini servire permittis? Quod enim est aliud rerum publicarum exitium & funus, nisi id, quod corrupta & vitiosa civium institutione comparatur? Cives igitur, qui male filios suos instituunt, me perdunt, mihi pestem parant, mihi interitum & exitium moliantur. Haec si resp. dicat hominibus in filiorum educatione dissolutis, venitne vobis in mentem, quo modo homines, in tanta re negligentes, a maximi & immanissimi criminis suspicione libere-tis? Haecenus Oforius.

Haec etiam figura non infrequens in sanctis litteris est. Vnde apud Salomonem & Ecclesiasticum Sapientia laudes suas praedicat, & homines ad sui studium advocat. Quale est illud: (a) o viri, ad vos clamito, & vox mea ad filios ho-

(a) *Prov. 8.*

hominum, & cetera. Tale est etiam illud eiusdem: (a) sapientia foris praedicat, in plateis dat vocem suam, in foribus portarum urbis profert verba sua, dicens: usquequo, parvuli, diligitis infantiam, & stulti ea, quae sunt sibi noxia, cupient? & cetera. Exstat libellus quidam de conflictu vitiorum & virtutum; quem quidam Leoni papae, quidam D. Augustino tribuunt, in quo vitiis, tamquam rebus animatis, sermones tribuuntur, quibus se se hominibus probent atque insinuent. Similique ratione virtutes ipsae pro se respondent, & causam atque dignitatem suam adversus vitia tuentur. D. vero Cyprianus contra feminas, quae exquisitis coloribus faciem depingunt, Deum ipsum hoc modo inducit loquentem: (b) non metuis, oro, quae talis es, ne, quum resurrectionis dies venerit, artifex tuus te non recognoscat; & ad sua praemia & promissa venientem removeat & excludat; & increpans vigore censoris & iudicis dicat: opus hoc meum non est, nec haec imago nostra est. Cutem falso medicamine polluisti, crinem adulterino colore mutasti, expugnata est mendacio facies, figura corrupta est, vultus alienus est, Deum videre non poteris, quum oculi tibi non sint, quos Deus fecit, sed quos diabolus infecit. Illum tu sectata es, rutilos atque depictos oculos serpentis imitata es, de inimico tuo comita, cum illo pariter arsuras. Haec, oro, non cogitanda sunt Dei servis? non die semper ac nocte metuenda?

Idem quoque Cyprianus, exaggerare volens inhumanitatem ac perversitatem eorum hominum, qui quum ingentes sumtus in rebus inanissimis faciant, ne reruncium quidem Christo pauperi porrigunt, appositissime hac eadem figura daemonem loquentem inducit. Sic enim ait: (c) ponat unusquisque ante oculos suos diabolum cum servis suis, id est, cum populo prodicionis & mortis, in medium prosilire, plebem Christi, praesente & iudicante ipso, comparationis examine provocare, dicentem: ego pro istis, quos mecum vides, nec alapas accepi, nec

L 2

fla-

(a) *Prov. 1.* (b) *Cyprian. de habitu virg.* (c) *Cyprian. Serm. de elemos.*

flagella sustinui, nec crucem pertuli, nec sanguinem fudi, nec familiam meam pretio passionis & crucis redemi: sed nec regnum caeleste illis promitto, nec ad paradysum restituta immortalitate denuo revoco, & munera mihi quam pretiosa, quam grandia, quam nimio & longo tempore quaesita, sumtuosissimis apparatibus comparant, rebus suis vel obligatis in muneris apparatione; vel venditis, ac, nisi editio honesta successerit, conviciis ac sibilis eiiciuntur, & furore populari nonnumquam paene lapidantur. Tuos tales munerarios, Christe, demonstra, illos divites, illos copiosis opibus affluentes, ac in Ecclesia, praesidente & spectante te, eiusmodi munus edant, opipignoris vel distractis rebus suis, immo ad caelestes thesauros, mutata in melius possessione, translatis. In istis muneribus hominum caducis atque terrenis nemo pascitur, nemo vestitur, nemo cibi & potus solatio sustinetur: cuncta inter furorem edentis & spectantis errorem, prodiga & stulta voluptatum frustrantium vanitate depereunt. Illic in pauperibus tuis tu vestiris & pascaris, tu aeternam vitam operantibus polliceris: & vix tui meis pereuntibus adaequantur, qui a te divinis mercedibus & praemiis caelestibus honorantur. Quid ad haec respondemus, fratres carissimi? Divitum mentes qua ratione defendimus? Qua excusatione purgamus, qui Zabuli servis minores sumus, ut Christo pro pretio passionis & sanguinis vicem nec in modicis rependamus? Hactenus Cyprianus. Cuius oratio satis indicat, quantum rei, de qua agitur, indignitas, hac dicendi figura creverit.

Exstant apud D. Hieronymum in epitaphio Blefillae duo commodissima huius virtutis exempla, quae his adiacere non gravabor. Quum enim Paulla Blefillae filiae mortem molestissime ferret, eandem Blefillam his verbis loquentem inducit: (a) quas nunc existimas Blefillam nostram pati cruces, quae ferre tormenta, quod tibi Christum videat subiratum? Clamat nunc illa lugenti: si un-

quam

(a) *Hieronym. in epist. ad Paul.*

quam me amasti, mater, si tua ubera suxi, si tuis instituta sum monitis, ne invid eas gloriae meae, nec hoc agas, ut a nobis in perpetuum separemur. Putas, esse me solam? Habeo pro te Mariam matrem Domini. Multas hic video, quas ante nesciebam. O quanto melior est iste comitatus! Habeo Annam quondam in evangelio prophetantem: & quo magis gaudeas, tantorum annorum labores ego in tribus mensibus consequuta sum. Vnam palmam castitatis accepimus. Misereris mei, quia mundum reliqui? At ego vestri sortem doleo, quos adhuc saeculi carcer includit: quos quotidie in acie praeliantes, nunc ira, nunc avaritia, nunc libido, nunc variorum incentiva vitiorum pertrahunt ad ruinam. Si vis ut mater mea sis, cura placere Christo. Non agnosco matrem meo Domino displicentem. Loquitur illa & alia multa, quae taceo, & pro te Dominum rogat. Haec Hieronymus.

Qui nec hac Blesillae oratione contentus, ipsum etiam Dominum ad Paullam matrem his verbis inducit loquentem: (a) non vereris, ne tibi Salvator dicat: irasceris, Paulula, quia tua filia mea facta est filia? Indignaris de iudicio meo, & rebellibus lacrimis facis iniuriam possidenti? Scis enim, quid de te, quid de ceteris tuis cogitem. Cibus tibi denegas, non ieiuniorum studio, sed doloris. Non amo frugalitatem istam. Ieiunia ista adversarii mei sunt. Nullam animam recipio, quae me nolente separatur a corpore. Tales stulta philosophia habeat martyres, habeat Zenonem, Cleombrotum, vel Catonem. Super nullum requiescit spiritus meus, nisi super humilem, & quietum, & timentem verba mea. Hoc est, quod mihi in monasterio promittebas? Quod habitu a matronis ceteris separato, tibi quasi religiosior videbaris? Mens ista, quae plangit, sericarum vestium est. Interciperis, & moreris, & quasi non in meas manus ventura sis, crudelem iudicem fugis? Fugerat quondam & Jonas animosus propheta, sed in profundo maris meus fuit. Si viventem crederes filiam, numquam plangeres ad meliora migrasse. Hoc est,

L 2

quod

(a) Hieron. in epist. ad Paul.

quod per apostolum meum iusseram, ne pro dormientibus in similitudinem gentium tristaremini? Haecenus ille. Ieremias quoque ad leniendos captivorum animos, ipsam Ierosolymorum civitatem his verbis filios suos alloquentem facit: (a) audite confines Sion, adduxit enim mihi Deus luctum magnum: vidi enim captivitatem populi mei, filiorum meorum, & filiarum, quam superduxit illis aeternus. Nutrivi enim illos cum iucunditate: dimisi autem illos cum fletu & luctu, &c.

Haec duo novissima descriptionum genera, praeter alias insignes utilitates, hoc etiam habent, quod rectum orationis cursum atque impetum ad formam quodam modo dialogi flectunt: dum sermones variis personis accommodant, quas idem concionator induere debet, & ea vocis & gestus figura pronuntiare, atque ii, quibus hi sermones tribuuntur. Quae res non modo ad orationis, sed etiam ad pronuntiationis varietatem & gratiam plurimum valet.

Post rerum & personarum descriptiones, temporum quoque & locorum numerantur: quas, quoniam proposito nostro parum conveniunt, omittendas duxi. Exstant autem duo huius rei apud Lactantium clarissima exempla in carmine de phoenice, & de dominica resurrectione. Illic enim locus, hic tempus elegantissime describuntur.

CAP. X.

DE AFFECTIBVS IN COMMVNI.

Post amplificandi rationem proximum est, ut de affectibus differamus: quamvis hoc, exposita iam amplificandi ratione, magna ex parte traditum sit. Affectus enim, ut philosophi aiunt, partim magnitudine rerum, partim earundem praesentia oculis subiecta concitantur. Illud amplificatione, hoc descriptione rerum & personarum fit. Vtrumque vero haecenus explicuimus. Itaque rerum amplificatio atque descriptio, quamvis in suadendo

(a) Baruch 4.

do aut dissuadendo, laudando aut vituperando plurimum valeant; non minus tamen, sed multo etiam magis ad affectus permovendos conducunt. Haec igitur prima admonitio sit, ut quum alicuius rei tractatione auditorum animos afficere volumus, eam rem maximam in suo genere ostendamus, eandemque, si natura rei patitur, velut oculis spectandam proponamus.

Huius rei commodissimum exemplum praebent lamentationes Ieremiae: in quibus vir ille sanctissimus, non humano, sed divino spiritu actus, civitatis sanctae everSIONem, civiumque suorum calamitatem miro modo his rationibus exaggerat. Omnia enim, quae calamitas illa complectebatur, hoc est, omnes eius partes & circumstantias enumerat & amplificat, remque totam ante oculos ponit. Hoc enim ostendunt illa verba: (a) quo modo sedet sola civitas plena populo! &c. Et, (b) candidiores Nazarei eius nive, nitidiores lacte, &c. Et, (c) omnes portae eius destructae, sacerdotes eius gementes, virgines eius squallidae, & ipsa oppressa amaritudine. Iam vero eiusdem prophetae oratio, lamentationibus addita, totius calamitatis summam complectitur.

Deinde illud etiam ad permovendos animos maxime iuvat, ut ipsi, qui movere alios volumus, vehementer commoveamur. Qua de re non gravabor Fabii verba, quae superius citavi, hoc in loco repetere. Is igitur, ubi de movendis affectibus disseruisset, sic hunc locum absolvit: (d) Si tradita mihi sequi praecepta sufficeret, satisfeceram huic parti, nihil eorum, quae legi, vel didici, quod modo probabile fuit, omittendo. Sed mihi in animo est, quae latent penitus, ipsa huius loci aperire penetralia: quae quidem non aliquo tradente, sed experimento meo, ac natura ipsa duce accepi. Summa enim, quantum ego quidem sentio, circa movendos affectus in hoc posita est, ut moveamur ipsi. Nam & luctus, & irae, & indignationis aliquando ridicula fuerit imitatio, si verba vultumque tan-

L 4

tum,

(a) *Thren.* 1. (b) *Thren.* 4. (c) *Thren.* 1. (d) *Quintil.* lib. 2. cap. 2.

tum, non etiam animum accommodaverimus. Quid enim aliud est causae, ut lugentes utique in recenti dolore differtissime quaedam exclamare videantur, & ira nonnumquam indoctis quoque eloquentiam faciat, quam quod illis inest vis mentis, & veritas ipsa morum? Quare in his, quae verisimilia esse volumus, simus ipsi similes eorum, qui vere patiuntur, affectibus; & a tali animo proficiatur oratio, qualem facere iudicem voler. An ille dolebit, qui audiet me, quum hoc dicam, non dolentem? Irascetur, si nihil ipse, qui in iram concitat, idque exigit, simile patietur? Siccis agenti oculis lacrimas dabit? Fieri non potest. Nec incendit nisi ignis, nec madescimus nisi humore, nec res ulla dat alteri colorem, quem ipsa non habet. Primum est igitur, ut apud nos valeant ea, quae valere apud iudicem volumus; afficiamurque, antequam afficere conemur.

At quo modo fiet, ut afficiamur? Neque enim sunt motus in nostra potestate. Tentabo etiam de hoc dicere. Quas *phantasias* Graeci vocant, nos sane visiones appellemus; per quas, imagines rerum absentium ita repraesentantur animo, ut eas cernere oculis, ac praesentes habere videamur: has quisquis bene conceperit, is erit in affectibus potentissimus. Hunc quidem dicunt *euphantasioton*, qui sibi res, voces, actus, secundum verum optime finget: quod quidem nobis volentibus facile continget... Vt hominem occisum querar, non omnia, quae in re praesenti accidisse credibile est, in oculis habebo? non percussor ille subitus erumpet? non expavescet circumventus? exclamabit, vel rogabit, vel fugiet? non ferientem, non concidentem videbo? non animo sanguis, & pallor, & gemitus, extremus denique expirantis hiatus insidet? Insequetur *enargia*, quae a Cicerone (a) illustratio & evidentia nominatur; quae non tam dicere videtur, quam ostendere: & affectus non aliter, quam si rebus ipsis intersimus, sequentur... Vbi vero miseratione opus erit, nobis ea, de quibus querimur, accidisse credamus, atque id animo nostro persuadeamus. Nos illi simus, quos gravia,

(a) Acad. quaest. lib. III.

via, indigna, tristia passos queramur. Nec agamus rem quasi alienam, sed assumamus parumper illum dolorem. Ita dicemus, quae in simili nostro casu dicturi essemus. Vidi ego saepe histriones atque comoedos, quum ex aliquo graviore actu personam deposuissent, flentes adhuc egredi. Quod si in alienis scriptis sola pronuntiatio ita falsis accedit affectibus; quid nos faciemus, qui illa cogitare debemus, ut moveri periclitantium vice possimus... Orbem agimus, & naufragum, & periclitantem: quorum induere personas quid attinet, nisi affectus assumimus? Haec dissimulanda mihi non fuerunt, quibus ipse, quantuscumque sum, aut fui, nam pervenisse me ad aliquod nomen ingenii credo, frequenter motus sum, ut me non lacrimae solum deprehenderint, sed pallor, & vero similis dolor. Haftenus Fabius.

Ceterum pios animi erga res spirituales affectus nulla ars praebere potest, nisi adsit Spiritus ille divinus, qui afflatu suo hunc motum animis nostris inspiret, quo & prophetae, & evangelici viri pleni fuerunt. Hoc enim nobis insinuat adspectus ille sanctorum animalium, quae Ezechiel propheta descripsit, (a) qui erat ut carbonum ignis ardentium, & quasi adspectus lampadarum. Non solum enim accensis lampadibus mentes hominum illuminabant, sed etiam ignitis carbonibus ad divinarum rerum amorem incendebant. Hoc affectu saucius Ieremias, clamabat: (b) quis dabit capiti meo aquam, & oculis meis fontem lacrimarum, & plorabo die ac nocte interfectos filiae populi mei? Et, (c) o vos omnes qui transitis per viam! &c. Et, (d) defecerunt prae lacrimis oculi mei, conturbata sunt viscera mea, effusum est in terra iecur meum super contritione filiae populi mei. Hoc eodem affectu commotus Apostolus, dicebat: (e) quis infirmatur, & ego non infirmor? quis scandalizatur, & ego non uror? Et, (f) filii mei, quos iterum parturio, donec formetur Christus in vobis, vellem esse apud vos modo, & commutare vocem

(a) *Ezech. 1.* (b) *Ierem. 9.* (c) *Tbren. 1.* (d) *Tbren. 2.*
 (e) *2. Corinth. 11.* (f) *Galat. 4.*

cem meam, quoniam confundor in vobis. Quisquis igitur hunc animum atque sensum habuerit, non dubium, quin motus ipse alios movere, & incensus incendere possit. Quia vero hoc, ut ante diximus, Spiritus sancti donum est, qui in humilium cordibus requiescit; humilitate & submissione animi, assiduisque precibus illud ab eo flagitet, quisquis onus & officium hoc effugere non potest.

CAP. XI.

DE AFFECTIBVS IN SPECIE:

Verum haec in universum dicta sunt. Iam ad affectus in specie tractandos descendamus, sua cuique loca, & inveniendi rationem perscribentes. Sunt autem alii affectus oratorum, alii concionatorum. Oratores enim fere auditorum animos ad commiserationem vel indignationem movere solent. Concionatores autem ad amorem Dei, peccati odium, spem divinae miserationis, metum divini iudicii, ad spirituale gaudium, salutarem tristitiam, divinarum rerum admirationem, mundi contemptum, & cordis humilitatem, sive animi submissionem movere solent.

Aristoteles secundo rhetorices ad Theodectem libro copiose de omnibus ferme affectibus scribit: nempe de ira, mansuetudine, amore, odio, timore, audacia, pudore, indignatione, misericordia, ceterisque similibus. In quibus tractandis philosophico more causas explicat, quibus unusquisque horum affectuum in animo commoveri soleat. Hanc ergo prudentissimi philosophi methodum his affectibus concitandis, quos supra memoravimus, nos quoque sequemur. Diligenter ergo animadvertenda illa sunt, quae in nobis dilectionem erga Deum, peccati odium, spem in Deum, timorem, ceterosque similes affectus concitare soleant. Haec autem omnia sigillatim explicare, non unius libri, sed multorum opus est: quum magna pars sacrorum voluminum, sanctorumque patrum hoc praecipue agat, ut hos affectus in animis nostris ingeneret.

ret. Nobis autem hoc in loco satis erit, velut digito affectuum fontes indicasse, viamque ostendisse, quam in aliis sequi debeamus.

Amorem igitur in Deum excitant immensa eius bonitas, caritas, mansuetudo, pulchritudo, cognatio, & beneficentia. Bonitas enim, ut ab hac incipiamus, humanae voluntatis obiectum a philosophis esse dicitur. Deus autem non modo bonus, sed immensa etiam bonitas, summumque & universale bonum est, quod omnem complectitur bonitatem; quemadmodum ipse ad Mosem ait: (a) ego ostendam tibi omne bonum. Denique adeo bonus est, ut eius comparatione nihil bonum esse dicatur; quemadmodum Salvator ait: (b) nemo bonus, nisi solus Deus. Amor etiam nostri, quem secundo loco posuimus, ad mutuam amoris vicem reddendam incitat. At ita nos Dominus dilexit, ut dicat: (c) maiorem hac dilectionem nemo habet, quam ut animam suam ponat quis pro amicis suis, Et, (d) sic Deus dilexit mundum, ut filium suum unigenitum daret. Et, (e) in caritate perpetua dilexi te, ideo attraxi te miserans. Haec autem divina caritas sic nos ad redamandum impellit, ut Salvator dicat: (f) ignem veni mittere in terram, & quid volo, nisi ut accendatur? Lenitas quoque & mansuetudo amorem conciliant. At virtutem hanc ita sibi Salvator sumpsit, ut dicat: (g) discite a me, quia mitis sum, & humilis corde. Et Apostolus, (h) ceteris Domini virtutibus praetermissis, fideles obsecrat per mansuetudinem Christi.

Pulchritudo quoque ad se amandam vehementer allicit, quae Graece *calon*, a vocando, dicitur; quod omnia vocet ad se, & amoris vi ac potestate trahat. At Deus est, cuius immensam pulchritudinem Sol & Luna mirantur; qui de se ipso ait: (i) pulchritudo agri mecum est. Nec agri solum, sed omnium etiam caelestium atque terrestrium rerum pulchritudinem in se uno continet: a quo etiam

(a) *Exod.* 33. (b) *Marc.* 10. (c) *Ioan.* 15. (d) *Ioan.* 3.
 (e) *Ierem.* 31. (f) *Luc.* 12. (g) *Matth.* 11. (h) *2. Corinb.* 10.
 (i) *Psal.* 49.

etiam pulchritudo omnis in omnia, quae pulchra sunt, derivatur: quum nemo dare possit, quod non habet. Quisquis autem pulchri huius naturam & conditionem plenius cognoscere cupit, Platonem legat in convivio; in quo Socrates feminam quamdam, de summi huius pulchri natura mirabiliter differentem, inducit.

Sequitur deinde cognatio, quam cum Deo habemus, cuius & genus sumus: quemadmodum Paullus poetae gentilis testimonio docet. Haec autem magnum etiam amoris incitamentum est. Quum enim sanguinis & generis communio inter cognatos sit; consequens est, ut qui se ipsum diligit, eiusdem generis & sanguinis consortes diligat. Inter cognationes autem, parentum & filiorum magna cognatio est. At de Domino Deo nostro propheta dicit: (a) nonne ipse est pater tuus, qui possedit, & fecit, & creavit te? Nec enim corporis solum formator, sed animae etiam creator est: ideoque ipse est, (b) a quo omnis paternitas in caelo, & in terra nominatur: cuius comparatione, sicut nemo bonus, ita nemo pater super terram appellandus est. Vnde merito propheta dicit: (c) pater meus, & mater mea dereliquerunt me, Dominus autem assumpsit me. Et Isaias: (d) & nunc, Domine, pater noster es tu: & Abraham nescivit nos, & Israël ignoravit nos. Quanto ergo magis talis pater diligendus est? Sed est aliud cognationis nomen multo arctius atque coniunctius, quodque maiorem amoris flammam excitat: nempe viri & uxoris, propter quam (e) relinquet homo patrem & matrem. Hoc autem plenissimum amoris nomen sibi Christus Dominus in Canticorum libro vindicavit, ut flagrantissimum suum erga nos amorem, nostrumque, hoc est, sanctarum animarum erga illum, insinuaret. Idemque fidelem animam, fide & caritate inflammata, sibi desponsat. Vtrumque autem nomen, & patris & sponsi, per prophetam complexus est, quum ait: (f) ergo amodo voca me, pater meus, & dux virginitatis meae. Quo ergo amore talis sponsus a nobis diligendus est?

Su-

(a) *Deuter.* 32. (b) *Ephes.* 3. (c) *Psalms.* 26. (d) *Isai.* 63.
(e) *Genes.* 2. (f) *Jerem.* 3.

Supereſt beneficentia , quae omnia Domini beneficia , ſive corporis , ſive animae , ſive naturae , ſive gratiae , ſive communia , ſive privata , complectitur ; atque inter haec omnia ſummum & maximum redemptionis noſtrae beneficium. Quae autem oratio horum beneficiorum multitudinem & magnitudinem vel explicare , vel etiam numerare valeat ? Facilius enim ſtellarum multitudo , quam divina beneficia , numerari poterit. Quot ergo ſunt Domini beneficia , tot cordi noſtro igniculi admoventur , qui amoris ignem erga illum incendunt. Denique , ut uno verbo omnia complectar , omnes amandi rationes , quae in rebus conditis inveniuntur , cum infinita acceſſione in hoc ſummo bono auctae reperiuntur. Quo fit , ut ſolus infinitus amor , qui in divino pectore aeſtuat , huic infinitae bonitati plene ſatisfaciat ; ceteri vero amores , vel ipſarum quoque beatarum mentium , infinitis partibus minores ſunt , quam quos infinita illa bonitas & pulchritudo meretur. Ex his ergo fontibus rationes & incitamenta caritatis oriuntur , quibus algentia hominum pectora ad Dei amorem incendimus.

Hoc igitur exemplo propoſito , Eccleſiaſtes , partim ſtudio & meditatione , partim ſacrarum litterarum , ſanctorumque patrum lectione , rationes invenire poterit , quibus ceteros affectus in animis auditorum excitare poſſit. Inter quos ad letalis peccati odium & deteſtationem , & ad divinae iuſtitiae timorem poſſimum ſtudeat inducere. Hunc autem ſalutarem metum praecipue acuunt peccatorum multitudo , incerta vitae conditio , mortis inevitabilis neceſſitas , divinorum iudiciorum abyſſus , rationis reddendae cogitatio , extremi iudicii formidanda ſeveritas , ſuppliciorumque gehennae acerbitas ſimul & aeternitas , ceteraque his ſimilia. Eſt autem hic timoris affectus utiliſſimus ad obdurata hominum pectora concutienda. Quum enim homines nimium ſui amantes ſint , etiamſi Dei amore careant ; hoc tamen nimio ſui amore capti , quidquid ſibi valde noxium eſſe intelligunt , vehementer perhorreſcunt. Vnde fit , ut a ſervili timore incipientes , &
pec-

peccata solo poenarum metu detestantes, paullatim ad filiorum amorem provehantur. Hac ratione beatissimus confessor Vincentius infinitam paene hominum multitudinem ad veram poenitentiam traxit: quod in concionibus suis ut vehementissimus, ita frequentissimus esset in hoc divini iudicii, aeternorumque suppliciorum metu concitando. Quocirca Ecclesiastes, animarum salutem sitiens, frequenter hos affectus urgere, ac praecipue gehennae acerbitatem & aeternitatem, quanta poterit vi dicendi, exaggerare, & velut oculis spectandam proponere debet. Numquam enim tantum has poenas dicendo amplificare poterit, quin multis ac paene infinitis partibus eius oratio sit inferior, quam quod rei magnitudo postulat. Qua in re omnis ars, omnisque dicendi facultas deficit.

Quum enim inter oratorum virtutes *dinosis* praecipue numeretur, quae rei indignitatem & atrocitatem non solum dicendo aequat, sed etiam superat; qua virtute Demosthenes plurimum valuisse dicitur: in hac tamen poenarum acerbitate amplificanda virtus haec prorsus deficit. Tantum enim abest, ut maiorem, quam res vera est, dicendo faciat, ut nec, quanta sit, efficere ullo modo possit. Quamvis autem longe minus sit, quod hac de re dicitur; hoc ipsum tamen, quod dicitur, vehementer vel ferrea hominum praecordia movere potest. Ad hoc autem multa Ecclesiastes in scriniolis reposita & meditata habere debet, quibus hunc affectum excitare possit, ac deinde ingentem admirationem commovere; quod tam multi sint, qui haec omnia certissima fide sibi persuadentes, non aliter vivant, quam si eadem aniles fabulas existimarent. Vbi igitur his rationibus argumenta invenerimus, quibus affectus isti commoveantur, rationes amplificandi adhibendae sunt, quibus ea, quae inventa fuerint, amplificemus: & haec ipsa exemplis, similibus, dissimilibus, & scripturarum atque sanctorum patrum testimoniis confirmabimus.

DE

DE COMMISERATIONIS AFFECTV.

Conquestio in causis iudicialibus defensori necessaria est, qua vel iudicum, vel auditorum animos ad misericordiam flectere conatur. Huius autem affectus tractatio raro in concionibus incidit: incidit tamen aliquando, sive quum dominicae passionis acerbicatem, vel sacratissimae Virginis dolorem amplificamus, quando aut triduo filium amisit, aut cum eo in Aegyptum fugit, aut, quod fuit longe miserabilius, quum eundem in cruce morientem vidit, & tumulo condidit. Poterit etiam in agonibus martyrum explicandis hic affectus intercedere. Quamvis autem hoc raro eveniat, quia tamen quae de hoc animorum motu rhetores docent, digna sunt quae legantur; ea hoc in loco attexere volui: ex quibus prudens concionator, quae instituto suo commodiora videbuntur, seligere poterit. De hoc igitur affectu Cicero in primo de inventione libro (a) sic ait.

Conquestio est oratio auditorum misericordiam captans. In hac primum animum auditoris mitem, & misericordem conficere oportet, quo facilius conquestione commoveri possit. Id locis communibus efficere oportebit, per quos fortunae vis in omnes, & hominum infirmitas ostenditur: qua ratione habita graviter & sententiose, maxime demittitur animus hominum, & ad misericordiam comparatur, quum in alieno malo suam infirmitatem considerabit. Deinde primus locus est misericordiae, per quem, quibus in bonis fuerint, & nunc, quibus in malis sint, ostenditur. Secundus, qui in tempora tribuitur, per quem, quibus in malis fuerint, & sint, & futuri sint, demonstratur. Tertius, per quem unumquodque deploratur incommodum, ut in morte filii, pueritiae delectatio, amor, spes, solatium, educatio, & si qua simili in genere quolibet de incommodo per conquestionem dici poterunt.

Quartus, per quem res turpes, & humiles, & illiberales proferuntur, & indignae aetate, genere, fortuna, pri-

sti-

(a) Cap. 55. & 56.

stino honore , beneficiis ; quas passi , perpeffurive sint. Quintus est , per quem omnia ante oculos sigillatim incommoda ponentur , ut videatur is , qui audit , videre , & re quoque ipsa , quasi adsit , non verbis solum ad misericordiam ducatur. Sextus , per quem praeter spem in miseriis demonstratur esse ; & quum aliquid expectaret , non modo id non adeptum esse , sed in summas misérias incidisse. Septimus , per quem ad ipsos , qui audiunt , similem casum convertimus , & petimus , ut de suis liberis , aut parentibus , aut aliquo , qui illis carus debeat esse , nos quum videant , recordentur. Octavus , per quem aliquid dicitur esse factum , quod non oportuerit , aut non factum , quod oportuerit , hoc modo : non affui , non vidi , non postremam eius vocem audivi , non extremum eius spiritum excepi. Item : inimicorum in manibus mortuus est , hostili in terra turpiter iacuit insepultus , a feris diu vexatus , communi quoque honore in morte caruit. Nonus , per quem oratio ad mutas & expertes animi res refertur : ut si ad equum , domum , vestem , sermonem alicuius accommodes , quibus animus eorum , qui audiunt , & aliquem dilexerunt , vehementer commovetur.

Decimus , per quem inopia , infirmitas , solitudo demonstratur. Undecimus , per quem aut liberorum , aut parentum , aut sui corporis sepeliendi , aut alicuius eiusmodi rei commendatio fit. Duodecimus , per quem disiunctio deploratur ab aliquo , quum diducaris ab eo , quicum libentissime vixeris , ut a parente , filio , fratre , familiari. Tertiusdecimus , per quem cum indignatione conquerimur , quod ab iis , a quibus minime conveniat , male tractemur , propinquis , amicis , quibus benefecerimus , quos adiutores fore putaverimus , aut a quibus indignum est , ut servis , libertis , clientibus , supplicibus. Quartusdecimus , qui per obsecrationem sumitur : in quo orantur modo illi , qui audiunt , humili & supplici oratione , ut misereantur. Quintusdecimus , per quem non nostras , sed eorum , qui cari nobis debent esse , fortunas conqueri nos demonstramus. Sextusdecimus est , per quem animum nostrum

strum in alios misericordem esse ostendimus : & tamen amplum , & excelsum , & patientem incommodorum esse , & futurum , si quid acciderit , demonstramus. Nam saepe virtus & magnificentia , in quo gravitas & auctoritas est , plus proficit ad misericordiam commovendam , quam humilitas & obsecratio. Commotis autem animis , diutius in conquisitione morari non oportebit. Quemadmodum enim dixit rhetor Apollonius , lacrima nihil citius arescit. Haec tenus Cicero.

CAP. XII.

*DE FIGVRIS ELOQVVTIONIS , QVAE AFFECTIBVS
concitandis deserviunt.*

Qvae haecenus de affectibus concitandis diximus , ad inveniendi magis , quam ad eloquendi , rationem pertinent. Nunc quaedam eloquutionis figuras , quae ad hoc ipsum praecipue conducunt , his adiungere visum est. Post rem igitur insignem amplificatam aut probatam , auditoris animus , qui iam rei magnitudine incipit commoveri , figuris ad hoc idoneis excitandus est. Inter quas prima & vulgatissima est exclamatio ; qualis illa Apostoli , ex affectu caritatis erumpens : (a) o insensati Galatae ! quis vos fascinavit non obedire veritati ? &c. Nec semper exclamatio ab hac interiectione , o , incipienda est , sed ubicumque impotens affectus erumpit , exclamatio est ; qualis illa : (b) generatio prava , atque perversa ! haecine reddis Domino , popule stulte & insipiens ? Nonne ipse est pater tuus , &c. Potuisset enim dicere : o generatio prava ! &c. quemadmodum in evangelio Dominus : (c) o generatio incredula atque perversa ! quamdiu apud vos ero ? quousque vos patiar ? Illa quoque eiusdem Domini vox , doloris index , (d) vae mundo a scandalis , exclamatio est.

Sed vehementissima illa est , quae pluribus constat exclamationibus ; qualis illa Gregorii Theologi in oratione

M

fi1-

(a) Galat. 3. (b) Deut. 32. (c) Matth. 17. (d) Matth. 18.

funebri, in qua Gorgoniae sororis, feminae sanctissimae, virtutes, ac praecipue sacras in orationis studio vigilas commendat. Re enim exposita, sic exclamat: (a) o noctes insomnes, & psalmodum cantus, & stationem in diem desinentem! O David, solis piis animis haud prolixè canens! O tenera membra in terram provoluta, seque asperere praeter naturam exercentia! O lacrimarum fontes prae tribulatione profusarum, ut in exultatione messem faciant! O nocturnum clamorem, nubes penetrantem, ad Deumque pervadentem! O spiritus fervorem, prae orationis desiderio nec canes nocturnos, nec imbres, nec tonitrua, nec grandinem, nec tenebras extimescentem! O femineam naturam, quae, propter commune salutis certamen, naturam virilem superasti, atque ostendisti, maris & feminae nomine, non animos, sed corpora sola distingui! Haecenus Gregorius.

Est autem exclamatio multo acrior, quum *apostrophe* coniuncta est; in qua animus, rei magnitudine commotus, ad res etiam mutas & inanimas sermonem convertit, qualis illa est: (b) obstupefcite caeli super hoc, & portae eius desolamini vehementer, &c. Et illa quoque ante rem expositam, quod rarius contingit, contingit tamen: (c) audi, caelum, & auribus percipe, terra, quia Dominus loquutus est. Et similis huic: audite caeli, quae loquor, audiat terra verba oris mei. Sed illa tamen, si non acrior, certe splendidior atque suavior ex desiderii magnitudine expressa vox: (d) rorate caeli desuper, & nubes pluant iustum: aperiatur terra, & germinet Salvatorem. Hanc quidem vocem ingens desiderii ardor expressit. Ille vero vehemens grati animi & laetitiae affectus: (e) laudate caeli, quoniam Dominus fecit; iubilate extrema terrae: resonate montes laudationem, saltus, & omne lignum eius: quoniam redemit Dominus Iacob, & Israël gloriabitur. D. vero Hieronymus, in epitaphio Nepotiani, mortem ipsam alloquitur his verbis: o mors, quae fratres dividis, & amo-

re

(a) Gregor. Nazian. oratione funebri sororis Gorg. (b) Ierem. 2.
(c) Isai. 1. (d) Isai. 45. (e) Isai. 44.

re sociatos, crudelis ac dura, dissocias! &c.

Contraria huic figura est, qua non res mutas & inanimas alloquimur, sed ipsis etiam sermonem, & humanos affectus tribuimus: quod in litteris sanctis ut vehementissimum, ita frequentissimum est. Quale est illud: (a) flumina plaudent manu, simul montes exultabunt a conspectu Domini: quia venit, &c. Et, (b) laetentur caeli, & exultet terra: gaudebunt campi, & omnia, quae in eis sunt. Tunc exultabunt omnia ligna silvarum a facie Domini, quia venit, &c. Et, (c) misericordia & veritas obiaverunt sibi, iustitia & pax osculatae sunt.

Finitima his hyperbole, quae latine dicitur superlatio; cuius est etiam non infrequens in litteris sanctis usus: quae rem attollit quidem supra fidem, sed non supra modum. Talis est illa vox in psalmo 17. & intonuit de caelo Dominus, & Altissimus dedit vocem suam, grando, & carbones ignis. Et misit sagittas suas, & dissipavit eos; fulgura multiplicavit, & conturbavit eos. Et apparuerunt fontes aquarum, & revelata sunt fundamenta orbis terrarum. His enim vocibus horrendis impetum & iram divini numinis adversus impios voluit demonstrare. Ad eundem modum Deus apud Isaiam, (d) caelum, inquit, turbabo, & conquassabitur terra, propter indignationem Domini exercituum. Quem locum D. Hieronymus explanans, ait, hanc esse superlationem, qua vehementissimam iram Dei vates sanctus exaggerat. Simile huic esse videtur illud eiusdem prophetae: (e) tacui semper, silui, patiens fui, sicut parturiens loquar, dissipabo simul & absorbebo: desertos faciam montes & colles, & omne gramen eorum exsiccabo. His enim verbis divini furoris magnitudo insinuatur.

Interrogationum quoque repetitio vim habet & acrimoniam, & non solum ad affectus permovendos, sed etiam ad orationis varietatem plurimum valet. Est autem vehementior atque elegantior, quum plures interrogationes, articulis aut membris distinctae, in eadem orationis serie

M 2

flu-

- (a) *Psalms. 97.* (b) *Psalms. 95.* (c) *Psalms. 84.* (d) *Isai. 13.*
(e) *Isai. 42.*

fluxerunt ; quale est illud Apostoli : (a) non sum liber ? non sum apostolus ? nonne Christum vidi ? nonne opus meum vos estis in Domino ? Et paullo post : quis militat suis stipendiis umquam ? quis plantat vineam , & de fructu eius non edit ? quis pascit gregem , & de lacte gregis non manducat ? Numquid secundum hominem haec dico ? An & lex haec non dicit ? &c. Sic etiam , exposita letalis peccati gravitate , eos , qui huiusmodi peccata deferere nullo modo volunt , his interrogationibus urgere ac perterrefacere licebit. Quousque tandem , o miseri homines , divina patientia abutemini ? quamdiu in isto infelicissimo statu permanebitis ? quem tot sceleribus finem statuetis ?

Nihil ergo vos periculi vestri magnitudo , nihil divini iudicii timor , nihil mortis incerta conditio , nihil rationis reddendae cogitatio , nihil aeterni supplicii metus , nihil susceptae cum Deo inimicitiae periculum , nihil tot divina beneficia , quae nos ad benefactoris amorem provocant , nihil divinae maiestatis imperium , quod spernitis , & pro nihilo ducitis , nihil Christi crux , clavi , lancea , sputa , vincula , flagella , vestri causa suscepta , apud vos efficient ? Quale pectus illud est , quod tot machinis non movetur , tot arietibus non quatitur , tot fulminibus non deiicitur ? Quomodo talibus aut cibus , aut somnus gratus esse potest , quum in eo statu degant , in quo , si repentina mors supervenerit , quod fieri non raro solet , protinus ad aeterna supplicia rapiantur ? Quis in eis sensus remanet , qui somnum carpere tot noctes in peccato audent ? qui rerum omnium conditorem , sine cuius virtute ne spirare quidem possumus , sibi infensum & inimicum habent ? Quis hic daemonis vires atque potentiam non agnoscat , adeo potenter hominem excaecantis , & veluti adamantinis compedibus vincientis ?

Obsecratio quoque , qua aliquid obnixe ab auditoribus postulamus , post rem probatam aut amplificatam , appositissime cadit. Sic Paullus , (b) obsecro , inquit , vos per misericordiam Dei , ut exhibeatis corpora vestra hostiam viventem , &c. Et iterum : (c) ipse ego Paullus obsecro vos per man-

(a) 1. *Corinth.* 9. (b) *Rom.* 12. (c) 2. *Corinth.* 10.

mansuetudinem & modestiam Christi, &c. Et alibi : (a) obsecro vos ego vinctus in Domino, &c. Sic D. Chrysostomus, postea quam vehementer in eos invecus esset, qui sorores adoptivas domi fovebant, hac obsecratione orationem clausit : oro igitur & supplico, & ante genua vestra me provolvo, & omnibus preces offero, persuadeamini, & ab hac ebrietate redeamus : simus nostri ipsorum compotes, & agnoscamus honorem, quem dedit nobis Deus, & Paulum clamantem audiamus : ne sitis servi hominum, & mulieribus servire ad communem omnium perniciem desinamus. Haecenus ille.

Hac igitur figura frequentissime concionatores uti possunt : quae, si a caritatis visceribus proficiscatur, magnam vim ad animos permovendos habet. Est in Hispania concionator quidam, non minus sanctitate, quam doctrina & officii dignitate celebris : cuius auditores, inter cetera laudum eius insignia, hoc maxime commendant, quod frequenter hac obsecratione uti soleat : obsecro vos, fratres, amore Dei, ne ultra peccare velimus. Quam quidem sententiam ea vocis & vultus figura pronuntiat, quae facile affectum eius caritatis plenissimum ostendunt, quo vehementer auditorum animos commovere solet.

Finitima est huic adiuratio, quae maiorem adhuc vim habet. Cuius speciem illa Paulli verba prae se ferre videntur : (b) testificor coram Deo, & Christo Iesu, qui iudicaturus est vivos & mortuos, per adventum ipsius, & regnum eius, praedica verbum, &c. Religiosus admodum pater Franciscus Titelmanus, ubi in commentariis de caelo & mundo, aliquorum siderum magnitudinem, ex sententia Ptolemaei Alfagrani, ceterorumque doctissimorum astronomorum, declarasset; adiecissetque, aliquot sidera esse, quae terrae magnitudinem tricesies quinquies, alia septuagies, alia nonagies, alia vero, quae primae magnitudinis esse dicuntur, centies & septies superarent, rei magnitudine stupefactus, sic exclamat : adiuro te, lector, quisquis es, ut christiano pectore etiam atque etiam perpendas ex his,

M 3

quae

(a) *Ephef. 4.* (b) *2. Timoth. 4.*

quae dicta sunt, quam sit miseranda fors eorum hominum, qui propter angustissima huius terrae gurgustiola immensam illam caelestis regni amplitudinem amittunt.

Iterumque considera, quam miseri sint, & quam male sibi consulant, qui pro huiusmodi rebus digladiantur, mutuoque se ipsos decipiunt, omniaque divina & humana iura violant. Quamvis enim aliquis totius terrae imperium obtineret, quod tamen nulli haecenus inter mortales contigit; quid aliud, quam punctum, rapuit? quid aliud quam punctum manibus tenet, in atomo tenet imperium? Illi ergo, qui pro terrae minima particula, utpote pro agello, pro angusto praediolo, pro domuncula sive casula contendunt; quid aliud moliuntur, quid quaerunt, quam huius puncti, hoc est, totius terrae, minimam particulam possidere? O vanas hominum curas! o pectora caeca! Disce, o miser, pro quam minima recula, quantum amittas thesaurum; & pro angusto formicarum nidulo, quam amplum abiicias palatium, dum terrenam sortem caelesti praeeligis.

Optatio quoque affectum animi desiderantis explicat; qualis illa: (a) gens absque consilio, & sine prudentia est. Utinam saperent, & intelligerent, ac novissima providerent! Item illa: (b) quis dabit mihi pennas sicut columbae, & volabo, & requiescam? Et illa: (c) usquequo peccatores, Domine, usquequo peccatores gloriabuntur? Sic etiam Dominus de filiis Israël obedientiam pollicentibus ad Mosem ait: (d) recte omnia sunt loquuti. Quis det eos talem habere mentem, ut timeant me, & custodiant universa mandata mea, ut bene sit illis, & filiis eorum usque in sempiternum? Sanctus quoque Iob, (e) quis, inquit, mihi tribuat, ut in inferno protegas me? &c. Et, (f) quis mihi tribuat, ut scribantur sermones mei? Quis mihi det, ut exarentur in libro, &c. Ieremias item, populi peccatis offensus, clamat: (g) quis dabit me in solitudine diversorium viatorum, ut fugiam populum meum; quia omnes adulteri sunt, & coetus praevaricatorum?

Con-

(a) *Deuter.* 32. (b) *Psal.* 54. (c) *Psal.* 93. (d) *Num.* 36.
(e) *Iob* 14. (f) *Iob* 19. (g) *Ierem.* 9.

Contraria huic est imprecatio ; qualis illa Didonis apud Virgilium : (a)

*Sed mihi vel tellus optem prius ima dehiscat,
Vel pater omnipotens adigat me fulmine ad umbras
Pallentes umbras Erebi , noctemque profundam;
Ante pudor , quam te violem , aut tua iura resolvam.*

Est haec figura non infrequens in litteris sanctis. Sic sanctus Iob : (b) pereat dies , in qua natus sum , & nox , in qua dictum est : conceptus est homo. Et Osee 14. pereat Samaria , quia ad iracundiam provocavit Deum suum , &c. Et in psalmo : (c) fiant mensae eorum coram ipsis in laqueum , &c. Verum his imprecationibus , prophetarum & psalmorum libri pleni sunt : quae tamen non tam imprecationes malorum , quam futurarum cladum vaticinia , existimandae sunt. Hac figura uti possumus , quum , gehennae acerbitaltem , aut extremi iudicii severitatem exaggerantes , damnatorum voces exprimimus ; quibus illi parentibus , nutricibus , praeceptoribus , ac postremo natali diei , atque sibi ipsis rabido ore dira imprecantur.

Admiratio quoque inter figuras , quae affectibus serviunt , iure numeranda est : cuius est in litteris sanctis frequens usus ; qualia sunt illa : (d) quo modo sedet sola civitas plena populo ! Er , (e) quo modo obscuratum est aurum , mutatus est color optimus ! Er , (f) quo modo obtexit caligine in furore suo Dominus filiam Sion ! Isaias quoque , (g) quo modo cecidisti de caelo , Lucifer , qui mane oriebaris ! &c. Et Psalmographus : (h) quid est tibi mare , quod fugisti , & tu Iordanis , quia conversus es retrorsum ? Montes exultastis sicut arietes , &c. Hoc autem in loco duplicatur figura , quum admirationi iungitur apostrophe. Apparet autem , hanc esse figuram , quia quod simpliciter dici poterat , sedet sola civitas plena populo , &c. acrius eadem sententia hoc modo profertur , & honestatur.

Sunt & aliae figurae , quae multum etiam ad acrimoniam , & res amplificandas valent : quales sunt , repetitio,

M 4

con-

(a) *AEneid. lib. IIII. a v. 24.* (b) *Iob 3.* (c) *Psal. 68.* (d) *Tbren. 1.*
(e) *Tbren. 4.* (f) *Tbren. 2.* (g) *Isai. 14.* (h) *Psal. 113.*

conversio , complexio , interpretatio , *synathrismos* sive congeries , contraria , contentio , & quaedam aliae , quas inter ceteras eloquutionis figuras reddemus. Eas enim solum hic enumerare volumus , quae manifestos continent affectus. Quas si quis inter figuras referre noluerit , non admodum repugnabo , dum modo earum vis atque natura intelligatur.

Haec sunt , quae de amplificandi ratione in communi mihi dicenda visa sunt. Quum autem initio secundi libri , omnem orationem in triplici genere versari , traditum a nobis sit , nempe argumentatione , amplificatione , & expositione ; ac de duobus prioribus iam dictum sit : reliquum erat , ut de tertia parte , hoc est , expositione , modo diceremus : de qua tamen in sequenti libro , quum de narratione , & genere didascalico dicendum erit , pauca trademus. Vtrotumque enim modo aliquid exponimus , vel quum rem gestam narramus , vel quum abstrusum aliquid dicendo explicamus ,





LIBER QVARTVS
ECCLESIASTICAE
RHETORICAE,
SIVE DE RATIONE CONCIONANDI:
QVI SINGVLARIA CONCIONVM
genera, & dispositionis ordinem atque
rationem explicat.

CAP. I.

DE SEX ORATIONIS PARTIBVS.

HActenus communia inventionis praecepta, quae ad omnia concionum genera in universum pertinent, exposuimus. Nunc doctrinae ordo exigere videtur, ut ad singulares concionum species tractandas descendamus: & quid unaquaeque earum desideret, quidque Ecclesiastes supra oratorem addat, explicemus. Diximus autem, ex Aristotelis & Ciceronis sententia, rhetoricae artis materiam in triplici causarum genere versari, iudiciali, deliberativo, ac demonstrativo. Et in iudiciali quidem genere accusamus, vel defendimus: in deliberativo suademus, dissuademus, hortamur, dehortamur, petimus, consiliamur, commendamus, &c. in demonstrativo, personas, res, facta laudamus, aut vituperamus. Additum est his didascalicum, seu dialecticum genus ab iis, qui latius hoc causae genus patere volunt, ut non tantum finitam complectatur quaestionem, sed ad infinitam etiam extendatur, & ad quamcumque rem positam, de qua differi via & ratio.

tione possit. Hoc genere continentur theses, seu loci communes, & simplices, & copulati: quorum tractationem orator a dialectica methodo accipit. Eam rationem Cicero in libris de officiis sequutus est: nihilque aliud D. Thomas, ceterique Theologiae doctores agunt, quum de Deo, de angelis, de anima, de fide, spe, caritate, ceterisque virtutibus disputant; quarum naturam, genus, species, partes, causas, effectus, &c. tractant. Huius autem generis finis cognitio est. Ecclesiastes tamen omnia ad vitae institutionem inclinabit.

Ex his autem quattuor generibus, iudiciale ab instituto nostro excludendum esse, superius diximus; reliqua vero tria, quoniam proposito nostro magis conveniunt, sigillatim a nobis tractanda sunt.

Quia vero non parum refert ad omnia concionum genera, praecipueque ad suasoria, quae maxime ad institutum nostrum pertinent, orationis cuiusque praecipuas partes, & veluti membra nosse: necesse erit, ut has ante omnia breviter exponamus. Sunt igitur plenissimae atque perfectae orationis sex partes: exordium, narratio, propositio, cui partitio sive divisio iungitur, confirmatio, confutatio, & conclusio sive peroratio. Exordium est principium orationis, per quod animus auditoris praeparatur ad audiendum. Narratio est rerum gestarum, aut perinde ut gestarum, expositio. Propositio summam causae complectitur: cui additur partitio, quae membra orationis aperit. Confirmatio est nostrorum argumentorum expositio cum asseveratione. Confutatio est contrariorum locorum dissolutio. Conclusio est artificiosus terminus orationis. Has partes natura monstravit, & hunc ordinem servari iubet, ut antequam de re proposita dicamus, initio concilientur animi eorum, qui audiunt; deinde res demonstratur; postea controversia constituatur; tum id, quod intendimus, confirmetur; post, quae contradici possunt, refellantur; extrema autem oratione, ea, quae pro nobis faciunt, amplificentur, & augeantur; quae pro adversariis, infirmantur. Est itaque oratio, quae his partibus constat, velut perfectum quoddam in suo genere corpus,

pus, membris omnibus absolutum. Prima igitur pars ad conciliandos animos, ultima ad commovendos valet. Confirmatio & confutatio ad docendum ac probandum pertinent, ad quam reliquae viam muniunt. Ex his partibus plena & perfecta componitur oratio. Quid autem unaquaeque earum exigat, exponere incipiamus.

§. I.

DE EXORDIO.

EXordium est, quo animus auditoris ad audiendum praeparatur. Id ita sumitur, ut benevolos, ut attentos, ut dociles auditores habeamus. Hic multa rhetores de captanda benevolentia docent. Benevolos quippe auditores quatuor modis faciunt: a dicentis, ab adversariorum, ab auditorum persona, & a rebus ipsis. Et ab adversariorum quidem persona, si eos in odium, invidiam, contemptum adduxerint: quae omnia longissime ab officio nostro distant. Satis ergo nobis erit, si attentos & dociles efficiamus; quibus etiam rationibus, eorum nobis favorem & gratiam conciliabimus. Attentos enim habebimus, si docebimus, nos de rebus magnis, novis, inusitatis verba facturos, aut de iis rebus, quae ad rempub. pertinent, aut ad eos ipsos, qui audient, aut ad Dei cultum & religionem: & si rogabimus, ut attente audiant: & si numero exponemus res, de quibus dicturi sumus. Dociles auditores habere poterimus, si summam causae breviter exponemus, & si attentos eos faciemus. Nam docilis est, qui attente vult audire.

§. II.

DE NARRATIONE.

Post exordium rhetores, qui hanc artem ad iudiciales praecipue causas tractandas, ut antea diximus, excogitarunt, narrationem secundo loco posuerunt: quae ad
hu-

huiusmodi causas agendas fere necessaria est. Hoc autem narrationis genus parum instituto nostro convenit. Sunt tamen quattuor alia narrationum genera, quae non raro in conciones incurrunt. Primum est, quum res gestas, quae vel in sacris litteris, vel in vita sanctorum continentur, ad aliquid confirmandum commemoramus. Secundum est, quod amplificandi causa tractatur. Tertium est, quod allegoriae, vel tropologiae servit. Quartum in evangelica lectione explicanda versatur: de quibus breviter modo dicendum est.

Primum ergo genus esse dicimus, quod res gestas, & exempla sanctorum commemorat. Sic enim narramus historiam Ioseph a fratribus proditi: sic Davidis, Tobiae, Iudith, Esther, Ionae prophetae, ceterasque similes, alicuius utilitatis gratia, in diversis concionum partibus commemoramus. Nemo autem putet, facile cuique esse, huiusmodi exempla artificiose & eleganter dicere. Hac enim in re cum primis eloquentia dominatur, ut iucundam narrationem efficiat: in ea namque tum animorum motus, tum verba variis personis convenientia, per quae morata oratio fit, tum etiam breves rerum descriptiones adhibendae erunt, quae rem oculis subiiciant. Genus quoque orationis rebus ipsis convenire debet. Hoc autem fiet, si laetis iucunda, seriis gravis, insignibus ornata, tristibus acerba tribuatur expositio:

Quamvis autem huiusmodi narrationes iudicialium causarum dissimiles sint, eas tamen virtutes habere debent, quas illis rhetores attribuunt. Volunt quippe, ut omnis narratio brevis, dilucida, verisimilis, & iucunda sit. Brevis, & iucunda libentius auditur: perspicua facilius intelligitur: verisimilis citius probatur. Solet fere narrationis initio praeparatio quaedam adhiberi, & fini tamquam peroratio, atque ad contentionem transitio: quod ipsum in reliquis etiam partibus observandum est, ut apte inter se omnes atque eleganter cohaereant. Has ergo res habere narrationem convenit: quae quoniam fieri oportere scimus, quemadmodum facere debeamus, cognoscendum est. Rem breviter narrare poterimus, si inde incipiemus narrare, unde neces-

cesse erit : & si non ab ultimo initio repetere volemus ; & si summatim , non particulatim , narrabimus ; & si non ad extremum , sed usque eo , quo opus erit , prosequemur ; & si transitionibus nullis utemur ; & si non deerrabimus ab eo , quod coeperimus exponere ; & si exitus rerum ita exponemus , ut ante quoque quae facta sint , sciri possint , tamen si nos reuocauerimus. Quod genus , si dicam me ex provincia rediisse , profectum quoque in provinciam intelligatur. Et omnino non modo id , quod obest , sed etiam id , quod neque obest , neque adiuuat , satius est praeterire. Et , ne bis aut saepius idem dicamus , cavendum est etiam , ne id , quod semel supra diximus , deinceps dicamus , hoc modo : Athenis Megaram vespere advenit Simo : ubi advenit Megaram , insidias fecit virgini : insidias postquam fecit , vim in loco attulit.

Rem dilucide narrabimus , si ut quidquid primum gestum erit , ita primum exponemus , & rerum ac temporum ordinem conservabimus , ut gestae res erunt , aut ut potuisse geri videbuntur. Hic erit considerandum , ne quid perturbate , ne quid contorte , ne quid ambigue , ne quid nove dicamus , ne quam aliam in rem transeamus , ne ab ultimo repetamus , ne longe prosequamur , ne quid , quod ad rem pertineat , praetereamus : & sic persequamur ea , quae de brevitate praecepta sunt. Nam quo brevior , eo dilucidior & cognitu facilior narratio fiet. Verisimilis narratio erit , si , ut mos , ut opinio , ut natura postulat , dicemus : si spatia temporum , personarum dignitates , consiliorum rationes , locorum opportunitates constabunt ; ne refelli possit , aut temporis parum fuisse , aut causam nullam , aut locum idoneum non fuisse , aut homines ipsos facere aut pati non potuisse. Lucunda vero narratio erit , si nova , inexpectata , magna , gravia contineat.

Secundum narrationis genus esse diximus , quod amplificandi causa sumitur , quo videlicet egregia sanctorum facta , aut detestanda malorum exempla amplificare volumus. Hac ratione Origenes obedientiam Abrahae in filii sacrificio , Gregorius Nazianzenus vitam & mortem beati martyris Cy-
pria-

priani , D.Basilii quadraginta militum martyrium , D. autem Chrysostomus trium puerorum , quos Nabuchodonosor in fornace coniici praecepit , constantiam & animi magnitudinem amplificat. Hoc autem narrationis genus maiorem adhuc eloquentiae vim , quam superius illud , desiderat. Huic enim potissimum amplae illae rerum & personarum descriptiones , & ea omnia , quae in superiori libro de amplificatione diximus , serviunt. Nihil autem nos iuvare magis ad huius artificii rationem poterit , quam haec sanctorum patrum scripta , quae modo retuli , perlegisse , & , quae artis sunt , diligenter in eos adnotasse. Verum hac de re paullo fusius , quum ad demonstrativum genus ventum fuerit , disseremus.

Tertium genus est , quod allegoriae , mysticisque sanctorum scripturarum sensibus deservit. Quia vero sancti olim patres , ac praecipue Origenes , in his mysticis sensibus explicandis diligentissime versati sunt ; & hoc ipsum ad concionatoris officium maxime spectat : quae mihi hac de re dicenda videbuntur , paucis expediam. Principio igitur inter mysticos sensus , alii ad mores formandos , alii ad Christi mysterium explicandum pertinent : illud tropologiam , hoc allegoriam appellant. Et illi quidem sensus ad moralem philosophiam , hi vero ad Christi fidem : illi ad legem , & institutionem vitae , hi ad gratiam evangelii explicandam referuntur. Qua ex re dignitas allegoriae supra tropologiam intelligitur : quandoquidem tropologia divinae legis enarrationem continet , allegoria vero divinae gratiae beneficium demonstrat : illa quidem intellectum erudit , haec vero , proposita divinae gratiae , divinaeque bonitatis & misericordiae magnitudine , voluntatem accendit. Itaque quum concionator , ut ante diximus , docere , flectere , ac delectare debeat , tropologia solum docet : allegoria vero non solum docet , sed etiam flectit atque delectat. Delectat quidem , divinae largitatis , & gratiae , evangelique faustissimo nuncio ante oculos posito : flectit autem , qui , hac tanta divinae bonitatis & caritatis magnitudine exposita , voluntates hominum ad mutuum in Deum amorem,

rem, & peccati odium, & salutis suae spem vehementer incendit.

Sed quum allegoriae nomen multa, quae ad Christi mysterium pertinent, comprehendat; illud genus allegoriae potissimum excellit, quod summum redemptionis nostrae beneficium, & dominicae passionis meritum, & divinae gratiae, quae per illam nobis datur, mirabilem vim & efficaciam praecipue declarat. Haec enim diligenter exposita & amplificata, miro modo mentes hominum in tantarum rerum admirationem rapiunt, & divinae bonitatis, benignitatis, caritatis & misericordiae amorem vehementer inflammant. Nemo autem allegoriarum tractatione hos affectus excitare poterit, nisi qui prius, partim quidem studio atque doctrina, partim vero secreto Spiritus sancti magisterio, hanc tantam divinae dignationis gratiam didicerit, eiusque non modo cognitionem, sed etiam sensum ab eo hauserit. Hoc autem ad mysticam Theologiam spectat, quae divinarum rerum dignitatem magis amando ac degustando, quam intelligendo, cognoscit; cuius verus ac legitimus magister Spiritus sanctus est. Qui ab hoc igitur summo praecceptore fuerit edoctus, is utique huiusmodi allegoriarum tractatione poterit animos hominum ad amorem in Deum, & peccati odium excitare: & quem ipse motum atque affectum animo conceperit, in alios dicendo transfundere.

Sunt autem quidam, praecipue hac nostra aetate, qui solo litterali, ut vocant, sensu contenti, mysticos sensus refugiunt. Sunt rursus alii, qui in omnibus paene sanctarum scripturarum locis hos sensus indagare student: quo in genere notatus olim a D. Hieronymo Origenes fuit: sic enim de illo ait: liberis campis allegoriae vagatur, & interpretatis nominibus singulorum, ingenium suum facit Ecclesiae sacramenta. Modus igitur in his adhibendus est, & media, hoc est, regia via incedendum, ut videlicet nusquam allegorias requiramus, nisi quum res ipsa mysticum sensum postulare videtur. Quum enim Dominus in evangelio (a) lu-

tum

(a) Ioan. 9.

tum facit ex sputo, & caeci oculos linit, & ad natatoriam Siloë mittit: quumque surdum, & mutum a turba secernit, (a) & exspuens tangit linguam eius, & digitos mittit in aures eius, & gemit, & caelum suspicit, aperte haec omnia mysticum aliquid nobis hic latere insinuant.

Hac igitur in re haec ab eodem Origene tradita regula mihi tenenda esse videtur: ut quoties vel in sacra historia, vel in veteris legis praeceptis, sacrificiis, & caerimoniis aliquid inveniatur, quod prima fronte vel otiosum, vel specie tenus superstitiosum, vel parum rationi & aequitati consonum inveniatur; ibi mysticum sensum requiramus: ut quod in littera, scriptoris aut legislatoris dignitati minus convenire videtur, in mystico sensu maxime convenire reperiatur. Exempli gratia: parum divinae legis aequitati convenire videtur, ut mulier, (b) quae filium enixa fuerit, septem diebus immunda sit, & ab omni sacrorum contactu arceatur: si vero filiam pepererit, hoc legalis immunditiae spatium duplicetur. Sic etiam quum vir mundus, (c) qui ex praecepto Domini vaccam, legalium immunditiarum expiatrix, comburit, & qui eius cineres colligit, in mundissimo loco reponit, lavare vestimenta sua, & usque ad vesperam immundus esse per legem debeat: quum ex divinae legis obedientia, & rei mundissimae contactu nemo sordes contrahat. Iam vero vacca praecipitur eligi rufa, & sine macula, & quae numquam iugum portaverit, & quod extra castra, non in templo, sit immolanda atque comburenda; & ita comburenda, ut ipsius etiam pellis atque fimus cum ea simul comburantur: quis igitur haec omnia mysteriis vacare credat? Quid vero mundati leprosi sacrificium? quam multa continet, quae, si nihil spirituale atque reconditum designarent, indignum Deo legislatore viderentur.

Sic enim Levitici XIII. de ipso legimus: adducetur ad sacerdotem, qui egressus de castris quum invenerit lepram esse mundatam, praecipiet ei, qui purificatur, ut offerat duos passeris vivos pro se, quos vesci licitum est, & lignum cedrinum, vermiculumque, & hyssopum, & unum ex pas-

se-

(a) *Marc. 7.* (b) *Levit. 12.* (c) *Num. 19.*

seribus immolari iubebit in vase fictili super aquas viventes : alium autem vivum cum ligno cedrino , & cocco , & hyssopo tinget in sanguine passeris immolati , quo adspersget illum , qui mundandus est , septies , ut iure purgetur , & dimittet passerem vivum , ut in agrum avolet. Haec nus verba legis. In his ergo ac similibus legibus explicandis Origenes ait : si credimus, has litteras esse divinas, necesse est, ut spirituale aliquid atque divinum, tanto dignum legislatore, in eis latere fateamur. Alioqui audeo dicere, Atheniensem, aut Lacedaemoniorum leges commodiores hominibus, magisque salutare exstitisse. Quum vero idem Dominus in paschalis agni sacrificio praecipiat, (a) ut is agnus sit anniculus, ut sine macula, ut in una domo comedatur, ut ossa eius non conterantur, ut nihil ex eo in crastinum reponatur, sed igne, quod residuum fuerit, comburatur, ac postremo ut assus, non elixus, comederetur : quis adeo sine mente erit, ut non, haec omnia mysticis sensibus refertissima esse, credat? Hic D. Gregorius ex eo, quod Dominus praecipit, (b) ne quid crudum ex hoc agno comederetur, aperte colligit, spirituales in his sensum reconditum esse. Alioqui otiosum erat praecipere, ne quis crudas carnes comederet, quas praeter carnivoras bestias nemo comedit.

His ita constitutis, proximum est, ut tractandi rationem in his mysticis sensibus ostendamus. Primum igitur vel legem ipsam, vel historiam rei gestae dilucide & breviter, ut paullo ante de narratione diximus, exponemus: hac tamen observatione, ut vel ex lege, vel historia rei gestae ea solum dicamus, quae ad mystici sensus explicationem pertinent; cetera vero, nisi quae ad historiae cognitionem necessaria fuerint, praetermittamus. Exempli gratia: si ex sacrificio illius vaccae, (c) cuius paullo ante mentionem feci, redemptionis Christi gratiam, & sacramentorum virtutem, a sacra eius passione manantem, voluero declarare, altero eiusdem legis mysterio praetermisso, de eo videlicet, qui vaccam combussit, & eius cineres in mun-

N

do

(a) *Exod.* 12. (b) *Ibidem.* (c) *Num.* 19.

do loco reposuit, qui etiam immundus esse usque ad vespem dicitur, cetera solum, quae ad sacram Christi humanitatem pertinent, commemorabo: ne videlicet multis rebus, quarum mysteria explanare nolo, narrationem frustra onerem.

Rursum si docere voluero, genus humanum primi parentis vitio ad mortem damnatum; nequaquam Mosis lege, sed per incarnationis dominicae beneficium fuisse a morte suscitatum; per quod homines, immensam illam Dei bonitatem & caritatem agnoscentes, amore eius aestuare coeperunt: ea solum ex historia pueri ab Eliseo suscitati (a) narrabo, quae ad hoc mysterium explicandum pertinebunt. Nempe, quod illa sancti viri hospita ad ipsum accurrerit, propheta vero puerum suum cum baculo miserit, quem super defuncti corpus poneret; qui tamen vitam mortuo reddere non potuit, quousque pueri dominus venit, seque ad defuncti parvuli mensuram contraxit: quo factum est, ut caro pueri calefieret, oculosque aperuerit, atque ita demum vitam amissam receperit. Lege igitur aut historia hoc modo ante oculos posita, primo loco iis rationibus, quas paullo ante ex Origenis sententia attigimus, demonstrandum erit, mysticum aliquid in iis rebus latere. Nam, ut de Eliseo loquar, quorsum necis & vitae auctor Dominus hac tam nova ratione voluerit mortuo vitam reddi, quae nihil ad hoc pertinere videbatur?

Quum his igitur rationibus auditorum attentio fuerit excitata, eorumque animus eius mysterii cognoscendi avidus effectus, tum eius explanationem aggrediemur, singulas eius partes, singulis vel legis vel historiae partibus accommodantes: idque, quantum orationis perspicuitas tulerit, translatis verbis utentes, quae ad legem vel historiam propositam alludere intelligantur. Quod tamen ita faciendum erit, ut oratio metaphoris respersa, non obruta esse videatur, ne obscuritatem pariat, & allegoricus sermo in aenigmata exeat.

In his autem allegoriis nequaquam oportebit, quod qui-

(a) 4. Reg. 4.

quidam faciunt, diutius in nominum interpretatione versari: sed haec ipsa brevi oratione explicantes, in ea re, cuius gratia allegoria inducta est, immorari conveniet, & longiori interdum oratione, id quod intendimus, amplificare.

Vltimo vero loco illud adiiciam, ut quoniam multa sunt, quae de hac re praecipiuntur, quae nos brevi oratione complecti minime possumus, studiosus concionator, in his mysticis sensibus explicandis cum laude versari cupiens, diligenter Origenis libros, qui in Mosis Pentateuchum scripti sunt, evolvat; & ex eo, quonam modo haec praecipua Theologiae pars tractanda sit, plenissime discet. Exstat etiam de hoc argumenti genere Radulphi Flaviani opus in Leviticum, dignum profecto, quod a studiosis concionatoribus legatur. Exstat item allegoriarum, moraliumque sententiarum opus, abs triginta veteribus patribus collectum: in quo multa in hoc genere scitu digna pius concionator congesta deprehendet.

Reliquum erat quartum narrationis genus, quod in evangelica lectione explananda versatur: cuius vim & rationem paullo post suo loco explicabimus.

§. III.

DE PROPOSITIONE, ET PARTITIONE.

Propositio est, qua breviter status & summa totius causae comprehenditur. Haec autem omnis confirmationis caput est, quae omitti numquam potest. Si propositio simplex non est, subiicitur partitio, quae brevis est partium propositionis enumeratio. Ea duplex est: una, quae tantum in genere iudiciali adhibetur, per quam aperi-
mus, quid cum adversariis conveniat, & quid in controversia relinquatur. Altera est, qua in omnibus causarum generibus uti licebit: per quam explicamus, quot, & quibus de rebus sumus dicturi, & quem sequuturi in di-

cendo ordinem ostendimus , ut quid , quaque de re , quo-ve loco dicendum sit , appareat : quae res vel maxime docilem facit auditorem , dum , quo ordine unamquamque earum , quae propositae sunt , partium tractaturus sit , praecognoscet : maximumque eadem memoriae lumen affert : utilis & necessaria non oratori solum , sed cuivis etiam quacumque de re differenti. Sed hic videndum est , ne sit obscura partitio , ne longa nimium ac multiplex , ne permixta genera partibus implicentur. Tribus enim virtutibus ea maxime commendatur , absoluteione , & paucitate : nec pluribus fere , quam tribus , aut interdum quattuor membris comprehenditur.

Evenire autem interdum potest , ut aliqua divisionis pars docendi gratia iterum dividenda sit : quod fecit Cicero pro lege Manilia , sive de imperatore ad bellum Mithridaticum deligendo. Prima enim partitio fuit : primum mihi videtur de genere belli , deinde de magnitudine , tum de imperatore deligendo esse dicendum. Absolutis autem duobus propositis divisionis membris , quum ad tertium ventum est , hac divisione est usus : ego sic existimo , in summo imperatore quattuor has res inesse oportere , virtutem , scientiam rei militaris , auctoritatem , felicitatem. Haec de partitione in universum dicta sunt : de qua etiam non nulla paullo inferius adnotabimus.

Sunt autem multa alia , quae dialectici de divisionis ratione atque natura docent , quae ab illis petenda sunt. Quod vero ad institutum nostrum attinet , videndum illud quoque est , ut membra divisionis inter se cohaereant : hoc est , ut sub eodem genere univoce contineantur. Qua in re multi nimis insulse peccant , qui sola nominis voce contenti , dissimilima inter se membra sub eodem nomine coniungunt. Pudet huius rei exemplum ponere. Hoc certe modo peccant , qui , civitatem supra montem positam explicaturi , montem faciunt virum sanctum , de quo sermonem habituri sunt ; deinde Ecclesiam ; tum iusti viri animam , atque ita de triplici monte se concionem habituros dicunt. Quo in genere innumera paene vitia in multis

tis auctoribus, qui sermones scripserunt, passim deprehendere licet.

Quia tamen non leviter a multis in hac dividendi ratione peccatur; quae res totius concionis perturbationem parit, quae tota a divisionis ordine & ratione procedit; quid in hac parte Ecclesiastes considerare debeat, paucis expediam. Is igitur ante omnia, quid in tota concione efficere velit, hoc est, orationis suae scopum, ante oculos ponat. Deinde, quibus illum rationibus attingere velit, animadvertat, easque in prudenti consilio ad aliquem ordinem reducat: atque ita demum divisionis partes colligere poterit, quae totius causae summa comprehendant. Hoc autem apparet in ea Ciceronis divisione, quam paullo ante(a) citavimus. Cetera vero, quae de hac re praecipui possunt, prudentis concionatoris iudicio relinquuntur: quandoquidem totam hanc recte disponendi rationem, a qua divisio manat, Cicero prudentiae magis consilio, quam artis praeceptis, constare putat.

§. IV.

DE CONFIRMATIONE, ET CONFUTATIONE.

Quartam & quintam orationis partem esse diximus confirmationem & confutationem, quas non nulli sub contentionis & probationis nomine comprehendunt: cuius gratia superiores illae partes traditae sunt. Ea vero totius quaestionis disputationem continet. Constat autem confirmatione & confutatione: quatenus illa ad probandum, haec ad refellendum valet; illa argumentando causae facit fidem, haec adversariorum argumenta, quae vel obiecta sunt, vel obiici possunt, dissolvit. Ad hanc autem probationis partem omnia, quae in secundo libro, sive de argumentorum inventionem, sive de argumentationum formis, dicta sunt, pertinent. Quae omnia ex dialecticorum fontibus manant. Verum quum concionatori efficiendum sit, non solum ut doceat, quod proprium est dia-

(a) §. praecedenti.

lecticorum, verumetiam ut delectet & permoveat; illustrior est oratorum, ornatioque confirmatio, quam ieiuna illa dialecticorum argumentatio: cui tamen rhetores omne orationis robur acceptum ferunt, si quid argumentis aut probare velint, aut reprehendere. Quibus autem orationis figuris rhetoricae argumentationes illustrandae atque exornandae sint, superiori libro, ubi de argumentandi ratione tractavimus, expositum est.

§. V.

DE CONFUTATIONE.

Quibus autem adversarii confirmatio aut diluatur, aut infirmetur, aut elevetur, Cicero in rhetoricis docet his fere verbis: omnis argumentatio reprehenditur, si aut ex his, quae sumpta sunt, non conceditur aliquid unum, plurave; aut his concessis, conclusio ex his confici negatur; aut si genus ipsum argumentationis vitiosum ostenditur: veluti quum docemus, falsa esse pro veris assumpta, aut si contra firmam argumentationem alia aequae firma aut firmior ponitur. Haec ab illo pluribus explicantur lib. I. de invent. & a Cornificio lib. II. rhetor. ad Heren. & a Quintiliano lib. V. cap. 13. Utimur aliis etiam modis, elevatione, quum adversarii argumenta ridemus; excusatione, ut si aetas, imprudentia, sexus afferatur; deprecatione, mutua criminatione, inversione signi contra nos allati.

§. VI.

DE CONCLUSIONE, SEU PERORATIONE.

Peroratio est (a) extrema pars orationis, seu artificiosus orationis exitus: qui constat fere vel enumeratione, vel affectibus. Enumeratio est, per quam res, disperse & diffuse dictae, unum sub adspectum subiiciuntur. Haec si
sem-

(a) Haec ex Cic. lib. I. de invent. cap. 52.

semper eodem modo tractabitur, perspicue ab omnibus artificio quodam tractari intelligetur. Sin varie fiet, & hanc suspicionem & satietatem vitare poterit. Quare tum oportebit ita facere, ut plerique faciunt, propter facilitatem sigillatim unamquamque rem attingere, & ita omnes transire breviter argumentationes: tum autem, id quod difficilius est, dicere, quas partes exposueris in partitione, de quibus te pollicitus sis dicturum, & reducere in memoriam, quibus rationibus unamquamque partem confirmaris: tum ab iis, qui audiunt, quaerere, quid sit, quod sibi velle debeant demonstrari, hoc modo: docuimus hoc, illud planum fecimus: ita simul & in memoriam redibit auditor, & putavit, nihil esse praeterea, quod debeat desiderare. Atque in his generibus, ut ante dictum est, tum tuas argumentationes transire separatim, tum id, quod artificiosius est, cum tuis contrarias coniungere, & quum tuam argumentationem dixeris, tum contra eam quod afferebatur, quemadmodum dilueris, ostendere.

Ita per brevem comparisonem auditoris memoria & de confirmatione, & de reprehensione redintegrabitur. Atque haec aliis actionis quoque modis variare oportebit. Nam cum ex tua persona enumerare possis, ut quid, & quo quidque loco dixeris, admoneas; tum vero personam aut rem aliquam inducere, & enumerationem ei totam attribuere. Personam hoc modo: nam si legis scriptor existat, & quaerat a vobis, quid dubitetis, quid possitis dicere, quum vobis hoc, & hoc sit demonstratum? Atque hic, item ut in nostra persona, licebit alias sigillatim transire omnes argumentationes, alias ad partitiones singula genera referre, alias ab auditore, quid desideret, quaerere, alias haec facere per comparisonem suarum & contrariorum argumentationum. Res autem inducetur, si alicui rei huiusmodi, legi, loco, urbi, monumento attribuetur oratio per enumerationem, hoc modo: quid? si leges loqui possent, non ne haec apud vos quererentur? quidnam amplius desideratis, iudices, quum vobis hoc & hoc planum factum sit? In hoc quoque genere omnibus eisdem

modis uti licebit. Commune autem praeceptum hoc datur ad enumerationem, ut ex unaquaque argumentatione, quoniam tota iterum dici non potest, id eligatur, quod erit gravissimum, & unumquodque quam brevissime transeatur, ut memoria, non oratio, renovata videatur. Haftenus Cicero.

His similia dicit Fabius: quae quamvis ad iudiciales causas magis pertineant, multa tamen ex his elicere possumus, quae non parum ad institutum nostrum, praesertim in suavorii generis peroratione, conducant. Facile enim ex similibus similia procreantur. Sic igitur Fabius: (a) in hac (peroratione) quae repetemus, quam brevissime dicenda sunt, & quod Graeco verbo patet, decurrendum per capita. Nam si morabimur, non iam enumeratio, sed altera quasi fiet oratio. Quae autem enumeranda videntur, cum pondere aliquo dicenda sunt, & aptis excitanda sententiis, & figuris utique varianda: alioqui nihil est odiosius recta illa repetitione, velut memoriae iudicum diffidentis. Sunt autem innumerabiles; optimeque in Verrem Cicero: (b) si pater ipse iudicaret, quae diceret, quum haec probarentur? Et deinde subiecit enumerationem. Aut quum idem in eundem, per invocationem Deorum spoliata a praetore templa dinumerat. Licet & dubitare, num quid nos fugerit, & quid responsuri sint adversarii his, & his; aut quam spem accusator habeat, omnibus ita defensis. Illa vero iucundissima, si contingat aliquod ex adversario ducere argumentum, ut si dicas: reliquit vero hanc partem causae, aut invidia premere maluit, aut ad preces confugit, & merito, quum sciret haec, & haec. Sed non sunt singulae species persequendae, ne sola videantur, quae forte nunc dixero, quum occasiones & ex causis, & ex dictis adversariorum, & ex quibusdam fortuitis quoque oriantur. Nec referenda modo nostra, sed postulandum etiam ab adversariis, ut ad quaedam respondeant. Id autem, si & actionis supererit locus, & ea proposuerimus, quae refelli non possunt. Haftenus Fabius.

Al-

(a) *Instit. orat. lib. VI. cap. 1.* (b) *Accus. lib. V.*

Alteram vero orationis partem affectibus constare diximus: & quidem rethores in iudicialibus causis indignationis & commiserationis affectus excitare conantur. Accusator quippe ad indignationem adversus crimen, quod intendit; defensor vero commiseratione ad reum absolvendum utitur. Ille igitur, ubi crimen admissum esse probavit, ad vindictam & supplicium, criminis atrocitate amplificata, excitat: iste contra, ubi argumentis reum probavit innocentem, ad absolutionem & misericordiam hortatur. Qua ex re liquet, perorationis affectus cum ratione causae, quae tractata est, convenire & cohaerere debere.

Ad hunc ergo modum prudens concionator, pro argumenti & materiae ratione, quam praecipue in concione tractavit, argumentandi subtilitate relicta, amplificationi vela pandere debet; sic tamen, ut amplificatio ipsa, quae quandoque longior, quandoque brevior futura est, cum praecedenti orationis parte cohaereat. Itaque si suademus, ubi rei dignitatem & utilitatem argumentis probavimus, aculeos in fine exhortationis adiiciemus: contra vero, si dissuademus, ad odium & contemptum ac detestationem eius rei acriter incitabimus. Quae res quamvis varie per totum orationis corpus spargenda sit, in fine tamen orationis, quando auditor flectendus, & vel a turpi actione deterrendus, vel ad honesta excitandus est, praecipuas partes habet. Qua de re D. Augustinus sic ait: (a) si qui audiunt, movendi sunt potius, quam docendi, ut in eo, quod iam sciunt, agendo non torpeant, & rebus assensum, quas veras esse fatentur, accommodent, maioribus dicendi viribus opus est. Ibi obsecrationes & increpationes, concitationes & coërcitiones, & quaecumque alia valent ad commovendos animos, sunt necessaria. Et paullo post idem: (b) quum vero, inquit, id docetur, quod agendum est, & ideo docetur, ut agatur; frustra persuaderetur, verum esse, quod dicitur, frustra placet modus ipse, quo dicitur, si non ita discitur, ut agatur. Oportet

(a) *Lib. IIII. de doct. christ. cap. 4.* (b) *Cap. 13.*

tet igitur, eloquentem Ecclesiasticum, quando suadet aliquid, quod agendum est, non solum docere, ut instruat, & delectare, ut teneat, verum etiam flectere, ut vincat.

Et paullo ante de eodem genere sic ait: (a) sicut est autem, ut teneatur ad audiendum, delectandus auditor; ita flectendus, ut moveatur ad agendum. Et sicut delectatur, si suaviter loquaris; ita flectitur, si amet, quod polliceris; timeat, quod minaris; oderit, quod arguis; quod commendas, amplectatur; quod dolendum exaggeras, doleat; quum quid laetandum praedicas, gaudeat; misereatur eorum, quos miserandos ante oculos dicendo constituis; fugiat eos, quos cavendos terrendo proponis: & quidquid aliud grandi eloquentia fieri potest ad commovendos animos auditorum, non quid agendum sit, ut sciant, sed ut agant, quod agendum esse iam sciunt. Si autem adhuc nesciunt, prius utique docendi sunt, quam movendi. Haftenus Augustinus. His igitur affectibus & figuris, quae D. Augustinus commemoravit post epilogum, sive enumerationem, quae est altera perorationis pars, uti licebit. Commodissime enim, probata iam causa, velut strue lignorum composita, affectuum flamma consurgit. Quae tanto erit ardentior, quanto probatio fuerit firmior & efficacior.

Illud ultimo admonendum duxi, argumentorum epilogum, extremam hanc orationis partem, quam Cicero amplificationem vocat, praecedere debere. Non enim in hoc solum argumentorum summa colligitur, ut auditorum memoria reficiatur; sed ut omnia simul breviter conglobata, velut agmine facto, in eorum animos irrumpant, & apud illos, quod volumus, efficiant. Hanc autem argumentorum enumerationem opportune amplificatio sequitur: qua vel ab aliquo scelere deterremus, vel ad virtutis eius studium, de qua sermonem fecimus, adhortamur, & acres ad hoc stimulos adhibemus.

Est etiam commodissimus perorandi modus, quando non ad unam aliquam virtutem, sed ad omnia virtutum

of

(a) Cap. 12.

officia adhortamur : quibus aeternae vitae praemium propositum est. Quo perorationis genere elegantissime D. Paullus in epistola ad Romanos usus est: quam omnium pae- ne officiorum atque virtutum enumeratione clausit. Nec hanc solum, sed epistolam quoque ad Hebraeos, ceteras- que, his virtutum, variorumque officiorum adhortationi- bus finivit.

Aliquando vero non inutile erit, de caelesti gloria, & sanctorum felicitate in regno Patris eorum differere: ut hoc suavissimo animarum ferculo spiritualis doctrinae epulum fi- niamus. Quod venustissime D. Cyprianus in sermone de mor- talitate fecit. Haec autem duo postrema perorationis gene- ra in omnibus concionibus, quacumque de re habeantur, non incommode quadrare poterunt. Semper enim quae vel ad flectendos animos potentiora, vel ad oblectandos iu- cundiora sunt, extremae orationis parti, quae de tota fere concione diiudicat, reservanda sunt.

Haec igitur de sex perfectae orationis partibus dicta sunt: quae in genere suasorio ac dissuasorio, quod mox tractavimus, praecipue locum habent. Ideoque peculiarius de ipsis in eo genere differemus.

CAP. II.

DE PRIMO CONCIONANDI MODO
in genere suasorio.

His perfectae orationis partibus explicatis, reliquum est, ut ad peculiares concionandi modos tractandos descendamus: atque in primis suasorium, ac dissuasorium; quos, sub deliberativo genere comprehendere, superius dixi- mus. Hoc enim genus adeo concionatoris proprium est, ut in omnibus concionibus, siue quae de sanctis, siue quae de redemptionis nostrae beneficiis habentur, siue quae in explanatione evangeliorum, ceterorumque sacrorum libro- rum versantur, hunc nobis scopum & in tota concione, & singulis eius partibus proponere debeamus, ut ad pie-
ta-

tatem & iustitiam homines adhortemur, vel a vitiis deterreamus; quod ad hoc genus pertinet. Huc enim semper omnis oratio nostra referenda est.

De hoc autem genere satis multa diximus, quum sex orationis partium vim & rationem tradidimus: quae nulli commodius, quam in hoc suasorio genere, inveniuntur. Sed nos tamen, quae de his partibus diximus, ad hunc concionandi modum hoc in loco accommodabimus.

Exordium igitur in hoc genere attentos in primis auditores faciet, exposita rei dignitate vel necessitate, de qua sermonem habituri sumus. Omnes enim attente audiunt, quae vel maxime decent, vel quae sibi cum primis necessaria ducunt. Exempli causa. Si quis vetusta hominum odia extirpare dicendo velit, praefari poterit, esse hoc gravissimum crimen, dicente Ioanne: (a) qui odit fratrem suum, homicida est. Deinde crimen hoc quam dignissime animo infixum haerere. Quo tempore innumera peccata hoc peccatum parit. Postremo latissime hoc scelus patere, quum varia passim irarum atque odiorum incitamenta ab importunis & sceleratis hominibus unicuique praebeantur: ideoque operae pretium esse, hoc tantum periculum, & tam late patens malum, quodque tam multa ex se scelera germinet, ab auditorum mentibus penitus revellere. Diversa autem ratione virtutem aliquam suasuri, insignem eius laudem, utilitatem aut necessitatem breviter ostendemus, & quanti nostra referat, eius dignitatem exploratam & perspectam habere.

Sic D. Cyprianus, sermone de patientia, ab hac necessitate orditur his verbis: de patientia loquuturus, fratres dilectissimi, & utilitates eius & commoda praedicaturus, unde potius incipiam, quam quod nunc quoque ad audientiam, vestram patientiam video esse necessariam: ut ne hoc ipsum, quod auditis & discitis, sine patientia facere possitis? Tunc enim demum sermo & oratio salutaris efficaciter discitur, si patienter, quod dicitur, audiat. Nec invenio, fratres dilectissimi, inter ceteras caelestis

di-

(a) 1. Ioan. 3.

disciplinae vias, quibus ad consequenda divinitus praemia, spei ac fidei nostrae secta dirigitur, quid magis sit vel utilius ad vitam, vel maius ad gloriam, quam ut, qui praeceptis dominicis, obsequio timoris ac devotionis, innititur, patientiam maxime tota observatione tueamur. Hanc se sectari philosophi quoque profitentur: sed tam illic patientia falsa est, quam & sapientia falsa est.

Narratio in huiusmodi causis fere locum non habet. Propositio tamen, ac divisio necessaria est. Propositio quidem, ut auditores intelligant, quo potissimum oratio nostra tendat. Qua in re concionatores quidam graviter delinquant, qui quum initio dicendi concionis suae scopum auditoribus non proponant, vix quisquam est, qui, quo tendant, & quid efficere velint, assequatur: atque ita auditor dubius haeret & incertus; neque, quid ex doctrina colligere possit, assequitur. Scopus igitur ante omnia praefigendus est, ut auditor aperte videat, quo omnia sententiarum & rationum iacula dirigantur.

Propositioni finitima est divisio, quae causam in partes dividit. Ea vero e generibus expetendorum & fugiendorum frequenter sumenda est: illud, quum suademus; hoc vero, quum dissuademus. Quum enim bonum ita humanae voluntati a natura propositum sit, ut nihil velle possit, nisi quod vel bonum sit, vel aliquam boni rationem induat; danda nobis opera est, ut in eo, quod suademus, omnes boni rationes esse ostendamus. Quum autem tria bonorum genera philosophi statuunt, honestum, utile, atque iucundum; haec ipsa, quam maxime fieri poterit, in eo, quod suademus, esse contendamus.

Rhetores autem, docendi gratia, haec tria bonorum genera in alia partiuntur, nempe honestum, utile, tutum, iucundum, facile, necessarium. Atque haec omnia, vel plura horum, in eo, quod suadent, inesse contendunt. Ab honesto suasit caelestis magister, quum adolescenti dixit: (a) si vis perfectus esse, vade, & vende omnia, quae habes, & da pauperibus, &c. Ab utili suadet Paullus, quum ait:

(a) *Matth. 19.*

ait : (a) itaque , fratres , stabiles stote , abundantes in omni opere Domini : scientes , quod labor vester non est inanis in Domino. A tuto vero idem suadet , (b) quum infirmis nuptias concedit propter fornicationis periculum. A iucundo vero argumentatur , quum nos ad divinorum mandatorum obedientiam inducit , (c) quod sit divinae legis iugum suave , & onus leve. A facili vero , servi Naaman Syri illum ad obediendum prophetae imperio excitabant , dicentes : (d) pater , etsi rem grandem tibi dixisset propheta , certe facere debuisses : quanto magis , quia non dixit , nisi , vade , lavare , &c. Item Moses ad populum : (e) mandatum , inquit , hoc , quod ego praecipio tibi hodie , non supra te est , neque procul positum , nec in caelo situm , ut possis dicere : quis nostrum valet ad caelum ascendere , ut deferat illud ad nos , ut audiamus , atque opere compleamus ? Neque trans mare , &c. Rursumque alibi : (f) & nunc , Israël , quid Dominus petit a te , nisi ut diligas Dominum Deum tuum , & ambules in viis eius , & diligas eum , ac servias Domino. Deo tuo in toto corde tuo , & in tota anima tua , ut bene sit tibi ? A necessario vero urget Dominus , quum ait : (g) nisi poenitentiam egeritis , omnes simul peribitis.

His etiam partibus addunt laudabile : quod quamvis numquam ab honesto separetur , sunt tamen inter virtutes , quae sub eo continentur , non nullae , quae magnam apud homines laudem promerentur : qualis magnanimitas , liberalitas , magnificentia , fortitudo , atque prudentia est , & si quae sunt aliae. Quia vero homines laudis & gloriae maxime avidi sunt , haec quoque laudis pars in eo , quod suademus , inesse demonstrandum est. Ab hoc enim loco Iudas Machabaeus (h) milites suos ad periculosissimum certamen excitavit , ne videlicet ullum gloriae suae crimen fugientes inferrent. Capiuntur autem hac esca potissimum reges , & principes viri. Ab hoc autem loco Cicero pro lege Manilia ad suscipiendum bellum Mithridaticum adhorta-

ta-

(a) 1. *Corinth.* 15. (b) 1. *Cor.* 7. (c) *Matth.* 11. (d) 4. *Reg.* 5.
(e) *Deut.* 30. (f) *Deut.* 10. (g) *Luc.* 13. (h) 1. *Macbab.* 9.

ratur: & quoniam, inquit, praeter ceteras gentes appetentes laudis & gloriae fuistis, delenda vobis est illa macula, Mithridatico bello superiore suscepta, &c. Denique fructus omnes & utilitates & laudes, quas secum ea res affert, quam suademus, non solum enumerare, sed, quam maxime fieri possit, amplificare debemus.

Diversa autem ratione dissuademus, quum id, a quo deterremus, turpe, damnosum, periculosum, ignominiosum, iniucundum, difficile, aut, si fieri posset, impossibile esse probamus. Hoc enim postremo loco sanctus Ioseph ad stuprum repudiandum usus est, quum adulterae feminae respondit: (a) ecce dominus meus, omnibus mihi traditis, ignorat, quid habeat in domo sua, &c. Quo modo ergo possum hoc malum facere, & peccare in Dominum meum? Vtriusque autem rei clarissima Deuter. 28. exstant exempla: in quibus Moses commoda omnia, quae pietatem & iustitiam consequuntur, & horrenda item atque formidanda mala, quae improbitati constituta sunt, magna oratione persequitur. Quae quidem res maximam in suadendo vim habet, quum ex utroque latere auditorum voluntatem feriat; dum & bona proponit, quae eam alliciant, & mala item, quae terreant, atque ita demum in officio contineant.

Post confirmationem sequitur confutatio: qua, ut antea diximus, ea, quae obstant, quaeque auditorum animos remorantur, quominus praeceptis nostris pareant, amovemus & confutamus. Sic D. Cyprianus, sermone de eleemosyna, ubi multos huius virtutis fructus & utilitates commemorasset; ea, quae homines ab hoc benignitatis studio remorari poterant, diluit atque confutat. Sic enim ait: si vereris & metuis, ne, si plurimum operari coeperis, patrimonium tuum larga operatione ad penuriam forte redigatur, esto in hac parte securus, & cetera, quae sequuntur. Deinde aliorum excusationem confutat, qui libris se patrimonium servare dicunt, his verbis: sed nec illa res, fratres, a bonis operibus refrenet, & revocet Christia-

(a) *Genes.* 39.

stianum, quod excusare se posse aliquis existimet beneficio filiorum, & cetera, quae sequuntur.

Ultimo loco sequitur peroratio sive epilogus; cuius, ut ante diximus, duo sunt officia: alterum, brevissime omnia argumentationum capita in unum cogerere, quo multiplici rationum vi ac pondere auditorum animos in nostram sententiam pertrahamus: alterum vero, affectus concitare, quibus ad id, quod iam probavimus, exsequendum impellamus; indignissimum esse ostendentes, vel rem adeo salutarem spernere, si suademus, vel adeo perniciosam amplecti & persequi, si dissuademus. Exemplo nobis erit D. Cyprianus sermone de patientia. Vbi enim is patientiae laudes & fructus exposuisset, orationem tandem hoc epilogo claudit: patientia est, quae nos Deo & commendat, & servat: ipsa est, quae iram temperat, quae linguam frenat, mentem gubernat, pacem custodit, disciplinam regit, libidinis impetum frangit, tumoris violentiam comprimit, incendium simultatis exstinguit: coercet potentiam divitum, inopiam pauperum refovet, tuetur in virginibus beatam integritatem, in viduis laboriosam castitatem, in coniunctis & maritatis individuum caritatem: facit humiles in prosperis, in adversis fortes, contra iniurias & contumelias, mites: docet, delinquentibus cito ignoscere; si ipse delinquas, diu & multum rogare: tentationes expugnat, persecutiones tolerat, passiones & martyria consummat. Haecenus Cyprianus.

§. I.

His autem partibus, quae concionatori cum oratore communes sunt, proprium ac singulare quiddam addit Ecclesiastes, nempe, ut quum ad alicuius virtutis officium fuerit adhortatus, vel ab aliquo vitio deterruerit, perorata causa, modum ostendat, quo vel ea virtutis actio exsequenda sit, vel turpis actio fugienda. Sapienter enim Plutarchus ait, eos, qui ad virtutem adhortantur, nec tamen docent vel tradunt eam, similes esse iis, qui lucernam

nam quidem emungunt, nec tamen oleum infundunt, quo ali & sustentari possit. Sic qui ad eleemosynae studium adhortatur, docere post adhortationem debet, quonam modo utiliter eleemosyna danda sit: ut videlicet non angusta, sed larga & liberali manu; quando (a) qui parce seminat, parce & meter. Deinde, ut prompto & alacri animo: (b) hilarem enim datorem diligit Deus. Praeterea ut eleemosyna sit occulta: (c) ut nesciat sinistra tua, quid faciat dextera tua. Tum etiam, ut ex affectu caritatis & compassionis tribuas, quod est misericordiae proprium; & cetera his similia.

Ad eundem quoque modum, ubi ad precandi studium adhortati fuimus, de animi praeparatione ad precandum, de modo precandi, & conditionibus, ad precandum necessariis, quo sit efficax oratio, agendum est, si non ad ostentationem, sed ad salutem animarum dicimus. Atque ut docendi gratia de scriptis nostris exempla proponamus, in fine eius libri, quem de orationis & meditationis studio scripsimus, tres in hoc genere suasorio tractatus, de tribus satisfactionis partibus, nempe oratione, ieiunio, & eleemosyna adiecimus. Qui facilius, quid hoc argumenti genus requirat, quam ipsa praecepta, indicabunt. In eo autem volumine, cui Hispano sermone titulum praefiximus, *Guia de pecadores*, duobus libris hoc idem argumentum copiose persequuti sumus: in quibus ad virtutis studium sumus adhortati.

Principio enim in exordio attentionem captavimus, tem omnium, quae in vita sunt, maxime necessariam dicturos nos professi. Deinde honesti partes tractavimus, immensam Dei bonitatem, eiusque clarissima beneficia explicantes; quae iure suo obedientiam & amorem nostrum sibi vindicant. Deinde utilitatis & iucunditatis ratio explicata est. Quo in loco duodecim insignia privilegia, quibus pii omnes in hac vita potiuntur, exposuimus. Postea excusationes omnes, quibus improbi homines se se a virtutis studio subtrahere solent, tamquam inanes & frivolas, apertissima oratione confutavimus atque dissolvimus. In

O

ul-

(a) 1. Corinib. 9. (b) *Ibidem*. (c) *Matth. 6.*

ultimo vero eius libri capite , argumentorum omnium summam complexi sumus : & , quantum facultas tulit , timoris & amoris affectus concitavimus , quibus languentes animos ad virtutis amorem , divinique numinis metum excitaremus. Et haec quidem in priori libro: in posteriori vero , quae ratione esset virtus colenda atque exercenda, praescripsimus.

Illud autem in hoc genere praecipue admonendum videtur , ut bona & mala , commoda & incommoda , quae in hac causa ad suadendum , vel dissuadendum adducimus , quantum fieri possit , iis rationibus , quas supra memoravi , amplificemus. Quo enim maiora ea fecerimus , eo vehementius suadebimus.

Illud etiam admonendum , duo esse hominum genera , alterum indoctum & aggreſte , quod antefert semper utilitatem honestati : alterum expolitum , quod rebus omnibus dignitatem anteponit. Apud hunc autem argumenta , quae ducuntur ab honesto ; apud illum vero , quae sumuntur ab utili , fortiora sunt. Haec de genere suasorio breviter dicta sint.

CAP. III.

DE SECVNDO CONCIONANDI MODO IN GENERE demonstrativo , qui sanctorum festis & laudibus deservit.

Quemadmodum concionandi modus , qui proxime a nobis descriptus est , in genere suasorio versatur : ita qui in festis sanctorum diebus tractatur , ad demonstrativum genus pertinet ; quo utimur in alicuius certae personae laudem vel vituperationem. Finem autem eius rhetores statuunt , ut is , quem laudant , laude dignissimus videatur : contra vero , si vituperant. At , iuxta D. Basilii sententiam , laudes sanctorum nequaquam encomiorum legibus serviunt : non enim hoc praecipue agimus , ut eos sanctissimos fuisse doceamus , sed ut vitam nostram ad eorum normam effingere studeamus , atque ut hoc argumento mi-

ra-

rabilem divini Spiritus virtutem agnoscamus, qui homines, natura fragiles & imbecillos, & in peccatis conceptos, ad malumque propensos, ita permutavit, ut pares propemodum angelis, ac mundo superiores effecerit. In hoc genere rhetores per omnes personarum circumstantias, quas supra enumeravimus, laudationem ducunt: genus, videlicet, parentes, patriam, naturae dotes, educationem, fortunam, studia, dicta, facta, & quae sunt huius generis, commemorantes atque amplificantes. Hoc autem fere ordine D. Gregorius Theologus laudes scripsit D. Basilii, & Caesarii fratris, atque Gorgoniae sororis. Nos tamen, dum laudes sanctorum praedicamus, non usquequaque hunc ordinem sequimur: sola enim fere insignia facta dictaque, & interdum etiam miracula, enumeramus, & quantum possumus, amplificamus, auditoresque ad eorum imitationem excitare contendimus.

In hoc autem genere amplificandi ratio praecipue dominatur: qua, tum ex natura rei & partibus eius, tum ex omnibus aliis circumstantiis, quae rebus & personis attributae sunt, egregia sanctorum facta dicendo illustramus & amplificamus. Sic Apostolus ad Romanos, ex personae circumstantiis, fidem Abrahae amplificat his verbis: (a) & non infirmatus est in fide, nec consideravit corpus suum emortuum, quum iam fere centum esset annorum, & emortuam vulvam Sarae. In repromissione etiam Dei non haesitavit diffidentia, sed confortatus est fide, dans gloriam Deo: plenissime sciens, quia, quaecumque promisit, Deus potens est & facere. Ideo & reputatum est illi ad iustitiam. Sic Origenes, homilia de sacrificio Isaac, celerem eius & promptam obedientiam, in re adeo gravi & luctuosa, ex omnibus circumstantiis amplificat. Ut autem, quantum in hoc genere virtus amplificandi valeat, aperte doceam, clarissimum huius rei exemplum ex libro Senecae (b) *de tranquillitate vitae* (c) hoc in loco referam: quo is dictum illud Stilponis phi-

O 2

lo-

(a) Cap. 4. (b) In locum verborum de tranquillitate vitae, sequentia substitui debent: Ad Serenum, Quod in sapientem non cadit iniuria. (c) In lib. ad Seren. quod in sap. cap. 5. 6. 7. & 8.

losophi, *omnia bona mea meum porto*, re primum exposita, his verbis amplificat.

Megara Demetrius ceperat, cui cognomen Poliorcetes fuit: ab hoc Stilpon philosophus interrogatus, num quid perdidisset, nihil, inquit: omnia namque mea mecum sunt. Atqui & patrimonium eius in praedam cesserat, & filias raperat hostis, & patriam. At ille victoriam illi excusit: & se, urbe capta, non invictum tantum, sed indemnem esse restatus est. Habebat enim secum vera bona, in quae non est manus iniectio. At ea, quae dissipata & direpta ferebantur, non iudicabat sua, sed adventicia, & nutum fortunae sequentia; ideo non ut propria dilexerat. Omnium enim extrinsecus affluentium lubrica & incerta possessio est. Cogita nunc, an huic fur, an calumniator, aut vicinus potens, aut dives aliquis ... facere iniuriam possit: cui bellum, & hostis ille, egregiam artem quassandarum urbium professus, eripere nihil potuit. Inter micantes ubique gladios, & militarem in rapinam tumultum, inter flammas & sanguinem, stragemque impulsae civitatis, inter fragorem templorum, super Deos suos cadentium, uni homini pax fuit. Non est itaque, quod audax iudices promissum, cuius tibi, si parum fidei habeo, sponsorem dabo. Vix enim credis, tantum firmitatis in hominum, aut tantam animi magnitudinem cadere, sed si prodit in medium, qui dicat:

Non est quod dubites, an attollere se homo natus supra humana possit, an dolores, damna, ulcerationes, vulnera, magnos morus rerum circa se frementium securus adspiciat, & dura placide ferat, & secunda moderate: nec illis cedens, nec his fretus, unus idemque inter diversa sit, nec quidquam suum, nisi se, putet esse, ea quoque parte, qua melior est. Adsum hoc vobis probaturus, sub isto tot civitatum everfore, munimenta incursum arietis labefieri, & turrium altitudinem cuniculis ac latentibus fossis repente residere, & aequaturum editissimas arces aggerem crescere: at nulla machinamenta posse reperiri, quae bene fundatum animum agitent. Erepsi modo ruinis domos, & incendiis undique relucentibus, per flammas, per sanguinem fugi. Filias

lias meas qui casus habeat , an peior publico , nescio. Solus , & senior , & hostilia circa me omnia videns , tamen integrum incolumemque esse censum meum profiteor , teneo , habeo , quidquid mei habui. Non est quod me victum , victorem te credas. Vicit fortuna tua fortunam meam. Caduca illa , & dominum mutantia , ubi sint , nescio. Quod ad res meas pertinet , mecum sunt , mecum erunt. Perdiderunt isti divites patrimonia : libidinosi amores suos , & magno pudoris impendio dilecta scorta. Ambitiosi curiam & forum , & loca exercendis in publico vitiis destinata. Foeneratores perdiderunt tabellas suas , quibus avaritia , falso laeta , divitias imaginatur. Ego quidem omnia integra illibataque habeo. Proinde istos interroga , qui flent , qui lamentantur , qui strictis gladiis nuda pro pecunia corpora opponunt , qui hostem onerato sinu fugiunt.

Ergo ita habe , Serene , perfectum illum virum , humanis divinisque virtutibus plenum , nihil perdere. Bona eius solidis & inexsuperabilibus munimentis praecincta sunt. Non Babylonis illi muros contuleris , quos Alexander intravit : non Carthaginis , aut Numantiae moenia , una manu capta : non capitolium , arcemve. Habent ista hostile vestigium : illa , quae sapientem tuentur , a flamma & ab incurfu tuta sunt : nullum introitum praebent , excelsa , inexpugnabilia , Diis aequa.

Non est quod dicas , ita ut soles , hunc sapientem nostrum nusquam inveniri. Non... *enim* ingentem imaginem falsae rei concipimus , sed qualem confirmamus , exhibuimus , & exhibebimus. Raro forsitan , magnisque aetatum intervallis invenitur. Neque enim magna , & excedentia solitum ac vulgarem modum , crebro gignuntur... Non potest ergo quisquam aut nocere sapienti , aut prodesse : quemadmodum divina nec iuvari desiderant , nec laedi possunt. Sapiens autem vicinus proximisque Diis consistit , excepta mortalitate , similis Deo. Haecenus Seneca.

Quem in medium protuli , ut , proposito hoc exemplo , studiosus concionator adniverteret , qua ratione egregia sanctorum facta dictaque amplificare dicendo possit : quum

videat, hanc unam vocem, *omnia mea bona mecum porto*, tam longa oratione a Seneca fuisse verbis & sententiis illustratam. Quod si haec egregia hominum facta adeo magnificis verbis & sententiis Seneca extulit; quid is faceret, si agones & certamina nostrorum martyrum & puellarum scripssisset, quae spectaculum admirandum Deo, angelis & hominibus praeberunt? Si quis autem commodissima huius amplificationis exempla videre cupit, legat secundum & tertium D. Chrysostomi de divina providentia librum: in quo is Noë, Abrahæ, Iacob, Mosi atque Davidis patientiam, variosque labores mira facundia amplificat. Quibus exemplis ad hanc, de qua loquimur, virtutem erudiri poterit.

§. I.

Quaeret fortasse studiosus concionator, qua ratione praeclaras martyrum, ceterorumque sanctorum virtutes amplificare simili ratione possit. Ad hoc igitur non nihil iuvabit, praecepta, & amplificandi rationes, quas libro III. praescripsimus, probe tenere: deinde disertissimorum patrum scripta, qui in hoc genere magna cum laude versati sunt, studiose legere: &, quibus illi rationibus sanctorum virtutes extulerunt, diligenter adnotare: & ad eorum imitationem, quae laudare voluerint, effingere. Exemplis enim multo magis, quam praeceptis, animadvertere poterit, quid in hoc genere maxime deceat.

Sed haec omnia leviora sunt, nisi adsit Spiritus ille caelestis, de quo Apostolus ait: (a) nos autem non spiritum huius mundi accepimus, sed Spiritum, qui ex Deo est: ut sciamus, quae a Deo donata sunt nobis: hoc est, ut eius lumine illustrati, virtutum atque donorum eius dignitatem & amplitudinem aestimare sciamus. Si enim nemo sine arte aurum purum ab adulterino discernere, & lapillorum atque gemmarum pretium & dignitatem, praesertim quum in pulvere atque luto sordent, agnoscere potest: quis sine divino lumine divina dona, quae exsue-

rant

(a) 1. Corinth. 2.

rant omnem sensum, pro dignitate aestimare & admirari queat? Regina Saba, (a) quum Salomonis regiam, & famulorum atque pincernarum & cantorum ordines, vestes & officia, ac postremo regiae domus apparatus vidisset, rerum magnitudine atque splendore stupefacta, non habuisse ultra spiritum dicitur. Si quis autem eos mentis oculos haberet, quibus veri Salomonis opes, hoc est, imperuestigabiles divitias Christi, & famulorum eius virtutes, & clarissima gesta intueri posset; non dubium, quin multo magis, quam regina Saba, in admirationem extasimque raperetur.

Non tamen est omnium, hos oculos habere, quibus latentem Christi & Ecclesiae suae splendorem cernere possint: quum (b) omnis eius gloria ab intus sit in fimbriis aureis. Ipsa enim Ecclesia de se ait: (c) nigra sum, sed formosa filia Ierusalem. Exterius quidem nigra, intus autem miro decoris splendore coruscans. Quonam modo? Sicut, inquit, tabernacula Cedar, & sicut pelles Salomonis. Haec namque tabernacula, atque Salomonis pelles, extra quidem pulvere deformatae, atque Solis ardore exustae erant; intus tamen regio cultu atque apparatu splendebant. Quid autem magis ad vivum Ecclesiae ornatum exprimere potuit? Quae quum extra in sanctis martyribus, ceterisque divinis hominibus, atque iis praesertim, qui in solitudinibus vitam inopem agebant, vilis atque abiecta carnalium hominum oculis appareret; supernis tamen mentibus splendore & dignitate virtutum ita fulgebat, ut spectatores suos in stuporem atque admirationem raperet.

Quis enim non stupeat, audiens Paullum dicentem: (d) si immolor supra sacrificium fidei vestrae, in hoc gaudeo, & congratulor omnibus vobis: id ipsum vos congaudete, & congratulamini mihi? Quis umquam talem gaudii & congratulationis materiam audivit? Quis non stupeat Andream, crucem sibi paratam tanta devotionis alacritate salutantem, laudantem, desiderantem, tantoque gaudio & securitate amplectentem? Quis non stupeat Laurentium inter tormen-

(a) 3.Reg.10. (b) Psalm.44 (c) Cant.1. (d) Ad Philip.cap.2.

torum suorum flammis laetantem: & Vincentium, moras carnificum increpantem: & B. P. Dominicum, avidissime martirium sitientem, & omnia corporis sui membra dissolari cupientem? Quid Agnetem virginem commemorem, tertio decimo aetatis anno ignes & gladios superantem? Quid nobilem virginem Eufemiam, rotas, ignes, & bestias vincentem, & iniuriam se a iudice pati clamantem, quod quum mobilis esset, ignobiliores sibi in martirio praeferret? Atque ut a martiribus ad confessores veniamus, quis beatum Alexium in ipsa paterna domo, patre, matre, sponsaque praesentibus, eiusque absentiam perpetuo luctu lamentantibus, vitam adeo inopem & asperam inter multas servorum suorum iniurias, annis decem & octo patientissime usque ad mortem tollerasse, non obstupescat? Quis non divinae gratiae potentiam agnoscat, qui noverit Eduardum, Angliae regem, ab adolescentia sua ad extremum usque vitae diem, cum nobilissima & pulcherrima virgine matrimonio sibi copulata, in perpetua castitate vixisse; quum necesse esset, illi convivere, & cum ea perpetuo versari, & communi domo atque mensa uti?

Miracula vero sanctorum multi praedicanda non putant, quod illorum commemoratione magis divorum sanctitas declararetur, quam auditorum vita instituatur. Ego vero ex eorum narratione immensam Dei nostri bonitatem, & inestimabilem in suos caritatem, fidem, paternam curam & providentiam hac ratione maxime declarari posse video: utpote qui eos tanto honore prosequutus sit, ut non modo ipsorum verbis & imperio, sed cineribus, & vestibus, & sudariolis, & semicintiis, & pulveri postremo tumulorum suorum, elementa mundi famulari, daemones obtemperare, morbos cedere, & naturae leges, quibus mundi reges & imperatores subiiciuntur, obedire voluerit.

Sed quid ista commemoro? Quum caecus quidam videntibus facultatem a Domino postulasset, iussus est, ut aqua ea, qua manuum sordes Eduardus rex, cuius modo mentionem feci, lavaret, oculos ipse suos lavaret: lavit, & oculorum lumen protinus recepit. Quantam, quaeso, dilectionis erga suos

suos vim hoc indicio Dominus ostendit , quum hunc tantum honorem aquae sordidae impendere voluit , non alia vi , quam quod ea servi sui manus contrigisset ? Quam multa autem huiusmodi miracula in vitis sanctorum legimus , quae ineffabilem hanc Domini in suos benignitatem & misericordiam apertissime testantur & praedicant ? Mihi vero neque Solis , & Lunae , & stellarum splendor , neque caelum , terrae , maria tantam divinae bonitatis significationem praebent , quantam hoc , quod video , haec ipsa omnia , quae aeternis Dominus legibus & imperio stabilivit atque devinxit , sanctorum nutui & pulveri cedere atque obedire. Quae quidem bonitas , his clarissimis argumentis patefacta , incredibile dictu est , quantam in piis hominibus amoris flammam excitet , quantumque accendat desiderium serviendi ei Domino , a quo nihil ipsi minus sperare poterunt , si fideliter ei diligenterque servierint. Haec breviter de commemoratione miraculorum , seu narratione , dicere volui , qua pius concionator auditorum animos in divinae bonitatis amorem excitare commode poterit.

Non minus autem has easdem divinae bonitatis & caritatis opes paterna illa cura & providentia declarat , quam fidelissimus & amantissimus Dominus in martyrum suorum certaminibus ostendit. Nam praeter insuperabilem constantiam , quam illis ad tam immania supplicia perferenda contulit , admirandis eos favoribus , caelestibusque signis & miraculis in tormentis reficiebat & consolabatur. Ignes frequenter exstinguebat , immanes bestias mitigabat , rotas ferreas confringebat , ferventem adipem refrigerabat , vulnera eorum sanabat , defluentem ex vulneribus sanguinem angelorum manibus abstergebat , truncata membra redintegrabat , in carcere positos visitabat , inediaque maceratos caelesti cibo reficiebat. Quibus rebus adeo in fidei veritate confirmabantur , ut non modo ipsi in ea stabiles & inconculsi perdurarent , sed infideles etiam ad fidem , miraculorum testimonio , converterent , & ad martyrium excitarentur.

Quis

Quis igitur his indiciis non aperte immensas illas divinae bonitatis divitias, & plenissima caritatis & misericordiae in suos viscera non agnoscat? Quis non talem Deum flagrantissimae dilectionis ardore prosequatur? Quis propter illius gloriam millies in tormentis vitam abiicere non concupiscat? O fidelissime piorum amice! O vere adiutor in opportunitatibus, & in tribulatione! Hanc autem paternam in suos curam & providentiam Sapientis ille declaravit, quum, de increata Sapientia loquens, ait: (a) haec venditum iustum non dereliquit, sed a peccatoribus tutavit illum: descenditque cum illo in foveam, & in vinculis non dereliquit illum, donec afferret illi sceptrum regni, & cetera. Quisquis igitur, Spiritus sancti magisterio doctus, harum rerum non modo intellectum, sed etiam sensum acceperit, is utique praeclara sanctorum gesta, & miracula dignis poterit efferre praeconiis, atque his argumentis & exemplis ad divinae bonitatis cognitionem pariter & amorem auditorum animos poterit excitare.

Hae sunt igitur, ut ad institutum redeam, veri Salomonis nostro opes, hae impervestigabiles divitiae Christi, haec illa virtus, sive, ut alii verterunt, potentia evangelii (b) in salutem omni credenti, quae hominem mundo, se ipso, atque natura superiorem facit.

Hinc etiam licebit divinae gratiae vim & potentiam vehementer admirari, quae hanc tantam vim, tantamque puritatem mortali & fragili creaturae contulit. Hinc etiam licebit, caecitatem & amentiam eorum hominum accusare, qui, laboris ac difficultatis metu, virtutis iter, tamquam asperum ac difficile, ingredi detrectant: quum tamen divinae gratiae & caritatis virtus non modo divinorum mandatorum obedientiam, sed cruces etiam & ignes iucundissimos faciat.

Hinc etiam licebit, desides ac torpentes acriter obiurgare, qui non praestent leviora, quum tamen sancti omnes ex eadem massa procreati, eodemque modo in peccatis concepti, tanto maiora praestiterint. Quisquis igitur eam

men-

(a) *Sap. 10.* (b) *Rom. 1.*

mentem atque spiritum Domini beneficio nactus fuerit, ut haec tam magnifica Spiritus sancti dona, aequa lance, iustisque ponderibus librare sciat; is plane, quem ipse affectum conceperit, in auditorum animos transferre dicendo poterit, atque ita demum sanctorum virtutes meritis poterit efferre praeconiis. Quia vero pauci admodum sunt, quibus haec felicitas contingit, nulli sermones concionatoribus molestiores ac difficiliores sunt, quam qui de sanctorum laudibus habentur. Quisquis autem hoc praestare minus poterit, habet sane paratum in promptu remedium: nempe, ut evangelicam lectionem, quae eo die legitur, more solito explanet, & insignes sancti virtutes vel ipsi explanationi, ubi locus admonuerit, admisceat, vel in extrema concionis parte proponat. Est autem contentio demonstrativa, qua vel personam cum persona, vel rem cum re, laudis aut vituperationis gratia, conferimus: de qua sequenti libro inter sententiarum figuras disseremus.

CAP. IV.

*TERTIVS CONCIONANDI MODVS, QVI LECTIIONIS
evangelicae enarrationem continet.*

EST etiam tertius concionandi modus, idemque in usu frequentissimus, qui in evangelicae lectionis explanatione versatur. Quo modo autem Ecclesiastes in hoc concionum genere se gerere debeat, paucis expediam.

Principio evangelica lectio ante eius explanationem breviter recitanda est; ea tamen brevitate, quae venustate & sermonis elegantia non careat. Non enim ea ieiuna & arida esse debet, quod quidam nimis iniucunde faciunt, sed suo quodam ornatu perpolita. Paraphrastem quippe concionator magis, quam interpretem, hac in re agere debet. Ea enim, quae sancti evangelistae brevi atque simplici oratione tradiderunt, ipse paullo fusius narrare curavit. Nec hoc tamen perpetuo faciendum est: praesertim quum evangelica lectio solito longior extiterit, qualis Lazari
qua-

quattriduani, (a) & Samaritanae historia (b) est, aut etiam, quum commodius videbitur, eam cum ipsa simul explanatione coniungere. Quod concionatoris iudicio relinquitur. Neque enim haec, quae dicimus, plebiscita sunt aere incisa, ut non aliter facere liceat, quum id videbitur commodius.

Sacra vero lectione breviter exposita, sequatur eiusdem explanatio. Ante quam non ab re fuerit, ab aliqua sententia, vel communi loco ordiri, quae proposito quadret, & in ea paullulum immorari; atque ita demum ad id, quod initio explanationis dicturi sumus, inclinare. Erit autem opere pretium, ante evangelicae lectionis explanationem vel narrationem, quid illam in contextu evangelicae historiae praecesserit, indicare: quando videlicet ea, quae sequuntur, ab antecedentibus pendeant. Sic, quum sacram illam lectionem explicamus, (c) caro mea vere est cibus, &c. exordium a miraculo quinque panum capiendum est: quo quum Dominus Iudaeos ad fidem inducere vellet, ipsique contra signum tale ab eo flagitarent, quale fuit manna, (d) patribus in deserto exhibitum, hac occasione sumpta, quanto nobiliorem panem cibumque esset ipso mundo praestiturus, differere coepit: qui non corpoream & temporariam, sed aeternam esset hominibus vitam largiturus. Sic etiam parabola illa de patrefamilias, operarios ad vineae suae culturam vocante, ab ea Petri interrogatione pendet, qua de praemio, iis, qui omnia propter Deum reliquerunt, proposito, inquit: & Dominus, post praemii huius magnitudinem expositam, de variis praemiandi rationibus, partim ex divina iustitia, partim ex gratia, in parabola proposita differit. Hoc igitur exordium breviter absolvamus: ne tempus, explanationi evangelicae destinatum, hac occasione subtrahatur. Quia in re dupliciter a multis peccatur, qui & maximam concionis partem in hac connexione insumunt; &, quum non est necesse, sequentibus antecedentia connectunt. Sic enim multi communia quaedam concionandi decreta sibi proposuerunt, ut quod in una concione decet, in omnibus decere credant: & quod semel faciendum esse

sta-

(a) *Ioan. 11.* (b) *Ioan. 4.* (c) *Ioan. 6.* (d) *Exod. 16.*

statuunt, ubique esse faciendum arbitrentur.

Est & aliud exordii genus, quo non numquam uti debemus, ut auditorum animos ad audiendum praeparemus. Quidquid enim impedimento est, quo minus auditores vel moveantur, vel persuadeantur, initio dictionis amovendum est. Vehementer autem concionum fructum impedit, quod multi, magis consuetudine ducti, quam studio proficiendi, concionibus intersunt; alii vero curiositatis affectu; alii, negligenter & oscitanter concionem audientes, vacui atque ieiuni a concione redeunt. Commodum igitur erit, huiusmodi impedimenta, ceteraque his similia, initio dicendi amovere, summumque eorum, qui sic audiunt, periculum explicare. Quum enim malorum nostrorum remedia in divinorum eloquiorum medella posita sit, quae spes reliqua erit aegroto, cui toties adhibita haec medicina nihil profuit? Hoc igitur triplici principio in huiusmodi concionibus uti licebit. Iudicio autem concionatoris relinquitur, quando hoc aut illo principio utendum sit. Hoc enim solum in hac disciplina perpetuum est, quod nihil perpetuo fieri debeat: sed pro ratione evangeliorum, temporum, & auditorum, omnia dicentis consilio varianda sunt.

Porro autem in ipsa evangelii explicatione haec admonenda esse duco. Primum, ut tria solum, vel quattuor, aut ad summum quinque loca sibi tractanda Ecclesiastes proponat. Si enim plura his fuerint, oratio saepe intercisa erit, quum frequenter dicendi imperum deponere atque refrigerare necesse sit, ac denuo novum exordium atque spiritum resumere. Adde etiam, quod quum praecipuum concionatoris munus sit, affectus commovere; hos autem nisi re iam probata aut amplificata excitare nequeat: efficitur sane, ut quanto probatio ipsa & amplificatio longior atque vehementior fuerit, tanto affectus acriores concitari possint. Quisquis ergo pauciora loca tractare constituit, habet utique longiora spatia, quibus & res copiosius probare & amplificare, atque ita affectus vehementiores accendere queat. Qua commoditate caret, qui multa evangelicae lectionis loca unius horae spatio, quod nobis ad dicendum da-

datur, tractare decrevit. Ingens namque flamma ex magna lignorum materia, parva autem ex tenui excitari solet. Si enim, ut Sapiens ille ait, (a) secundum ligna silvae, sic exardescit ignis; consultius est, pauciora loca copiose digere, quam multa breviter ieiuna oratione percurrere.

Deinde illud admonendum, ne in ipsa explanatione, quod multi faciunt, vim scripturis faciamus: ne germanum sensum vel adulteremus, vel violenter detorqueamus: sed id assumamus, quod scriptura sponte sua vigilantibus atque studioso lectori offert: & ea potissimum deligamus, quae non curiositati, aut otiosae subtilitati serviant, sed quae ad mores componendos, & obiurganda vitia plurimum valeant.

Ceterum, quas sententias ex sacra lectione depromserit, aliis scripturarum & sanctorum patrum testimoniis studeat confirmare. Vt enim D. Hieronymus ait, (b) sermo presbyteri scripturarum sale conditus esse debet. In locis autem scripturarum adducendis, quattuor haec mihi observanda videntur. Primum ut, quatenus fieri possit, ne sint nimium trita, atque vulgata, & cuilibet passim obvia, nisi ea insigni aliqua expositione illustrentur, sed reconditiora, & minus trita loca adducenda: qualia multa sunt, quae in prophetarum, & Sapientiae libris continentur: quae novitate sua, & dicentium, & audientium animos alliciant. Deinde in his locis afferendis modus adhibendus est: ne videlicet quidquid nobis occurrerit, propriae inventionis amore illecti, quod multis sane contingit, protinus arripiamus. Sed commodissima quaeque & minus cuique obvia eligamus.

Praeterea illud etiam videndum, ne rem, per se satis apertam, aut iam probatam, testimoniis non necessariis oneremus. Quod quidam faciunt, ostentandae magis memoriae aut eruditionis, quam necessitatis causa. Deinde id etiam providendum, ut quas sententias vel ex litteris sanctis, vel ex patribus attulerimus, sic interpretemur, ut fide & integritate sententiae conservata, cum quadam venustate;

&

(a) *Eccli.* 28. (b) *Ad Nepotianum.*

& sermonis nostri proprietate ita reddamus, ut non ex latina lingua translatae, sed in nostra natae esse videantur. Dupliciter enim hac in re multi peccant. Quidam enim sic latina vertunt, ut latini sermonis idiomata seruent: atque ita magnam sententiis gratiam adimunt. Quum enim unaquaeque lingua, sua habeat idiomata, proprietatesque loquendi; optimi interpretis est, latini sermonis idiomata in alterius linguae idiomata, quae tantumdem valeant, convertere. Alii vero, ut hoc crimen effugiant, inepte rhetoricantur, nimiaque verborum copia luxuriantes, nec allatae sententiae gravitatem, nec veritatem conservant.

Ceterum, ut de eloquutione aliquid hoc loco dicam, est plane methodus valde accommodata, ad multa lectionis evangelicae loca explicanda; si ea sub quaestionis aut dubitationis figura proponamus. Exempli gratia. In evangelio de Regulo, (a) salutem filio petente, quaeri primum potest, cur Dominus illum infidelitatis arguat; quum fidem habere videretur, qui salutem filio petebat? Neque enim salutem ab eo peteret, quem non crederet Salvatorem. Deinde cur principi, qui simili ratione salutem filiae petebat, nihil tale dixit? Immo quum eo perrexit, & in ipso itinere in fide nutantem benigne confirmavit: quum tamen & acriter Regulum corripuerit, & cum eo ire noluerit? Item, cur in Centurionis domum, (b) qui salutem servo petebat, ire sponte sua non rogatus voluit: in domum vero Reguli rogatus etiam ire noluit? Unaquaeque harum quaestionum adhibitis dubitandi rationibus proponenda est. Deinde vero responsio eius assignanda, similique modo confirmanda, & ad utilitatem auditorum accommodanda est. Quidquid enim in concione dialogi formam praese fert, praeterquam quod attentionem dubitatione ipsa excitat, ad pronuntiationis varietatem plurimum conducit. Vnde D. Chrysostomus, tractandorum animorum artifex peritissimus, crebris saepe interrogatiunculis dormientem excitat auditorem.

Postremo illud etiam admonendum est, ut quum aliquod
scri-

(a) *Ioan. 4.* (b) *Luc. 7.*

scripturae testimonium citamus, nequaquam sola eius interpretatione, quae vulgari sermone fit, contenti sumus: quod multi faciunt, qui totidem verbis latina patrio sermone reddunt. Danda enim opera est, ut aliquid in testimonio adducto observatione dignum ponderemus. Quod fit, quando vel emphasim, quae in uno aliquo verbo latet, explicamus, vel metaphoram aliquam excutimus. Est enim metaphora omnis in arctum contracta similitudo: ideoque per illam explicanda est. Interdum etiam sententiam, breviter comprehensam, dilatamus aut amplificamus. Ad quod dilatandi atque amplificandi rationes, quae superius a nobis expositae sunt, iuvare poterunt. Hoc satis sit breviter monuisse. Plena quippe huius rei cognitio, totius vitae studio comparatur. Hoc enim praecipue agimus, quum sacris litteris operam damus. Nec enim earundem intelligentia contenti sumus, sed ea etiam ponderamus, quae aliquid observatione dignum continent. Haec autem admonitio in iis scripturarum testimoniis locum non habet, quae ad mysticam nominum interpretationem pertinent: ut quum aquae nomine divinam gratiam & sapientiam significari; vel calicis nomine sortem, quae cuique obtrigit; aut olei vocabulo misericordiam intelligi debere dicimus. In his enim satis est, vocis significationem ex alio loco breviter indicasse.

CAP. V.

QUARTVS CONCIONANDI MODVS
ex superioribus mixtus.

ESt autem quartus concionandi modus ex his, quae diximus, temperatus, ac D. Chrysostomo valde familiaris: cuius sunt duae praecipue partes; quarum altera evangelicae lectionis explanationem continet; altera in hoc genere suasorio vel dissuasorio versatur: in quo vir sanctus communia virtutum & vitiorum loca tractare solet, in quibus vel ad aliquam virtutis actionem adhortatur, vel ab aliquo vitio deterret: utriusque rei bona & mala, commoda

da & incommoda enumerans & amplificans. Qua de re nihil est singulare ac proprium, quod in hoc genere praecipui debeat. Quum enim hic concionandi modus ex duobus superioribus conflatus sit; quid in toto fieri debeat, ex partium doctrina, e quibus totum constat, intelligi facile potest. In quo tamen genere periculum est, ne, dum utrique parti satisfacere volumus, plus iusto longiores in concione simus. Quae res magnopere concionatoribus fugienda est: ne, dum auditores taedio afficimus, omnium, quae recte dicta sunt, gratiam & fructum amittamus: quum fatigatus auditor, neque, quid dicas, attendit, & eorum, quae audivit, suavitatem ac memoriam perdit.

His ita constitutis, non erit alienum, hos quattuor concionandi modos inter se conferre, ut cuiusque ipsorum ratio, dignitas atque utilitas intelligatur. Et quidem hi omnes, & quicumque alii reperiantur, ad tria mihi capita revocari posse videntur. Primus quidem simplex appellari potest, quum unum aliquod argumentum, sive in genere suasorio, sive in demonstrativo, tractatur: in suasorio, quum ad unam aliquam virtutem hortamur, aut ab aliquo scelere dehortamur: quod facit D. Cyprianus, in sermone de patientia, de eleemosyna, de mortalitate, de invidia; idemque non raro ceteri quoque patres. In demonstrativo autem, quum totus sermo, alicuius sancti virtutes, & egregia facta, atque insignia miracula praedicat & amplificat: quod iidem saepe faciunt. Secundus vero modus evangelicam lectionem explanat: in qua varia moralis vitae documenta & argumenta, ut cuiusque loci ratio exigit, explicantur. Quod genus concionandi sancti quoque patres frequenter sequuti sunt,

Quocirca nemo ex his duobus concionandi modis alterum ita probare debet, ut alterum deprimat: quando uterque veteribus patribus in usu fuerit: nemoque iure reprehendere potest, quod eorum exemplo & auctoritate defenditur. Hic autem concionandi modus & auditoribus propter rerum varietatem gratus, & propter diversa vitae documenta utilis, & concionatori quoque facilis admodum

P

est.

est. Neque enim sex illis partibus, quas antea commemoravimus, neque artificiosa argumentorum dispositione eget, quum lectionis evangelicae seriem atque ordinem sequatur: neque magnam admodum in concionatore eruditionem requirit, quum nulla tam angusta ingenii vena sit, neque tam curta rerum supellex, ut non singulis explanationis partibus aliquid aliunde sumat, quo illas locupletare & illustrare queat. Sed hic tamen concionandi modus, ut audienti gratus, & dicenti facilis, ita parum vehemens esse videtur. Rerum enim amplificatio, & concitatiores affectus causam argumentis iam probatam consequuntur: tantoque sunt, ut antea diximus, vehementiores, quanto probatio longior atque firmitior est. Huiusmodi autem probationes in evangeliorum explanatione longiores esse nequeunt, quando qui multa, & ea quidem inter se diversa, unius horae spatio tractare debet, diutius in una aliqua re immorari non potest: ideoque brevis & ieiuna probatio magnam affectuum vim excitare non poterit.

Adde etiam, quod ille dicendi ardor atque impetus, in quo tota paene dicendi vis posita est, frequenter refrigerandus atque interrumpendus est. Quoties enim ab una re ad aliam longe diversam transitum facimus, toties impetum illum subsidere, & intercidi necesse est. Neque quisquam adeo affectuum suorum est dominus, ut facile possit affectum, quo erat iam permotus, exuere, & novum illum, qui ex dissimili rerum natura consurgit, protinus induere.

Ceterum quum una aliqua res in tota concione tractatur, ut quum ad dilectionem inimicorum, ad eleemosynae, humilitatis, caritatis, & patientiae studia exhortamur, ardentior oratio esse poterit, quod multiplex argumentorum vis maiorem affectibus concitandis materiam praebeat. Difficilior tamen huius causae tractatio est. Primum quod maiorem in concionatore dicendi facultatem, uberiolemque sententiarum copiam requirat: ut satietatem, quae ex unius rei tractatione excitatur, rerum varie-

rie-

rietate & copia vitare possit. Hic igitur primus huius operis labor est. Proximus vero, & haud scio an multo maior, reliquas orationis partes, nempe, exordium, divisionem, confutationem, & perorationem confirmationi; in qua tota vis causae sita est, aptare & accommodare. Est enim huiusmodi oratio velut perfectum quoddam corpus, suis partibus & quasi membris compactum, quae omnia, tamquam unius corporis membra, cohaerere inter se, sibi que mutuo respondere debent. Hic tamen labor ea ratione, quam diximus, pensatur, quod huiusmodi oratio vehementior, & ad permovendos animos accommodatior est.

Quod si quis a me requirat, quem ex his concionandi modis sequi potissimum debeamus, quamvis nos is sim, qui hoc mihi iudicium arrogare possim, tamen pro tenuitate ingenii mei, quid censeam, paucis indicabo. Non probo illos, qui unam dumtaxat concionandi formam sequuntur, & quod semel faciunt, semper faciendum esse decernunt. Commodius ergo videtur, ut pro rerum natura ac dignitate, aut etiam auditorum utilitate, vel necessitate, nunc hoc, nunc illo concionandi genere utamur. Aliquando enim tota concio in lectionis evangelicae explanatione versabitur: quandoque vero unum aliquod argumentum in genere dissuasorio, vel demonstrativo persequetur. Satietas vero, quae ex unius rei tractatione gigni posse videtur, hac ratione vitabitur, si eadem de re varias quaestiones explicemus. Exempli gratia: si de caritate dicimus, pars prima de laude & commendatione caritatis: altera vero de his, quae ad caritatem consequendam adiuvant: tertia autem de praecipuis caritatis impedimentis, quae removenda sunt, disputabit. Item de humilitate dicturus, easdem partes versabit, atque item de diversis verae humilitatis gradibus & signis differet.

Eodem modo de orationis quoque virtute disputare poterit. Cui argumento illud etiam liberum erit adiungere, ut de praeparatione animi ad orandum, deque variis virtutibus, hoc est, fide, humilitate, devotione, ieiunio,

nio, & misericordia, quibus efficax oratio facienda atque iuvanda est, haberi sermo poterit. Hac ergo multiplici eiusdem rei varietate satietas atque fastidium vitari poterit. Hoc autem meum iudicium sanctorum patrum auctoritate tueri possum, quos aperte videmus in utroque concionandi genere versatos: sed inter hos tamen concionandi modos, quartus, quem paullo ante indicavimus, commodissimus mihi videtur. Nam & evangelicam lectionem enarrat, ac deinde unum aliquod argumentum persequitur. Hunc enim concionandi modum, ut ante dixi, summo illi concionatori D. Chrysostomo video placuisse. Hoc igitur frequentius: aliis vero, tum pro natura & conditione rerum, tum pro facultate & ingenio dicentis, uti licebit. Neque enim omnibus ingeniis, aut omnibus etiam argumentis eadem conveniunt.

CAP. VI.

DE GENERE CONCIONIS DIDASCALICO.

Est & aliud concionum genus, quod didascalicum appellant: quod docendi gratia magis, quam movendi, adhibetur. Occurrere tamen aliquando ex singulari aliqua ratione potest, praesertim in aliquibus concionis partibus, quae hoc exigunt, quum populus non solum movendus, sed etiam docendus est. Id vero est, quum alicuius rei plenam notitiam atque scientiam tradere volumus.

In hoc igitur genere hic fere ordo servandus erit, ut primum ostendamus, quid res sit, deinde qualis sit, hoc est, quas habeat qualitates & affectiones, tum causas eius & effectus, ac postremo eius partes per divisionem indagemus. Sic de gratiae natura tractaturus, primum quaerit, quid sit gratia; secundo quas habeat proprietates; tum praecipuas eius causas & effectus, quos in anima viri iusti operatur; ac postremo gratiae partes, variarum gratiarum divisione, numerabit ac discutiet. Horum exemplorum D. Thomas ceterique Theologiae tractatores pleni sunt.

sunt. Aristoteles vero aliam methodum, non admodum huic disimilem, tradit. Praecipit enim, ut primum probeamus, rem esse, deinde quid ea sit, postea qualis sit, ad extremum cur talis sit. Quo quidem ordine quum commodissime quaelibet res tractetur, non dubium est, quin optimus doctrinae ordo in eadem re tractanda censendus sit. Quamquam non erit necesse, haec omnia persequi, quum de uno aut pluribus constiterit.

Ad hos quattuor quasi gradus revocantur omnia, quae de qualibet re quaeri possunt. Hac enim ratione & rerum effectus, & causae item explicantur, quarum cognitio scientiam parit. Ad hunc ergo modum in tractatione cuiusque virtutis, primum, an proposita virtus sit necessaria humanae perfectioni, necne, differitur: quod ad quaestionem, an res sit, reducitur. Deinde, quatenam sit eius materia, tum obiecta, tum subiecta: quod ad quaestionem naturae pertinet. Tum quae sint virtutis affectiones ac conditiones: quod ad quaestionem qualitatis perspicue spectat. Ad extremum, quonam pacto ipsam possimus consequi: quod ad quartam quaestionem revocatur, in qua de causis & impedimentis virtutum agitur. Itaque omnia, quae de una re differuntur, ad illa quattuor revocantur, eodemque ordine fere tractantur.

Concionator tamen in hac ipsa tractatione meminisse debet, quid potissimum inter doctorem & concionatorem intersit. Scholasticus enim doctor docere solum, & intellectum erudire studet: concionator autem voluntatem movere, & ad pietatis & iustitiae studium inflammare debet: ideoque omnia ad hunc scopum, quatenus fieri poterit, dirigere atque referre conabitur.

CAP. VII.

DE DISPOSITIONE.

DIximus haecenus de inventione argumentorum: reliquum est, ut breviter de ipsorum ordine atque dis-


positione dicamus. Ordo igitur, quod ad hunc locum attinet, est argumentorum inter se apta ad persuasionem collocatio. Quae quidem quam sit necessaria differenti, nemo est, qui non videat. Vt enim domui construendae satis non est, lapides & reliquam materiam in acervum congerere, nisi his disponendis ac collocandis artificum manus adhibeatur; utque milites, quantumlibet fortes ac strenui, nisi periti ducis industria formam exercitus accipiant, ad bellum inferendum idonei non sunt: sic argumenta ex locis traditis coacta tumultuantur, nec ad finem adipiscendum apta sunt, nisi ad persuasionem apposite collocentur ac disponantur. Turbati quippe exercitus, sibi ipsis sunt impedimento: & artus, etiam leviter loco moti, perdunt, quo viguerunt, usum. Sic oratio, carens hac virtute, tumultuetur necesse est, & sine rectore fluitet, nec cohaereat sibi; multa repetat, multa transeat, velut nocte in ignotis locis errans; nec initio, nec fine proposito, casum potius, quam consilium, sequatur.

Primus igitur dispositionis ordo est, quum sequimur eam praeceptionem, quam paullo ante exposuimus: hoc est, ut utamur principio, narratione, divisione, confirmatione, confutatione, conclusione: & hunc ordinem, quemadmodum praeceptum ante est, in dicendo sequemur. Item ex institutione artis, non modo totas causas per orationem, sed singulas quoque argumentationes disponemus, quemadmodum in secundo libro docuimus: id est, expositionem, rationem, confirmationem rationis, exornationem, complexionem. Haec igitur duplex dispositio est: una per orationes, altera per argumentationes ab institutione artis profecta.

In confirmatione autem, & confutatione argumentationum, dispositiones huiusmodi convenit habere: firmissimas argumentationes in primis & postremis causae partibus collocare: mediocres, & neque utiles ad dicendum, neque necessariae ad probandum, quae, si separatim ac singulae dicantur, infirmae sunt, cum ceteris tamen coniunctae, firmae & probabiles fiunt; interponi, & in
me-

medio collocari oportet. Nam & re narrata statim expectat animus auditoris, ex qua re causa confirmari possit. Quapropter continuo firmam aliquam oportet inferre argumentationem. Et quoniam nuperrime dictum facile memoriae mandatur, utile est, quum dicere desinemus, recentem aliquam relinquere in animis auditorum bene firmam argumentationem.

Est & alius doctrinae ordo, qui in quovis orationis genere servandus est. Primum enim ea priori loco tractare debemus, quae ad eorum, quae sequuntur, intelligentiam vel necessaria sunt, vel maiorem illis lucem afferunt. Praeterea semper a communioribus ad minus communia, a genere ad speciem, a facilioribus ad difficiliora, a magis notis ad minus nota procedendum est. Ideoque ab effectibus ad eorum causas, & ab his, quae sensu cognoscuntur, ad ea, quae intellectu praevidentur, consurgimus: quod ea nobis, ut magis vicina & familiaria, ita magis nota sunt. Hac enim ratione, ut Apostolus ait, (a) invisibilia Dei a creatura mundi per ea, quae facta sunt, intellecta conspiciuntur: sempiterna quoque virtus eius, & divinitas. Haftenus de inventione ac dispositione fere conjunctim, quae tradenda videbantur, exposuimus: nunc ad eloquutionem, quae praecipua huius artis pars est, transitum faciemus.





LIBER QUINTVS
 ECCLESIASTICAE
 RHETORICAE,
 SIVE DE RATIONE CONCIONANDI.

PRAEFATIO.

NVMQVAM putaram, studiose Lector, quum libellum hunc scribere coepissem, ut ad haec minuta eloquutionis praecepta descenderem. Sed quum huius artis institutio ad unam bene dicendi rationem dirigatur, quae multis tamen partibus & virtutibus constat; ita omnes inter se cohaerent & colligatae sunt, ut vix una aliqua citra aliarum cognitionem intelligi perfecte possit. Quocirca, ne mutila & manca admonitio nostra relinqueretur, neve studiosus concionator, per varias rhetorum officinas, & perplexa eorum documenta vagaretur; quae proposito nostro maxime necessaria visa sunt, quam potui dilucide, atque recto ordine collegi, eaque, perspicuitatis gratia, plurimis D. Cypriani exemplis, qui omnium orthodoxorum patrum eloquentissimus & ornatissimus in dicendo est, illustranda curavi. Sicut rhetores unius Ciceronis exempla ad omnia dicendi praecepta & ornamenta illustranda sufficere credunt: ita ego hunc christianum Ciceronem ad omnia eloquutionis praecepta elucidanda satis esse arbitror: ut omittam interim, quod is non solum praeceptis explicandis, sed etiam formandis moribus, & vitae recte constituendae servit.

CAP.

DE ELOQVVTIONIS COMMENDATIONE,
& qualitate, ex Fabii lib. VIII.

Hinc (a) iam eloquutionis rationem tractabimus, partem operis, ut inter omnes oratores convenit, difficillimam. Nam & Marcus Antonius ... ait, a se disertos vi-
fos esse multos, eloquentem autem neminem. Disertis satis putat, dicere, quae oporteat; ornatè autem dicere, proprium esse eloquentissimi. Quae virtus si usque ad eum in nullo reperta est, ac ne in ipso quidem, aut L. Crasso; certum est, & in his, & in prioribus eam desideratam, quia difficillima fuit. Et M. Tullius (b) inventionem quidem ac dispositionem prudentis hominis putat; eloquentiam, oratoris. Ideoque praecipue circa partis huius praecepta elaboravit: quod eum merito fecisse, etiam ipso rei, de qua loquimur, nomine palam declaratur. Eloqui enim hoc est, omnia, quae mente conceperis, promere, atque ad audientes perferre: sine quo supervacua sunt priora, & similia gladio condito, atque intra vaginam suam haerenti. Hoc itaque maxime docetur, hoc nullus nisi arte assequi potest, huc studium adhibendum, hoc exercitatio petit, hoc imitatio, hic omnis aetas consumitur, hoc maxime orator oratore praestantior, hoc genera ipsa dicendi alia aliis potiora. Neque enim Asiani, aut quocumque alio genere corrupti, res non viderunt, aut eas non collocaverunt: neque, quos aridos vocamus, stulti, aut in causis caeci fuerunt: sed his iudicium in eloquendo ac modus, illis vires defuerunt: ut appareat, in hoc & vitium & virtutem esse dicendi.

Non ideo tamen sola est agenda cura verborum. Occurrere enim necesse est, & velut in vestibulo protinus apprehensuris hanc confessionem meam, resistam iis, qui, omissa rerum, qui nervi sunt in causis, diligentia, quodam inani circa voces studio senescunt: idque faciunt gratia de-

co-

(a) *Quintil. instit. orat. lib. VIII. in prooemio.* (b) *De orat. lib. II.*

coris, quod est in dicendo mea quidem opinione pulcherrimum: sed quum sequitur, non quum affectatur. Corpora sana, & integri sanguinis, & exercitatione firmata, ex iisdem his speciem accipiunt, ex quibus vires. Namque & colorata, & adstricta, & lacertis expressa sunt: sed eadem, si quis vulsa atque fucata muliebriter comat, foedissima sint ipso formae labore. Et cultus concessus atque magnificus addit hominibus, ut Graeco versu testatum est, (a) auctoritatem. At muliebris & luxuriosus non corpus exornat, sed detegit mentem. Similiter illa translucida & versicolor quorundam eloquutio res ipsas effeminat, quae illo verborum habitu vestiuntur. Curam ergo verborum, rerum volo esse sollicitudinem: nam plerumque optima rebus cohaerent, & cernuntur suo lumine. At nos quaerimus illa, tamquam lateant semper, seque subducant. Ita numquam putamus, circa id esse, de quo dicendum est; sed ex aliis locis petimus, & inventis vim afferimus.

Maiore animo aggredienda eloquentia est: quae si toto corpore valet, ungues polire, & capillum reponere, non existimabit, ad curam suam pertinere. Sed evenit plerumque, ut hac diligentia deterior etiam fiat oratio. Primum, quia sunt optima minime accersita, & simplicibus atque ab ipsa veritate profectis similia: nam illa, quae curam fatentur, & ficta atque composita videri etiam volunt, nec gratiam consequuntur, & fidem amittunt; propter id quod sensus obumbrant, & velut laeto gramine sata strangulant. Nam & quod recte dici potest, circumimus amore verborum: & quod satis dictum est, repetimus: & quod uno verbo patet, pluribus oneramus: & pleraque significare, melius putamus, quam dicere. Quid quod nihil iam proprium placet, dum parum creditur disertum, quod & alius dixisset? A corruptissimo quoque poetarum figuras seu translationes mutuamur: tum demum ingeniosi scilicet, si ad intelligendum nos opus sit ingenio. Atqui satis aperte Cicero (b) praeceperat, in dicendo vitium vel ma-

xi-

(a) *Vid. Erasmi. in proverb. Vestis virum facit.* (b) *De orat. lib. I. in prologo.*

ximum esse, a vulgari genere orationis, atque consuetudine communis sensus abhorrere.

Sed ille durus atque ineruditus : nos melius, quibus sordent omnia, quae natura dictavit; qui non ornamenta quaerimus, sed lenocinia. Quasi vero sit ulla verborum nisi rei cohaerentium virtus : quae ut propria sint, & dilucida, & ornata, & apte collocentur, si tota vita laborandum est, omnis studiorum fructus amissus est. Atque plerosque videas haerentes circa singula, & dum inveniunt, & dum inventa ponderant ac dimetiuntur. Quod etiam si idcirco fieret, ut semper optimis uterentur, abominanda tamen haec infelicitas erat, quae & cursum dicendi refrenat, & calorem cogitationis exstinguit mora & diffidentia. Miser enim, &, ut sic dicam, pauper orator est, qui nullum verbum aequo animo perdere potest. Sed ne perdet quidem, qui rationem loquendi primum cognoverit, tum lectione multa & idonea, copiosam sibi verborum suppellectilem compararit, & huic adhibuerit artem collocandi : deinde haec omnia exercitatione plurima roborarit, ut semper in promptu sint, & ante oculos. Namque & hoc qui fecerit, ei res cum nominibus suis occurrant. Sed opus est studio praecedente, & acquisita facultate, & quasi reposita. Namque ista quaerendi, iudicandi, comparandi anxietas, dum discimus, adhibenda est, non quum dicimus. Haecenus Fabius.

Et paullo inferius idem : in hac ipsa cura est aliquid satis. Nam quum latina *verba*, significantia, ornata, apte sint collocata, quid amplius laboremus ? Quibusdam tamen nullus finis calumniandi est, & cum singulis paene syllabis commorandi : qui etiam, quum optima sint reperta, quaerunt aliquid, quod sit magis antiquum, remotum, inopinatum : nec intelligunt, iacere sensus in oratione, in qua verba laudantur. Sit igitur cura eloquutionis quam maxima, dum sciamus tamen, nihil verborum causa esse faciendum, quum verba ipsa rerum gratia sint reperta : quorum ea sunt maxime probabilia, quae sensum animi nostri optime promunt, atque in animis iudicum, quod volumus, effici-

ficiunt. Ea debent praestare sine dubio & admirabilem & iucundam orationem. Verum admirabilem, non sic, quo modo prodigia miramur: & iucundam orationem, non deformi voluptate, sed cum laude ad dignitatem coniuncta. Haftenus Fabius. Haec in genere de eloquutionis qualitate dicta sunt: nunc ad singulares eius sive partes, sive virtutes veniamus. In quibus hunc tenebimus ordinem, ut primo loco virtutes, quae ad eloquutionis rationem pertinent, collocemus; deinde vitia illi contraria subiiciamus.

CAP. II.

*DE QUATTUOR PRAECIPUIS ELOQUUTIONIS
virtutibus.*

Quattuor praecipue in eloquutione Cicero (a) spectanda esse ait, nempe ut latine, ut perspicue, ut ornate ut ad id quodcumque agitur, apte congruenterque dicamus: de quibus est nobis sigillatim hoc libro dicendum.

Primum igitur est, ut oratio latina sit, atque emendata. Quae res ad grammatici officium praecipue pertinet: cuius est, de oratione congrua & incongrua iudicare. Quod non in latino solum aut graeco sermone, sed in quovis alio inspiciendum est. Habet enim unaquaeque lingua non modo suas phrasas & idiomata, sed etiam suam syntaxim & constructionem verborum, qua diserti in ea lingua uti solent: quam etiam sequi debet, quisquis caste & emendate loqui desiderat.

Adversus autem primam hanc virtutem, quae aliorum omnium fundamentum est, tria vitia numerantur: nempe barbarismus, soloecismus, & barbara lexis. Barbarismus autem in una dictione committitur, quum ea verba usurpamus, quae apud eius linguae peritos, in qua loquimur, non reperiuntur. Soloecismus vero in oratione locum habet, quum voces quidem latine, sed male tamen, hoc est,

(a) *De orat. lib. III.*

est, contra artis grammaticae praecepta copulantur. Barbara vero lexis barbarissimo affinis est: quum videlicet peregrina dictione utimur, ut quum latina in hispano sermone, vel hispana in latino miscemus. Castus enim & proprius sermo hoc etiam vitare studet.

Hic autem non alienum erit, ut quemadmodum peregrina verba, ita etiam phrascs & idiomata peregrina magno studio fugiamus. Quod vitium frequenter etiam in disertissimos viros cadit. Nam in T. Livio, mirae facundiae viro, putat inesse Asinius Pollio patavinitalcm quamdam. Quare, si fieri potest, inquit Fabius, (a) & verba omnia, & vox huius alumnū urbis oleant: ut oratio Romana plane videatur, non civitate donata. Quo quidem vitio non nulli concionatores haud carent: qui, patrio sermone loquentes, latini aut hebraei sermonis phrascs admiscunt. Quod tunc vel maxime faciunt, quum scripturarum, vel sanctorum patrum testimonia vulgari sermone reddunt.

CAP. III.

DE SECUNDA ELOQVVTIONIS VIRTUTE,
videlicet perspicuitate.

Orationis perspicuitas (b) tum in verbis singulis, tum in coniunctis, hoc est, in contextu orationis diligenter observanda est. Prius illud efficiunt propria verba, quibus maxima sermonis pars constare debet. Proprietas tamen ipsa non simpliciter accipitur. Primus enim intellectus est sua cuiusque rei appellatio, qua non semper utimur. Nam & obscena vitabimus, & sordida, & humilia. Sunt autem humilia infra dignitatem rerum, aut ordinis.

Sed ne in his quidem virtus oratoris inspicitur. At illud iam non modiocriter probandum, quod hoc etiam laudari modo solet, ut proprie dictum id sit, quo nihil inveniri possit significantius: ut Cato dixit, C. Caesarem

ad

(a) *Insit, lib. VIII, cap. 1.* (b) *Ex Quintil. loc. cit. cap. 2.*

ad evertendam rempub. sobrium accessisse : Annibalem quoque dirum , & acrem tibiam hoc modo dicimus. Et ea quoque , quae bene translata sunt , propria dici solent. Possunt videri verba , quae plus significant , quam eloquuntur , in parte ponenda perspicuitatis : intellectum enim adiuvant. Quod facit emphasis , de qua suo loco dicemus.

Plus tamen est obscuritatis in contextu , & continuatione sermonis , & plures modi. Quare nec sit tam longus sermo , ut eum prosequi non possit intentio : nec traiectione tam tardus , ut in hyperbaton finis eius differatur.

Vitanda etiam ambiguitas , non haec solum , quae incertum intellectum facit , ut Chremetem audiui percussisse Demeam : sed illa quoque , quae , etiam si turbare non potest sensum , in idem tamen verborum vitium incidit : ut si quis dicat , visum a se hominem librum scribentem. Nam etiam si librum ab homine scribi pateat , male tamen composuerat , feceratque ambiguum , quantum in ipso fuit. Etiam interiectione , sive parenthesi : qua & oratores , & historici frequenter utuntur , ut medio sermone aliquem inferant sensum , impediri solet intellectus , nisi , quod interponitur , breve est.

Est etiam in quibusdam turba inanium verborum : quidam communem loquendi morem reformidant , ducti specie nitoris , circumeunt omnia copiosa loquacitate , quae dicere volunt : ipsam deinde illam seriem cum alia simili iungentes miscentesque , ultra quam ullus spiritus durare possit , extendunt.

Alii , brevitatis aemuli , necessaria quoque orationi subtrahunt verba , & , velut satis sit scire ipsos , quae dicere velint , quantum ad alios pertineat , nihil putant. At ego otiosum sermonem dixerim , quem auditor suo ingenio non intelligit.

Nobis igitur prima sit virtus perspicuitas , propria verba , rectus ordo , non in longum dilata conclusio , nihil neque desit , neque superfluat. Ita sermo & doctis probabilis , & planus imperitis erit. Haec est eloquendi observatio.

tio. Nam rerum perspicuitas quo modo praestanda sit, in praeceptis narrationis traditur. Similis autem ratio est in omnibus. Nam si neque pauciora, quam oportet, neque plura, neque inordinata aut indistincta dixerimus, erunt dilucida, & negligenter quoque audientibus aperta. D. autem Augustinus (a) iuxta illud graecorum adagium: quamvis rudius dicito, modo clarius; minus latinis verbis uti admonet, si perspicua magis fuerint. Sic enim ait: quid prodest loquutionis integritas, quam non sequitur intellectus audientis; quum loquendi omnino nulla sit causa, si quod loquimur, non intelligunt, propter quos, ut intelligant, loquimur? Qui ergo docet, vitabit omnia verba, quae non docent. Et si pro eis alia integra, quae intelligantur, potest dicere, id magis eliger. Si autem non potest, siue quia non sunt, siue quia in praesentia non occurrunt, utetur etiam verbis minus integris, dum tamen res ipsa doceatur atque discatur integre. Et paullo post: (b) bonorum, inquit, ingeniorum insignis est indoles, in verbis verum amare, non verba. Quid enim prodest clavis aurea, si aperire, quod volumus, non potest? Aut quid obest lignea, si hoc potest, quando nihil quaerimus, nisi patere, quod clausum est? Haec ille.

Est autem alia non in verbis, sed in rebus ipsis obscuritas: ubi quidam concionatores abditas atque difficiles quaestiones, ex ipsis philosophiae atque Theologiae penetrabilibus desumtas, rudi & indoctae multitudini proponunt; quo ingenium suum ostentent, & eruditi in populo habeantur. Hi autem minime cum Apostolo dicere posse videntur: (c) non nosmetipsos praedicamus, sed Dominum nostrum Iesum Christum; nos autem servos vestros per Iesum. Vehementer autem indignum est, ut quo in loco & officio alios a vanitatis & iactantiae vitio deterremus, nos in idem vitium, quod perstringimus, incidamus. Quod si admonitio mea adversus hanc multorum consuetudinem minus valet, valeat sane D. Augustini in 4. de do-

(a) *August. lib. III. de doctr. christ. cap. 10.* (b) *Cap. 11.* (c) *2. Corinth. 4.*

doctrina christiana libro dicentis : (a) sunt quaedam , quae sua vi non intelliguntur , aut vix intelliguntur... quamvis planissime dicentis versentur eloquio : quae in populi audientiam vel raro , si aliquid urget , vel numquam omnino mittenda sunt. Haecenus Augustinus.

CAP. IV.

DE TERTIA ELOQVVTIONIS VIRTUTE , QVAE
in ornatu posita est.

VEnio (b) nunc ad ornatum , in quo sine dubio plus, quam in ceteris dicendi partibus, sibi indulget *concionator*. Nam emendate quidem ac dilucide dicentium tenue praemium est : magis enim est , vitiis carere , quam ut magnam aliquam virtutem adeptus esse videaris... Nec vero hic ornatu parum causae confert... Nam qui libenter audiunt, & magis attendunt , & facilius credunt , & plerumque ipsa delectatione capiuntur , non numquam admiratione auferuntur. Nam & ferrum affert oculis terroris aliquid, & fulmina ipsa non tam nos confunderent , si vis eorum tantum , non etiam ipse fulgor, timeretur. Recteque Cicero his ipsis ad Brutum verbis quadam in epistola scribit : (c) nam eloquentiam , quae admirationem non habet , nullam iudico. Aristoteles quoque eandem petendam maxime putat. Sed hic ornatu , repetam enim , virilis , fortis , & sanctus sit , nec effeminatam levitatem , nec fucum eminentem colorem amet , sanguine , & viribus niteat. Hoc autem adeo verum est , ut quum in hac parte sint vicina virtutibus vitia , etiam qui vitiis utuntur , virtutis tamen his nomen imponant. Quare nemo ex corruptis dicat , me inimicum esse culte dicentibus. Non nego hanc esse virtutem , sed illis eam non tribuo.

An ego fundum cultiorem putem , in quo mihi quis ostenderit lilia , & violas , & amoenos fontes surgentes , quam ubi plena messis , aut graves fructu vites erunt ? Ste-
ri-

(a) Cap. 9. (b) Ex Quintil. lib. VIII. cap. 3. (c) In fragm. epist.

rilem platanum, tonsasque myrtos, quam maritam ulmum, & uberes oleas praecoptaverim? Habeant illa divites, licet quid essent, si aliud nihil haberent? Nullusne ergo etiam fructiferis adhibendus est decor? Quis negat? Nam & in ordinem, certaue intervalla redigam meas arbores. Quid enim illo quincunce speciosius, qui, in quamcumque partem spectaveris, rectus est? Sed protinus in id quoque prodest, ut terrae succum aequaliter trahant. Surgentia in altum cacumina oleae ferro coërcebo, in orbem se formosius fundet, & protinus fructum ramis pluribus feret. Decentior equus, cuius adstricta sunt ilia, si idem velocior. Pulcher adspectu sit athleta, cuius lacertos exercitatio expressit, idem certamini paratior. Numquam vera species ab utilitate dividitur. Haec Fabius.

D. vero Augustinus de hoc orationis ornatu, quo potissimum auditorum animi oblectantur, sic ait: (a) sicut autem saepe sumenda sunt & amara salubria, ita semper vitanda est dulcedo perniciofa. Sed salubri suavitate... quid melius? Quanto enim magis illic appetitur suavitas, tanto facilius salubritas prodest. Sunt ergo ecclesiastici viri, qui divina eloquia non solum sapienter, sed & eloquenter etiam tractaverunt. Quibus legendis magis non sufficit tempus, quam deesse ipsi studentibus, & vacantibus possunt. Haec ille.

CAP. V.

DE ORNATU, QUI EST IN VERBIS SINGVLIS.

QVoniam orationis tam ornatus, quam perspicuitas, aut in singulis verbis est, aut in coniunctis; primum, quid singula verba, deinde quid coniuncta exigant, consideremus. Qua in re illud primo loco statuendum est, quod quemadmodum perspicuitas propriis verbis, sic ornatus translatis, vel quovis alio tropo figuratis, praecipue constat. Sed quum eandem rem frequenter plura ver-

Q

ba

(a) August. ubi sup. cap. 5.

ba significant, quod synonymia vocatur, commodiora semper, & meliora eligenda sunt. Constat enim, inter haec ipsa verba, alia esse aliis consonantiora, grandiora, honestiora, sublimiora, nitidiora, iucundiora, vocaliora. Exempli gratia: consonantiora sunt, quamquam, moderatio, & concertare; quam si dixeris, etsi, modestia, conflagere. Grandiora sunt, immanis, contrucidare, optimus, officiosissimus; quam haec, magnus, necare, bonus, officiosus. Nitidius etiam, bos, quam vacca. In universum quidem optima ex simplicibus verbis creduntur, quae aut maxime exclamant, aut sono sunt iucundissima. Et honesta quidem turpibus potiora semper: nec sordidis umquam in erudita oratione locus.

Ceterum quod ad usum attinet, in quo maior observatio est, delectus verborum sic habendus est, ut cum rerum, de quibus dicimus, natura & dignitate cohaereant. Rebus enim atrocibus verba etiam ipsa auditu aspera magis convenient. Quod enim verbum in re grandi aptum & magnificum fuerit, in re humili tumidum erit. Contra vero quae humilia circa res magnas, apta circa minores videntur. Et sicut in oratione nitida notabile est humiliter verbum, & velut macula: ita a sermone tenui sublimenitidumque discordat, fitque corruptum, qui in plano tumet.

Haec de propriis verbis dicta sunt. Translata vero, de quibus modo dicendum est, nisi in contextu, probari non possunt. Sed nec inornata sunt quidem, nisi quum sunt infra rei, de qua loquendum est, dignitatem.

CAP. VI.

DE TROPIS.

QUoniam, ut paullo ante diximus, perspicuitas quidem propriis, ornatus vero translatis verbis, vel quovis alio tropo figuratis, praecipue constat; de tropis iam dicere incipiamus, atque eo libentius, quo in prophetarum libris frequentior eorum usus est. Omnia enim pro-

prophetarum scripta, quoniam de rebus maximis differunt, siue quum hominum scelera corripiunt, siue quum ultrices scelerum poenas improbis denuntiant, siue quum piis hominibus, & in officio manentibus, ingentia divinae gratiae beneficia pollicentur; metaphoris & allegoriis plena sunt: quibus illi, magnarum rerum similitudinibus, quae ipsi quoque maxima dicunt, amplificare, & ante oculos ponere solent. Cuius rei non alienum puto, loca aliquot indicare, ut aperte liqueat, omnia prophetarum scripta metaphoris & allegoriis referta esse. Talis est locus ille Isaïae: (a) & egredietur virga de radice Iesse, & flos de radice eius ascendet, &c. Virgae enim nomine potentiam, floris autem, pulchritudinem Domini Salvatoris designavit.

Deinde sequentia allegoriis plena sunt. Habitabit lupo cum agno, &c. Et cap. 8. (b) pro eo quod abiecit populus iste aquas Siloë, quae vadunt cum silentio, &c. Deinde futuram populi vastitatem fluminis inundatione designat, & amplificat. Cap. vero 35. conversionem, & laetitiam gentium pulcherrimis metaphoris declarat, quum ait: laetabitur deserta & invia, & exultabit solitudo, & florebit quasi lilium, & quae sequuntur. Ieremias vero cap. 4. Assyriorum regem leonis nomine significat, quum ait: ascendit leo de cubili suo, &c. Ezechiel vero cap. 17. eundem regem ingentis aquilae nomine exprimit, quum ait: aquila grandis magnarum alarum, longo membrorum ductu, plena plumis & varietate, venit ad libanum, & tulit medullam cedri, &c. Pharaonem vero, Aegypti regem, draconem appellat, ut eius superbiam & atrocitatem ostendat, his verbis: (c) ecce ego ad te, draco magne, qui cubas in medio fluminum tuorum, & dicis: meus est fluvius, & ego feci memetipsum. Verum haec exempla in omnibus fere prophetarum paginis reperiuntur. Quae tamen hoc in loco referre volui, ut troporum utilitatem & usum etiam ostenderem. Apparet enim, res magnas & atroces his nominibus attolli, earumque magnitudinem his verbis magis, quam propriis, significari.

Q 2

Est

(a) Cap. 11. v. 1. (b) Cap. 11. v. 6. (c) Ezech. 29.

Est igitur tropus: (a) verbi, vel sermonis, a propria significatione in aliam cum virtute mutatio ... Incipiamus igitur ab eo, qui cum frequentissimus est, tum longe pulcherrimus: translationem dico, quae *metaphora* graece vocatur. Latissime enim patet. Eam necessitas genuit, inopia coacta: post autem delectatio iucunditasque celebravit. Nam ut vestis frigoris depellendi causa reperta primo, post adhiberi coepta est ad ornatum etiam corporis & dignitatem; sic verbi translatio instituta est inopiae causa, frequentata delectationis. Est autem translatio, quum nomen aut verbum transfertur ex eo loco, in quo proprium est, in eum, in quo proprium deest, aut translatum proprio melius est. Id facimus, aut quia necesse est, aut quia significantius, aut quia decentius. Nam gemmare vites, luxuriam esse in herbis, laetas segetes, etiam rustici necessitate dicunt. Oratores durum hominem, aut asperum. Non enim proprium erat, quod darent his affectionibus nomen. Iam incensum ira, inflammatum cupiditate, & lapsus errore, significanti gratia. Nihil enim horum suis verbis, quam his arcessitis, magis proprium erat. Illa vero ad ornatum, lumen orationis, & generis claritatem, & concionum procellas, & eloquentiae flumina, ut Cicero pro Milone, Clodium fontem eius gloriae vocat, & alio loco, segetem, ac materiam.

Illud autem admirandum videtur, quid sit, quod omnes translatis & alienis magis delectentur verbis, quam propriis & suis. Nam si res suum nomen & proprium vocabulum non habet, ut pes in navi, ut in vite gemma; necessitas cogit, quod non habeas, aliunde sumere: sed in suorum verborum maxima copia, tamen homines aliena multo magis, si sunt ratione translata, delectant. Causa autem illa est, quod translatio est similitudo ad unum verbum contracta: similitudine autem mirifice capiuntur animi. Eo tamen distat, quod illa comparatur rei, quam volumus exprimere, haec pro ipsa re dicitur. Comparatio est, quum dico, fecisse quid hominem, ut leonem. Translatio, quum dico de homine, leo est.

Me-

(a) *Ex Fab. lib. VIII. cap. 6.*

Metaphorae autem vis omnis quadruplex est. Quum in rebus animalibus aliud pro alio ponitur: ut Livius, (a) Scipionem a Catone allatrari solitum refert. Inanima pro aliis generis eiusdem sumuntur, ut: concentu virtutum nihil est suavius. Aut pro rebus animalibus inanima, ut: duo fulmina belli Scipiades. Praecipueque ex his oritur mira sublimitas, quae, audaciae proxima, periculo translationis attollitur, quum rebus sensu carentibus actum quemdam & animos damus, qualis est: (b)

..... *pontem indignatus Araxes.*

Et illa Ciceronis: (c) quid enim tuus ille, Tubero, districtus in acie Pharsalica gladius agebat? cuius latus ille mucro petebat? qui sensus erat armorum tuorum? Arcanae autem litterae, propter rerum magnitudinem, hac eadem metaphora non raro utuntur, qua & rebus inanimatis affectus & actiones humanas tribuunt, & ad ipsas etiam sermonem convertunt. Tale est illud: (d) flumina plaudent manu, simul montes exsultabunt a conspectu Domini. Et alio loco: (e) tunc exsultabunt omnia ligna silvarum a facie Domini, &c. Rei enim magnitudo, nempe Christi Domini in mundum adventus, hoc exigere videbatur, vel ipso Domino testante, qui ait: (f) si hi tacuerint, lapides clamabunt.

In (g) translationibus autem fugienda est dissimilitudo, qualis est in illo Ennii: caeli ingentes fornices. Deinde videndum est, ne longe simile sit ductum: syrtem patrimonii, scopulum libentius dixerim; charybdim bonorum, voraginem potius. Facilius enim ad ea, quae visa, quam ad illa, quae audita sunt, mentis oculi feruntur. Sunt (h) quaedam & humiles translationes, ut, faxea est verruca: quaedam maiores, quam res postulat, ut, tempestas comestationis: quaedam minores, ut comestatio tempestatis.

Vt modicus autem atque opportunus eius usus illustrat orationem, ita frequens & obscurat, & taedio complet:

Q3

con-

(a) *Lib. XXXVIII. cap. 34.* (b) *Virg. lib. VIII. vers. 728.* (c) *Pro Q. Ligario cap. 3.* (d) *Psal. 97.* (e) *Psal. 95.* (f) *Luc. 19.* (g) *Ex Cic. lib. III. de orat. cap. 40. & 41.* (h) *Ex Quintil. lib. VIII. cap. 6.*

continuus vero in allegoriam & aenigma exit. Quod si verere , ne paullo durior translatio esse videatur , mollienda est proposito saepe verbo , ut , si olim M. Catone mortuo pupillum senatum quis relictum dicat ; paullo durius : sin, ut ita dicam , pupillum ; aliquanto mitius est. Etenim verrecunda debet esse translatio , ut deducta esse in alienum locum , non irruisse , atque ut precario , non vi , venisse videatur. Diligenter etiam cavendum est , ne omnia , quae poëtis permilla sunt , convenire orationi putemus : nec enim pastorem populi , auctore Homero , (a) dixerim , nec volucres pennis remigare : licet Virgilius (b) in apibus ac Daedalo (c) speciosissime sit usus. Modus autem nullus est florentior in singulis verbis , nec qui plus luminis afferat orationi : eoque in illo explicando merito longiores fuimus.

Synecdoche tropus est, in quo ex parte totum , aut contra ; aut ex antecedentibus sequentia intelliguntur. Quae descriptio octo illos modos comprehendit , quibus fit synecdoche , quos gravissimi scriptores tradiderunt. Ex parte totum intelligitur , ut ex puppi navis , ensis ex mucrone , aut ex tecto domus. Cicero : (d) mucrones eorum a iugulis nostris reiecimus. Huc pertinet , quum vel ex uno plures significantur. Livius : Romanos praelio victor : & Virgilius : (e) *hostis habet muros*. Vel genus ex forma , sive specie. Virgilius : (f) *dentesque Sabellicus exacuit sus* , pro quovis sue. Vel ex materia res confecta : qua ratione & ferrum pro gladio , & pinus pro navi , & aurum atque argentum pro aurea & argentea pecunia sumitur. Cicero : (g) homines instructi , & certis locis cum ferro collocati. Contra vero ex toto pars declaratur , ut in illo Virgilii : (h)

..... *fontemque , ignemque ferebant.*

De quo genere est , quum aut e pluribus unus intelligitur. Cicero ad Brutum : (i) populo , inquit , imposuimus , & oratores visi sumus ; quum de se tantum loqueretur. Aut e genere pars illi subiecta. Virgilius : (k)

prae-

(a) *Iliad.* A. (b) *Georg. lib. III. v. 58.* (c) *AEneid. lib. VI. v. 19.*
 (d) *In Cat. III. c. 1.* (e) *AEneid. lib. II. v. 290.* (f) *Georg. lib. III. v. 255.* (g) *Pro A. Caecina.* (h) *AEneid. lib. XII. v. 119.* (i) *In Bruto, cap. 50.* (k) *AEneid. lib. XII. v. 255.*

..... *praedamque ex unguibus ales*
Proiecit.

Ex antecedentibus quoque sequentia monstrantur: ut quum ait idem poeta: (a)

Adspice aratra iugo referunt suspensa iuveni.

Ex his autem perspicuum est, translationem ad movendos animos, & res paene sub oculos subiiciendas repertam esse; synecdochen vero ad locupletandum sermonem pertinere.

Nec procul ab hoc genere discedit metonymia: in qua causas per effecta, vel effecta per causas, vel ex eo, quod continet, id, quod continetur, vel rem e signo intelligimus. Per causas effecta declaramus, quum inventor, aut alicuius rei auctor, pro re inventa ponitur. Virgilius: (b)

..... *onerantque canistris,*
Dona laboratae Cereris.

Hoc modo Platonem, Aristotelem, Demosthenem frequenter pro eorum scriptis ponimus. Cicero lectitasse Platonem studiose, audivisse etiam Demosthenem dicitur. Ex effectis autem causa significatur, quum sacrilegium deprehensum, & scelus dicimus pro scelerato. Hinc maestum timorem, tristem senectutem, & pallidam mortem eleganter optimi dicunt auctores. Virgilius: (c)

..... *maestumque timorem*
Mittite.

Horatius: (d)

Pallida mors aequo pulsat pede pauperum tabernas,
Regumque turres.

Ex eo, quod continet, id, quod continetur, venuste etiam intelligitur. Sic bene moratae urbes vocantur, sic saeculum felix, sic Roma pro Romanis, Athenae pro Atheniensibus frequenter ponuntur. Virgilius: (e)

..... *caelo gratissimus amnis,*
 id est, caelestibus. Cicero: (f) ut omittam... illas omnium doctri-

Q 4

na-

a Eclog. II. v. 66. (b) AEneid. lib. VIII. v. 180. (c) AEneid. lib. I. v. 202. (d) Lib. I. od. 4. (e) AEneid. lib. VIII. v. 64. (f) De orat. lib. I. cap. 2.

narum inventrices Athenas , in quibus summa dicendi vis & inventa est , & perfecta ; pro Atheniensibus. Huc referuntur etiam illa , quum ex possessore res , quae possidetur , aut ex duce exercitus significatur. Virgilius : (a)

..... iam proximus ardet

Vcalegon:

id est , Vcalegontis domus.

Sic , hominem devorari , cuius patrimonium devoratur : & ab Annibale apud Cannas caesa sexaginta millia hominum dicimus , id est , ab eius copiis. E signo denique res monstratur. Vnde toga , quae pacis erat insigne , & otii , pro pacis & fasces usurpantur pro magistratu. Virgilius : (b)

Illum non populi fasces , non purpura regum

Flexit.

Metonymiam , ut ait Cicero , (c) rhetores hypallagem vocant.

Antonomasia ponit aliquid pro nomine , ut , eversoe Carthaginis , & Numantiae , pro Scipione. Et , Romanae eloquentiae princeps pro Cicerone. Et per epitheton , thalamo quae fixa reliquit impius : impium pro Aenea posuit. Sic philosophum pro Aristotele ; poetam pro Virgilio , excellentiae causa , dicimus. Differt antonomasia a periphrasi , quod illa ad sola personarum nomina referatur ; periphrasis vero , de qua mox dicemus , latissime ad cetera patet , quae circuitione aliqua melius , quam proprio nomine , significantur.

Epitheton , sive latine appositum , Diomedes speciem facit antonomasiae. Estque frequenter adiectivum nomen , proprio nomini adiectum , ornandi , aut amplificandi , aut indicandi causa. Non raro etiam aliis nominibus adiungitur , quae personarum propria non sunt. Neque refert , an haec epitheta sint adiectiva nomina , necne , modo quocumque pacto proprietates quaedam attribuatur , non personis tantum , verum etiam rebus. Ut : praeceps iuventa , praeceps , amens , & inconsultus amor : esca malorum voluptas : morosa ac difficilis senectas : vitiorum expultrix philosophia : hu-

ma-

(a) *AEnid. lib. II. v. 311.* (b) *Georg. lib. II. v. 495.* (c) *In orat.*

manae vitae speculum comoedia : vitae magistra historia. In poëmaticis licebit naturalibus epithetis uti, ut : candida nix, liquidi fontes, frigida nox, volubilis amnis, aureus Sol. In oratione prorsus non oportebit adhiberi, nisi emphasis quamdam habeant, & ad rem propositam pertineant. Ut, non impetrabis causam tam iniquam ab Aristide iustissimo. Et, coram, Catone, severissimo morum censore, audes agere Floralia? Id potissimum fiet incitationibus exemplorum aut sententiarum. Aristarchus eruditissimus, & idem diligentissimus, Cicero eloquentiae princeps, Plato certissimus auctor. Exornantur autem epitheta maxime translationibus. Ut, cupiditas effrenata, insanae substructiones, &c. Solet etiam fieri aliis adiunctis epitheton tropis apud Virgilium : (a) turpis egestas, & tristis senectus. Verumtamen talis est ratio huius virtutis, ut sine appositis nuda sit & velut incompta omnis oratio, nec oneretur tamen multis. Nam fit longa, & impedita. Ut, in quaestionibus eam iudices similem agmini totidem lixas habenti, quot milites quoque : in quo & numerus est duplex, nec duplum virium.

Interdum autem epitheta eleganter ita multiplicantur, ut instar definitionis, vel descriptionis sint ; immo & frequenter totam rei naturam, eiusque proprietates explicent. Hinc Ioannes Climacus : (b) superbia, inquit, est Dei abnegatio, aspernatio hominum, laudum progenies, sterilitatis argumentum, divini adiutorii expulsio, stuporis praecursor, lapsus ministra, casus materia, iracundiae fons, simulationis ianua, firmamentum daemonum, delictorum custos, duritiae & crudelitatis artifex, compulsionis & misericordiae ignoratio, amarus exactor, immitis iudex, Dei adversatrix, blasphemiae radix. Haec ille. Sic Origenes de muliere Chananaea : mulier, inquit, caput peccati, arma diaboli, expulsio paradisi, mater delicti, corruptio legis antiquae, veniebat ad Dominum Iesum. Sic etiam Iudas apostolus in epistola sua de pseudoapostolis loquens : hi sunt, inquit, in epulis suis maculae convivantes, sine timore semetipsos pascentes, nubes sine aqua, quae a ventis cir-

cum-

(a) *Aeneid. lib. VI. v. 275.* (b) *Scalae paradisi gradu XXII.*

cumferuntur, arbores autumnales, infructuosae, bis mortuae, eradicatae, fructus feri maris, despumantes suas confusiones, sidera errantia.

Catachresis, quam recte dicimus abusionem, non habentibus nomen suum accommodat, quod in proximo est. Sic: (a)

..... *equum divina Palladis arte
AEdificant.*

Et: pyxides, cuiuscumque materiae sunt: & parricida, matris quoque aut sororis interfector dicitur. (b) Valde similis est metaphorae, sed ab ea tamen distinguitur, quod abusio nomen ex vicina ac finitima re accommodat alteri rei, quae sine nomine est: metaphora vero, etiam si nomen non deest, undecumque, modo similitudinem res habeat, alienum nomen adsciscit. Quid tam propinquum patris interfectori, quam matris, aut sororis, aut fratris interfector? Ergo is, quia nomen latino sermone non habet, per abusionem parricida vocatur. Quid rursus magis seiunctum, quam arbor, atque respublica, quae florere, verbo ab arbore translato, dicitur? Vnde apparet, duos hos tropos ita similes esse, ut tamen sint diversi.

Allegoria, quam inversionem interpretamur, aliud verbis, aliud sensu ostendit, ac etiam interim contrarium. Virgilius: (c)

*Sed nos immensum spatii confecimus aequor:
Et iam tempus aequum fumantia solvere colla.*

Habet usum talis allegoriae frequenter oratio, sed raro totius, plerumque apertis permixta est. Tota apud Ciceronem talis est: hoc miror enim, querorque, quemquam hominem ita pessumdare alterum verbis velle, ut etiam navem perforret, qua ipse naviget. Illud vero commixtum allegoriae genus frequentissimum est. (d) Equidem ceteras tempestates, & procellas in illis dumtaxat fluctibus concionum semper Miloni putavi esse subeundas: nisi adiecisset, fluctibus concionum, esset allegoria: nunc eam miscuit.

II-

(a) Virgil. *AEneid.* lib. II. v. 15. (b) *Quintil.* loc. cit. (c) *Georg.* lib. II. v. 541. (d) *Cic. pro Mil.* cap. 2.

Illud vero longe speciosissimum genus orationis , in quo trium permixta est gratia , similitudinis, allegoriae, & translationis. Quod fretum , quem Euripum tot motus , tantas, tam varias habere creditis agitationes , commutationes , fluctus , quantas perturbationes , & quantos aestus habet ratio comitiorum ? Dies intermissus unus , aut nox interposita , saepe perturbat omnia , & totam opinionem parva non numquam commutat aura rumoris. Nam id quoque in primis est custodiendum , ut quo genere coeperis translationis , hoc desinas. Multi enim quum initium a tempestate sumserunt , incendio aut ruina finiunt , quae est inconsequentia rerum foedissima. Haëtenus Fabius. Ceterum scripturae prophetarum , ut aliis tropis , ita pulcherrimis allegoriis , & mira verborum consequentia illuminantur , qualis est illa Isaiae 5. de vinea plantata a dilecto in cornu filio olei. Quam etiam non minori elegantia septem continuis versiculis persequitur David , quum ait : (a) vineam de Aëgypto transtulisti , eiecisti gentes , & plantasti eam... extendit palmites suos usque ad mare , & usque ad flumen propagines eius : & cetera , quae sequuntur.

Ironia , quam illusionem vocant , allegoria est , quae non solum aliud sensu , aliud verbis ostendit , sed contrarium. Ea aut pronuntiatione intelligitur , aut persona , aut rei natura. Nam si qua earum verbis dissentit , apparet , diversam esse oratione voluntatem. Cicero in Clodium : (b) integritas tua te purgavit , mihi crede , pudor eripuit , vita anteaëta servavit. Et Turnus apud Virgilium : (c)

..... meque timoris

Argue tu , Drance , tot quando stragis acervos

Teucrorum tua dextra dedit.

Periphrasis , sive latine circuitio , sicut & allegoria , non in uno verbo , sed in coniunctis fit , quum id , quod simpliciter dici poterat , quo sit oratio vel plenior , vel significantior , pluribus verbis dicimus. Quod frequentissime fit , quum recto obliquum , decoris gratia , adiungimus. Vt , Scipionis providentia Carthaginis opes fregit , pro eo quod est:

(a) *Psalm. 79.* (b) *In fragm.* (c) *Aëneid. lib. XI. v. 383.*

est : Scipio Carthaginem delevit. Sic dicimus , admirari virtutis decus & elegantiam , pro , virtutem : & odisse sceleris deformitatem vel turpitudinem , pro , scelus. Qua loquendi figura frequentissime & ornatissime utitur eloquentissimus Olorius.

Constat autem aliis modis tropus hic , nempe etymologia , notatione , finitione. Etymologia , quum nominis rationem explicamus : ut si quis hereditetam dicat , qui hereditates alienas appetat , captetque. Aut pro parasito , hominem cibo ventrique deditum : aut pro philosopho , hominem sapientiae studiosum : pro grammatico , qui litteras doceat : pro locuplete , qui plurima loca possideat : pro pecunioso , qui magnam pecorum copiam possideat.

Notatione constabit , quum notis quibusdam accidentium rem quampiam describimus : ut si quis , iram intelligens , animi aut bilis effervescentiam dicat , quae pallorem vultui , ardorem oculis , tremorem membris inducat. Eiusdem generis est & illud : qui digito scalpunt uno caput : quo molles , & parum viri significantur. Aut si dicas : cubito se emungit , salsamentarium indicans.

Finitione constabit , ut si quis artem bene dicendi pro rhetorica dicat. Peculatorem virum , qui civitatis aerarium compilasset. Hominem tyrannum , qui vi leges , ac civium libertatem oppressisset.

Haec de tropis dicta sint : quae , ut ante diximus , ornamentum plurimum orationi conciliant : quorum omnium una est ratio atque natura , nempe , pro noto & proprio alicuius rei nomine aliud subrogare , quod vel ornatius vel significantius sit , vel etiam vim habeat probationis & argumenti. Atque ut huius virtutis fontem aperiā , quae magnam huic facultati lucem praeferet , sciendum , nequaquam nomen aliud pro alio subiici posse , nisi illi valde finitimum , & quasi cognatum sit. Cognata autem rebus sunt ea , quae supra diximus , esse rebus aut personis attributa , unde topica , hoc est , argumentorum sedes oriuntur. Qualia

lia sunt genus rei, species, definitio, propria, accidentia, sive antecedentia, sive concomitantia, sive consequentia, causae, effectus, totum & partes, similia, & cetera eiusdem generis. Quum ergo omnia haec vim habeant argumenti, periti artificis erit, quo sit oratio vehementior, frequenter his rerum attributis pro rebus ipsis uti: quod huiusmodi nomina vicem argumenti, sive, ut dialectici vocant, medii vim habeant. Sic Sapiens illa femina 2. Reg. 20. (a) Ioab, civitatem Abela obsidenti, ait: quare praecipitas hereditatem Domini? In qua oratione verbo praecipitandi obsidionis malum amplificavit: verbo autem hereditatis, quod pro civitatis proprio nomine posuit, vim argumenti, & quidem acris, inclusit. Quo exemplo aperte liquet, ad omnem usum, cui topica deserviunt, tropos etiam deservire: qui ab illis originem ducunt. Quum autem similitudo inter topica numeretur; ea vero ad probandum, ad amplificandum, ad inferendum rebus lucem, ad rem oculis subiiciendam, & ad delectandum accommodata sit: consequens est, ut metaphora etiam, quae brevis similitudo esse dicitur, ad omnes hos usus deserviat, eoque principem inter omnes tropos locum teneat.

Illud etiam admonendum, quod non modo ad orationis ornatum, sed ad intelligenda quoque scripta prophetarum haec facultas plurimum conducit, quod frequentissime his tropis utantur. Si quis enim in scriptis eorum diligenter adverterit, quid, pro nominibus propriis, earum rerum, de quibus dicunt, usurpaverint; inveniet, eos non solum metaphoricis & allegoricis loquutionibus usos, sed aliis etiam tropis, dum aut effectum pro causa, aut causam pro effectum, aut totum pro parte, aut partem pro toto, aut proprium nomen pro communi, aut commune pro proprio, aut instrumenta pro re confecta, aut quae rebus adiuncta sunt, pro rebus ipsis ponunt. Tale est illud Ieremiae: (b) interrogate & videte, si generat masculus. Quare ergo vidi omnis viri manum super lumbum suum quasi parturientis? Hic ex consequentibus calamitatis magnitudinem significavit, Si-

(a) *Vers. 19.* (b) *Ierem. 30.*

mile est huic illud eiusdem : (a) vocate lamentatrices, & ad eas, quae procul sunt, mittite, &c. His enim signis venturae cladis acerbiter ostendere. Quum vero Amos, divitum inhumanitatem exaggerans, ait : (b) nihil patiebantur super contritione Ioseph; proprium nomen pro communi pauperum & miserorum nomine posuit, ut D. Augustinus (c) adnotavit, qui hunc prophetae tropum plurimum commendavit. Quum vero Apostolus ait : (d) non regnet peccatum in vestro mortali corpore, ad obediendum concupiscentiis eius; effectum posuit, pro causa peccati, nempe, concupiscentia & fomite, unde peccata oriuntur. Contra vero, quum, fide, ait, (e) homines iustificari; partem pro toto posuit. Fides quippe radix & fundamentum est omnium, quae ad iustificationem requiruntur : pro quibus fidem posuit. Sic ubi in scripturis legimus, quinquagesimum caput, vel quinquaginta capita, ex praecipua parte totum intelligimus.

Ceterum, qua ratione sibi Ecclesiastes ornatissimorum verborum copiam, in quibus haec troporum lumina inveniuntur, comparare possit, suo loco explicabimus.

CAP. VII.

DE ORNATU, QUI EST IN VERBIS CONIUNCTIS: *ac primum de figuris.*

QUum paullo superius dictum a nobis sit, orationis ornatum partim in verbis singulis, partim in coniunctis positum esse; ubi iam de tropis, qui ad priorem ornatus partem deserviunt, diximus, reliquum est, ut de posteriori, qui in verbis coniunctis cernitur, nunc dicamus. Hic autem praecipue constat figuris, compositione, & variis dicendi formis, ad rerum dignitatem accommodatis. De his igitur in reliqua huius libri parte tractandum est, a figuris, quae graece schemmata dicuntur, initium sumentes:

(a) Cap. 9. (b) Amos 6. (c) Lib. III. de doctrin. christ. cap. 7.
(d) Rom. 6. (e) Rom. 3.

tes : in quibus maxima ornatus & elegantiae pars sita est. His autem Demosthenes ita est usus , ut omnia fere , quae dicit , aliqua huiusmodi figura exornare curet. Quo nomine multi putant , ut auctor est Cicero , eloquentiam eius maxime esse mirabilem.

Principio igitur figurae definitio ac divisio tradenda est. Figura autem , ut rhetores definiunt, (a) est conformatio quaedam orationis , remota a communi , & primum se offerente ratione , qua rectus sermo in alium cum virtute mutatur. Vt hoc autem rudi , quod aiunt , Minerva explicemus , sciendum est , quod quemadmodum eidem corpori vestimenta plura aptari possunt , quorum alia ad venustatem , alia ad gravitatem , alia ad luctum & maestitiam , alia ad humilitatem & sanctitatem accommodantur : ita eadem sententia diversis potest figuris & formis explicari , & quodam modo vestiri : quorum aliae venustatem , aliae gravitatem , aliae vim & acrimoniam prae se ferant. Eruditi autem artificis est , eam figuram & velut habitum eligere , qui vel sententiae enuntiandae , vel proposito nostro maxime quadret.

Subiiciamus huius rei exempla. Simplici & recta oratione Apostolus dicere poterat : si quis infirmatur , & ego infirmor : si scandalizatur , & ego uror. Sed ab hac simplici , & primum se offerente ratione discedens , multo acrius & elegantius per interrogationis figuram dixit : (b) quis infirmatur , & ego non infirmor ? Quis scandalizatur , & ego non uror ? Simili quoque ratione dicere poterat : nulla res poterit nos a caritate Christi separare , &c. At quanto vehementius & elegantius est : (c) quis non separabit a caritate Christi ? Tribulatio , an angustia , an periculum ? &c. Item simplici oratione dicere poterat : non possunt homines Deum invocare , de quo nihil audierunt : neque audire , nisi illis annuntietur : neque quis annuntiare poterit , nisi a Deo mittatur. At multo elegantius ait : (d) quo modo invocabunt , in quem non crediderunt ? Aut quo modo credent ei,

(a) *Apud Quintil. lib. VIII. cap. 1.* (b) *2. Cor. 11.* (c) *Rom. 8.*
 (d) *Rom. 10.*

ei, quem non audierunt? Quo modo autem audient sine praedicante? Quo modo vero praedicabunt, nisi mittantur? Hic enim multae simul eloquutionis virtutes coeunt. Est enim repetitio, & interrogatio, & gradatio, & membra item orationis ex pari fere numero syllabarum.

Potuisset etiam D. Gregorius simpliciter dicere: mirum est, peccatricem mulierem ad Dominum venire: & mirum item, eandem ab eo misericorditer trahi, & benigne recipi. Sed quanto elegantius est, hanc sententiam figurata oratione ad hunc modum explicari? (a) Quid igitur miramur, fratres, Mariam venientem, an Dominum susipientem? Susipientem dicam, an trahentem? dicam melius, & trahentem, & susipientem. Ad hunc modum Sedulius, quum dicere potuisset: vehementer nobis prima illa femina & antiquus serpens nocuerunt: multo ornatius atque vehementius dixit: (b)

..... *heu noxia coniux!*

Noxia tu coniux magis, an draco perfidus ille?

Perfidus ille draco, sed tu quoque noxia coniux.

Item simpliciter dicere solemus: virtutis comes invidia est, quae viros bonos plerumque infectatur: acrius tamen per exclamationem dicitur: o virtutis comes invidia, quae bonos plerumque insequeris, atque adeo infectaris! His exemplis, ut arbitror, facile figurae definitio, & eius item usus percipi potest.

Definitionem sequitur divisio. Sunt enim duplices figurae, aliae verborum, aliae sententiarum. Verborum sunt, quae venusta & concinna eorundem verborum colloctione constant: qua sublata, mutatur & tollitur figura. Sententiarum vero sunt, quae non in verbis, sed in rebus ipsis sunt positae: ut quum vel exclamamus, vel interrogamus, vel obsecramus, vel dubitare nos aliquid dicimus, vel etiam optamus. Descriptiones quoque rerum & personarum, hoc est, sermocinationes, notationes, sententiae & epiphonemata, de quibus ante diximus, & multae item aliae inter sententiarum figuras numerantur.

Quum autem verborum figurae ornatum & elegantiam orationi concilient, unde hic ornatus originem ducat, dili-

li-

(a) *Homil. 33. in Evang.* (b) *Carm. Pasch. lib. II. v. 6.*

ligenter animadvertendum est. Huius enim rei cognitio plurimum ad earum usum conducet. Sciendum est igitur, rerum omnium decorem & pulchritudinem, quae vel sensibus, vel intellectu percipitur, proportionem quadam & concinnitate partium, sibi invicem apte consentientium, praecipue constare. Vnde sapientissimus ille rerum omnium architectus, qui pulcherrima omnia facere voluit, in numero, pondere & mensura perfecit, ipsumque inter cetera hominem ea natura condidit, ut numeris, & apta rerum concinnitate maxime caperetur. Hac enim de causa & pulchritudo oculos oblectat, & vocum concentus, suis numeris dimensus, aures recreat, & poetarum carmina, quae numerorum legibus eleganter adstricta sunt, voluptate nos afficiunt. Quo minus mirandum est, si ornatus, qui in verborum figuris est positus, in quadam apta & concinna verborum collocatione & proportionem constitutus sit. Quid autem proportionis huius nomine intelligam, liceat enim hac voce uti, proposita exempla facile declarabunt.

Sumamus illam Eusebii Emissemi sententiam: ferina immanitas est, Deum aestimare minorem, quia maiora contulit; ut ideo a te minus accipiat honoris, quia plus contulit dignitatis. Hic aperte vides proportionem inter contraria, & similiter cadentia verba. Idem Eusebius, locum illum explanans, (a) parvulus natus est nobis, & filius datus est nobis, sic ait: natus est nobis, qui sibi erat. Datus est ergo ex divinitate, natus ex Virgine. Natus, qui sentiret occasum; datus, qui nesciret exordium. Natus, qui & matre esset iunior; datus, quo nec pater esset antiquior. Natus, qui moreretur; datus, ex quo vita nasceretur. Ac sic qui erat, datus est; qui non erat, natus est. Illic dominatur, hic humiliatur. Sibi regnat, & mihi militat. Idem etiam, de corporum resurrectione disputans, sic ait: ipsa caro honoratur praemiis, quae est probata suppliciis: ipsa in muneribus gaudebit, quae in doloribus triumphavit: quae ideo tolerabiliter doluit se afflictam, quia fideliter credidit reformandam. In his omnibus quis non videt

R

nu-

(a) *Isai. 9.*

numerum & proportionem similium, dissimilium, & contrariorum sibi invicem respondentium? Quin & in ecclesiasticis quoque antiphonis & versiculis interdum idem numerus atque proportio reperitur; quale est illud in laudibus D. Martini: o virum ineffabilem, nec labore victum, nec morte vincendum; qui nec mori timuit, nec vivere recusavit! Hic apparet, quo modo sibi respondeant, laborem & mortem, victum & vincendum, mori & vivere, timere & recusare. Est autem in his omnibus exemplis oratio colis & commatis ubique rotunda: de quibus suo loco dicemus.

Quia vero D. Augustinus, ut ceteros quoque patres omittam, hoc loquendi genere maxime delectatus est; libet non nulla eius exempla referre, quae Prosper Aquitanus adnotavit atque collegit, quae hanc praeceptionem maxime illustrabunt: ut omittam interim, quod eadem ipsa, citra hanc commoditatem, non indigna sunt, quae legantur. Sic igitur ait: (a) lex data est, ut gratia quaereretur; gratia data est, ut lex impleretur: neque enim vitio suo non implebatur, sed vitio prudentiae carnis. Quod vitium per legem demonstrandum, per gratiam sanandum fuit. Idem: (b) divina bonitas ideo maxime irascitur in hoc saeculo, ne irascatur in futuro: & misericorditer temporalem adhibet severitatem, ne aeternam iuste inferat ultionem. Idem: (c) vera confessio est benedictis, quum idem sonus est & oris, & cordis. Bene autem loqui, & male vivere, nihil aliud est, quam sua se voce damnare. Idem: (d) hoc affectu, & desiderio colendus est Deus, ut sui cultus ipse sit merces. Nam qui Deum ideo colit, ut aliud magis, quam ipsum, promereatur, non Deum colit, sed illud, quod assequi concupiscit.

Idem: (e) iniquus puniri se ignorat, nisi quum manifestum supplicio senserit nolens, quantum mali sit, quod perpetravit volens. Idem: (f) mala mors putanda non est, quam bona vita praecesserit. Non enim facit malam mortem,

(a) *Sent.* 44. (b) *Sent.* 5. (c) *Sent.* 6. (d) *Sent.* 20.
(e) *Sent.* 47. (f) *Sent.* 50.

tem, nisi quod sequitur mortem. Non itaque multum curandum necessario morituris, quid accadat, ut moriantur, sed moriendo quo ire cogantur. Idem: (a) iustis quidquid malorum ab iniquis dominis irrogatur, non poena est criminis, sed virtutis examen. Nam bonus, etiamsi seruiat, liber est: malus autem, etsi regnet, servus est: nec unius hominis, sed, quod gravius, tot dominorum, quot vitiorum. Idem: (b) diabolus superbus hominem superbientem perduxit ad mortem: Christus humilis hominem obedientem reduxit ad vitam. Quia sicut ille elatus cecidit, & deiecit consentientem: sic iste humiliatus surrexit, & erexit credentem. Idem: (c) in rebus spiritualibus quum minor maiori adhaeret, sicut creatori creatura, illa fit maior, quam erat, non ille: & hoc est maius esse, quod est melius esse: quia adhaerens creatura creatori, non mole auctior, sed virtute fit maior. Idem: (d) omnes beati habent, quod volunt... Miseri autem sunt, qui vel non habent, quod volunt, vel id habent, quod non recte volunt. Propior est ergo beatitudini voluntas recta, etiam non adepta quod cupit, quam prava, etiamsi, quod cupit, obtinuit. Idem: (e) qui laudat Deum in miraculis beneficiorum, laudet & in terroribus ultionum. Nam & blanditur, & minatur. Si non blandiretur, nulla esset exhortatio: si non minaretur, nulla esset correctio. Hactenus ille.

In his autem omnibus locis vel negligenter etiam attendentibus proportionis concinnitas satis apparet, quae singula verba singulis verbis contraponuntur, sibi quoque mutuo respondent. Sed huiusmodi exemplorum nusquam non maxima copia, & passim obvia, ut merito accusari possim, quod rem adeo perspicuam tot exemplis oneraverim. Verum hoc feci, ut ostenderem, hanc decoris & venustatis partem, quae in verborum figuris cernitur, ex eo fonte manare, unde omnis aliarum rerum pulchritudo, quae vel arte vel natura constant, manare solet: simul ut hac

R 2

ra-

(a) *Sent.* 53. (b) *Sent.* 59. (c) *Sent.* 60. (d) *Sent.* 62.
(e) *Sent.* 70.

ratione admonerentur, qui eleganter dicere volunt, ut ad hanc dicendi formam ea revocare studeant, quorum natura huius decoris capax est. Haec enim orationis gratia sequi rerum naturam debet, non affectari. Et tunc etiam parcus hoc loquendi genere utendum est, quum in veritate dicemus; quo affectationis vitium, omnium aliorum pessimum, fugiamus: utpote quod fidem dicenti adimat.

Hoc enim loquendi genere venerandi PP. Augustinus, Eusebius Emisenus, Petrus Ravenas, D. Bernardus, ita delectati sunt, ut vix alio eloquutionis genere frequentius utantur. D. vero Gregorius omnes fere sententias his numeris adstringit. Quam rem adeo venuste Petrus Ravenas agit, ut hac potissimum ratione Chrysologi nomen invenerit. Quamvis autem rhetores hac loquendi figura parcus utendum esse praecipiant, quod ea plus habeat iucunditatis & suavitatis, quam gavitatis; hi tamen, quos supra memoravi, patres, ut eorum scripta monstrant, frequentissime ea usi sunt.

Sed ut ad id, cuius gratia haec a me inducta sunt, veniam, sciendum est, plerasque verborum figuras ex hoc proportionis fonte manare. Est enim, quod ad praesens attinet institutum, triplex proportionis genus: nempe, eiusdem verbi ad idem verbum certo ordine & numero sibi respondens, aut similis ad simile, aut contrarii ad contrarium, quacumque ratione contrarium sit. Varia siquidem contrariorum genera a dialecticis numerantur. Ex hoc ergo triplici proportionum genere tres veluti classes figurarum oriuntur, quae in verbis positae sunt: de quibus ubi mox dixerimus, non nullas alias, partim similes, partim contrarias, adiiciemus. Vtrumque enim ad eundem ordinem atque tractationem pertinet.

*PRIMA CLASSIS DE FIGVRIS VERBORVM, QVAE
eiusdem verbi repetitione constant.*

EX prima igitur classe, ubi idem verbum eleganter repetitur, primum locum tenet repetitio: quae est, quum continenter ab uno atque eodem verbo in rebus similibus & diversis principia sumuntur. Sic D. Cyprianus: si, inquit, filii Dei sumus, si templa eius esse iam coepimus, si accepto Spiritu sancto, sancte & spiritualiter vivimus, si de terris oculos ad caelum sustulimus, si ad superna & divina plenum Deo & Christo pectus ereximus, non, nisi quae sunt Deo & Christo digna, faciamus. Idemque rursus contra quosdam Christi confessores paulo licentius agentes, sub unius nomine, sic invehitur: confessor est, sed post confessionem periculum maius est; quia plus adversarius provocatus est. Confessor est, hoc magis stare debet cum Domini evangelio, per evangelium gloriam consequutus a Domino. Confessor est, sit humilis & quietus, sit in actu suo cum disciplina modestus; ut qui Christi confessor dicitur, Christum, quem confitetur, imitetur. Confessor est Christi, sed si non postea blasphemetur maiestas & dignitas Christi. Lingua Christum confessa non sit maledica, non sit turbulenta, non conviciis & litibus perstrepsens audiat. Ceterum si culpabilis & detestabilis postmodum fuerit, si confessionem suam mala conversatione prodiderit, si vitam suam turpi foeditate maculaverit, si Ecclesiam denique, ubi confessor factus est, derelinquens, & unitatis concordiam scindens, fidem primam perfidia posteriore mutaverit, blandiri sibi per confessionem non potest. Et cetera. Haecenus Cyprianus.

CONVERSIO.

Conversio est, per quam non, ut ante, primum repetimus verbum, sed ad postremum continenter rever-

timur. Cyprianus: Deus videri non potest, visu clarior est: nec comprehendi, tactu purior est: nec aestimari, sensu maior est. Et ideo sic Deum digne aestimamus, dum inae-
stimabilem dicimus. Idem: quisque ille est, quem zelo per-
sequeris, subterfugere & vitare te poterit: tu te fugere
non potes; ubicumque fugeris, adversarius tuus tecum est,
hostis semper in pectore tuo est, perniciēs intus inclusa est,
ineluctabili catenarum nexu ligatus & vinctus es, zelo do-
minante captivus es, nec solatia tibi ulla subveniunt. Ta-
le est illud Apostoli: (a) Hebraei sunt, & ego: Israëlitaē
sunt, & ego. Semen Abrahæ sunt, & ego: ministri Chri-
sti sunt, ut minus sapiens dico, plus ego. Sic etiam Sene-
ca: (b) hoc est, inquit, Alexandri crimen æternum, quod
nulla virtus, nulla bellorum felicitas redimet. Nam quo-
ties quis dixerit, occidit Persarum multa millia; oppone-
tur, & Callisthenem. Quoties dictum erit, occidit Da-
rium, penes quem tunc magnum regnum erat; opponetur,
& Callisthenem. Quoties dictum erit, omnia oceano tenus
vicit, ipsum quoque tentavit novis classibus, & imperium
ex angulo Thraciæ usque ad orientis terminos protulit;
dicetur, sed Callisthenem occidit. Omnia licet antiqua
ducum regumque exempla transierit, ex his, quæ facit,
nihil tam magnum erit, quam scelus Callisthenis.

COMPLEXIO.

Complexio est, quæ utramque complectitur exorna-
tionem, & hanc, & quam ante posuimus; ut & re-
petatur idem primum verbum sæpius, & crebro ad idem
postremum revertamur. Cyprianus: solus non est, cui
Christus in fuga comes est. Solus non est, qui, templum
Dei servans, ubicumque fuerit, sine Deo non est. Sed hæc
brevis complexio est. Potest autem esse multo longior. Cu-
ius rei exemplum non verebor ex sanctissimo Bonaventura
afferre: cuius oratio, quamvis non adeo leniter fluat,
sententiarum tamen pondere non minus grata sanis inge-
niis.

(a) 2. Corinth. 11. (b) Nat. quæst. lib. VI. cap. 23.

nlis esse debet, quam quae elegantia & nitore sermonis exornata est. Is igitur precandi studium hoc genere exor-
nationis commendat his verbis : si vis patienter tolerare
adversa, vaca orationi. Si vis tentationes & tribulatio-
nes superare, vaca orationi. Si vis pravas affectiones con-
culcare, vaca orationi. Si vis astutias satanae cognosce-
re, ac eius fallacias vitare, vaca orationi. Si vis laetanter
vivere in opere Dei, & per laboris & afflictionis viam in-
cedere, vaca orationi. Si vis spiritali in vita te exercere,
& carnis curam non agere in desideriis, vaca orationi. Si
vis vanas cogitationum muscas effugare, vaca orationi.
Si vis animam tuam sanctis cogitationibus & desideriis
impinguare, vaca orationi. Si vis cor tuum virili spiritu,
& constanti proposito in Dei beneplacito stabilire, vaca
orationi. Denique, si vis vitia extirpare, & virtutibus or-
nari, vaca orationi. In ea enim recipitur sancti Spiritus un-
ctio, quae de omnibus mentem docet. Hac eadem figura
D. Gregorius utitur, hoc modo : (a) considero, inquit,
patres novi & veteris testamenti, David, Danielem,
Amos, Petrum, Paullum, & Matthaeum, & apertis ocu-
lis fidei intueor. Implet namque Spiritus sanctus puerum
citharoedum, & psalmistam facit : implet abstinentem pue-
rum, & iudicem senum facit : implet pastorem armenta-
rium, & prophetam facit : implet piscatorem, & princi-
pem apostolorum facit : implet persecutorem, & docto-
rem gentium facit : implet publicanum, & evangeli-
stam facit. Quam ergo insani sumus, qui hunc Spiri-
tum non quaerimus ? Hic videre licet eadem esse verborum
initia, eisdemque fines.

T R A D U C T I O .

TRaductio est, quae facit, ut quum idem verbum cre-
brius ponatur, non modo non offendat animum, sed
etiam concinniore orationem reddat, hoc pacto : qui ni-
hil habet in vita iucundius vita, is cum virtute vitam

R 4

non

(a) *Homil. 30. in Evang.*

non potest colere. Item : eum tu hominem appellas , qui , si fuisset homo , numquam tam crudeliter vitam hominis petiisset. At erat inimicus : ergo inimicum sic ulcisci voluit , ut ipse sibi reperiretur inimicus. Item : divitias sine divitum esse , tu vero virtutem praefer divitiis. Nam si voles divitias cum virtute comparare , vix satis idoneae tibi videbuntur divitiae , quae virtutis pedissequae sunt. Repetuntur autem eadem nomina. Primum quidem in diversis casibus , quale est illud : (a)

Litora litoribus contraria , fluctibus undas

Imprecor , arma armis : pugnent ipsique nepotes.

Eleganter etiam Ioannes Picus Mirandulanus , cum Deo loquens , sic ait:

Namque tua est nostris maior clementia culpis.

Et dare non dignis res magis digna Deo est.

Quamquam sat digni , si quos dignatur amare,

Qui , quos non dignos invenit , ipse facit.

Hoc autem *polyptoton* Graeci vocant.

Huc etiam pertinet *epanalepsis* : hoc est , a postremo ad primum verbum regressio. Quale est illud : (a)

Multa super Priamo rogitans , super Hectore multa.

Item illud Ciceronis in Verrem : multi & graves dolores inventi parentibus , & propinquis multi. Quod etiam fit , sententia aliqua interiecta , hoc modo : bona , miserum me ! consumtis enim lacrimis , tamen animo infixus haeret dolor , bona , inquam , Cn. Pompeii acerbissimae vocis subiecta praeconis.

Finitima huic quoque est *anadiplosis* , quae idem verbum in fine praecedentis , & initio sequentis orationis repetit. Quale est illud : (b)

Vrbs Etrusca solo. Sequitur pulcherrimus Astur,

Astur equo fidens , & versicoloribus armis.

Sic etiam Cicero contra Catilinam : (c) o tempora , o mores ! Senatus hoc intelligit , consul videt , hic tamen vivit : vivit ? immo vero etiam in Senatum venit , &c. Et oratio quoque hoc modo iteratur. Quale est illud Sedulii , de

(a) Virgil. *Aeneid.* lib. III. v. 628. (b) *Aeneid.* lib. X. v. 180.

(c) *Orat.* I. cap. 1.

de prima femina loquentis : (a)

..... *heu noxia coniux.*

Noxia tu coniux magis , an draco perfidus ille ?

Perfidus ille draco , sed tu quoque noxia coniux.

Simile est & illud Ioannis Pici Mirandulani:

Sed premit heu miseros tantae indulgentiae sortis,

Quos fecit natos gratia , culpa reos.

Culpa reos facit , sed vincat gratia culpam:

Et tuus in nostro crimine crescat honor.

Est etiam affinis huic epizeusis, latine conduplicatio, quae vel idem verbum, vel eandem sententiam conduplicat. Idem verbum, quale est illud: tu tu faces illas incendiisti. Et : (b)

Me , me : adsum , qui feci : in me convertite ferrum.

Et Cicero contra Catilinam: vivis , & vivis , non ad deponendam , sed ad confirmandam audaciam. In oratione vero hoc modo : (c) commotus non es ? quum tibi mater pedes amplexaretur , commotus non es ? Item : nunc etiam audes in horum conspectum venire , proditor patriae ; proditor , inquam , patriae , venire audes in horum conspectum ? Vehementer auditorem commovet eiusdem redintegratio verbi , & vulnus maius efficit , quasi aliquod telum saepius perveniat in eandem partem corporis.

GRADATIO.

GRadatio quoque ab hoc repetitionis fonte manat, quae quamdam verborum catenam efficit : estque & ad docendum , & ad delectandum quum primis accommodata. D. Cyprianus , sermone de livore : zelare , inquit, quod bonum videas , & invidere melioribus , leve apud quosdam crimen videtur : dumque existimatur leve , non timetur : dum non timetur , contemnitur : dum contemnitur , non facile vitatur. D. item Gregorius : considerandum est , ad culmen quisque regiminis qualiter veniat , & ad hoc rite perveniens , qualiter vivat , & bene vivens qualiter doceat , & recte docens , infirmitatem suam quoti-

(a) *Carm. Pasch. lib. II. v. 6.* (b) *AEntid. lib. VIII. v. 427.* (c) *Cicero ad Heren. lib. III.*

tidie quanta consideratione cognoscat. Et Apostolus: (a) tribulatio, inquit, patientiam operatur, patientia probationem, probatio vero spem, spes autem non confundit. Et iterum: (b) quos, inquit, praescivit & praedestinavit, hos & vocavit: & quos vocavit, illos & iustificavit, &c. Et in eodem capite per interrogationem & repetitionem venustissime ait: quo modo invocabunt, in quem non crediderunt? Quo modo vero credent ei, quem non audierunt? &c. Item: non sensi haec, & non suasi; neque suasi, & non ipse statim facere coepi; neque facere coepi, & non perfecti; neque perfecti, & non probavi. In hoc autem novissimo exemplo, non decus modo, sed vis etiam & acrimonia inest. Haftenus de figuris, quae eiusdem verbi repetitione constant.

In his autem figuris non inopia fit, ut ad idem verbum reddatur saepius, sed inest festivitas quaedam, quae facilius auribus diiudicari, quam verbis demonstrari, potest. Huic autem virtuti, sicut omnibus aliis, suum quoque vitium finitimum est, quod *tautologiam* appellant, hoc est, eiusdem verbi vitiosam repetitionem, quae non decoris gratia, sed inopia verborum fit, quae etiam aurium iudicio diiudicatur, qualis est illa: nam cuius rationis oratio non exstet, ei rationi ratio non est fidem adhibere.

CAP. IX.

SECUNDA CLASSIS DE FIGVRIS, QVAE verborum similitudine constant.

SECUNDI vero ordinis figurae, quae proportionem verborum similium, sibi invicem respondentium, constant, quattuor praecipue numerantur, nempe compar, similiter cadens, similiter desinens, & agnominatio.

Compar, quod graece *isocolon* dicitur, est quod habet in se membra, quae constant ex pari fere numero syllabarum. Hoc non de enumeratione nostra fiet: nam id
qui-

(a) Rom. 5. (b) Rom. 8.

quidem puerile est, sed tantum affert usus & exercitatio facultatis, ut animi quodam sensu par membrorum superiori referre possimus. Cyprianus: mundus ipse occasum sui, rerum labentium probatione, testatur: non hieme nutriendis seminibus tanta imbrium copia est, non frugibus aestate torrendis solita flagrantia est, nec sic verna de temperie sata laeta sunt, nec adeo arboreis fetibus autumnus secunda sunt. Sed huiusmodi exemplorum nusquam non magna copia est.

SIMILITER CADENS, SIMILITER DESINENS.

Similiter cadens exornatio dicitur, quum in eadem constructione verborum duo aut plura sunt verba, quae similiter iisdem casibus efferuntur. At similiter desinens est, quum, tametsi casus non insunt in verbis, tamen similes exitus sunt. Vtriusque rei exemplum patet his D. Cypriani adversus Demetrianum verbis: certe & labor irritus, & nullus effectus, offerre lumen caeco, sermonem surdo, sapientiam bruto: quum nec sentire brutus possit, nec caecus lumen admittere, nec surdus audire. In hoc autem genere pulcherrima & iucundissima sunt illa, in quibus non extrema tantum, sed media quoque varie & multipliciter sibi respondent. In quibus quanta sit varietas, exempla declarabunt. Cyprianus ad Donatum, accipe, inquit, non diserta, sed fortia: nec ad audientiae popularis illecebram culto sermone fucata, sed ad divinam indulgentiam praedicandam rudi veritate simplicia. Accipe quod sentitur, ante quam discitur: nec per moras temporum longa agnitione colligitur, sed compendio gratiae maturantis hauritur. Idem contra Demetrianum: qui ad malum motus est, mendacio fallente, multo magis ad bonum movebitur, veritate cogente. Longior quidem illa, sed non minus ornata D. Augustini sententia, qua nativitatis & mortis diem in beato martyre comparans, sic ait: illo die ex fastidioso matris utero in hanc lucem processit, quae oculos carnis illecebrat: isto autem die ex profundissimo
car-

carcere in illam lucem discessit, quae visum mentis illustrat. Ad pretiosam mortem iuste vivendo venit : ad gloriosam vero vitam iniuste moriendo perrexit.

AGNOMINATIO.

Agnominatio est verborum similitudo, in dissimili tamen sententia. Quale est illud Cypriani de habitu virginum : capilli tibi non sunt, quos Deus fecit, sed quos diabolus infecit. Idem, sermone de mortalitate, defunctos fratres non esse lugendos, quum sciamus, non eos amitti, sed praemitti. Tale est illud Fabii : (a) nihil putamus esse perfectum, nisi ubi natura cura iuvatur. Est autem D. Bernardus ut frequentissimus, ita etiam festivissimus in hac figura ; quale est illud eiusdem : benigna caritas affluit, non defluit. Item, futuram hominis gloriam daemon vidit & invidit. Et, Cain munera Deus non respicit, quia illum despicit. Et, magna superbia est uti datis, quasi innatis. Sic multa alia apud eundem.

CAP. X.

TERTIA CLASSIS EX FIGURIS VERBORVM, quae contrariis nominibus aut rebus constant.

Tertius figurarum ordo, contrariorum proportionem constat : in quibus tantum inest leporis & gratiae, ut quocumque fere modo contraria copulentur, ornamentum plurimum orationi afferant ; neque iucundam modo, sed acrem interdum efficiant. Tale est illud in Catilinam : vicit pudorem libido, timorem audacia, rationem amentia. Nec minorem vim & acrimoniam habet illud Cypriani in epistola ad Cornelium contra Novatianos. Sic enim ait : an ad hoc, frater carissime, deponenda est Ecclesiae catholicae dignitas, & sacerdotalis auctoritas ac potestas, ut iudicare velle se dicant de Ecclesiae praeposito extra

Fr-

(a) *Instit. orat. lib. XI. cap. 3.*

Ecclesiam constituti , de christiano haeretici , de sano saucii , de integro vulnerati , de stante lapsi , de iudice rei , de sacerdote sacrilegi ? Haecenus ille. Nec minori acrimonia Isaïas adversus superbum atque lascivum feminarum ornatum ait : (a) & erit pro suavi odore foetor , pro zona funiculus , pro crispante crine calvitium , & pro fascia pectorali cilicium.

Sed quoniam haec figura ornatissima est , pluribus a nobis exemplis illustranda erit , ut hac ratione multiplex eius usus intelligi possit. Cyprianus , gratulandum est , inquit , quum improbi de Ecclesia separantur , ne columbas , ne oves Christi saeva sua & venenata contagione praedentur. Cohærere & coniungi non potest amaritudo cum dulcedine , caligo cum lumine , pluvia cum serenitate , pugna cum pace , cum fecunditate sterilitas , cum fontibus siccitas , cum tranquillitate tempestas. Idem : quemadmodum satanas transfigurat se , velut in angelum lucis ; ita ministros suos subornat , velut ministros iustitiae , asserentes noctem pro die , interitum pro salute , desperationem sub obtentu spei , perfidiam sub praetextu fidei , Antichristum sub vocabulo Christi ; ut , dum verisimilia mentiuntur , veritatem subtilitate frustrentur. Idem sermone de eleemosyna : Dei filius , hominis filius esse voluit , ut nos filios Dei faceret. Humiliavit se , ut populum , qui prius iacebat , erigeret. Vulneratus est , ut vulnera nostra sanaret. Servivit , ut ad libertatem servientes extraheret. Mori sustinuit , ut moriens immortalitatem mortalibus exhiberet.

Idem etiam sermone de patientia , de admiranda Domini Salvatoris patientia sic ait : sub ipsa autem passionis hora , quae conviciorum probra , quae contumeliarum tolerata ludibria ? ut insultantium sputamina patienter exciperet , qui sputo suo caeci oculos paullo ante formaverat : & cuius in nomine nunc a servis eius Zabulus cum angelis suis flagellatur , flagella ipsa pateretur : coronaretur spinis , qui martyres floribus coronat aeternis : palmis in

fa.

(a) Cap. 3.

faciem verberaretur, qui palmas vincentibus tribuit: spoliaretur veste terrena, qui indumento immortalitatis ceteros vestit: cibaretur felle, qui cibum caelestem dedit: potaretur aceto, qui poculum salutare propinavit. Hac eadem figura Apostolus usus est, quum ait: (a) maledicimur, & benedicimus: persecutionem patimur, & sustinemus: blasphemamur, & obsecramus. Dei quoque Filius apud Isaiam (b) in hoc se a patre missum esse testatur, ut lugentibus daret coronam pro cinere, oleum gaudii pro luctu, pallium laudis pro spiritu maeroris.

Est etiam pulcherrimum illud contrariorum genus, quo D. Basilius in laudem martyrum utitur his verbis: pericula non respicit martyr, coronas respicit: plagas non horret, sed praemia numerat: non videt lictores inferne flagellantes, sed angelos superne laetos hominibus acclamantes: non spectat ad temporalia pericula, sed ad praemiorum aeternitatem.

C O H A B I T A T I O .

EST etiam cohabitatio, qua contraria in eadem re, vel personae simul coniunguntur: quod fieri posse sub diversis rationibus, dialectici concedunt. Sic Lactantius de phoenice, post mortem exsurgente, ait:

*Ipsa quidem, sed non eadem, quia & ipsa, nec ipsa est,
Aeternam vitam mortis adepta bono.*

Tale est illud Herennianae rhetoricae: ades, abesse vis: abes, reverti cupis. In pace bellum quaeritas, in bello pacem desideras. Sic D. Gregorius, dedignantur, inquit, iusti, sed non dedignantes; desperant, sed non desperantes; persecutionem commovent, sed amantes.

P A R A D I A S T O L E .

HVic contraria est paradiastole. Sicut enim illic contraria copulantur, ita hic simillima discernuntur. Hac

(a) 1. Corintb. 4. (b) Isai. 62.

Hac elegantissima figura elegantissime Apostolus usus est, quum ait : (a) in omnibus tribulationem patimur , sed non angustiamur : aporiamur , sed non destituimur : persecutionem patimur , sed non relinquimur : humiliamur , sed non confundimur : deicimur , sed non perimus. Sic D. Cyprianus similia hoc modo disiungit : aliud est , inquit , martyrio animum deesse , aliud animo defuisse martyrium. Sic etiam Seneca , de homine deside & otioso loquens : non , inquit , diu vixit , sed diu fuit. Idem : pergitur , inquit , non quo eumdum est , sed quo itur : nec ad rationem , sed ad similitudinem vivimus. Et dum unusquisque mavult credere , quam iudicare , numquam de vita iudicatur , semper creditur. Et iterum : quaeramus quid optimum factu sit , non quid usitatissimum. Idemque : opes , inquit , meas fortuna abstulit , non avulsit. Item D. Augustinus , (b) sic diligendi sunt homines , ut eorum non diligantur errores : quia aliud est amare , quod facti sunt ; aliud odisse , quod faciunt.

Item D. Cyprianus : (c) nos autem , fratres carissimi , qui philosophi non verbis , sed factis sumus , nec vestitu sapientiam , sed veritate , praeferimus ; qui virtutum magis conscientiam , quam iactantiam , novimus ; qui non loquimur magna , sed vivimus : quasi servi & cultores Dei , patientiam , quam magisteriis caelestibus discimus , obsequiis spiritualibus praebeamus. Haecenus ille. In epistola vero , quam presbyter Romani ad eundem Cyprianum de lapsis miserunt , sic inter cetera scribunt : maxime illis congruit verecundia , quorum in delictis damnatur mens inverecunda. Pulsent sane fores , sed non utique confringant : adeant ad limen Ecclesiae , sed non utique ut transiliant : castrorum caelestium excubent portis , sed armati modestia , qua intelligant , se desertores fuisse : resumant precum suarum tubam , sed qua non bellicum clangant. In his exemplis aperte liquet , quae similia videntur , ratione disiungi , & quantum inter se differant , explicari.

CON-

(a) 2. Corinth. 4. (b) Tom. III. in fin. Sent. 2. (c) Cyprian. Serm. de patient.

Est etiam contrarium in sententiis, quod dialectici inter ea argumenta, quae a contrariis ducuntur, referunt. Quia tamen hoc genus argumentationis ceteris ornatus est, inter exornationes collocatur. Tale est illud: nam qui suis rationibus inimicus fuerit semper, eum quo modo alienis rebus amicum fore speres? Item, nam quem in amicitia perfidiosum esse cognoveris, eum quare putas inimicitias cum fide habere posse? Ad hoc etiam genus contrarii argumenta ab imparibus, hoc est, a maiori & minori, referuntur hoc modo: quos ex collibus deiecimus, cum iis in campo metuimus dimicare? Qui, quum plures erant, paucis nobis exaequari non poterant; hi, postquam pauciores sunt, metuimus, ne sint superiores?

CONTENTIO.

Hic autem figurae finitima est contentio: quae non tam ex contrariis, quam ex imparium circumstantiarum comparatione constat: quae quidem, sicut & praecedens, magis ad sententiarum, quam ad verborum, figuras pertinet. Quia tamen contrarii speciem habet, his eam adnectere, docendi gratia, voluimus. Ea vero frequentissime utimur, quum, proposita similitudine, aut exemplo, quo aliquid vel probare volumus, vel amplificare, utriusque rei circumstantias excutimus, ut ostendamus, id, quod intendimus, aut par, aut minus, aut maius esse. Sic Cicero pro lege Manilia: (a) maiores, inquit, vestri saepe, mercatoribus ac naviculatoribus iniuriosius tractatis, bella gesserunt: vos, tot civium Romanorum millibus, uno nuntio, atque uno tempore necatis, quo tandem animo esse debetis? Legati, quod erant appellati superbius, Corinthum patres vestri, totius Graeciae lumen, extinctum esse voluerunt: vos eum regem inultum esse patiimini, qui legatum populi Romani, consularem, vinculis ac verberibus,

(a) Cap. 5,

bus, atque omni supplicio excruciatum, necavit? Illi libertatem civium Romanorum immunitam non tulerunt, vos vitam ereptam negligetis? Ius legationis, verbo violatum, illi persequuti sunt: vos legatum Pop. Rom. omni supplicio interfectum, inultum relinqueris? Subiecit deinde conclusionem his verbis: videte, ne ut illis pulcherrimum fuit, tantam vobis imperii gloriam relinquere, sic vobis turpissimum sit, illud, quod accepistis, tueri & conservare non posse. Verum de hac contentione paullo fusius, quum de exemplorum tractatione agendum erit, differemus.

C O M M U T A T I O .

AD hoc genus contrariorum pertinet commutatio, quae Graece dicitur *antimetabole*. Ea vero est, quum duae sententiae, inter se discrepantes, ex transiectione ita efferuntur, ut a priori posterior, contraria a priori proficiscatur, hoc modo: esse oportet, ut vivas; non vivere, ut edas. Item; ea re poemata non facio, quia, cuiusmodi volo, non possum; cuiusmodi possum, nolo. Item: quae de illo dicuntur, dici non possunt; quae dici possunt, non dicuntur. Item: si poema, loquens pictura est; pictura, tacitum poema debet esse. Item: quia stultus es, ea re taces; non tamen quia taces, ea re stultus es. Item in sacris litteris: nequaquam Dominus propter locum gentem elegit, sed propter gentem locum. Item Sedulius: (a)

..... nam sabbata propter

Condita sunt hominem, sed non homo sabbata propter.

(a) *Carm. lib. III.*

*QUARTA CLASSIS DE RELIQUIS VERBORUM
figuris.*

POST haec tria figurarum genera, quae proportionem quadam verborum, sibi invicem respondentium, constare diximus; superest quartum genus figurarum, in quibus non ita aperte haec proportio deprehenditur: quamvis non prorsus ea careat. Hoc enim praecipue figurae verborum a sententiarum figuris distant, quod in eis sic verba collocantur, ut quamdam proportionis imaginem prae se ferant, unde venustas omnis atque iucunditas orationis manat. Quo fit, ut huiusmodi verborum figurae ad delectandum plurimum conferant: quae res inter tria orationis officia numeratur.

ADIUNCTIO:

INter has ergo figuras prima est adiunctio, quae Graece *zeuma* dicitur: in qua unum ad verbum, quod primum, aut postremum collocatur, plures sententiae referuntur: quarum unaquaeque desideraret, si sola poneretur. Fit autem praeposito verbo, ad quod reliqua respiciant, hoc modo: vicit pudorem libido, timorem audacia, rationem amentia: aut proposito, quo plura clauduntur. Nec enim is es, Catilina, ut te aut pudor unquam a turpitudine, aut metus a periculo, aut ratio a furore revocaverit. Medium quoque potest esse, quod & prioribus, & sequentibus sufficiat: ut, formae dignitas aut morbo deflorescit, aut vetustate. Quia vero in his tribus locis verbum illud collocari potest, in principio videlicet, medio, & fine; tres zeumatis species Graeci fecerunt, nempe protozeuma, messozeuma, & hyperozeuma: quibus hanc differentiam significarent.

DIS-

DISIUNCTIO.

Hic contraria est disiunctio, qua unicuique orationis membro suum verbum apponitur, quum tamen unum aliquod toti orationi sufficere potuisset. Vt autem illa figura brevis, ita hac ornatius & elegantius dicimus. Sic D. Cyprianus contra Demetrianum: quid, inquit, cum terrenae carnis imbecillitate contendis? Cum animi vigore congregere, virtutem mentis infringe, fidem destrue, disceptatione, si potes, vince. Idem sermone de mortalitate: si avaritia prostrata est, exsurgit libido: si libido compressa est, succedit ambitio: si ambitio contempta est, ira exasperat. Item Cicero pro Archia, de studiis suis loquens, sic ait: (a) me autem quid pudeat, qui tot annos ita vivo, ut ab illis nullo me unquam tempore aut commodum, aut otium meum abstraxerit, aut voluptas avocaret, aut denique somnus retardaret. Et in eadem oratione: (b) Homerum Colophonii civem esse dicunt suum, Chii suum vindicant, Salaminii repetunt, Smyrnaei vero suum esse confirmant.

DISTRIBUTIO.

Distributio duplex est: altera in sententiis, quae inter sententiarum figuras reddetur: altera in verbis, quae est huius loci propria, & superiori, hoc est, adiunctioni, finitima, nisi quod est multo ornatior. Sed illa quidem plura verba idem significantia repetit, haec vero diversa sive verba, sive nomina rebus accommodatissima iungit. Quo in genere ut frequentissimus, ita elegantissimus est D. Cyprianus. Hinc in epistola ad Donatum, de pravae consuetudinis violentia loquens, sic ait: tenacibus semper illecebris necesse est, ut solebat, vinolentia invitet, inflet superbia, iracundia inflammet, rapacitas inquietet, crudelitas stimulet, ambitio delectet, libido praecipitet. Idem de habitu virginum: caelestis hominis imaginem virgines portant, stabiles in fide, humiles in timore, ad

S 2

omnem

(a) Cap. VI. (b) Cap. VIII.

omnem tolerantiam fortes, ad sustinendam iniuriam mites, ad faciendam misericordiam faciles, fraterna pace unanimis atque concordēs. Idem contra Demetrianum: qui alios, inquit, iudicas, aliquando esto & tibi iudex; conscientiae tuae latebras intueri ... Aut enim superbia inflatus es, aut avaritia rapax, aut iracundia saevus, aut alea prodigus, aut vinolentia temulentus, aut livore invidus, aut libidine incestus, aut crudelitate violentus: & miraris, in poenas generis humani iram Dei crescere, quum crescat quotidie, quod puniatur? Idem sermone de patientia, exemplo Domini, in ingratos etiam beneficia conferre suadet his verbis: videmus inseparabili aequalitate patientiae nocentibus & innoxis, religiosis & impiis ... Dei nutu tempora obsequi, elementa famulari, spirare ventos, fontes fluere, grandescere copias messium, fructus mitescere vinearum, exuberare pomis arbuta, nemora frondescere, prata florere.

INTERPRETATIO.

Pertinet etiam ad figuras verborum interpretatio, quam graeci *synonymiam* appellant: quum instandi, augendi, & interdum etiam apertius dicendi causa plura verba idem significantia congregantur. Sic D. Cyprianus sermone de lapsis: doleo, fratres, doleo vobiscum ... Cum singulis pectus meum copulo, maeroris & funeris pondera luctuosa participo. Cum plangentibus plango, cum deflentibus defleo, cum iacentibus iacere me credo. Iaculis illis grassantis inimici mea membra simul percussa sunt: saevientes gladii per mea viscera transierunt. Idem sermone de livore: si recesserunt de pectore tuo tenebrae, si nox inde discussa est, si caligo deterfa est, si illuminavit sensus tuos splendor diei, si homo lucis esse coepisti, quae sunt Christi, sequere: quia lux & dies Christus est. Quid in zeli tenebras rursus? quid te nubilo livoris involvis? quid invidiae caecitate omne pacis & caritatis lumen extinguis? Item Cicero: (a) quae quum ita sunt, Catilina, perge,

quo

(a) In Cat. I. cap. V.

quo coepisti: egredere aliquando ex urbe. Patent portae: proficiscere. Idem de eodem: (a) abiit, excessit, evasit, erupit.

Est etiam pulcherrima illa Hieronymi Vidae cum Deo in hymno loquentis interpretatio. (b)

*Sisque aliis metus, ut libet, ac formidinis horror.
At mihi blandus amor, mihi sis placidissimus ardor.
Noctes atque dies toto te pectore versem:
Te sine sit mihi dulce nihil, te prae omnibus optem,
Vnum depeream: totis hunc sensibus aestum
Implicitem: hunc imis exardens ossibus hauriam,
Hoc mihi solvantur flagrantes igne medullae:
Hos mihi mens unus semper suspiret amores.*

Verborum autem idem significantium copia, quae ad hanc figuram cum primis necessaria est, non modo synonymia, sed etiam tropis, ac praecipue metaphoris, & allegoriis paratur: quando, quod propriis verbis enuntiatum est, metaphoris significamus. Quale est illud Hieronymi Vidae cum Domino agentis: (c)

*Nam quamvis hominem admoneas, foveasque tegasque,
Quodlibet audendi est tamen omnibus aequa potestas,
Et nobis laxas nostri usque relinquis habenas.*

Hic postremus versiculus idem allegorice, aut metaphorice dicit, quod duobus praecedentibus propriis verbis enuntiaverat.

Neque verba modo, sed sensus quoque idem facientes acervantur, quale est illud: perturbatio istum mentis, & quaedam scelerum obfusa caligo, & ardentes furiarum faeces excitarunt.

Mixta quoque, & idem, & diversa significantia, hoc eodem modo coniunguntur. Cyprianus de habitu virginum: si tu te sumtuosius comas, & per publicum notabiliter incedas, oculos in te iuventutis illicias, suspiria adolescentum post te trahas, concupiscendi libidinem nutrias, peccandi fomenta succendas, ut etsi ipsa non pereas, a-

S 2

lios

(a) In Catilin. 11. cap. 1. (b) A vers. 512. (c) A vers. 617.

lios tamen perdas , & velut gladium te , & venenum videntibus praebeas ; excusari non potes , quasi mente casta sis , & pudica.

Hoc in loco monendus est concionator , ne pluribus verbis idem significantibus eandem sententiam oneret ; nisi vel augendae rei , vel alicuius obscurioris sententiae explicandae gratia , quae nisi hoc modo exprimi satis non potest. Quod quidam parum advertentes , plura verba idem pollentia temere congerunt : quae res dicenti fidem abrogat , propterea quod magnam ostentationis & affectationis significationem det.

CONGERIES , VEL SYNATHRISMVS.

Finitima est huic figurae synathrismus , cuius inter amplificandi rationes meminimus : nisi quod interpretatio est unius verbi multiplicatio , synathrismus vero multarum rerum congeries , qua in augendis & amplificandis rebus praecipue uti solemus. In qua plura sive verba , sive commata , sive membra orationis , interpositis conjunctionibus , aut etiam sublatis , quod est acrius , coniunguntur. Cyprianus contra Demetr. innoxios , iustos , Deo caros domo privas , patrimonio spolias , catenis premis , carcere includis , gladio , bestiis , ignibus punis. Idem de simplic. Praelat. quam vero unitatem servat , quam dilectionem custodit , qui , discordiae furore vesanus , Ecclesiam scindit , fidem destruit , pacem turbat , caritatem dissipat , sacramentum profanat ? Ad hoc genus pertinet illud Isaïae : (a) in die illa auferet Dominus ornamentum calceamentorum , & lunulas , & torques , & monilia , & armillas , & mitras , & discriminalia , & periscelides , & murenulas , & olfactoriola , & inaures , & annulos , &c. Simile est & illud Apostoli : (b) usque in hanc horam & esurimus , & sitimus , & nudi sumus , & colaphis caedimur , & instabiles sumus , & laboramus , operantes manibus nostris. Verum haec figura , frequenta-

tio-

(a) *Isai.* 3. (b) *1. Corinth.* 4.

tionī, de qua posterius erit sermo, admodum similis, ad sententiarum figuras magis pertinere videtur. Eius autem usus in augendo & amplificando potissimum cernitur. Estque haec amplificandi ratio maxime naturalis, & cuique vel imperito obvia, qua videlicet in una re multa inesse dicimus, quae illam augeant & exaggerent. Haecenus de verborum figuris: nunc ad sententiarum figuras, in quibus ut minor iucunditas, ita maior vis dicendi est.

CAP. XII.

*DE FIGVRIS SENTENTIARVM, AC PRIMVM
de his, quae ad docendum magis pertinere vi-
dentur.*

QVum tria sint, ut D. Augustinus ait, (a) praecipua concionatoris officia, nempe docere, flectere, & delectare, de quibus suo loco dicemus; omnes figurae tum verborum, tum sententiarum, in loco additae, haec tria maxime praestant. Exempli gratia: transitio ad docendum praecipue pertinet; quae, quid dictum sit, & quid sit dicendum, perspicuitatis gratia breviter exponit. Eadem autem vim & acrimoniam orationi adiungit hoc modo: audistis gravissima, audietis graviora. Quaedam tamen inter figuras sunt, quae magis ad delectandum, quam ad docendum aut flectendum, accommodantur: quales sunt verborum figurae, de quibus haecenus loquuti sumus; quamvis non nullae inter eas vim & acrimoniam habeant, qualis repetitio, conduplicatio, interpretatio, & synathrismus, sive congeries est. Contraria vero, ut proposita exempla declarant, non modo magnam venustatem, sed vim etiam & acrimoniam habent. At sententiarum figurae minus fortasse ad delectandum valent, ad docendum tamen atque flectendum plurimum conducunt: ideoque illas perspicuitatis gratia in duas classes divisimus; quarum prior eas figuras continet, quae magis ad docen-
S 4 dum,

(a) *Lib. III. de doctr. christ. cap. 11.*

dum pertinent ; posterior vero , quae ad flectendum magis , hoc est , ad instandum , & animos commovendos magis serviunt : quamvis non abnuam, plerasque earum ad omnia simul conferre. Nam & exempla , & similia aliquando rem aperiunt , & perspicuam faciunt ; aliquando orationem ornant , atque delectant ; quandoque vero rem amplificanti , & augent : quo nomine inter amplificandi rationes , ut suo loco exposuimus , numerantur. Sic etiam rerum & personarum descriptiones non ad flectendum modo , quod earum praecipuum est , sed interdum etiam ad docendum & delectandum adiuvant.

CAP. XIII.

*PRIMA CLASSIS DE FIGVRIS SENTENTIARVM,
quae maxime ad docendum pertinent.*

DEFINITIO.

Definitionem constat inter locos argumentandi collocari. Eadem tamen inter sententiarum figuras ponitur , quia non solum ad perspicuitatem , quod eius est proprium , sed etiam ad orationis ornatum non parum conducit. Ea vero est , quae rei alicuius proprias amplectitur potestates breviter & absolute , hoc modo : maiestas reipub. est , in qua continetur dignitas & amplitudo civitatis. Item : iniuriae sunt , quae aut pulsatione corpus , aut convicio aures , aut aliqua turpitudine vitam cuiuspiam violant. Item : non est ista diligentia , sed avaritia : ideo quod diligentia est accurata conservatio suorum , avaritia iniuriosa appetitio alienorum. Item : non est ista fortitudo , sed temeritas : propterea quod fortitudo est contemptio laboris & periculi cum ratione utilitatis , & compensatione commodorum : temeritas est , cum inconsiderata laborum perpessione , gladiatoria periculorum susceptio. Haec igitur commoda putatur exornatio , quod omnem rei cuiuspiam vim & potestatem ita dilucide propon-

ponit, & breviter explicat, ut neque pluribus verbis oportuisse dici videatur, neque lucidius potuisse dici putetur.

Haec autem brevis & absoluta definiendi ratio ex dialecticorum officina desumta est. Est autem alia longior atque copiosior, laudis aut vituperationis causa assumpta, quae ad rhetores magis pertinet. Vituperationis, ut Cyprianus in epistola ad Cornelium, de Novatiano loquens: magis, inquit, durus saecularis philosophiae pravitate, quam philosophiae dominicae lenitate pacificus, desertor Ecclesiae, misericordiae hostis, interfecto poenitentiae, doctor superbiae, veritatis corruptor, perditor caritatis. Laudandi vero gratia idem Cyprianus de habitu virginum disciplinam hoc modo definit: disciplina custos spei, retinaculum fidei, dux itineris salutaris, fomes ac nutrimentum bonae indolis, magistra virtutis, facit in Christo manere semper, ac iugiter in Deo vivere, ad promissa caelestia, & divina praemia pervenire. Idem de oratione dominica: evangelica praecepta, inquit, nihil sunt aliud, quam magisteria divina, fundamenta aedificandae spei, firmamenta corroborandae fidei, nutrimenta fovendi cordis, gubernacula dirigendi itineris, praesidia obtinendae salutis; quae, dum dociles credentium mentes in terris instruunt, ad caelestia regna perducunt.

DIVISIO.

Divisio quoque, sicut definitio, inter locos argumentandi ponitur. Quae, quoniam & perspicuitatem & ornatum quemdam orationi addit, inter sententiarum figuras collocatur. Ea vero res omnes aliquando in formas, sive species, aliquando in partes distribuit. Ab ea vero sic argumentum ducitur: duae res sunt, quae possunt homines ad turpe compendium commovere; inopia, atque avaritia. Te avarum in fraterna divisione cognovimus, inopem atque egentem nunc videmus: qui potes igitur ostendere causam maleficii non fuisse? Inter hanc divisionem, & il-

illam, quae de partibus orationis tertia est, de qua alibi diximus, hoc interest: illa dividit per enumerationem, aut per expositionem, quibus de rebus in tota oratione disputatio futura sit: haec se statim explicat, & brevi, duabus aut pluribus partibus subiiciens rationes, exornat orationem. Est etiam divisionis quaedam species in his D. Cypriani verbis: primus est victoriae titulus, gentiliū manibus apprehensum Dominum confiteri. Secundus ad gloriam gradus est, cauta secessione subtractum, Domino reservari. Illa publica, haec privata confessio est.

SUBIECTIO.

Subiectio inter argumentorum formas posita est, quod vim habeat argumentandi. Eademque inter figuras numeratur, quod ornatissima sit. Qua frequenter in confutatione utimur, quum iis, quae contra nos obiici possunt, brevi rationis subiectione respondemus. Sic enim D. Hieronymus in epistola ad Heliodorum, qua illum ad eremiticam vitam hortatur, tacitis obiectionibus respondet, hoc modo: paupertatem times? Sed beatos Christus pauperes appellat. Labore terreris? At nemo athleta sine sudore coronatur. De cibo cogitas? Sed fides famem non timet. Super nudam metuis humum exesa ieiuniis membra collidere? Sed Dominus tecum iacet. Squallidi capitis horret inculta caesaries? Sed caput tuum Christus est. Infinita eremi vastitas terret? Sed tu paradisum mente deambula. Quotiescumque illuc cogitatione conscenderis, toties in eremo non eris. Scabra sine balneis atrahitur cutis: sed qui in Christo semel lotus est, non illi necesse est, iterum lavare. Et ut breviter ad cuncta audias Apostolum respondentem: (a) non sunt, inquit, condignae passionēs huius saeculi ad superventuram gloriam, quae revelabitur in nobis. Haec tenus Hieronymus.

D. vero Cyprianus hac eadem figura beatissimos Christi confessores, ad fodienda metalla damnatos, commendat
&

(a) Rom. 8.

& laudat his verbis : non fovetur in metallis lecto & culticis corpus, sed refrigerio & solatio Christi fovetur. Humi iacent fessa laboribus viscera : sed poena non est, cum Christo iacere. Squallent sine balneis membra situ & sorde deformia : sed spiritualiter intus abluitor, quod foris carnaliter sordidatur. Panis illic exiguus : at non in pane solo vivit homo, sed in sermone Dei. Vestis argentibus deest : sed qui Christum induit, & vestitus abundanter, & cultus est. Semitonfi capitis capillus horrescit : sed quum sit caput viri Christus, qualecumque caput illud deceat necesse est, quod ad Domini nomen insigne est. Omnis ista deformitas, detestabilis & foeda gentilibus, quali splendore pensabitur?

D I S T R I B U T I O.

Divisioni finitima est distributio, quam inter verborum figuras retulimus. Est autem distributio alia in sententiis, quum in plures res aut personas certas negotia quaedam dispertiuntur, hoc modo : qui vestrum, iudices, nomen senatus diligit, hunc oderit necesse est : petulantissime enim semper iste oppugnavit senatum. Qui equestrem locum splendidissimum cupit esse in civitate, is oportet istum maximas poenam dedisse velit, ne iste sua turpitudine ordini honestissimo maculae atque dedecori sit. Qui parentes habetis, ostendite in istius supplicio, vobis homines impios non placere. Quibus liberi sunt, statuete exemplum, quanta poenae in civitate sint hominibus huiusmodi comparatae. Item, senatus officium est, consilio civitatem iuvare. Magistratus officium est, opera & diligentia consequi voluntatem senatus. Populi officium est, res optimas, & homines idoneos suis sententiis eligere, & probare. Accusatoris officium est, inferre crimina : defensoris, diluere, & propulsare. Testis est, dicere, quae scierit, aut audierit. Quaestoris est, unumquemque horum in officio suo continere.

D. quoque Cyprianus, sermone de lapsis, de corruptis
sae-

saeculi sui moribus sic ait : non in sacerdotibus religio devota , non in ministris fides integra , non in operibus misericordia , non in moribus disciplina. Corrupta barba in viris , in feminis forma fucata. Adulterati post Dei manus oculi , capilli mendacio colorati. Ad decipienda corda simplicium callidae fraudes , circumveniendis fratribus subdolae voluntates. Ad hunc modum Ezechiel Propheta cap. 22. varia aetatis suae crimina , & corruptam personarum omnium disciplinam moresque describit. Contra vero Apostolus 5. & 6. cap. epistolae ad Ephes. variorum statuum personas , hoc est , viros , uxores , filios , parentes , servos atque dominos , ad virtutum officia unicuique debita hortatur. Quod utinam nostri saeculi concionatores frequenter in concionibus suis facerent : ut , quid quisque in statu suo persequi deberet , voce concionatoris agnosceret.

Est & illa non inelegans neque infrequens distributionis species , qua frequenter in descriptionibus utimur , qualis est illa Nasonis : (a)

Iamque aliquis posita monstrat fera praelia mensa,

Pingit & exiguo pergama tota mero.

Hac ibat Simois , hic est Sigeia tellus:

Hic steterat Priami regia celsa senis.

Illic AEacides , illic tendebat Vlysses:

Hic lacer admissos terruit Hector equos.

Sic etiam Maro , varios terrarum fructus describens , ait : (b)

Hic segetes , illic veniunt felicius uvae,

Arborei fetus alibi , atque iniussa virescunt

Gramina. Nonne vides , croceos ut Tmolus odores,

India mittit ebur , molles sua tura Sabaei?

At Chalybes nudi ferrum , viroscumque Pontus

Castorea , Eliadum palmas Epirus equarum?

D. vero Cyprianus in epistola ad Donatum utramque distributionis speciem coniungit his verbis : flagrant ubique delicta , & passim multiformi genere peccandi per improbas mentes nocens virus operatur. Hic testamentum subiicit,

(a) *Heroid. ep. I. v. 31. seqq.* (b) *Virg. Georg. lib. I. v. 54.*

cit, ille falsum capitali fraude conscribit: hic arcentur hereditatibus liberi, illic bonis donantur alieni. Inimicus insimulat, calumniator impugnat, testis infamat, utrobi-que grassatur in mendacium criminum prostitutae vocis venalis audacia.

RATIOCINATIO.

Ratiocinatio duplex est: altera, quae amplificationi servit, quam a Fabio (a) hoc nomine appellari superius (b) diximus: altera, quae inter sententiarum figuras numeratur, subiectioni, de qua modo diximus, admodum similis: nisi quod subiectio inter argumentationum formas collocatur; ideoque partes omnes interrogando enumerat, ut ad unam aliquam perveniat: ratiocinatio autem huic partium enumerationi adstricta non est, quamvis illius speciem interrogando & respondendo referat. Ea vero est, per quam nos ipsi a nobis rationem poscimus, quare quidquid dicamus, & crebro nosmet a nobis petimus uniuscuiusque propositionis explanationem. Ea est huiusmodi: maiores nostri, si quam unius peccati mulierem damnabant, simplici iudicio multorum maleficiorum convictam putabant. Quo pacto? Quoniam quam impudicam iudicabant, eam veneficii quoque damnatam existimabant. Quid ita? Quia necesse est, eam, quae suum corpus addiderit turpissimae cupiditati, timere permultos. Quos istos? Virum, parentes, ceteros, ad quos videt sui dedecoris infamiam pertinere. Quid postea? Quos tantopere timeat, eos necesse est, ut quoquo modo possit, veneficio petat. Cur? Quia nulla potest honesta ratio retinere eam, quam magnitudo peccati facit timidam, intemperantia audacem, natura muliebris inconsideratam. Quid veneficii damnatam? Putabant impudicam quoque necessario. Quare? Quia nulla facilius ad id maleficium causa, quam turpis amor, & intemperans libido commovere potuit: quum cuius animus mulieris esset corruptus, eius corpus castum esse non putarint.

Quid

(a) *Instit. orat. lib. VIII, cap. 4.* (b) *Lib. III, cap. 5.*

Quid in viris? idem ne hoc observabant? Minime. Quid ita? Quia viros ad unumquodque maleficium singulae cupiditates impellunt: mulieres ad omnia maleficia cupiditas una ducit. Item, bene maiores nostri hoc comparaverunt, ut neminem regem, quem armis cepissent, vita privarent. Quid ita? Quia quam nobis facultatem fortuna dedisset, iniquum erat, in eorum supplicio consumere, quos eadem fortuna paullo ante in amplissimo statu collocarat. Quid quod exercitum contra duxit? Desino meminisse. Quid ita? Quia viri fortis est, qui de victoria contendunt, eos hostes putare; qui victi sunt, eos homines iudicare: ut possit bellum fortitudo minuere, pacem humanitas augere. At ille si vicisset, num idem fecisset? Non profecto tam sapiens fuisset. Quid igitur ei parcis? Quia talem stultitiam contemnere, non imitari, consuevi. Haec exornatio ad sermonem vehementer accommodata est; & animum auditoris reddit attentum, tum venustate sermonis, tum rationum expectatione. Hoc exemplo satis liquet, qua ratione quisque & interrogare, & sibi ipsi respondere queat.

Est autem, ut dixi, figura haec ad concionandi rationem utilissima: propterea quod naturam quodam modo dialogi imitatur, & rectum orationis cursum atque impetum, quo auditores interdum fatigantur, dialogi specie atque varietate reficit. Quin etiam attentionem excitat: dum qui audiunt ea, de quibus concionator vel dubitat, vel requirit, ipsi etiam simili ratione dubitare, & responsionem expectare coguntur: atque in hunc modum variis interrogationibus & responsionibus inescantur ac detinentur. Id adeo verum est, ut non defuerint auctores non poenitendi, qui conciones, quas litteris mandaverunt, in dialogorum speciem & formam retulerint. Cuius rei quum multae sint commoditates, non postrema illa est, quod quum apta pronuntiationis varietas, variaque vocis figura auditores plurimum detineat; haec interrogandi atque respondendi ratio magnam ex natura sua varietatem, ut in ipsis rebus, ita in pronuntiatione petit: ut res non
tam

tam in concione, quam in scena quodam modo agi videantur.

DIMINVTIO.

Diminutio est, quum aliquid esse in nobis, aut in iis, quos defendimus, aut natura, aut fortuna, aut industria dicimus egregium: quod, ne qua significetur arrogans ostentatio, diminuitur & attenuatur oratione, hoc modo: nam hoc pro meo iure, iudices, dico, me labore & industria curasse, ut disciplinam militarem non in postremis tenerem. Hic si quis dixisset, ut optime tenerem, tamen arrogans visus esset: nunc & ad invidiam vitandam, & ad laudem comparandam satis dictum est. Item, utrum igitur avaritiae causa, aut egestatis accessit ad maleficium? Avaritiae? At largissimus fuit in amicos, quod signum liberalitatis est, quae contraria avaritiae est. Egestatis? At huic quidem pater, nolo nimium dicere, non tenuissimum patrimonium reliquit. Hic quoque vitatum est, ne magnum aut maximum diceretur. Tale est illud D. Cypriani in epistola ad Donatum: ceterum quale, vel quantum est, quod in pectus tuum veniat ex nobis? Exilis ingenii angusta mediocritas, tenues admodum fruges parit: nullisque ad copiam fecundi cespitis culminibus ingravescit. Aggrediar tamen facultate, qua valeo.

COMMORATIO.

Commoratio est, quum in loco firmissimo, quo tota causa continetur, manetur diutius, & eodem saepius reditur. Hac uti maxime convenit, & id est oratoris boni maxime proprium. Non enim datur auditori potestas, animum de re firmissima dimovendi. Huic exemplum satis idoneum subiici non potuit: propterea quod hic locus non est a tota causa separatus, sicut membrum aliquod, sed tamquam sanguis perfusus est per totum corpus orationis. Hac uti Ecclesiastes poterit, quum rem aliquam ad salutem maxime necessariam auditorum animis infigere cupit:

ur,

ut, hac repetita admonitione, rei dignitatem & necessitatem intelligant. Sic D. Hieronymus, in epistola ad Demetriadem, finem, inquit, iungo principio, nec semel monuisse contentus. Ama scientiam scripturarum, & amabit te sapientia. Hoc autem Apostolum Tjmotheo praecepisse arbitror, quum dixit: (a) *instā oportune & importune*,

FREQUENTATIO.

Finitima est huic figurae frequentatio, quum res, in tota causa dispersae, coguntur unum in locum, quo gravior, aut acrior, aut criminiosior ratio sit, hoc pacto: a quo tandem abest iste vitio? Quid est, iudices, cur velitis eum liberare? Suae pudicitiae proditor est, insidiator alienae, cupidus, intemperans, petulans: superbus, impius in parentes, ingratus in amicos, infestus in cognatos, in superiores contumax, in aequos & pares fastidiosus, in inferiores crudelis, denique in omnes intolerabilis. Hac figura in fine concionis uti possumus, praesertim in suasoriis concionibus, quum argumenta omnia, quae in tota concione tractavimus, breviter in unum colligimus: ut velut agmine facto in animos auditorum irrumpamus, & illis vim quodam modo inferamus. Qua de re in superiori libro diximus, quum de suasorii generis partibus ageremus. Neque in fine solum concionis, sed in eius etiam partibus, ubi longa aliqua disputatio vel argumentatio absoluta fuerit, auditorum memoriam refricare hac eadem figura licebit, non solum ut meminerint, sed etiam ut vi argumentorum assentiant & vincantur. Quo in genere non graviora modo, sed etiam leviora argumenta colligenda sunt. Feriunt enim, si non ut fulmine, certe ut grandine. Eadem etiam figura ad amplificandum aptissima est; quando omnia, quae rem augent, in unum simul cogit. Qua de re superius dictum est.

BRE-

(a) 2. *Timoth.* 4.

Brevitas est res, ipsis tantummodo verbis necessariis expedita, hoc modo: Lemnum praeteriens cepit: inde Tarsi praesidium reliquit: post urbem in Bithynia sustulit: inde pulsus in Hellespontum, statim potitur Abydo. Item: modo consul, quondam tribunus, deinde primus erat civitatis. Tum proficiscitur in Asiam: deinde exsul & hostis est dictus: post imperator, postremo consul factus est. Habet paucis comprehensa brevitatis multarum rerum expeditionem. Quare adhibenda saepe est, quum tempus non sinit commorari, aut res non longa eget narratione. Qua de causa D. Ambrosius super Lucam multa brevi comprehendit his verbis: (a) non solum ab angelis & pastoribus, sed etiam a senioribus & iustis generatio Domini accepit testimonium. Omnis aetas, & uterque sexus, eventuumque miracula fidem adstruunt. Virgo generat, sterilis parit, mutus loquitur, Elisabeth prophetat, magus adorat, utero clausus Ioannes exultat, vidua confitetur, iustus spectat. Hic videre licet, quam multa paucis comprehensa sint: quia hoc satis erat ad id explicandum, quod ad rem propositam pertinebat. Quae quidem oratio quo brevior, eo ad augendum potentior est.

CAP. XIV.

SECUNDA CLASSIS DE FIGURIS

sententiarum, quae maiorem vim & acrimoniam habent.

Sequitur deinde altera classis de figuris sententiarum: quae quamvis ad omnia valeant, praecipue tamen ad commovendos auditorum animos adjuvant. Maiorem quippe vim & acrimoniam, quam praecedentes, habent. Incipiamus igitur ab ea, quae magis in usu est, & ad plura valet, nempe interrogatione. Simplex est, sic rogare: (b) ma-

T

gi-

(a) In cap. 2. (b) Matth. 19.

gister bone, quid boni faciam, ut habeam vitam aeternam? Figuratum autem, quoties non sciscitandi gratia assumitur, sed instandi. Cyprianus de simplic. praelat. quid facit in pectore Christiano luporum feritas, & canum rabies, & venenum letale serpentum, & cruenta saevitia bestiarum? Idem ibidem: quam vero unitatem servat, quam dilectionem custodit aut cogitat, qui discordiae furore vesanus Ecclesiam scindit, fidem destruit, pacem turbat, caritatem dissipat, sacramentum profanat?

Idem sermone de livore: quid in zeli tenebras ruis? quid te nubilo livoris involvis? quid invidiae caecitate omne pacis & caritatis lumen exstinguis? quid ad Zabulum, cui renuntiaveras, iterum redis? quid Caïn similis existis? Nec minus urget illa eiusdem interrogatio in sermone de lapsis: putas ne tu Dominum cito posse placari, quem verbis perfidis abnuisti, cui patrimonium praeponere maluisti, cuius templum sacrilega contagione violasti? Putas facile eum misereri tui, quem tuum non esse dixisti? Sed haec exempla indignationi, sequens vero, quod modo subiiciam, admirationi & optationi magis servit: quale est illud eiusdem sermone de eleemosyna. Quae illa erit, fratres carissimi, operantium gloria, quam grandis & summa laetitia, quum populum suum Dominus coeperit recensere, & meritis atque operibus nostris praemia promissa retribuere, pro terrenis caelestia, pro temporalibus sempiterna, pro modicis magna praestare? Instat etiam illa eiusdem interrogatio in sermone de mortalitate. Quis non peregre constitutus properet in patriam regredi? Quis non ad suos navigare festinans, ventum prosperum cupidius optaret, ut velociter caros liceret amplecti? Patriam nostram paradysum computamus, parentes nostros patriarchas habere iam coepimus: quid non properamus & currimus, ut patriam nostram videre, ut parentes salutare possimus?

Ceterum quum praecipua orationis virtus existat, ut non iners & languida, sed viva & mobilis sit; hoc quidem cum aliae figurae, tum praecipue interrogatio praestat,

stat, quae neque dicentem neque audientem languescere aut dormire sinit. Semper enim acrior sententia est, quae interrogatione, quam quae simplici oratione, effertur. Quae eo est ornatior, quo & longior: qualis est pulcherrima illa Apostoli inductio, variis exemplis & similibus decurrens: (a) quis, inquit, militat stipendiis suis umquam? quis plantat vineam, & de fructu eius non edit? quis pascit gregem, & de lacte gregis non manducat? Numquid secundum hominem haec dico? an & lex haec non dicit? Et cetera, quae hac eadem figura sequuntur, atque etiam praecedunt.

OCCUPATIO.



Occupatio est, quum dicimus, nos praeterire, aut non scire, aut nolle dicere id, quod tunc maxime dicimus. Cyprianus in epistola ad Cornelium: (b) taceo ... de fraudibus Ecclesiae factis: coniurationes, & adulteria, & varia delictorum genera praetereo. Vnum illud, in quo non mea, nec hominum, sed Dei causa est, de eorum facinore non puto esse reticendum: quod a primo statim persecutionis die, quum recentia delinquentium facinora ferverent, & sacrificiis nefandis non tantum diaboli altaria, sed adhuc manus ipsae lapsorum atque ora maderent, communicare cum lapsis, & poenitentiae agenda intercedere non destiterunt. Haec utilis est exornatio, si aut rem, quam non pertineat aliis ostendere, occulte admonuisse prodest, aut si longum est, aut ignobile, aut planum, aut non potest fieri, aut facile potest reprehendi.

PRAECISIO.

Praecisio est, quum dictis quibusdam, reliquum, quod coeptum est dici, relinquitur in audientium iudicium, sic: mihi tecum praecertatio non est, ideo quod pop. Rom. me: nolo dicere, ne cui forte arrogans videar: te autem saepe ignominia dignum putavit. Item, tu ista nunc

T 2

au-

(a) 1. Corin. 9. (b) Epist. lib. I. ep. 3. paullo post medium.

audes dicere, qui nuper alienae domui? Non ausim dicere, ne, quum te digna dixero, me indignum quidpiam dixisse videar. Hic atrocior tacita suspicio, quam diserta explanatio, facta est. Hac etiam figura vates regius vehemens animi sui desiderium significavit, quum ait: (a) anima mea turbata est valde, sed tu, Domine, usquequo? Idemque alibi: (b) & calix meus inebrians. Nam quod deinde sequitur, quam praeclarus est, ab interprete explicationis gratia adiectum esse, ostendit Hieronymi versio ex Hebraeo, quae hac particula caret. Hac eadem figura Ecclesiastes in rebus indignissimis, quas ad summum dicendo perduxit, praecisa oratione interiecta, & in ipso calore dicendi paullulum moratus, ingentem animi affectum significat: quem quia loquendo explicare non potest, silentio indicat. Quae res quum in veritate ex animo fit, vehementer auditores commovere solet. D. Hieronymus, in epistolis, quorundam hominum vitia recte castigans, neque quid significare vellet aperte explicans, hac brevi praecisione sententiam clausit: prudens mecum lector intelligis, quid tacitam, & quid magis tacendo loquar.

EMPHASIS.

Vicina huic emphasis, altiore praebens intellectum, quam quam verba per se ipsa declarant. Eius duae sunt species: altera, quae plus significat, quam dicit; altera, quae etiam id, quod non dicit. Prior est apud Cicero- nem pro Ligario ad Caesarem: (c) *quod* si in ... tanta... fortuna bonitas tanta non esset, quantam tu per te, per te, inquam, obtines: intelligo quid loquar. Tacuit enim illud, quod nihilominus accipimus, non deesse homines, qui illum ad crudelitatem impellerent. Est in vulgaribus quoque verbis emphasis: virum esse oportet: &, homo est ille. Et in sacris litteris: homo natus de muliere: emphasis habet *mulier*: quam explicuit D. Gregorius dicens: (d) quid in se habet fortitudinis, qui natus est de infirmitate? Item
Apo-

(a) *Psalms*. 6, (b) *Psalms*. 22. (c) *Cap.* 5. (d) *Lib.* 11. in *Iob*, cap. 26.

Apostolus ad Timoth. (a) haec, inquit, meditare: in his esto. Vnico verbo, esto, multa comprehendit: studium, curam, amorem, occupationem, diligentiam, & similia. Omnes quippe animae vires, & omne tempus, ceteris omnibus praetermissis, in hoc uno esse voluit. Emphasis enim est, quum dicimus: hisce oculis vidi, ne nega. Item quum Absalom famulis praecepit, ut Amnon fratrem interficerent, adiecissetque: (b) nolite timere: ego sum, qui praecipio vobis: verbum illud, ego, emphasis habet. Sic etiam quum Salvator ait: (c) ego autem dico vobis, diligite inimicos vestros, &c. Item quum Apostolus ait: (d) det ei Dominus misericordiam invenire in die illa. Pronomen, illa, non vulgarem emphasis habet. Est autem non infrequens in litteris sanctis haec figura: in qua excutienda non minima pars theologiae eruditionis posita est.

DVBITATIO.

DVbitatio est, quum quaerere videtur orator, utrum de duobus potius, an quid de pluribus potissimum dicat, hoc modo: obfuit eo tempore plurimum reipub. consulum sive stultitiam, sive malitiam dicere oportet, sive utrumque. Item: tu istud ausus es dicere homo omnium mortalium? Quaero quonam te digno, ac moribus tuis appellem nomine. Item D. Hieronymus: nostri doctores ita eloquentia suos refarcierunt libros, ut nescias quid in eis prius mirari debeas, an eruditionem saeculi, an scientiam scripturarum. Item Cyprianus ad Christi confessorem Celerinum, eundemque parentibus martyribus natum, sic ait: (e) non invenio, quem beatiorem magis dicam, utrumne illos de posteritate tam clara, an hunc de origine gloriosa. Item Eusebius Emiffenus homilia de nativitate Domini: quid primum mirer, quidve postremum? Quod sine conceptu est collata fecunditas, an quod per partum magis est

T 3

est

(a) 1. *Timoth.* 4. (b) 2. *Reg.* 13. (c) *Matth.* 9. (d) 2. *Thimoth.* 1. (e) *Nem ad Celerinum, sed de Celerino loquitur, epist. III. 3.*

est glorificata virginitas? Sed non mirum, si ita peperit: talis erat ille, cui nupserat. Item D. Gregorius de Magdalena: (a) quid igitur miramur, fratres? Mariam venientem, an Dominum susipientem? Susipientem dicam, an trahentem? Dicam melius, trahentem, & susipientem. Hac etiam figura quaerimus, quid dicamus, aut unde incipiamus. Cyprianus sermone de lapsis: quid hoc loco faciam, dilectissimi fratres, fluctuans vario mentis aestu? Quid, aut quo modo dicam? Lacrimis magis, quam verbis, opus est. Item Bernardus ad Eugenium: unde iam initium sumam? Libet ab occupationibus tuis.

C O N C E S S I O .

Concessio est, quum aliquid ei, ad versus quem disputamus, concedimus: quod ita tamen concedimus, ut causae atque proposito nostro non obsit, aut certe nihil illum iuvet, quod in sententiae suae defensionem adducit. Sic honoris cupidis concedimus, ut honorem quidem appetant, sed verum tamen & solidum, non futilem & inanem. Sic etiam, ut opes quaerant, non tamen fragiles & caducas, sed in aeternum permanfuras. Sic voluptates atque delitias permittimus, non turpes & carnales, quae hominem in pecudem transformant, sed spirituales & castas, quibus angeli perfruuntur. Sic Eucherius episcopus ad verae vitae amorem hortatur his verbis: cupiditas vitae nos delectatione rei praesentis innoxuit. Ergo amantes vitam, hortamur ad vitam. Vera ratio est persuadendi, quum id poscitur, ut impetremus a vobis, quod concupiscitis. Pro vita, quam diligitis, legatione apud vos fungimur; & hanc, quam omnes exiguum amatis, insinuamus, ut ametis aeternam. Quam quo pacto amemus, nescio, si non hanc, quam amamus, esse quam speciosissimam cupimus. Itaque istud, quod, quum arctum sit, placet, placeat magis, si potest esse perpetuum: & quod apud nos pretium habet, quum finem habeat, sit

(a) *Homil. 33. in Evang.*

fit nobis supra pretium, si potest esse sine fine. Haec-
nus ille.

Item Cyprianus de habitu virginum: locupletem te esse dicis & divitem, & utendum putas iis, quae possidere te Deus voluit: utere, sed ad res salutare: utere, sed ad bonas artes: utere ad illa, quae Deus praecepit, quae Dominus ostendit. Divitem te esse sentiant pauperes, locupletem sentiant indigentes. Patrimonia tua Deo foenera, Christum ciba. Possessiones tibi, sed caelestes magis compara, ubi fructus tuos iuges ac perennes, & ab omni contactu iniuriae saecularis immunes, nec rubigo atterat, nec grando caedat, nec Sol urat, nec pluvia corrumpat. Idem etiam, sermone de mortal. sic ait: mori plane timeat, sed qui ex aqua & spiritu non renatus, gehennae ignibus mancipatur. Morì timeat, qui non Christi cruce & passione censetur: mori timeat, qui ad secundam mortem de hac morte transibit: mori timeat, quem de saeculo recedentem perennibus poenis aeterna flamma torquet: mori timeat, cui hoc mora longiore confertur, ut cruciatus eius & gemitus interim differatur.

ADHORTATIO.

Adhortatio, ut ipsum nomen indicat, est, quam plura monita atque praecepta sub uno orationis impetu simul coniungimus, quibus aliquid fieri, aut non fieri adhortamur. Est autem huiusmodi adhortatio velut conclusio, qua post alicuius rei probationem aut amplificationem uti solemus: qua etiam, ut ante diximus, commodissime in epilogo suasoriae concionis utimur. Talis est illa Domini adhortatio apud Isaiam, post Israëliti populi scelera amplificata: qua praeteritis & futuris malis remedium adhibet, his verbis: (a) lavamini, mundi estote, auferite malum cogitationum vestrarum ab oculis meis. Quiescite agere perverse, discite benefacere. Quaerite iudicium, subvenite oppresso, iudicate pupillo, defendite

T 4

vi-

(a) *Isai. 1.*

viduam: & venite & arguite me, dicit Dominus.

Cyprianus contra Demetrianum sic argumentationem claudit: respicite itaque, dum tempus est, ad veram & aeternam salutem: & quia iam mundi finis in proximo est, ad Dominum Deum mentes vestras Dei timore convertite. Deum vel sero quaerite: quia iam pridem per prophetam praemonens hortatur, & dicit: (a) quaerite Dominum, & vivet anima vestra. Credite illi, qui omnino non fallit: credite illi, qui haec omnia futura praedixit: credite illi, qui credentibus praemium vitae aeternae dabit: credite illi, qui incredulis aeterna supplicia gehennae ardoribus irrogabit. Idem sermone de livore, post invidiae morbum amplificatum, sic orationem claudit: his meditationibus corroborandus est animus, fratres dilectissimi. Eiusmodi exercitationibus contra omnia diaboli iacula firmandus. Sic in manibus divina lectio, in sensibus dominica cogitatio. Oratio iugis omnino non cesset. Salutaris operatio perseveret. Spiritualibus semper actibus occupemur: ut quotiescumque inimicus accesserit, quoties adire tentaverit, & clausum adversus se pectus inveniat, & armatum. Idemque paullo post: venena fellis evome, discordiarum virus exclude, purgetur mens, quam sempiternus livor infecerat. Amaritudo omnis, quae intus insederat, Christi dulcedine leniatur. Ama eos, quos ante oderas: dilige illos, quibus iniustis obtrectionibus invidebas. Bonos imitare, si potes: si sectari non potes, collaetare certe & gratulare melioribus: fac te illis adunata dilectione participem, fac te consortio caritatis & fraternitatis vinculo coheredem. Dimittentur tibi debita, quando tu ipse dimiseris. Accipientur sacrificia tua, quum pacificus ad Deum veneris.

SVSTENTATIO.

SVstentatio est figura, qua diu suspenduntur auditorum animi, atque aliquid deinde inexpectatum subiungitur, ut in Verrem Cicero. (b) Quid deinde? quid censeris? furtum fortasse, an praedam aliquam? Deinde quum diu suspen-

(a) Psalm. 68. (b) *Ad. VII.*

pendisset iudicum animos, subiecit quod multo esset improbius. Aliquando etiam quum expectationem alicuius rei gravissimae orator concitaverit, ad aliquid, quod leve sit, aut nullo modo criminofum, descendit. Hac ratione Phariseorum levitatem amplificare possumus, qui discipulos Domini accusandos putabant, quod illotis manibus manducarent. Prius enim Scribarum & Phariseorum dignitatem exponimus, atque eorum praecipue, qui ab Ierosolymis veniebant: qui omnes uno consilio Dominum adeuntes, ampla oratione accusationem suam illi proposuerunt. (a) Quare, inquit, discipuli tui transgrediuntur traditiones seniorum? Magnum certe & intolerandum crimen, quum scriptum sit: (b) ne transgrediaris terminos antiquos, quos posuerunt patres tui. Sed videamus, quale sit hoc crimen, qualis ista transgressio. Non, inquit, lavant manus suas, quum panem manducant. Quid hac accusatione magis ridiculum? Hoccine erat crimen illud, quod tanti doctores communi consilio exprobrare volebant? Hac igitur figura duplici in loco utimur, vel quum leve aliquid hoc modo inferre, vel summum aliquid & inexpectatum amplificare volumus: ut quod natura sua magnum est, praemissa hac praeparatione maius appareat.

IRONIA.

IRonia, quum uno verbo, aut brevi oratione fit, tropus est, in quo pro rei nomine proprio aliud subicitur. Quale est illud: (c)

*Egregiam vero laudem, & spolia ampla refertis,
Tuque puerque tuus.*

Quum vero longa oratione fit, inter sententiarum ornamenta numeratur. Sic Cyprianus adversus Pupianum, qui ipsum Cyprianum negabat episcopum esse, acri ironia hoc modo invehitur: (d) nisi, inquit, apud te purgati fuerimus, & sententia tua absoluti, etiam sex annis

rec

(a) *Matth. 15.* (b) *Prov. 22.* (c) *Virg. AEn. lib. III, v. 93.*
(d) *Epist. lib. III, ep. 9.*

nec fraternitas habuerit episcopum, nec plebs praepositum, nec grex pastorem, nec Ecclesia gubernatorem, nec Christus antistitem, nec Deus sacerdotem? Subveniat Pupianus, & sententiam dicat: iudicium Dei & Christi in apertum referat, ne tantus fidelium numerus, qui sub nobis accersitus est, sine spe salutis & pacis exisse videatur. Et mox: annue aliquando, & dignare pronuntiare de nobis, & episcopatum nostrum cognitionis tuae auctoritate firmare: ut Deus & Christus eius agere tibi gratias possint, quod per te antistes & rector altariorum pariter & plebi restitutus sit. Et paullo post: quare in hunc scrupulum non inciderunt martyres, Spiritu sancto pleni, ... qui ad Cyprianum episcopum litteras de carcere direxerunt? ... Nisi si omnes isti communicantes mecum, secundum quod scripsisti, polluto ore nostro polluti sunt, & si spem vitae aeternae communicationis nostrae contagione perdiderunt. Pupianus solus integer, inviolatus, sanctus, pudicus, qui nobis miscere se noluit, in paradiso atque in regno caelorum solus habitabit. Haecenus ille.

Est etiam in sacris litteris huius figurae usus. Sic Ieremias: (a) confortamini, inquit, filii Benjamin, in medio Ierusalem, & in Thecua clangite buccina, & super Bethacarem levate vexillum: quia malum visum est ab aquilone, & contritio magna. Idem alibi eadem ironia utitur, quum, denuntiato Chaldaeorum adventu, subdit: (b) praeparate scutum & clypeum, & procedite ad bellum, iungite equos, & ascendite equites, state in galeis, polite lanceas, induite vos loricas. Quid igitur vidi ipsos pavidos, & terga vertentes, &c. Tale est & illud Salomonis: (c) lactare ergo, iuvenis, in adolescentia tua, & in bono sit cor tuum in diebus iuventutis tuae, & ambula in viis cordis tui, & in intuitu oculorum tuorum, & scito, quod pro omnibus his adducet te Deus in iudicium. Simile est & illud ex Apocalypsi: (d) qui nocet, noceat adhuc: & qui in sordibus est, sordescat adhuc.

EXEM-

(a) *Cap. 6.* (b) *Cap. 46.* (c) *Eccles. 11.* (d) *Cap. 12.*

EXEMPLVM.

EXemplum, & simile, constat esse argumentandi loca, quae tamen inter figuras numerantur, propterea quod magnum orationi ornamentum afferant; praesertim quum illustrandae aut ornandae rei gratia adhibentur. Quia vero duo haec orationis ornamenta magnam inter se affinitatem habent, atque eodem fere modo tractantur, de utrisque hoc in loco dicemus.

Exemplum est, alicuius facti aut dicti praeteriti cum certi auctoris nomine propositio. Id sumitur iisdem de causis, quibus similitudo. Rem ornatorem facit, quum nullius rei nisi dignitatis causa sumitur. Apertiores, quum id, quod sit obscurius, dilucidum reddit. Probabiliores, quum magis verisimilem facit. Ante oculos ponit, quum exprimit omnia perspicue, ut res dicta prope manu tentari possit. Movent autem potissimum animos antiqua, illustrata, nostrata, domestica, idest, suam quaeque gentem, suum quaeque genus. Aut longe minora, ut mulieris, pueri, servi, barbari. Adhibentur autem exempla, aut ut similia, aut dissimilia, aut contraria. Rursum aut ut maiora, aut ut minora, aut ut paria. Dissimilitudo, & inaequalitas constat genere, modo, tempore, loco, ceterisque ferme circumstantiis, quas supra recensuimus.

Augentur autem & crescunt exempla tractandi ratione. Licebit enim vel ab auctoris laude, vel gentis, unde ducitur exemplum, hoc modo praefari. Si quis e Plutarcho citabit exemplum, praefari licebit, eum auctorem unum omnium esse gravissimum, quippe qui summam philosophiae scientiam cum historicorum eloquentia coniunxerit, ut in eo non solum historiae fidem, verum etiam auctoritatem & iudicium doctissimi philosophi spectare oporteat. Item si quis M. Attilii Reguli, ad hostem redeuntis, exemplum velit adducere, poterit ad hunc prae loqui modum: inter tam multa Romanae virtutis insignia decora, nullum umquam facinus pulchrius exstitit, aut etiam laudatius, quem M. Attilii. Huiusmodi commendatiunculas
li-

licet affigere , vel longiores , vel breviores , utcumque locus postulabit. Affigendae sunt autem , quae maxime sine ad id , quod agitur , appositae. Veluti si in exemplo desiderabitur fides , auctor a gravitate fideque commendetur. Si pium videri voles , quod adfers , sumatur a pietate commendatio. Atque item de ceteris.

Quod vero ad tractandi rationem attinet , aliquando quidem breviter , ubi res notior est , quam ut longam orationem desideret : quale est illud D. Hieronymi : memento Daretis , & Entelli. Aliquando vero longius , quemadmodum idem Hieronymus , ad sapientiae studium commendandum , peregrinationem Pythagorae , Platonis , & Apollonii in praefatione , quam universae scripturae divinae praeponunt , tractat. Quum autem exempla imparia aut dissimilia sunt , poterunt latius per collationem & contentionem dilatari : quum videlicet ostendimus , id , quod adducimus , pro ratione & commoditate causae nostrae esse simile , dissimile , contrarium , par , maius , aut minus. Atque ea collatio sumitur ex omnibus rerum & personarum circumstantiis. Adiuvatur & orationis artificio , quum verbis aut figuris accommodis alia consulto elevantur , alia attolluntur. Porro qui copiosissime volet exemplum tractare , is singulis similitudinis aut dissimilitudinis partes explicabit , atque inter se per contentionem comparabit. Exstat locupletissimum huius rei exemplum apud D. Bernardum in vita Malachiae episcopi : quo vitam eius & mores cum aliorum episcoporum moribus confert. Sed quoniam exornatio haec frequenter in dicendo solet incidere , alia eius exempla , ex secundo de copia rerum commentario desumpta , subiiciemus.

Si quis horretur aliquem , ut filii mortem moderate ferat , & ex ethnicorum exemplis mulierem aliquam obii-
 ciat , quae plurium liberorum mortem fortiter tulerit , post enarratam rem , ita comparabit : quod mulier imbecilla potuit , tu vir barbatus non feres ? Illa cum sexu vicit & affectum matris : tu ab altero superaberis ? Illa complurium liberorum iacturam animo infraeto pertulit : tu unum ex-

stin-

Finctum inconsolabiliter defles? Adde, quod illius filii simul omnes naufragio perierunt, morte videlicet ingloria: tuus in bello fortiter pugnans occubuit. Illa non habebat, cui filios honeste imputaret: tu filium impendisti patriae. Illi vere torique perierunt: tuus immortalis gloria semper victurus est. Illa naturae gratias agebat, quod aliquando tot liberorum mater fuisset: tu tantum meministi, te optimum perdidisse filium. Illa non habebat sartiendae orbitatis spem, quippe maior, quam ut uterum iam ferre posset: tibi & uxor secunda, & aetas etiam num integra valensque. Ergo quod barbara muliercula praestitit, tu vir Romanus non praestabis? Quod contemnere potuit litterarum imperita, hoc te, tot praeditum litteris, tantum philosophiae professorem, frangit? Denique quam animi fortitudinem praestitit pagana, hanc homo christianus non exhibebit? Illa credens, post rogam nihil superesse, tamen luctum indecorum existimavit: tu doctus, eos demum vere vivere, qui cum laude excefferint ex hac vita, sine fine clamas, tibi periisse filium? Et quod illa aequo animo reddidit naturae, tu Deo repetenti non reddes? Illa fortiter paruit necessitati: tu Deo repugnas?

Ex hac forma satis, opinor, apparet, quibus modis oporteat exempla conferre: quamquam in veris causis, quoniam maior est circumstantiarum copia, facilius est invenire varias contentiones. Illud obiter admonendum, in huiusmodi contentionibus sententias & epiphonemata non inconcinne posse admisceri. Velut in hoc eodem exemplo post primam collationem: quod mulier imbecilla potuit, tu vir barbatus non poteris? Subiici poterant sententiae: natura discrevit sexum, tu non discernis animum. A muliere nemo fortitudinis laudem exspectat: vir, nisi fortis sit animo, nec viri nomine censetur. Vir utrumque significat, & sexum robustiorem, & animum infractum. Turpiter barbam gestat, qui pectoris robore superatur a femina. Item post illam contentionem: illa non habebat, cui filium imputaret honeste, tu filium impendisti patriae; poterant affigi sententiae ferme huiusmodi: magnum

gnum doloris solatium est, habere, cui honeste possis imputare fortunam. Vt nulli iustius, ita nec gloriosius impenditur filius, quam patriae. Rursum post illam: illi vere totique perierunt, tuus immortalis gloria semper victurus est; adiacere poterant huiusmodi: longe felicius honesta fama, quam hoc communi spiritu, vivitur. Corporis vita & calamitosa est, & omnino, ut nihil accadat, brevis: denique cum pecudibus communis: illa clara sempiternaque homines in divorum consortium referens. Ad eundem modum singulis collationum partibus sententiae subiici poterant. Sed haec obiter indicasse sat fuerit.

Haec exempla, quae proposuimus, satis aperte huius figurae naturam explicant: quae docendi gratia paullo fuere longiora. Ceterum quum res agitur seria, brevius aut longius, pro ratione earum rerum, de quibus dicimus, tractanda est. Superius autem admonuimus, D. Chrysostomum, ubi aliqua similitudine aut exemplo id, quod dicit, ad summum usque perduxerit, operam dare, ut aliquarum circumstantiarum comparatione rem, quam amplificat, maiorem adhuc faciat.

**DE CONTENTIONE DEMONSTRATIVA, QUAE
ad exemplorum ordinem spectat.**

EST & generalis quaedam contentio, praesertim in genere demonstrativo: quoties laudandi vituperandive gratia personam cum persona conferimus. Sic igitur Gregorius Nazianzenus, in homilia de laudibus Basilii, eum cum omnibus laudatissimis veteris & novi testamenti patribus, nempe cum Noë, Abraham, Iacob, Ioseph, Mose, Davide, Ioanne Baptista, Petro, Paulo, ceterisque patribus comparat, eorumque virtutes vel sectatum fuisse, vel aequare ait. Sic enim incipit: (a) age igitur, quum multi viri, tum in veteri, tum in novo testamento, pietate illustres extiterint, legislatores, militares duces,
pro-

(a) *Circa finem.*

prophetae, doctores, fortes usque ad sanguinis profusionem, cum illis Basilium nostrum conferamus; ut hinc, qualis fuerit, perspiciamus. Est & rerum comparatio: quod genus est, si quis historiam laudans, eam cum laudatissimis quibusque disciplinis compareret. Atque in his duplex ratio. Aut enim alterius partis bona elevas, alterius amplificas: aut alterius partis sic exaggeras laudes, ut praeferas tamen, aut certe aequas, quod laudandum susceperis. In vituperando attollis vitia, sed sic, ut scelestiorem tamen, aut aequae scelestum ostendas, quem insectaris.

In his illud observandum, ut quae adhibentur ad comparisonem, sint tum confessa, tum insignia. Vt si bonum principem conferas cum Traiano, aut Antonino philosopho: contra malum cum Nerone, aut Caligula. Rursus si hominem maledicum conferas quum Zoilo, & Hyperbolo: aut hominem obrectatorem quum Dipsade, aut Regulo: hominem voluptatibus effeminatum, quum Sardanapalo. Crescet autem comparisonis copia, si, quemadmodum modo attigi, ad unius hominis aut rei laudem, seu vituperationem, complures aut personae aut res adhibeantur. Veluti si quis principem laudaturus, e multis excerptat, quod in unoquoque maxime excelluit. E Iulio Caesare, felicitatem, animique praesentiam: ex Alexandro, magnanimitatem: ex Augusto, urbanitatem: ex Tito seniore, civilitatem: ex Traiano, sanctimoniam, & clementiam: ex Antonino, gloriae contemptum: atque item de ceteris. Similiter & in vituperando. Praeterea si iracundiam detestans, conferas eam cum enormi temulentia, cum phrenesi, cum morbo comitiali, aut daemoniaco. Aut si linguae virulentiam damnans, componas eam cum halitu hominis pestilentia laborantis, cum afflatu serpentum, quibus est venenum praesentissimum, cum exhalatione quorundam lacuum, aut specuum subitam mortem afferente.

Similitudo est (a) oratio traducens ad rem quampiam aliquid ex re dispari simile. Ea sumitur aut ornandi causa, aut probandi, aut apertius dicendi, aut ante oculos ponendi. Quo modo igitur quattuor de causis sumitur, ita quattuor modis dicitur; per contrarium, per negationem, per brevitatem, per collationem. Ad unamquamque sumendae causam similitudinis accommodabimus singulos modos pronuntiandi. Ornandi causa sumitur per dissimile, sive contrarium, hoc modo: non enim ut domus nova, aut navis, aut etiam vestis melior vetustate vel senio confecta est; ita melior novus amicus, quam antiquus: illius enim adhuc dubia & parum firma fides est, haec ut aurum, quod igne exploratur, multis experimentis & longa die probata & perspecta est. Dicitur autem simile a contrario, quod negemus, rem, quam adducimus, ei similem esse, quam probamus.

Per negationem vero ducitur simile probandi causa, hoc modo: neque equus indomitus, quamvis natura bene compositus sit, idoneus potest esse ad eas utilitates, quas desiderantur ab equo: neque homo indoctus, quamvis sit ingeniosus, ad virtutem potest pervenire. Hoc probabilius factum est, quod magis est verisimile, non posse virtutem sine doctrina comparari: quoniam nec equus quidem indomitus idoneus possit esse. Ergo sumtum est probandi causa. Dictum est autem per negationem: id enim perspicuum est de primo similitudinis verbo.

Apertius dicendi causa similitudo ducitur per brevitatem, hoc modo: in amicitia gerenda, sicut in certamine currendi, non ita convenit exerceri, ut, quoad necesse sit, pervenire possis: sed ut productus studio & viribus ultra facile procurras. Nam hoc simile est, ut apertius intelligatur, mala ratione facere, qui reprehendant eos, qui verbi causa post mortem amici liberos eius custodiant: propterea quod in cursore tantum velocitatis esse oporteat,

(a) *Ad Herem. lib. III. cap. 45.*

reat, ut efferatur usque ad finem: in amico tantum benevolentiae studium, ut ultra quam amicus sentire possit, procurrat amicitiae studio. Dictum autem simile est per brevitatem: non enim, ita ut in ceteris rebus, res ab re separata est, sed utraeque res coniuncte & confusse pronuntiatæ.

Ante oculos ponendi negotii causa sumetur similitudo per collationem, sic: uti citharoedus, quum prodierit optime vestitus, palla inaurata indutus, cum clamyde purpurea, coloribus variis intexta, & cum corona aurea magnis fulgentibus gemmis illuminata, citharam tenens exornatissimam, auro & ebore distinctam; ipse praeterea forma & specie sit & statura apposita ad dignitatem; si, quum magnam populo commoverit his rebus expectationem, repente silentio facto, vocem emittat acerbissimam cum turpissimo corporis motu; quo melius ornatus, & magis fuerit expectatus, eo magis derisus & contemptus eiicitur: ita si quis in excelsa loco, & in magnis ac locupletibus copiis collocatus, fortunæ muneribus & naturæ commodis omnibus abundabit, si virtutis, & artium, quæ virtutis magistrae sunt, egebit; quo magis ceteris rebus erit copiosus & illustris & expectatus, eo vehementius derisus & contemptus ex omni conventu bonorum eiicietur. Hoc simile, exornatione utriusque rei, & alterius inscitia artificii, alterius stultitia simili ratione collata, sub adspectum rem omnem subiecit. Dictum autem est per collationem, propterea quod proposita similitudine paria sunt relata omnia.

In similibus observare oportebit diligenter, ut quum rem afferamus similem, cuius rei causa similitudinem attulerimus, verba quoque ad similitudinem habeamus accommodata. Id est huiusmodi: ita ut hirundines aestivo tempore praesto sunt, frigore pulsae recedunt: ex eadem similitudine nunc per translationem verba sumimus; ita falsi amici sereno vitae tempore praesto sunt, simul atque hiemem fortunæ viderint, devolant omnes. Sed inventio similium facilis erit, si quis sibi omnes res animatas & inanimatas, mutas & loquentes, feras & mansuetas, terrestres & caelestes & maritimas, artificio, casu, natura compara-

tas, usitatas atque inusitatas, frequenter ante oculos posuerit, & ex his aliquam venari similitudinem studuerit, qua aut ornare, aut docere, aut apertiore rem facere, aut ponere ante oculos possit. Non enim, res tota toti rei, necesse est, similis sit; sed ad ipsum, ad quod conferetur, similitudinem habeat oportet. Exstat libellus quidam, ex D. Chrysostomi aliorumque auctorum similitudinibus collectus, qui studiosum concionatorem ad similium inventionem non mediocriter iuvare poterit. Meminerit tamen, nequaquam ex rebus sordidis & humilibus, neque item ex obscuris, nimiumque subtilibus, & ad intelligendum difficilibus similitudines sumendas esse: illud, quia orationem sordidant, hoc vero, quia obscurant; & in id praecipue nocent, ad quod similitudo reperta est.

Ceterum quod ad tractandi rationem attinet, quemadmodum exempla, sicut paullo ante diximus, quandoque brevius, quandoque latius tractantur, sic etiam similitudines. Nam aliquando uno verbo notantur: ut, non intelligis tibi vertenda vela. Aut, desine lavare laterem. Vt iam vel allegoria sit, vel metaphora. Aliquando latius explicatur, & apertius accommodatur. Quod facit Cicero pro Murena: (a) quod si e portu solventibus, ii, qui iam in portum ex alto invehuntur, praedicere summo studio solent & tempestatum rationem, & praedonum, & locorum; quod natura fert, ut eis faveamus, qui eadem pericula, quibus nos perfuncti sumus, ingrediantur: quo tandem me animo esse oportet; prope iam ex magna iactatione terram videntem, in hunc, cui video maximas... tempestates esse subeundas?

Hanc Ciceronis parabolam sic imitatur D. Hieronymus in epistola ad Heliodorum: & ego non integris rate vel mercibus moneo: sed quasi nuper naufragio eiectus in litus, timida navigaturis voce denuntio. In illo aestu charybdidis luxuriae salutem vorat. Ibi ore virgineo ad pudicitiae perpetranda naufragia scyllaeum renidens libido blanditur. Hic barbarum litus, hic diabolus pyrata cum sociis

(a) Cap. 2.

ciis portat vincula capiendis. Nolite credere, nolite esse securi, licet in modum stagni fuscum aequor arrideat, licet vix summa iacentis elementi spiritu terga crispentur, magnos hic campus montes habet. Intus est periculum, intus est hostis. Expedite rudentes, vela suspendite. Crux antennae figatur in frontibus. Tranquillitas illa tempestas est. Hic si quis singula pericula, quae a vitiis, aut improbis, aut aliunde, bonis moribus imminet, velit conferre cum singulis, quae nautis vitae discrimen adducere solent; deinde per comparisonem maius aut minus, item dissimile aut contrarium ostendere; postremo sententiis & epiphonematibus, ut inciderint, exornare: nimirum copiosissime dilatabit orationem.

Velut in hoc exemplo: ut quo pretiosior est res, hoc & diligentius solet adservari, & impendi circumspectius: ita temporis, quo nihil est pretiosius, summa habenda est ratio, ne quid effluat sine fructu. Etenim si curatores dari solent his, qui gemmas & aurum temere profundunt: quae tandem erit insania, tempus, pulcherrimum immortalis Dei munus, aut otio, aut inhonestis studiis turpiter consumere? Quid enim perdis, quum tempus perdis, nisi vitam? At vita quid esse potest carius? Et quum una gemmula perit, iacturam vocas: quum totus perit dies, hoc est, bona vitae portio, iacturam non vocas? Praesertim quum illa perdita aliunde possint recuperari, temporis irreparabilis sit iactura. Praeterea illa quum tibi pereunt, aliis plerumque lucro sunt: at temporis dispendium in nullo transit compendium. Nullum est damnum, ex quo non aliquis emolumentum aliquod sentiat, praeter damnum temporis.

Adde his, quod illarum opum iactura saepe saluti fuit. Nam divitiae plerumque vitiorum materiam ministrant, ita ut praestet temere profudisse, quam attente adservasse. Quanto cuiusque rei usus honestior, tanto turpior profusio. At nihil pulchrius, nihil praeclarius, quam bonas horas bene collocare. Illas ut quam maxime serves, saepenumero tamen vel casus eripit, vel homo tollit, ut iactura

te calamitosum dumtaxat, non etiam turpem reddat. At temporis amissio, quoniam non nisi nostro vitio contingit, non miseros solum, verum & infames reddit. Pessimum infamiae genus, quoties culpa in nullum conferri potest, praeterquam in eum, qui patitur malum. Illis fundos aut aedes mercari poteras, hoc, praeter alia animi ornamenta, parare poteras immortalitatem. Nulla est tam brevis vitae portio, in qua non magnus aliquis ad felicitatem gradus fieri possit. Postremo de illis male insumtis, patri fortassis rationem redditurus eras: de horis male transactis, Deo. Sed satis est indicasse, in quantam amplitudinem dilatari possit collatio, si quis ad eum modum singulas circumstantias velit componere atque ornare.

Hoc exemplum docendi gratia paullo fusius tractatum est. At quum in veritate dicemus, contrahenda est oratio: sic tamen ut quum a minori vel maiori ducitur similitudo, imparitas haec maxime conspicua fiat, quo vis argumenti maior appareat. Sumamus exempli gratia hoc a minori argumentum. Si dominus de servo delinquente supplicium sumit, cur non Deus ab homine peccante idem faciat? Qui igitur artis expertus est, hoc sane modo dixisset. Vide autem, quanto aliter dixerit Cyprianus contra Demetrianum: ipse, inquit, de servo tuo exigis servitium, & homo hominem parere tibi & obedire compellis, & quum sit vobis eadem fors nascendi, conditio una moriendi, corporum materia consimilis, animarum ratio communis, aequali iure & pari lege vel veniatur in hunc mundum, vel de hoc mundo postmodum recedatur; tamen nisi pro arbitrio tibi serviatur, nisi ad voluntatis imperium pareatur, imperiosus, & nimius servitutis exactor, flagellis verberas, fame, siti, nuditate, frequenter ferro & carcere affligis & crucias: & non agnoscis Dominum Deum tuum, quum sic exerceas ipse dominatum? In hoc exemplo D. Cyprianus summa tum copia, tum brevitate usus est. Summa enim brevitatis est, quod ait: non agnoscis Dominum tuum, quum sic exerceas ipse dominatum? Totam enim collationem, quam, divinae maiestatis amplitudine exposita, latius tra-

da-

Etare poterat, brevissimo sermone comprehendit. Similitudo vero, quae praecessit, copiose admodum explicata est.

Quamvis autem exemplorum & similium usus ad faciendam fidem non vulgariter adiuvent; tamen hoc praecipue praestant, quum per inductionem adhibentur. Quo in genere plurimus est Socrates Platonius. Exemplum per inductionem adhibetur hoc modo: dic mihi, quem tandem fructum attulit Demostheni insignis eloquentia? Nempe, praeter alia incommoda, infelicissimum & miserandum exitum. Quid autem praemii Tib. & C. Gracchis attulit? Nimirum caedem & miseram, nec satis honestam. Quid porro illi tantopere laudato Antonio? Certe & hic latronum sicis crudelissime confossus est. Age Ciceroni, eloquentiae parenti, quam mercedem attulit? Non ne mortem & acerbam, & miserandam? I nunc, & tot vigiliis ad summam eloquentiae laudem enitere, quae praestantissimis quibusque viris semper exitio fuit.

Simile adhibetur per inductionem, hoc modo: de navigando num melius disputabit nauta, quam medicus? An non medicus rectius de medendi ratione differet, quam pictor? Num pictor de colorum & umbrarum ac linearum ratione melius dicet, quam sutor? Num auriga de ratione moderandi currum melius, quam nauta? Ea si plurima conferantur, faciunt ut omnino probabile videatur, unumquemque melius de ea re dicturum esse, quam melius norit. Sic D. Cyprianus de simplicitate praelatorum: Ecclesia una est, quae in multitudinem latius incremento fecunditatis extenditur: quo modo Solis multi radii, sed lumen unum: & rami arboris multi, sed robur unum tenaci radice fundatum. Et quum de fonte uno rivi plurimi defluunt, numerositas licet diffusa videatur exundantis copiae largitate, unitas tamen servatur in origine. Avelle radium Solis a corpore, divisionem lucis unitas non capit. Ab arbore frange ramum, fractus germinare non poterit. A fonte praecide rivum, praecisus arescet. Sic & Ecclesia, Domini luce perfusa, per orbem totum radios suos porrigit, unum tamen lumen est, quod ubique diffunditur, nec unitas corporis

separatur : ramos suos in universam terram copia ubertatis extendit : profluentes largiter rivos latius expandit : unum tamen caput est , & origo una , & una mater fecunditatis successibus copiosa.

Haec de tropis & figuris , cum verborum , tum sententiarum , dicta sint : in quorum numero , nominibus , vi & natura explicanda vehementer dissentiunt auctores , tum Graeci , tum Latini : neque modo inter se ipsi discordant , sed , quod magis mirandum est , Cicero ipse sibi discrepat , qui ut ornatissimus in dicendo fuit , sic in praecipiendo diligentissimus. Nam , ut Quintilianus animadvertit , (a) multas figuras in tertio de oratore libro posuit , quas in oratore , postea scripto , quoniam de illis mentionem non fecit , videtur repudiasse. Quasdam posuit inter verborum exornationes , quae sententiarum sunt lumina. Quaedam ne figurae quidem sunt. Iam numerus illarum nec fuit olim certus , nec vero umquam esse poterit. Cuius rei duas ego reperio causas : altera est , quod novae figurae , Quintiliano etiam auctore , fieri adhuc & excogitari possunt : altera , quod tam verborum , quam sententiarum figurae non in formas , seu species , quarum certus est numerus , sed in partes , & quasi membra , quorum infinitior est numerus , distribuuntur.

CAP. XV.

DE VSV FIGURARVM.

NON multum prodest , figurarum nomina & definitiones tenuisse , nisi earum usum sciamus : hoc est , quonam modo , & quibus potissimum in rebus illis uti debeamus. Hoc autem ex tribus praecipuis concionatoris officiis colligendum est. Ad eum enim spectat , auditores primum docere , deinde delectare , ac postremo flectere. Et quidem docere necessitatis , delectare suavitatis , flectere victoriae esse dicunt. Ex figuris igitur quaedam ad docendum , quaedam ad delectandum , quaedam ad flectendum , & affectus

(a) *Instit. lib. VIII. cap. 3.*

aus concitandos potissimum seruiunt. Et quidem ad docendum figurae, quas inter argumentorum formas posuimus, praecipue pertinent: quibus adiungi potest ratiocinatio, quam modo inter sententiarum figuras numeravimus; & non nullae aliae, quae vel ad probandum, vel ad expositionem rerum conducunt. Inter quas merito collocatur transitio, quae, quum exponat, quid dictum sit, quidque deinceps sit dicendum, hac distinctione lucem orationi affert. Quae tamen interdum vim habet & acrimoniam, ut paullo ante admonuimus. Ad delectandum vero pertinent cum aliae figurae, tum praecipue quas inter figuras verborum in secunda & tertia classe collocavimus: quae similitum & contrariorum proportionem constant.

Ex aliis vero figuris, sive verborum, sive sententiarum, pleraeque vim & acrimoniam habere videntur. Sunt tamen aliae, & quidem non paucae, quae ad haec omnia valent. Constat enim, rerum, personarum, locorum ac temporum descriptiones, modo ad delectandum, modo vero ad amplificandum, interdum etiam ad docendum valere. Idem de contrariis diximus, quae, praeter venustatem & gratiam, vim quoque & acrimoniam in loco habent. Iam vero exempla, ac praecipue similitudines, quid non efficiunt? Quid enim rebus obscuris maiorem lucem, quam similitudines praeferunt? Quid non eisdem amplificamus, aut oculis spectandum subiicimus? Quantum praeterea iucunditatis commode inducta similitudo affert? Studiosi autem concionatoris erit, non solum numerum, & nomina, & naturam figurarum nosse, sed multo magis earum usum: ut, quibus figuris in quavis concionis parte utendum sit, probe teneat. Quum autem eadem sententia pluribus figuris explicari, & quodam modo vestiri possit; periti artificis erit, eam potissimum figuram deligere, quae sensum animi sui apertissime, brevissime, atque appositissime explicet. Haecenus de figuris: deinceps de compositione dicendum est.

DE COMPOSITIONE.

§. I.

POST tropos & figuras, de quibus haftenus dictum est, sequitur tertia pars ornatus, quae est in compositione, & in apta ac numerosa verborum collocatione, posita. Quam D. Augustinus non prorsus concionatori negligendam esse ait, licet ea in sacris litteris minus inveniantur. Eius haec verba sunt: (a) sane hunc eloquutionis ornatum, qui numerosis fit clausulis, deesse fatendum est auctoribus nostris. Quod utrum per interpretes factum sit, an, quod magis arbitror, consulto illi haec plausibilia devitaverint, affirmare non audeo, quoniam me fateor ignorare. Illud tamen scio, quod si quisquam, huius numerositatis peritus, illorum clausulas eorundem numerorum lege componat, quod facillime fit, mutatis quibusdam verbis, quae tantumdem significatione valent, vel mutato eorum, quae invenerit, ordine, nihil eorum, quae velut magna in scholis grammaticorum aut rethorum didicit, illis divinis viris defuisse cognoscet. Et multa reperiet eloquutionis genera tanti decoris, quae quidem & in nostra, sed maxime in sua lingua, decora sunt: quorum nullum in eis, quibus isti inflantur, litteris invenitur.

Sed cavendum est, ne divinis gravibusque sententiis, dum addicitur numerus, pondus detrahatur. Nam illa musica disciplina, ubi numerus iste plenissime discitur, usque adeo non defuit prophetis nostris, ut vir doctissimus Hieronymus quorundam etiam metra commemoret in Hebraea dumtaxat lingua. Cuius veritatem ut servaret in verbis, haec inde non transtulit. Ego autem, ut de sensu meo loquar, qui mihi, quam aliis, & quam aliorum est utique notior, sicut in meo eloquio, quantum modeste fieri arbitror, non praetermitto istos numeros clausularum: ita in au-

(a) *Lib. VIII. de doctr. christ. cap. 20.*

auctoribus nostris hoc mihi plus placent, quod ibi eos rarissime invenio. Haec ille. Cuius exemplum sequi poterit, quisquis aliquid eleganter scribere parat. Habet enim hoc praecipue oratio numerosa, & verba apte collocata, ut sine ostentatione & splendore verborum legentis animum adeo latenter oblectet, ut idem ipse, qui delectatur, rationem reddere nequeat, cur tantopere delectetur. Eadem etiam compositio non mediocriter intellectum adiuvat, quando orationis membra ita sibi respondent & connexa sunt, ut planissimum orationis sensum efficiant. Verum haec ad scribendum.

Ad concionandum autem, ut ii etiam, qui hac de re scripsere, fatentur, huiusmodi numerosa compositio minus necessaria est: ideoque, praetermissis praeceptis, quae multa rhetores hac de re tradunt, quam brevissime hanc partem absolvam. Cornificius ergo de ea sic ait: (a) compositio est verborum constructio, quae facit omnes partes orationis aequaliter perpolitae. Et conservabitur, si fugiemus crebras vocalium concursiones, quae vastam atque hiantem orationem reddunt, ut hoc est: vaccae aeneae amoenissimae impendebant. Et si vitabimus eiusdem litterae nimiam assiduitatem, cui vitio versus hic erit exemplo: (b)

O Tite, tute, Tati, tibi tanta, tyranne, tulisti.

Et hic eiusdem poetae:

Quidquam quisquam cuiquam, quod conveniat, neget.

Et si eiusdem verbi assiduitatem nimiam fugiemus. Ea est huiusmodi: nam cuius rationis oratio non exstet, ei rationi ratio non est fidem habere. Et si non utemur continenter similiter cadentibus verbis, hoc modo: flentes, plorantes, lacrimantes, obtestantes. Et si verborum traiectionem vitabimus, nisi quae erit concinna. Quo in vitio est Lucilius assiduus, ut hoc est in priori libro:

Has res ad te scriptas, Luci, misimus, Aeli.

Tale est illud Poliriani: legit epistolam mihi nuper ad te tuam Picus hic Mirandula noster. Quae quidem compositio puerilis ab omni gravitate aliena videtur. Item fugere oportet

ter

(a) *Ad Heren. lib. III. cap. 12.* (b) *Ennius apud Isid. etym. lib. I. cap. 35.*

ter longam verborum continuationem, quae & auditoris aures, & oratoris spiritum laedit.

§. II.

DE DVPLICI SPECIE COMPOSITIONIS.

Quisquis autem compositionis rationem exactius assequi cupit, quae res ad artificiose scribendum necessaria est, scire debet, aliam esse compositionem simplicem, aliam duplicem, sive compositam. Simplex est a numerorum lege, & periodis longioribus soluta; qua in familiari sermone utimur, quaque plerisque in locis sacrae litterae utuntur. Simplex enim veritas sermonis simplicitate gaudet. Tale est illud Geneseos: (a) in principio creavit Deus caelum, & teram. Terra autem erat inanis & vacua, & tenebrae erant super faciem abyssi, & spiritus Dei ferebatur super aquas. Dixit Deus: fiat lux, & facta est lux, &c. Composita vero, sive duplex oratio ab hac simplicitate recedens, flexuosa & longiori utitur oratione: cuius partes & velut membra explicare necesse est, ut eis cognitis, totum, quod ex illis constat, facilius agnoscatur. Ut autem in manu ipsam quidem manum velut totum quoddam consideramus, deinde digitum ut eius membrum, ac postremo digiti articulos, qui sunt variae huius membri partes; ita in oratione similes partes attendimus. Sunt enim velut articuli ea, quae Graecicommata, Latini caesa vel incisa vocant. Sunt deinde veluti membra, quae Graeci cola, Latini vero eodem nomine membra vocant. Sunt rursus periodi, quas Latini tum ambitum, tum comprehensionem, tum circumscriptionem appellant, quae pluribus membris constant.

Quia vero D. Augustinus, 4. de doctrina christiana, horum omnium exempla ex 2. ad Corinth. epistola ponit; nos, quod ille fecit, in hac parte sequemur. Caesa igitur vel incisa sunt quattuor illa: (b) in laboribus plurimis, in carceribus abundantius, in plagis supra modum, in mortibus frequenter. Et illa item quattuordecim: in itineribus saepe periculis fluminum, periculis latronum, periculis ex genere

re

(a) *Genes. 1.* (b) *2. Corintb. 11. v. 23.*

re, periculis ex gentibus, periculis in civitate, periculis in solitudine, & cetera, quae sequuntur. Membra vero sunt duo haec: (a) quis infirmatur, & ego non infirmor? Quis scandalizatur, & ego non uror? Periodus vero bimembris est apud eundem: (b) libenter suffertis insipientes, quum sitis ipsi sapientes. Trimembris vero, quum ait: (c) in quo quis audet, in insipientia dico, audeo & ego, & cetera. Quadrimembris autem, quum ait: (d) quod loquor, non loquor secundum Deum, sed quasi in stultitia, in hac substantia gloriae. Potest autem periodus plura etiam membra habere. Quum vero membra constant pari fere numero syllabarum, isocolon, sive compar, appellari, inter figuras verborum diximus.

D. autem Augustinus, posteaquam totius loci huius divinam eloquentiam miris laudibus extulisset, & dicendi flores adnotasset; potissimum commendat compositionis varietatem, quod modo caesis, modo membris, modo periodis haec oratio fluat; quodque decentissime, modo post caesa, modo post membra, periodos intermisceat: quibus orationis compositio variatur, & taedium legentis excutitur, & respirandi spatium datur. Quod Apostolum non humana quidem arte, sed divina sapientia, quam sequitur & comitatur, vera eloquentia fecisse constat. Sapientiae enim est, recte & pro dignitate res concipere & ponderare: eloquentiae vero, quod ita conceperis, simili oratione proferre. Hanc vero sapientiam sequi solet vera & naturalis eloquentia, qua viri sancti maxime utuntur, qui sine arte artificiosissimi & eloquentes sunt. Recte enim ille, (e) si rem, inquit, potenter conceperis, nec facundia dicendi, nec sermo te deseret ullus. Eadem varietate utitur D. Ambrosius, quum in libro de virgin. beatissimae Virginis virtutes laudesque perceret. Eadem enim venustate & gratia, modo post incisa, modo post membra, periodos bimembres aut trimembres interponit, ut sequenti capite videbimus.

Sciendum est etiam, duplicem esse periodi formam: alteram, qua vel caesim, vel membratim dicimus: alteram vero, qua circumscripte dicimus, qua videlicet ab initio
ad

(a) *Vers. 29.* (b) *Vers. 19.* (c) *Vers. 21.* (d) *Vers. 17.* (e) *Horat. in art. poetica.*

ad finem usque quasi in orbem inclusa fertur oratio, quae nisi in fine sententiam non absolvit. Itaque imaginem refert vel perfecti syllogismi, vel interdum etiam propositionis hypotheticae; idque modo brevius, modo longius, ut instituta ratio vel argumentatio postulaverit. Hoc autem praeter ea exempla, quae modo ex Paulli epistola proposita sunt, sequentia quoque declarant. Membratim quidem fuit illa D. Cypriani periodus contra Demetrianum: (a) mundus... occasum sui rerum labentium probatione testatur, non hieme nutriendis seminibus tanta imbrium copia est, non frugibus aestate torrendis solita flagrantia est, nec sic verna de temperie sata laeta sunt, nec adeo arboreis feribus autumnus fecunda sunt. Minus de effosis & fatigatis montibus eruuntur marmorum crustae, minus argenti & auri opes suggerunt exhausta iam metalla, & pauperes venae. Caesim vero perfluit, quae deinde sequitur: brevatur in dies singulos... ac deficit in agris agricola, in mari nauta, miles in castris, innocentia in foro, iustitia in iudicio, in amicitiis concordia, in artibus peritia, in moribus disciplina. Huiusmodi autem periodi, quamvis possint bimembres esse, maiorem tamen gratiam habent, quum vel trimembres sunt, vel etiam quadrimembres: quorum illa Graeci tricola, haec vero tetracola vocant. Tricola, ut illud: (b) vicit pudorem libido, timorem audacia, rationem amentia. Tetracola, ut illud Cypriani: quemadmodum sponte Sol radiat, dies illuminat, fons rigat, imber irrorat: ita se caelestis Spiritus infundit. Singula quoque verba caesam orationem faciunt, ut illud: acrimonia, voce, vultu inimicos perterruisti.

Periodus vero, qua circumscripte dicimus, in qua, ut Aristoteles ait, principio ita respondet finis, ut plenum sensum faciat, absolvatque sententiam, quandoque brevior, quandoque longior est. Brevis est illa:

..... *Finem qui quaeris amor:*

Cedit amor rebus: res age, tutus eris.

Hic perfectus syllogismus est. Brevior item & illa D. Cypriani in sermone de lapsis: nemo, fratres, nemo hanc con-

(a) *Sub initium.* (b) *Cic. pro Cluent. cap. VI.*

confessorum gloriam mutilet : quum dies negantibus praestitutus excessit , quisquis professus intra diem non est, christianum se esse confessus est. Paulo vero longior illa eiusdem , qua sermonem de patientia exorditur hoc modo: de patientia loquuturus , fratres dilectissimi , & utilitates eius & commoda praedicaturus , unde potius incipiam, quam quod nunc quoque ad audientiam vestram patientiam video esse necessariam ; ut nec hoc ipsum , quod auditis & discitis , sine patientia facere possitis. Paulo etiam longior est ea , quae deinde sequitur , periodus : nec inuenio , fratres dilectissimi , inter ceteras caelestis disciplinae vias , quibus ad consequenda divinitus praemia spei ac fidei nostrae secta dirigitur , quid magis sit vel utilius ad vitam , vel maius ad gloriam , quam ut qui praeceptis dominicis obsequio timoris ac devotionis innitimur , patientiam maxime tota observatione tueamur. Serviunt autem huiusmodi periodis frequenter coniunctiones adversativae, quamquam , etsi , licet : & item comparativae , ut , sicut , ita , &c. quia ubi hae particulae intercedunt , sensus orationis nisi in eius fine non absolvitur : quod huius periodi, quo circumscripte dicimus , proprium est. Participia quoque in hoc praecipue reperta sunt , ut plura verba sub una circumductione continerentur. Participia namque verborum vim habent.

His tribus compositionis speciebus , caesis , membris , & periodis, additur quarta, Graecis peribole dicta, id est , circuitus , aut flexus. Ea vero est oratio sinuosa & prolixior, constans fere pluribus membris , quam vulgata periodus : & hic flexus proprius est historicorum , in quo plura membra & commata sua serie ita se aequaliter consequuntur , ut tamen perspicua sit continuata & longior constructio. Differt autem peribole a periodo non ita multum , nisi quod in periodo tam rerum , quam orationis consequentia & cohaerentia requiritur bene coagmentata. Sed peribole est historica & longior constructio orationis , non ita nexis inter se antecedentibus & consequentibus , quin facillime possit in sua membra resolvi. Cavere tamen oportet , ne il-

la

la sit iusto prolixior, & obscuritatem vel taedium pariat. Summatim ergo, periodus est circuitus orationis oratoriae, peribole est circuitus orationis historicae.

Talis est illa Sanazarii de partu virginis oratio, qua sanctorum patrum in limbo residentium laetitiam de filii Dei conceptu grandi orationis figura, de qua mox dicemus, his verbis describit: (a)

*Interea maneis descendit fama sub imos,
Pallenteisque domos veris rumoribus implet:
Optatum adventare diem, quo tristia linquant
Tartara, & e visceribus fugiant Acheronta tenebris;
Immanemque ululatum, & non laetabile murmur
Tergemini canis, adverso qui carceris antro
Excubat insomnis semper, viscerumque trifauci
Horrendum, stimulante fame, sub nocte profunda
Personat, & morsu venienteis adpetit umbras.*

Huic vero quintam addunt constructionis speciem, quam Aristoteles *camptera*, Latini tractum vel nexum vocant, aut productionem spiritus: quae re vera idem est, quod peribole, quam definivimus; nisi quod est paullo longior, & quo longior, eo elegantior, dum tamen, ut diximus, modum in hac longitudine servet. Exemplo erit illud D. Cypriani in epistola ad Cornelium, quod etiam grandi figura profluit. Tuetur enim vir sanctus episcopatus sui dignitatem adversus haereticos, qui illum episcopum esse negabant, eiusque vitae & electioni detrahebant. Sic igitur ait: ceterum dico, dico enim provocatus, dico dolens, dico compulsus, quando episcopus in locum defuncti substituitur, quando populi universi suffragio deligitur, quando Dei auxilio in persecutione protegitur, collegis omnibus fideliter iunctus, plebi suae in episcopatu quadriennio iam probatus, in quiete serviens disciplinae, in tempestate proscriptus, applicato & adiuncto episcopatus sui nomine, toties ad leonem petitus, in circo, in amphiteatro dominicae donationis testimonio honoratus: quum talis frater a quibusdam desperatis, & perditis, & extra Ecclesiam consti-

(a) Av. 225.

stitutis impugnari videtur, apparet quis impugnet: non scilicet Christus, qui sacerdotes aut constituit, aut protegit: sed ille, qui Christi adversarius, & Ecclesiae eius inimicus, ob hoc Ecclesiae praepositum sua infestatione persequitur, ut gubernatore sublato, atrocius atque violentius circa Ecclesiae naufragia grassetur. Haecenus ille.

His igitur quinque constructionis speciebus pro rerum natura, quas tractamus, utendum erit. Quo fiet, ut satietatem varietate vitemus, & rebus ipsis suum velut habitum & colorem tribuamus. Periti autem artificis erit, animadvertere, quando his vel illis uti debeat: neque enim huius rei plena observatio praeceptis artis comprehendere potest. Illud tamen constat, caesa & membra non raro instandi gratia adhiberi, praesertim quum plura sint. Periodis tum in argumentando, tum in exordiis frequentius utimur, quamquam hic longioribus, illic vero brevioribus. Peribole ad historiae narrationes & amplificationes accommodatior est. Quamquam haec omnia & in aliis quoque orationis partibus non inepte locum habent. Haecenus de compositione, quam tertiam ornatus partem esse diximus, qua leniter, iucunde & aperte decurrit oratio. Deinceps de quarta eloquutionis virtute, nempe apte dicendi, agendum est.

CAP. XVII.

DE APTE DICENDO.

HAecenus de tribus eloquutionis virtutibus, nempe latinitate, perspicuitate, & ornatu, dictum est. De ornatu quoque, qui est tum in verbis, tum in figuris, tum etiam in compositione, disseruimus. Sequitur apte dicendi ratio, quae & ipsa ornate dicendi pars maxima est. Cicero autem paucis totam eius naturam atque rationem breviter complexus est, quum II. de oratore libro ait, non omni causae, neque auditori, neque personae, nec tempori congruere orationis unum genus. His igitur rebus apte atque apposite orationem accommodare, id demum apte dicere est.

est. Quod quidem, ut Fabius ait, non in eloquutione tantum, sed in inventione quoque spectatur. Nam si tantum habent etiam verba momentum, quanto res ipsae maius?

Quattuor sunt autem, quae praecipue observare debet, qui apte dicere cupit, nempe ut oratio tum dicenti, tum audienti, tum rebus ipsis, quas tractat, & officio, quod gerit, maxime conveniat. Hoc est, quis dicat, cui dicat, quae de re dicat, & quid potissimum dicendo consequi velit. In his igitur omnibus, quid maxime deceat, considerandum est: quod quidem non ad artis praecepta solum, sed ad prudentiae iudicium, quod sicut rerum omnium gerendarum, ita dicendarum moderator est, praecipue pertinet. Inter eius autem officia & maximum & difficilimum est, quid ubique deceat, intelligere. Hinc enim decorum illud nascitur, quod omnibus in rebus captandum est. Ceterum quid in his quattuor rebus, quas supra memoravimus, maxime deceat, ordine tractandum est.

Primum igitur, eius, qui dicit, ratio habenda est. Non enim eadem oratio omnibus convenit: aliter enim iuniores, aliter senes, aliter principes viri, aliter humiles atque privati, aliter inferioris ordinis ministri, aliter episcopi & superiores praelati dicere debent. His enim multa licent, quae aliis non perinde licent. Quod quidem in D. Chrysostomi concionibus apparet: in quarum exordiis auditorum benevolentiam captat, suam erga illos caritatem, paternamque curam & providentiam declarans, illorumque interdum laudes & virtutes praedicans. Hoc autem, quod episcopum & virum sanctissimum maxime decebat, alios non perinde deceret. Quum enim, iuxta Fabii sententiam, (a) rhetorica sit prudentia dicendi, praecipuum autem prudentiae opus sit, intelligere, quid maxime in agendo deceat; non minus eiusdem erit, videre, quid unamquamque personam deceat. Vnde quum Socrati Lyfias orationem, quam in eius defensionem composuerat, recitasset: praeclara, inquit, & elegans oratio est, sed non convenit Socrati. Erat enim forense instituto aptior, quam philosopho,

(a) *Instit. lib. II. cap. 20.*

pho, ac tali philosopho. (a) Rursus Lysiae percontanti, cur, si bonam iudicaret orationem, putaret sibi non convenire: nonne, inquit, fieri potest, ut amictus aut calceus elegans sit ac pulcher, qui tamen alicui non conveniat? Ad omnes tamen in universum pertinet, ne quid dicant, quo auditores offendi iure possint: hoc est, ut nihil insolenter, nihil arroganter, nihil invereconde, nihil petulanter, nihil contumeliose, nihil sordide, nihil scurriliter, nihil abiecte, nihil licenter, aut alias indecenter & vitiose dicant; sed totus orationis character modestiam, humanitatem, caritatem, & communis salutis studium, & ardens verae pietatis desiderium prae se ferat. Haec autem modestia cum aliis concionis partibus, tum exordiis maxime convenit, quae submissa esse debent & verecunda.

Has in dicendo virtutes cum alii patres, tum praecipue D. Cyprianus ubique praefert: nihil enim in eo reperies, quod ad ostentationem ingenii videri possit adscitum. Talis ubique sermonis habitus est, ut loqui sentias vere christianum episcopum, & martyrio destinatum. Pectus ardet evangelica pietate, & pectori respondet oratio: loquitur diserta, sed magis fortia, quam diserta. Hunc autem pietatis & dilectionis affectum declarat, quum in concionibus suis hanc vocem caritatis plenissimam frequentissime repetit: fratres dilectissimi. Sed hunc tamen affectum in sermone de lapsis praecipue declaravit; cuius haec verba sunt: quid hoc loco faciam, dilectissimi fratres, fluctuans vario mentis aestu? Quid, aut quo modo dicam? Lacrimis magis, quam verbis, opus est ad exprimendum dolorem, quo corporis nostri plaga deflenda est, quo populi aliquando numerosi multiplex lamentanda iactura est. Quis enim sic durus ac ferreus, quis sic fraternae caritatis oblitus, qui inter suorum multiformes ruinas, & lugubres ac multo squalore deformes reliquias constitutus, siccos oculos tenere praevaleat? nec erumpente statim fletu prius gemitus suos lacrimis, quam voce, depromat? Quis igitur in his verbis pectus apostolicum, & caritatem plusquam paternam non agnoscat? Hanc igitur mentem, hunc de tot pereun-

X

tium

(a) *Quint. lib. XI. cap. 1. Cic. de orat. lib. I. cap. 10. Val. Max. lib. VI. tit. 4.*

tium animarum interitu dolorem Ecclesiastes aliqua saltem ex parte imitari studeat; & , quatenus cuique liceat , dicendo quoque manifestare curabit.

Verum hoc in loco non tam virtutem nostram ostendere , quam vitia fugere , studeamus. Illud enim ostentationi proximum est , si nimium sit ; in hoc autem nihil esse potest nimium. Inter cetera autem vitia , quae fugere debemus , omnem vitiosam sui iactationem maxime fugiendam esse , monet Fabius , (a) quod ea audientibus afferat non fastidium modo , sed plerumque etiam odium. Habet enim mens nostra natura sublime quiddam & erectum , & impatiens superioris. Ideoque abiectos , aut submittentes se , libenter allevamus , quia hoc facere tamquam maiores videmur : & quoties discessit aemulatio , succedit humanitas. At qui se supra modum extollit , premere ac despiciere creditur , nec tam se maiorem , quam minores ceteros facere. Inde invident humiliores. Hoc vitium est eorum , qui nec cedere volunt , nec possunt contendere : rident superiores , improbant boni. Haecenus ille.

Ab hoc autem vitio non admodum abhorrent , qui , ostentandi ingenii & eruditionis gratia , difficiles quaestiones , quae nihil ad animarum salutem conducunt , in concionibus tractant. Hac enim ratione se ipsos ostentare & venditare populo volunt. Nec minus peccant , qui , eloquentiae laudem affectantes , plurima verba idem significantia temere congerunt : quibus apud imperitum populum & rudem concionem hac loquendi facultate , & volubilitate linguae , admirationem sui faciant : quum tamen nihil esse possit magis eloquentiae contrarium. Haec sunt igitur , & his similia , quae qui dicit , partim cavere , partim observare debet.

Nec solum quis dicat , sed apud quos etiam dicat , considerandum esse , ratio ipsa monet. Aliter enim apud rusticos & agrestes homines , aliter apud eruditos , aut nobiles , aut principes viros , & delicatas aures , dicendum est. Apud hos enim sublimis & elaborata oratio , apud illos vero concitator esse debet. Praeterea aliter apud monachos & vir-

gi-

(a) *Instit. lib. XI. cap. 10*

gines Deo dicatas, hominesque divinarum rerum studio & contemplationi addictos; aliter apud eos, qui sine ullo divini numinis metu in omnia scelera ruunt. Denique, pro varietate tum personarum, tum vitiorum, quae in populo grassantur, varie sermo tractandus est. Cuius rei monitorem habemus Apostolum, qui Timotheo praescripsit, (a) quid viros, quid uxores, quid seniores, quid iuniores, quid divites docere debeat. Quin & Ecclesiasticus huius rei nos admonuisse videtur, quum ait: (b) cum viro irreligioso tracta de sanctitate; & cum iniusto, de iustitia; & cum muliere, de his, quae aemulatur; cum timido, de bello; cum negotiatore, de traiectione; cum emtore, de venditione; cum viro livido, de gratiis agendis; cum impio, de pietate; cum inhonesto, de honestate; cum operario annuali, de consummatione anni; cum servo pigro, de multa operatione.

His igitur verbis non obscure Ecclesiasticus docet, pro auditorum varietate, sermonem esse varie accommodandum. Hoc autem parum advertunt, qui, quum neque episcopi, neque urbium praefecti, neque cognitores causarum in concione adsunt, adversus illos tonare ac fulminare solent; quum hoc non sit plebem erudire, sed indignationem atque odium, quod forte adversus illos conceperunt, irritare atque exsatiare: quod est a christiana pietate maxime alienum. Sed haec ad auditorum personam spectant.

Nunc, quid res ipsas, de quibus dicimus, & concionatoris officium maxime deceat, consideremus. Quia vero hoc non solum ad eloquendi, sed etiam ad inveniendi rationem pertinet; quid in hoc genere concionatorem deceat, in superiori libro, (c) quum de inveniendi ratione ageremus, non nulla observanda esse docuimus. Sed ne nihil hoc in loco dicamus; ille apte dicere, quod ad inveniendi rationem attinet, putandus est, qui pro ratione causae, quam tractat, commodissima, maximeque propria, & ad rem potissimum pertinentia dicit: neque ab ea, vel ad communia loca, vel ad peregrina, minimeque instituto suo deservientia, nisi

X 2

quum

(a) 1. *Timoth.* 5. (b) *Ecclesi.* 37. (c) *Cap.* 2. *U* *seqq.*

quum hoc ratio argumenti exigit, digreditur. Qui enim ita vagatur, quamvis eleganter fortasse dicat, apte tamen minime dicit; quia non id agit, cuius gratia dicere instituit. In quo vitio sunt concionatores ii, qui, instituti sui obliti, quod in hominum moribus castigandis & instituendis positum est, aliena, minimeque huic proposito servientia, tractant; miserosque auditores, qui huius rei gratia conciones adeunt, ieiunos vacuosque domum dimittunt. Verum haec in rebus ipsis observatio, ut modo diximus, ad inventionis rationem pertinet. Quod autem eloquutionis genus rebus ipsis, pro ipsarum natura & varietate, conveniat, in quo huius operis difficultas praecipue sita est, deinceps aperiendum est. Quae enim haecenus diximus, quamvis maxime necessaria, quivis concionator, vel mediocriter eruditus, facile advertere & praestare poterit; praesertim si fraterna caritate praeditus sit. Difficiliora sunt, quae sequuntur, & quae non tam a communi prudentia, quam ab artis praeceptionibus, maturo iudicio, & dicendi exercitatione pendent.

§. I.

*CVIVS MODI ELOQVVTIONEM VARIA GENERA
causarum, variaque concionatoris officia exigant.*

SCiendum est igitur, non idem eloquutionis genus omnibus causis & argumentis convenire. Hoc enim perinde esset, atque idem indumenti genus diversis personarum statibus, nempe dominis & servis, viris & feminis, sacris Deo hominibus, & profanis, velle accommodare: quum constet, unicuique harum personarum suum peculiarem habitum & cultum, pro cuiusque personae conditione & fortuna, convenire. Sic igitur aliud eloquutionis genus in parvis causis, aliud in mediocribus, aliud in gravibus desideratur. Qua de re sic Fabius ait: (a) parata... facultate scribendi, &c. proxima est cura, ut dicamus apte: quam virtutem quartam eloquutionis Cicero (b) demonstrat, quaeque, meo quidem
iu-

(a) *Quintil. lib. XI. cap. 1.* (b) *De orat. lib. I. cap. 6.*

iudicio, maxime necessaria est. Nam quum sit ornatus orationis varius & multiplex, conveniatque alius alii; nisi fuerit accommodatus rebus atque personis, non modo non illustrabit eam, sed etiam destruet, & vim rerum in contrarium vertet. Quid enim prodest esse verba & latina, & significantia, & nitida, ... nisi cum iis, in quae *auditorem* duci formarique volumus, consentiant? Si genus sublime dicendi parvis in causis, parvum limatumque grandibus, laetum tristibus, lene asperis, minax supplicibus, submissum concitatis, trux atque violentum iucundis adhibeamus; ut monilibus, & margaritis ac veste longa, quae sunt ornamenta feminarum, deformentur viri: nec habitus triumphalis, quo nihil excogitari potest augustius, feminas deceat. Haec Fabius.

Idemque lib. VIII. de vario orationis ornatu differens, eandem ferme sententiam, aliquanto tamen apertius, explicat his verbis: (a) illud observatione dignius, quod hic ipse honestus ornatus, pro materiae genere, debet esse variatus. Atque ut a prima divisione ordiar, non idem demonstrativis, & deliberativis, & iudicialibus causis conveniet. Namque illud genus ostentationi compositum solam perit audientium voluptatem; ideoque omnes dicendi artes aperit, ornatumque orationis exponit: ut qui non insidietur, nec ad victoriam, sed ad solum finem laudis & gloriae tendat. Quare quidquid erit sententiis popolare, verbis nitidum, figuris iucundum, translationibus magnificum, compositione elaboratum, velut institor quidam eloquentiae intruendum, & paene pertractandum dabit. Nam eventus ad ipsum, non ad causam, refertur. At ubi res agitur, & vera dimicatio est, ultimus fit famae locus. Praeterea non debet quisquam, ubi maxima rerum momenta versantur, de verbis esse sollicitus. Neque hoc eo pertinet, ut in his nullus sit ornatus; sed uti pressior & severior, & minus confusus, praecipue ad materiam accommodatus. Nam & suadendo, sublimius aliquid senatus, concitatus populus; & in iudiciis publicae, capitalesque causae poscunt accura-

X 3

tius

(a) *Quintil. lib. VIII. cap. 3.*

tius dicendi genus. At privatum consilium, causasque paucorum, ut frequenter accidit, calculorum, purus sermo, & dissimilis curae, magis decuerit. An non pudeat certam creditam pecuniam periodis postulare? aut circa stillicidia affici? aut in mancipii redibitione sudare? Haecenus Fabius.

Cornificius autem haec omnia dicendi genera ad tria revocat his verbis: (a) tria sunt *dicendi* genera, quae nos figuras appellamus, in quibus omnis oratio non vitiosa consumitur: unam gravem, alteram mediocrem, tertiam extenuatam vocamus. Gravis est, quae constat ex verborum gravium laevi & ornata constructione. Mediocris est, quae constat ex humiliore, neque tamen ex infima & pervulgatissima verborum dignitate. Attenuata est, quae demissa est usque ad usitatissimam puri sermonis consuetudinem. In gravi figura consumetur oratio, si quae cuiusque rei poterunt ornatissima verba reperiri, siue propria, siue translata, siue extranea, ad unamquamque rem accommodabuntur: & si graves sententiae, quae in amplificatione, & commiseratione tractantur, eligentur: & si exornationes sententiarum, aut verborum, quae gravitatem habebunt, ... adhibebuntur. In mediocri autem figura versabitur oratio, si haec, ut ante dixi, aliquantulum demiserimus, neque tamen ad infimum descenderimus. Attenuatum autem figurae genus, ad infimum & quotidianum sermonem demissum est.

Haec autem tria dicendi genera, quae rebus ipsis, quas dicimus, pro earum natura atque varietate, aptanda sunt, tribus etiam oratoris aut concionatoris officiis praecipue convenire, D. Augustinus ex Ciceronis sententia auctor est. Eius haec verba sunt: (b) dixit.. quidam eloquens, & verum dixit, (c) ita dicere debere eloquentem, ut doceat, ut delectet, ut flectat. Deinde addidit: docere necessitatis est, delectare suavitatis, flectere victoriae. Horum trium, quod primo loco positum est, hoc est, docendi necessitas, in rebus est

con-

(a) *Ad Heren. lib. III. cap. 8.* (b) *August. III. de doctrin. christian. cap. 12.* (c) *Cic. in orat. cap. 8.*

constituta, quas dicimus; reliqua duo, in modo quo dicimus... Sicut est autem, ut teneatur ad audiendum, delectandus auditor; ita flectendus, ut moveatur ad agendum. Et sicut delectatur, si suaviter loquaris; ita flectitur, si amet, quod polliceris; timeat, quod minaris; oderit, quod arguis; quod commendas, amplectatur; quod dolendum exaggeras, doleat: quum quid laetandum praedicas, gaudeat; misereatur eorum, quos miserandos ante oculos dicendo constituis; fugiat eos, quos cavendos terrendo proponis: & quidquid aliud grandi eloquentia fieri potest, ad commovendos animos auditorum; non, quid agendum sit, ut sciant, sed ut agant, quod agendum esse iam sciunt.

Si autem adhuc nesciunt, prius utique docendi sunt, quam movendi. Et fortasse, rebus ipsis cognitis, ita movebuntur, ut eos non opus sit maioribus eloquentiae viribus iam moveri. Quod tamen, quum opus est, faciendum est. Tunc autem opus est, quando, quum scierint, quod agendum sit, non agunt: ac per hoc docere necessitatis est. Possunt enim homines & agere, & non agere, quod sciunt. Quis autem dixerit, eos agere debere, quod nesciunt? Et ideo flectere necessitatis non est, quia non semper opus est, si tantum docenti, vel etiam delectanti, consentit auditor. Ideo autem victoriae est flectere, quia fieri potest, ut & doceatur, & delectetur, & non assentiatur... (a) Quum vero id docetur, quod agendum est, & ideo docetur, ut agatur: frustra persuadetur verum esse, quod dicitur; frustra placet modus ipse, quo dicitur, si non ita dicitur, ut agatur. Oportet igitur, eloquentem ecclesiasticum, quando suadet aliquid, quod agendum est, non solum docere, ut instruat...; verum etiam flectere, ut vincat. Haec Augustinus.

Ex his autem tribus concionatoris officiis colligit idem sanctus, tria esse dicendi genera, sive tres formas atque figuras, quae his tribus officiis respondeant. Sic enim eodem in loco ait: (b) quum vir eloquens tria praestare debeat, id est, ut doceat, ut delectet, ut flectat; ad eundem etiam haec tria dicendi genera pertinere ait idem ipse

Romani auctor eloquii, quum itidem dixit: is igitur erit eloquens, qui poterit parva submisſe, modica temperate, magna granditer dicere: tamquam ſi adderet etiam illa tria, & ſic explicaret unam eandemque ſententiam, dicens: is erit igitur eloquens, qui ut doceat, poterit parva ſubmiſſe; ut delectet, modica temperate; ut ſelectat, magna granditer dicere. Haſtenus Auguſtinus. Ex cuius verbis aperte liquet, haec tria dicendi genera ad tria illa concionatoris officia, docendi, delectandi, atque movendi, pertinere.

§. II.

DE TRIBVS ELOQVENDI GENERIBVS, & quibus potiffimum ornamentis unumquodque eorum conſtet.

QUum igitur & varietates cauſarum, de quibus ante diximus, & haec tria concionatoris officia, quae modo expoſuimus, variam eloquutionis rationem habitumque requirant; de his modo, quot ſint, & quibus potiffimum ornamentis conſtent, ex D. Auguſtini ſententia dicendum eſt. Sunt igitur, ut modo diximus, tria dicendi genera: unum ſubmiſſum, tenue, & acutum: alterum vehemens, copioſum, & grave: tertium eſt interiectum, & intermedium, & quaſi temperatum; in quo nec eſt acumen ſuperioris generis, nec vis poſterioris.

In genere autem ſubmiſſo & acuto forma debet eſſe orationis, a vinculis numerorum libera & ſoluta; non tamen vaga, ut ingredi libere, non ut licenter videatur errare. Diligentia etiam conglutinandi verba praetermittenda eſt, & omnis inſignis ornatus removendus. Ponentur tamen acutae crebraeque ſententiae: ornamenta verborum & ſententiarum cum tropis verecunde parceque adhibebuntur: translationes tamen poterunt eſſe crebriores; nec tam crebrae tamen, quam in genere dicendi ampliſſimo. Genus temperatum uberius eſt aliquanto & robuſtius, quam hoc humile, de quo dictum eſt: ſubmiſſius autem, quam illud, de quo

quo dicetur, amplissimum. Huic omnia dicendi ornamenta conveniunt, plurimumque est in hac oratione suavitatis. In idem cadunt lumina omnia & verborum & sententiarum. Hoc in genere nervorum vel minimum, suavitatis autem est vel plurimum. At illud amplum, grave, copiosum, ornatum, vim profecto habet vel maximam: modo enim perfringit, modo irrepit in sensus, inserit novas opiniones, elevat insitas. Hic orator & defunctos excitabit, ut Appium Caecum. Apud hunc & patria ipsa exclamabit, aliquemque, ut apud Ciceronem in oratione contra Catilinam in senatu, alloquetur. Hic & amplificationibus quoque eriget, & omne genus affectuum, pro rei natura, quam tractat, excutere & concitare poterit.

Ceterum, quod ad verborum delectum attinet, genus hoc dicendi amat verba ampla & magnifica, & in rebus atrocibus, ut ante diximus, auditu ipso aspera & veluti confragosa. Ex tropis autem illustres metaphoras, epitheta, & hyperbolem, similesque tropos. Huiusmodi sunt illa Prophetæ verba: (a) inebriabo sagittas meas sanguine, & gladius meus devorabit carnes. Et: (b) ignis accensus est in furore meo, & ardebit usque ad inferni novissima: devorabitque terram cum germine suo: & montium fundamenta comburet. Inebriare autem sagittas sanguine, & gladium devorare carnes, insignes illae & audaces metaphorae sunt, de quibus ante diximus: devorare autem terram, & montium fundamenta comburere, hyperbole esse videtur, quae ad rem augendam maxime accommodata est. Epitheta quoque, & adverbia epitalim, hoc est, incrementum, significantia ad hoc genus praecipue pertinent.

Haec omnia breviter indicat illa D. Cypriani oratio in epistola ad Cornelium, ubi ait: (c) Gentiles & Iudaei minantur, & haeretici atque omnes, quorum pectora & mentes diabolus obsidet, venenatam rabiem suam quotidie furiosa voce testantur: non tamen idcirco cedendum est, quia minantur; aut ideo adversarius & inimicus maior est Christo, quia tantum sibi vindicat & assumit in saeculo.

Ma-

(a) *Deut.* 32. (b) *Ibid.* (c) *Lib. I. epist.* 3.

Manere debet apud nos , frater , fidei robur immobile , & stabilis atque inconcussa virtus contra omnes incurfus atque impetus oblatrantium fluctuum , velut petrae obiacentis fortitudine & mole debet obistere. Huius autem figurae in Herenniana rhetorica commodissimum exstat exemplum : quod vel solum , quid hoc dicendi genus requirat , absque ullis etiam artis praeceptionibus poterit indicare : ideoque quamvis sententia , quae in eo tractatur , ab instituto nostro non nihil dissideat , libuit tamen hoc in loco adscribere : quoniam facile cuique erit , ex similibus similia effingere atque perficere. Sic igitur ait : (a) quis est vestrum , iudices , qui satis idoneam possit in eum poenam excogitare ; qui prodere hostibus patriam cogitarit ? Quod maleficio cum hoc scelere comparari ? Quod huic maleficio dignum supplicium potest inveniri ? In his , qui violassent ingenuum , matremfamilias constuprassent , pulsassent aliquem , aut postremo necassent , maxima supplicia maiores nostri consumserunt : huic vero truculentissimo ac nefario facinori singularem poenam non reliquerunt. Atque in aliis maleficiis ad singulos , aut ad paucos , ex alieno peccato iniuria pervenit : huius sceleris qui sunt affines , consilio universis civibus atrocissimas calamitates machinantur. O feros animos ! O crudeles cogitationes ! O derelictos homines ab humanitate ! Quid agere ausi sunt , aut cogitare potuerunt ? Quo pacto hostes , revulsis maiorum sepulcris , deiectis moenibus , ovantes irruerent in civitatem : quo modo Deum templis spoliatis , optimatibus trucidatis , aliis arreptis in servitutem , matribusfamilias & ingenuis sub hostilem libidinem subiectis , urbs acerbissimo concidat incendio conflagrata : qui se non putant id , quod voluerint , ad exitum perduxisse , nisi sanctissimae patriae miserandum scelerati viderint cinerem. Nequeo verbis consequi , iudices , indignitatem rei : sed negligentius id fero , quia vos mei non indigetis. Vester enim vos animus amantissimus reipub. facile edocet , ut eum , qui fortunas omnium voluerit prodere , praecipitem perturbetis ex ea civitate , quam ipse spurcissimorum hostium

(a) *Lib. III. cap. 8.*

stium dominatu nefario voluit obruere. Haftenus Cornificius, qui hoc amplissimo dicendi genere prodicionis indignitatem & atrocitatem exaggerat.

Ex figuris autem verborum & sententiarum, quas vim & acrimoniam habere diximus, (a) quum de illis loqueremur, & praecipue descriptiones rerum & personarum, conformatio, & congeries illa, quae Graece synathrismus dicitur, (b) qua multa simul, quae rei magnitudinem attollunt, unum in locum congeruntur, ad hoc genus pertinent. Compositio vero longiores periodos, & flexuosam orationis formam, quae multa caesa & membra includit, desiderat: de quibus paullo ante, (c) propositis eiusdem D. Cypriani exemplis, (d) loquuti sumus. Omnes vero amplificandi rationes, de quibus etiam suo loco diximus, huic generi praecipue serviunt. In hoc autem genere licet interdum, quum rei dignitas postulat, tonare ac fulminare, & caelum ac terram invocare: quale est illud Isaiae exordium: (e) audi caelum, & auribus percipe terra: quia Dominus loquutus est. Et apud Ieremiam Dominus, (f) obstupefcite caeli super hoc, &c.

CAP. XVIII.

QVIBVS IN REBVS, HIS TRIBVS DICENDI figuris sive generibus uti debeamus: ex D. Augustini sententia, lib. IIII. de doctrina christiana.

Quoniam, quid unamquaeque harum figurarum exigit, & quibus potissimum ornamentis conficiatur, ostendimus; ordo exigit, ut, quando non omnes hae formae omnibus causis & argumentis conveniunt, quibus potissimum unaquaeque harum conveniat, explicemus. Hunc autem laborem D. Augustinus in III. de doctrina christiana libro nobis ademit, qui, variis sanctarum scripturarum, & sanctorum patrum propositis exemplis, praecipuam rhetoricae artis partem copiose tractavit. Quia vero is non nulla alia huic praeceptioni obiter admiscet, ne harum
re-

(a) Pag. 255. & 289. (b) Pag. 278. (c) Pag. 312. seqq.
(d) Pag. 316. seqq. (e) Cap. 1. (f) Ierem. 2.

rerum admixtio lectori tenebras offundat, nos, quae ad hanc praeceptionem maxime pertinent, ab aliis seiuncta, eiusdem D. Augustini verbis hoc in loco adscribenda curavimus. Is igitur, ubi ex Ciceronis mente (a) dixisset, eum esse eloquentem, qui ut doceat, parva submisit: ut delectet, modica temperate, magna granditer diceret, sic ait. (b) „ Haec autem tria ille, sicut ab eo dicta sunt, in causis „ forensibus posset ostendere: non autem hic, hoc est, in „ ecclesiasticis quaestionibus, in quibus huiusmodi, quem „ volumus informare, sermo versatur. In illis enim ea par- „ va dicuntur, ubi de rebus pecuniariis iudicandum est: ea „ magna, ubi de salute ac de capite hominum: ea vero, „ ubi nihil horum iudicandum est, nihilque agitur, ut „ agat, sive decernat, sed tantum modo ut delectetur au- „ ditor, inter utrumque quasi media, & ob hoc modica, „ hoc est, moderata, dixerunt. Modicis enim modus nomen „ imposuit. Nam modica pro parvis abusive, non proprie, „ dicimus. In istis autem nostris, quandoquidem omnia, ma- „ xime quae de loco superiori populis dicimus, ad ho- „ minum salutem, nec temporariam, sed aeternam, refer- „ re debemus, ubi etiam cavendus est aeternus interitus, „ omnia magna sunt, quae dicimus: usque adeo, ut nec „ de ipsis pecuniariis rebus, vel adquirendis, vel amitendis „ parva videri debeant, quae doctor ecclesiasticus dicit, „ sive sit illa magna, sive parva pecunia. Neque enim par- „ va est iustitia, quam profecto & in parva pecunia custodi- „ re debemus, dicente Domino: (c) qui in minimo fidelis „ est, & in magno fidelis est. Quod ergo minimum est, mi- „ nimum est: sed in minimo fidelem esse, magnum est. Nam „ sicut ratio rotunditatis, id est, ut a puncto medio omnes „ lineae pares in extrema ducantur, eadem est & in magna „ disco, quae in nummulo exiguo: ita ubi parva iuste ge- „ runtur, non minuitur iustitiae magnitudo.

„ (d) Et tamen quum doctor iste debeat rerum dictator es- „ se magnarum, non semper eas debet granditer dicere, sed „ sub-

(a) *In libris de Orat. variis locis haec ad sensum; totidem verbis, nullibi.* (b) *Cap. 18.* (c) *Luc. 16.* (d) *Cap. 19.*

„ submisſe, quum aliquid docetur; temperate, quum aliquid
 „ vituperatur ſive laudatur. Quum vero aliquid agendum
 „ eſt, & ad eos loquimur, qui hoc agere debent, nec ta-
 „ men volunt; tunc ea, quae magna ſunt, dicenda ſunt
 „ granditer, & ad ſectendos animos congruenter. Et ali-
 „ quando de una eademque re magna & ſubmiſſe dicitur,
 „ ſi docetur; & temperate, ſi praedicatur; & granditer, ſi
 „ averſus inde animus, ut convertatur, impellitur. Quid
 „ enim Deo ipſo maius eſt? Numquid ideo non diſcitur?
 „ Aut qui docet unitatem Trinitatis, debet niſi ſubmiſſa
 „ diſputatione agere, ut res ad dignoſcendum difficilis,
 „ quantum datur, poſſit intelligi? Numquid hic ornamen-
 „ ta, & non documenta, quaeruntur? Numquid, ut aliquid
 „ agat, eſt ſectendus auditor; & non potius, ut diſcat, in-
 „ ſtruendus? Porro quum laudatur Deus, ſive de ipſo, ſi-
 „ ve de operibus ſuis; quanta facies pulchrae ac ſplendi-
 „ dae diſtionis oboritur ei, qui poteſt quantum poteſt lau-
 „ dare, quem nemo convenienter laudat, nemo quomo-
 „ documque non laudat? At ſi non colatur, aut cum il-
 „ lo, vel etiam prae illo, colantur idola, ſive daemonia, ſi-
 „ ve quaecumque creatura; quantum hoc malum ſit, at-
 „ que ut ab hoc malo avertantur homines, debet utique
 „ granditer dici.

„ (a) Submiſſae diſtionis exemplum eſt apud Apoſtolum
 „ Paullum, ut planius aliquid commemorem, ubi ait: (b)
 „ dicite mihi, ſub lege volentes eſſe, legem non audiftis?
 „ Scriptum eſt enim, quod Abraham duos filios habuit:
 „ unum (c) de ancilla, & unum (d) de libera: ſed ille, qui de
 „ ancilla, ſecundum carnem natus eſt; qui autem de libe-
 „ ra, per repromiſſionem: quae ſunt in allegoria. Haec
 „ enim ſunt duo teſtamenta: unum quidem a monte Sina,
 „ in ſervitutem generans, quae eſt Agar. Sina enim mons
 „ eſt in Arabia, qui coniunctus eſt huic, quae nunc eſt
 „ Ieruſalem, & ſervit cum filiis ſuis. Quae autem ſurſum
 „ eſt Ieruſalem, libera eſt, quae eſt mater noſtra, & cete-
 „ ra. Itemque ibi ratiocinatur, & dicit: (e) fratres, ſecun-
 „ dum

(a) *Cap. 20.* (b) *Galat. 4.* (c) *Gen. 16.* (d) *Gen. 21.* (e) *Galat. 3.*

„ dum hominem dico , tamen hominis confirmatum testa-
 „ mentum nemo irritum facit , aut superordinat. Abrahæ
 „ dictæ sunt promissiones , & semini eius. Non dicit , & se-
 „ minibus , tamquam in multis , sed tamquam in uno , &
 „ semini tuo , quod est Christus. Hoc autem dico testamen-
 „ tum confirmatum a Deo , quæ post quadringentos &
 „ triginta annos facta est lex , non infirmat ad evacuandas
 „ promissiones. Si enim ex lege hereditas , iam non ex pro-
 „ missione. Abrahæ autem per repromissionem donavit
 „ Deus. Et quia occurrere poterat audientis cogitationi:
 „ ut quid ergo lex data est , si ex illa non est hereditas ?
 „ Ipse sibi hoc obiecit , atque ait , velut interrogans : quid
 „ ergo lex ? Deinde respondit : transgressionis gratia pro-
 „ posita est , donec veniret semen , cui promissum est , dispo-
 „ sita per angelos in manu mediatoris. Mediator autem u-
 „ nius non est , Deus vero unus est. Et hic occurrebat , quod
 „ sibi ipse proposuit : lex ergo adversus promissa Dei ? Et
 „ respondit : absit. Reddiditque rationem , dicens : si enim da-
 „ ta esset lex , quæ posset vivificare , omnino ex lege esset
 „ iustitia. Sed conclusit scriptura omnia sub peccato , ut
 „ promissio ex fide Iesu-Christi daretur credentibus , &c.
 Haec igitur omnia , quæ docendi gratia inducta sunt ,
 submisso dicendi genere tractantur.

„ In illis autem Apostolicis verbis dictio temperata est:
 „ (a) seniore[m] ne increpaveris , sed obsecra ut patrem , iu-
 „ niores ut fratres , anus ut matres , adolescentulas ut so-
 „ rores. Et in illis : (b) obsecro autem vos , fratres , per
 „ miserationem Dei , ut exhibeatis corpora vestra hostiam vi-
 „ vam , sanctam , Deo placentem. Et totus fere ipsius ex-
 „ hortationis locus temperatum habet eloquutionis genus:
 „ ubi illa pulchriora sunt , in quibus propria propriis tam-
 „ quam debita reddita decenter excurrunt , sicuti est : (c)
 „ habentes dona diversa secundum gratiam , quæ data est
 „ nobis ; sive prophetiam , secundum regulam fidei ; sive mi-
 „ nisterium , in ministrando ; sive qui docet , in doctrina ;
 „ sive qui exhortatur , in exhortatione ; qui tribuit , in sim-
 „ pli-

(a) 1. *Timoth.* 5. (b) *Rom.* 12. (c) *Ibid.*

„ plicitate ; qui praeest , in sollicitudine ; qui miseretur , in
„ hilaritate. Dilectio sine simulatione ; odio habentes ma-
„ lum , adhaerentes bono : caritate fraternitatis invicem
„ diligentes , honore mutuo praevenientes , studio non pi-
„ gri , spiritu ferventes , Domino servientes , spe gauden-
„ tes , in tribulatione patientes , orationi instantes , neces-
„ sitatibus sanctorum communicantes , hospitalitatem se-
„ ctantes. Benedicite persequentibus vos , benedicite , &
„ nolite maledicere. Gaudere cum gaudentibus , flere cum
„ flentibus , id ipsum invicem sentientes. Et quam pulchre
„ ista omnia , sic effusa , bimembri circuitu terminantur : non
„ alta sapientes , sed humilibus consentientes ? Et aliquan-
„ to post : (a) in hoc ipso , inquit , perseverantes , reddite
„ omnibus debita : cui tributum , tributum ; cui vectigal ,
„ vectigal ; cui timorem , timorem ; cui honorem , hono-
„ rem. Quae membratim fusa clauduntur etiam ipso circui-
„ tu , quem duo membra contextunt. Nemini quidquam de-
„ beatis , nisi ut invicem diligatis.

„ Grande autem dicendi genus hoc maxime distat ab
„ isto genere temperato , quod non tam verborum ornatu-
„ bus comtum est , quam violentum animi affectibus. Nam
„ capit etiam illa ornamenta paene omnia : sed ea , si non
„ habuerit , non requirit. Fertur quippe impetu suo , & elo-
„ quutionis pulchritudinem , si occurrerit , vi rerum rapit ,
„ non cura decoris assumit. Satis est enim ei , propter quod
„ agitur , ut verba congruentia non oris eligantur indu-
„ stria , sed pectoris sequantur ardorem. Nam si aurato
„ gemmatoque ferro vir fortis armetur , intentissimus pu-
„ gnae , agit quidem ille armis , quod agit , non quia pre-
„ tiosa , sed quia arma sunt : idem ipse est tamen , & va-
„ let plurimum , etiam quum rimanti telum ira facit. Agit
„ Apostolus , ut pro evangelico ministerio patienter mala
„ huius temporis cum solatio donorum Dei omnia toleren-
„ tur. Magna res est , & granditer agitur , nec desunt or-
„ namenta dicendi : (b) ecce , inquit , nunc tempus accepta-
„ bile , ecce nunc dies salutis. Nullam in quoquam dantes
„ of-

(a) *Rom. 13.* (b) *2. Corinib. 6.*

„offensionem , ut non reprehendatur ministerium nostrum;
 „sed in omnibus commendantes nosmetipsos , ut Dei mi-
 „nistros, in multa patientia , in tribulationibus , in necessi-
 „tatibus , in angustiis , in plagis , in carceribus , in sedi-
 „tionibus , in laboribus , in vigiliis , in ieiuniis , in casti-
 „tate , in scientia , in longanimitate , in benignitate , in
 „Spiritu sancto , in caritate non ficta , in verbo veritatis,
 „in virtute Dei : per arma iustitiae a dextris , & a sini-
 „stris ; per gloriam , & ignobilitatem ; per infamiam , &
 „bonam famam : ut seductores , & veraces ; ut qui igno-
 „ramur , & cognoscimur ; quasi morientes , & ecce vivi-
 „mus ; ut coerciti , & non mortificati ; ut tristes , semper
 „autem gaudentes ; sicut egeni , multos autem ditantes ;
 „tamquam nihil habentes , & omnia possidentes. Vide
 „adhuc ardentem : os nostrum paret ad vos , o Corin-
 „thii , cor nostrum dilatatum est , &c. quae persequi lon-
 „gum est.

„Itemque ad Romanos agit , ut persecutiones huius
 „mundi caritate vincantur spe certa in adiutorio Dei. A-
 „git autem granditer & ornate : (a) scimus , inquit , quo-
 „niam diligentibus Deum omnia cooperantur in bonum ,
 „iis , qui secundum propositum vocati sunt. Quoniam
 „quos ante praescivit , & praedestinavit conformes ima-
 „ginis filii sui , ut sit ipse primogenitus fratribus. Quos
 „autem praedestinavit , illos & vocavit ; & quos vocavit ,
 „ipsos & iustificavit ; quos autem iustificavit , illos & glo-
 „rificavit. Quid ergo dicemus ad haec ? Si Deus pro no-
 „bis , quis contra nos ? Qui proprio filio non pepercit ,
 „sed pro nobis omnibus tradidit illum ; quo modo non
 „etiam cum illo nobis omnia donabit ? Quis accusabit
 „adversus electos Dei ? Deus , qui iustificat : quis est qui
 „condemnet ? Christus Iesus , qui mortuus est , magis au-
 „tem qui resurrexit , qui est in dextera Dei , qui & inter-
 „pellat pro nobis. Quis nos separabit a caritate Christi ?
 „Tribulatio , an angustia , an persecutio , an fames , an
 „nuditas , an periculum , an gladius ? Sicut scriptum
 „est:

(a) Rom. 8.

est: (a) quoniam propter te mortificamur tota die, aestimati sumus ut oves occisionis. Sed in his omnibus supervincimus per eum, qui dilexit nos. Certus sum enim, quia neque mors, neque vita, neque angeli, neque principatus, neque praesentia, neque futura, neque virtus, neque altitudo, neque profundum, neque creatura alia poterit nos separare a caritate Dei, quae est in Christo Iesu Domino nostro.

Ad Galatas autem quamvis tota ipsa epistola submisso dicendi genere scripta sit, nisi in extremis partibus, ubi est eloquium temperatum; tamen interponit quemdam locum eo motu animi, ut sine ullis quidem talibus ornamentis, qualia sunt in iis, quae modo posuimus, non posset tamen nisi granditer dici. Dies, inquit, (b) observatis, & menses, & annos, & tempora. Timeo vos, ne forte sine causa laboraverim in vos. Estote sicut & ego: quoniam & ego sicut vos. Fratres, precor vos, nihil me laesistis. Scitis quia per infirmitatem carnis iam pridem evangelizavi vobis, & tentationes vestras in carne mea non sprevisistis, neque respuistis; sed sicut angelum Dei excepistis me, sicut Christum Iesum. Quae ergo fuit beatitudo vestra? Testimonium vobis perhibeo, quoniam, si fieri posset, oculos vestros eruissetis, & dedissetis mihi. Ergo inimicus factus sunt vobis verum praedicans? Aemulantur vos non bene; sed excludere vos volunt, ut eos aemulemini. Bonum est autem in bono aemulari semper, & non solum quum praesens sum apud vos. Filioli mei, quos iterum parturio, donec formetur Christus in vobis: vellem autem nunc adesse apud vos, & mutare vocem meam, quia confundor in vobis. Numquid hic aut contraria contrariis verba sunt reddita, aut aliqua gradatione sibi subnexa sunt, aut caesa & membra circuitusve sonuerunt? Et tamen non ideo tepuit grandis affectus, quo eloquium fervere sentimus.

(c) Sed apostolica ista sic clara sunt, ut & profunda

Y

da

(a) *Psalms. 43.* (b) *Galat. 4.* (c) *Cap. 21.*

„ da sint : atque ita conscripta , memoriaeque mandata ,
 „ ut non solum lectore , vel auditore , verum etiam expo-
 „ sitore opus habeant , si quis in eis , non superficie con-
 „ tentus , altitudinem quaerat. Quapropter videamus ista
 „ genera dicendi in eis , qui istorum lectione ad rerum
 „ divinarum atque salubrium scientiam profecerunt , eam-
 „ que ecclesiae ministrarunt. B. Cyprianus submisso di-
 „ cendi genere utitur in eo libro , ubi de sacramento
 „ calicis disputat. Solvitur quippe ibi quaestio , in qua
 „ quaeritur : utrum calix dominicus aquam solam , an
 „ eam vino mixtam , debeat habere. Sed exempli gratia
 „ aliquid inde ponendum est. Post principium ergo epi-
 „ stolae , iam solvere incipiens propositam quaestio-
 „ nem , (a) “ admonitos autem nos scias ; inquit , ut in
 “ calice offerendo dominica traditio servetur , neque
 “ aliud fiat a nobis , quam quod pro nobis Dominus prior
 “ fecit , ut calix , qui in commemorationem eius offer-
 “ tur , vino mixtus offeratur. Nam quum dicat Christus ,
 “ (b) ego sum vitis vera ; sanguis Christi non aqua est uti-
 “ que , sed vinum ; nec potest videri sanguis eius , quo
 “ redempti & vivificati sumus , esse in calice , quando
 “ vinum desit calici , quo Christi sanguis ostenditur , qui
 “ scripturarum omnium sacramento ac testimonio prae-
 “ dicatur. Invenimus enim in Genesi circa sacramentum
 “ Noë hoc idem praecucurrisse , & figuram dominicae pas-
 “ sionis illic extitisse , (c) quod vinum bibit , quod inebria-
 “ tus est , quod in domo sua nudatus est , quod fuit re-
 “ cumbens nudis & patentibus femoribus , quod nudi-
 “ tas illa patris a medio filio denotata est , a maiore vero
 “ & minore contecta , & cetera , quae necesse non est ex-
 “ sequi , quum satis sit hoc solum complecti , quod Noë , ty-
 “pum futurae veritatis ostendens , non aquam , sed vi-
 “ num biberit , & sic imaginem dominicae passionis ex-
 “ presserit. Item in sacerdote Melchisedech dominicum
 “ sacramentum praefiguratum videmus , secundum quod
 “ scri-

(a) *Cyprian. epist. 63. ad Caecil. sacramento calicis.* (b) *Ioan. 15.*
 (c) *Genes. 9.*

“ scriptura divina testatur , & dicit : (a) & Melchisedech,
 “ rex Salem , protulit panem & vinum. Fuit autem sacer-
 “ dos Dei summi , & benedixit Abraham. Quod autem
 “ Melchisedech typum Christi portaret , declarat in psal-
 “ mis Spiritus sanctus ex persona patris ad filium dicens:
 “ (b) ante Luciferum genui te. Tu es sacerdos in aeternum,
 “ secundum ordinem Melchisedech. „ Haec , & alia , quae
 „ sequuntur , huius epistolae , submissae dictionis modum
 „ servant : quod facile est explorare legentibus.

„ Sanctus quoque Ambrosius quum agat rem magnam
 „ de Spiritu sancto , ut eum patri & filio demonstret
 „ aequalem , submisso tamen dicendi genere utitur ; quo-
 „ niam res suscepta non ornamenta verborum , aut ad fle-
 „ ctendos animos commotionis affectum , sed rerum docu-
 „ menta desiderat. Ergo inter cetera in principio huius
 „ operis ait : (c) “ commotus oraculo Gedeon , (d) quum
 “ audisset , quod deficientibus licet populorum millibus , in
 “ uno viro Dominus plebem suam ab hostibus liberaret,
 “ obtulit hoedum caprarum. Cuius carnem , secundum prae-
 “ ceptum angeli , & azyma supra petram posuit , & ea iu-
 “ re perfudit. Quae simul ut virgae cacumine , quam
 “ gerebat angelus Dei , contigit , de petra ignis erupit;
 “ atque ita sacrificium , quod offerebatur , absumtum est.
 “ Quo indicio declaratum videtur , quod petra illa ty-
 “ pum habuerit corporis Christi , quia scriptum est : (e)
 “ bibebant de consequenti petra : petra autem erat Chri-
 “ stus. Quod utique non ad divinitatem eius , sed ad car-
 “ nem relatum est , quae sitientium corda populorum pe-
 “ renni rivo sui sanguinis inundavit. Iam tunc igitur in
 “ mysterio declaratum est , quia Dominus Iesus in carne
 “ sua totius mundi peccata crucifixus aboleret , nec solum
 “ delicta factorum , sed etiam cupiditates animorum. Ca-
 “ ro enim hoedi ad culpam facti refertur , ius ad illece-
 “ bras cupiditatum , sicut scriptum est : (f) quia concu-
 “ pivit populus cupiditatem pessimam , & dixerunt : quis

Y 2

“ nos

(a) Genes. 14. (b) Psalm. 109. (c) Ambros. lib. I. de Spiritu sancto
 in prologo. (d) Iudic. 6. (e) 1. Corin. 10. (f) Num. 11.

“ nos cibabit carne ? Quod igitur extendit angelus virgam,
 “ & tetigit petram , de qua ignis exiit ; ostendit, quod ca-
 “ ro Domini , Spiritu repleta divino , peccata omnia hu-
 “ manae conditionis exureret. Vnde & Dominus ait : (a)
 “ ignem veni mittere in terram , &c. ,, In quibus (*Am-
 „ brosius*) rei docendae ac probandae maxime in-
 „ cumbit.

„ De genere temperato est apud Cyprianum virgini-
 „ tatis illa laudatio : (b) “ nunc nobis ad virgines sermo
 “ est , quarum quo sublimior gloria est , maior & cura.
 “ Flos est ille ecclesiastici germinis , decus atque orna-
 “ mentum gratiae spiritualis laeta indoles laudis & ho-
 “ noris , opus integrum atque incorruptum , Dei imago
 “ respondens ad sanctimoniam Domini , illustrior portio
 “ gregis Christi. Gaudet per ipsas , atque in illis largiter
 “ floret ecclesiae matris gloriosa fecunditas : quantoque
 “ plus gloriosa virginitas numero suo addit, tanto plus gau-
 “ dium matris augefcit. ,, Et alio loco in fine epistolae : ,,
 “ quo modo portavimus , inquit , imaginem eius , qui de
 “ limo est , sic portemus & imaginem eius , qui de caelo
 “ est. Hanc imaginem virginitas portat , portat integri-
 “ tas , sanctitas portat & veritas ; portant disciplinae Dei
 “ memores , iustitiam cum religione retinentes , stabiles
 “ in fide , humiles in timore , ad omnem tolerantiam for-
 “ tes , ad sustinendas iniurias mites , ad faciendam miseri-
 “ cordiam faciles , fraterna pace unanimes atque con-
 “ cordes. Quae vos singula , o bonae virgines , observa-
 “ re , diligere , implere debetis , quae Deo & Christo va-
 “ cantes , ad Dominum , cui vos dicastis , maiori & me-
 “ liori parte praeceditis. Profectae annis , iunioribus fa-
 “ cite magisterium. Minores natu , praebete maioribus mi-
 “ nisterium , comparibus incitamentum : hortamentis vos
 “ mutuis excitate , aemulis de virtute documentis ad glo-
 “ riam provocate , durate fortiter , spiritualiter pergite , per-
 “ venite feliciter , tantum mementote tunc nostri , quum
 “ incipiet in vobis virginitas honorari.

„ Am-

(a) *Luc. 12.* (b) *Cyprian. in tract. de habitu virginum.*

„ Ambrosius etiam genere dicendi temperato & or-
 „ nato professis virginibus proponit (*matrem Domini*)
 „ tamquam sub exempli forma, quod moribus imitentur,
 „ & dicit: (a) “ virgo erat non solum corpore, sed etiam
 “ mente, quae nullo doli ambitu sincerum adulteraret af-
 “ fectum: corde humilis, verbis gravis, animi prudens,
 “ loquendi parcior, legendi studiosior, non in incerto
 “ divitiarum, sed in prece pauperis spem reponens, in-
 “ tenta operi, verecunda sermoni; arbitrum mentis soli-
 “ ta non hominem, sed Deum, quaerere; nullum laedere,
 “ bene velle omnibus, assurgere maioribus natu, aequa-
 “ libus non invidere, fugere iactantiam, rationem sequi,
 “ amare virtutem. Quando ista vel vultu laesit parentes?
 “ Quando dissensit a propinquis? Quando fastidivit hu-
 “ milem? Quando risit debilem? Quando vitavit inopem?
 “ Eos solos solita coetus virorum invisere, quos mi-
 “ sericordia non erubesceret, neque praeteriret verecun-
 “ dia. Nihil torvum in oculis, nihil in verbis procax, ni-
 “ hil in actu inverecondum, non gestus fractior, non in-
 “ cessus solutior, non vox petulantior; ut ipsa corporis
 “ species simulacrum fuerit mentis, & figura probitatis.
 “ Bona quippe domus in ipso vestibulo debet agnosci, ac
 “ primo praetendat ingressu, nihil intus latere tenebra-
 “ rum, tamquam lucernae lux intus posita, foris luceat.
 “ Quid ego exsequar ciborum parsimoniam, officiorum
 “ redundantiam: alterum ultra naturam superfuisset, al-
 “ terum ipsi naturae paene defuisse? Illic nulla intermissa
 “ tempora, hic congeminati ieiunio dies: & si quando
 “ reficiendi successisset voluntas, cibus plerumque ob-
 “ vius, qui mortem arceret, non delitias ministraret,
 “ &c. „ Haec autem propterea in exemplo huius tempe-
 „ rati generis posui, quia non hic agit, ut virginitatem
 „ voveant, quae nondum voverunt; sed quales esse de-
 „ beant, quae iam votae sunt. Nam ut aggrediatur ani-
 „ mus tantum ac tale propositum, grandi utique dicendi
 „ genere debet excitari & accendi. Sed martyr Cypria-

Y 3

„ nus

(a) Ambros. lib. II. de Virginibus in princip.

„ nus de habitu virginum , non de suscipiendo virginitatis proposito scripsit. Iste vero episcopus etiam ad hoc eas magno accendit eloquio.

„ Verum ex eo , quod ambo egerunt , dictionis grandis exempla memorabo. Ambo quippe investiti sunt in eas , quae formam pigmentis colorant , vel potius decolorant : quorum prior ille , quum hoc ageret , ait inter cetera : (a) “ si quis pingendi artifex vultum alicuius & speciem & corporis qualitatem aemulo colore signasset , & signato iam consummatoque simulacro manus alius inferret , ut iam formata , iam picta quasi peritior reformaret ; gravis prioris artificis iniuria , & iusta indignatio videretur. Tu te existimas impune laturam tam improbae temeritatis audaciam , Dei artificis offensam ? “ Vt enim impudica circa homines , & incesta fucis lenocinantibus non sis ; corruptis violatisque , quae Dei sunt , peior adultera detineris. Quod ornari te putas , quod putas comi , impugnatio est ista divini operis , praevaricatio est veritatis. Monentis Apostoli vox est : (b) “ expurgate vetus fermentum , ut sitis nova conspersio , sicut estis azymi. Etenim pascha nostrum immolatus est Christus. Itaque festa celebremus , non in fermento veteri , neque in fermento malitiae & nequitiae , sed in azymis sinceritatis & veritatis. Num sinceritas perseverat & veritas , quando quae sincera sunt , polluuntur , & colorum adulteriis , & medicaminum fucis , in mendacium vera mutantur ? Dominus tuus dicit : (c) non potes facere capillum unum album aut nigrum : & tu ad vincendam Domini tui vocem vis te esse potiore ? Audaci conatu , & sacrilego contemptu crines tuos inficis ; malo praesagio futurorum capillos iam tibi flammeos auspicas. „ Longum est inserere omnia , quae sequuntur.

„ Ille vero posterior , ut in tales diceret : (d) “ hinc illa , inquit , nascuntur incentiva vitiorum , ut quaesitis
“ co-

(a) *Cyprian. de habitu Virgin.* (b) *1. Corinth. 5.* (c) *Matth. 5.*
(d) *Ambros. lib. 1. de Virginibus.*

" coloribus ora depingant , dum viris displicere formi-
 " dant , & de adulterio vultus , meditantur adulterium
 " castitatis. Quanta haec amentia , effigiem mutare natu-
 " rae , picturam quaerere ; & dum verentur maritale iu-
 " dicio , prodere suum ? Prior enim de se pronuntiat ,
 " quae cupit mutare , quod nata est : ita dum alii studet
 " placere , prius ipsa sibi displicet. Quom iudicem , mu-
 " lier , veriolem requiremus deformitatis tuae , quam te
 " ipsam , quae videri times ? Si pulchra es , cur abscon-
 " deris ? Si deformis , cur te formosam esse mentiris , nec
 " tuae conscientiae , nec alieni gratiam erroris habitu-
 " ra ? Ille enim alteram diligit , tu alteri vis placere : &
 " irasceris , si amet alteram , qui adulterare in te doce-
 " tur. Mala magistra es iniuriae tuae. Lenocinari enim
 " refugit , etiam quae est passa lenonem. Ac licet vilis
 " mulier , non alteri tamen , sed sibi , peccat. Tolerabi-
 " liora propemodum in adulterio crimina sunt : ibi enim
 " pudicitia , hic natura adulteratur. ,, Satis , ut existimo ,
 „ apparet , feminas , ne suam fucis adulterent formam ,
 „ & ad pudorem & ad timorem hae facundia vehemen-
 „ ter impelli. Proinde neque submissum , neque tempe-
 „ ratum , sed grande omnino genus hoc eloquentionis agno-
 „ scimus. Et in his autem , quos duos ex omnibus propo-
 „ nere volui , & in aliis ecclesiasticis viris , & bona , &
 „ bene , id est , sicut res postulat , acute , ornate , arden-
 „ terque dicentibus , per multa eorum scripta vel dicta
 „ possunt haec tria genera reperiri , & assidua lectione vel
 „ auditione , admixta etiam exercitatione , studentibus
 „ inolescere.

„ (a) Nec quisquam praeter disciplinam esse existimet ,
 „ ista miscere : immo , quantum congrue fieri potest , omni-
 „ bus generibus dictio varianda est. Nam quando proluxa
 „ est in uno genere , minus detinet auditorem. Quum ve-
 „ ro sit in aliud ab alio transitus , etiam si longius eat ,
 „ decentius procedit oratio : quamvis habeant & singula
 „ genera varietates suas in sermone eloquentium , quibus

Y 4

,, non

„ non sinuntur in eorum , qui audiunt , frigescere vel
 „ tepescere sensibus. Verumtamen facilius submissum so-
 „ lum , quam solum grande , diutius tolerari potest. Com-
 „ motio quippe animi quanto magis excitanda est , ut no-
 „ bis assentiatur auditor ; tanto minus in ea diu teneri
 „ potest , quum fuerit , quantum satis est , excitata. Et ideo
 „ cavendum est , ne , dum volumus altius erigere , quod
 „ erectum est , etiam inde decidat , quo fuerat excitatio-
 „ ne perductum. Interpositis vero quae sunt dicenda sub-
 „ missius , bene reditur ad ea , quae opus est granditer
 „ dici , ut dictionis impetus , sicut maris aestus , alternet. Ex
 „ quo fit , ut grande dicendi genus , si diutius est dicen-
 „ dum , non debeat esse solum , sed aliorum generum in-
 „ terpositione varietur : ei tamen generi dictio tota tribua-
 „ tur , cuius copia praevaluerit.

„ (a) Interest enim , quod genus cui generi interpona-
 „ tur vel adhibeatur certis & necessariis locis. Nam & in
 „ grandi genere semper , aut paene semper , temperata de-
 „ bet esse principia. Et in potestate est eloquentis , ut di-
 „ cantur non nulla submisso , etiam quae possent granditer
 „ dici : ut ea , quae dicuntur granditer , ex illorum fiant
 „ comparatione grandiora , & eorum tamquam umbris lu-
 „ minosiora reddantur. In quocumque autem genere ali-
 „ qua quaestionum vincula solvenda sunt , acumine opus
 „ est , quod sibi submissum genus proprie vindicat. Ac
 „ per hoc eo genere utendum est , & in aliis duobus ge-
 „ neribus , quando eis ista incidunt : sicut laudandum ali-
 „ quid vel vituperandum , ubi nec damnatio cuiusquam ,
 „ nec liberatio , nec ad actionem quamlibet assensio re-
 „ quiritur : in quocumque alio genere occurrerit , genus
 „ adhibendum & interponendum est temperatum. In gran-
 „ di ergo genere inveniunt suos locos duo cetera , & in
 „ submisso similiter. Temperatum autem genus non qui-
 „ dem semper , sed tamen aliquando submisso indiget , si ,
 „ ut dixi , quaestio , cuius nodus est solvendus , incurrat ;
 „ vel quando non nulla , quae ornari possent , ideo non or-
 „ nan-

„ nantur , sed submisso sermone dicuntur , ut quibusdam
„ quasi toris ornamentorum praebeant eminentiorem lo-
„ cum. Grande autem genus temperata dictio non requi-
„ rit. Ad delectandos quippe animos , non ad movendos,
„ ipsa suscipitur.

„ (a) Non sane si dicenti crebrius & vehementius ac-
„ clametur , ideo granditer putandus est dicere : hoc enim
„ & acumina submissi generis , & ornamenta faciunt tem-
„ perati. Grande autem genus plerumque pondere suo vo-
„ ces premit , sed lacrimas exprimit.

„ Denique quum apud Caesaream Mauritaniae populo
„ dissuaderem pugnam civilem , vel potius plusquam ci-
„ vilem , quam *catervam* vocabant ; neque enim cives tan-
„ tummodo , verum etiam propinqui , fratres , postremo
„ parentes , ac filii lapidibus inter se , in duas partes divi-
„ si , per aliquot dies continuos , & certo tempore anni
„ sollemniter dimicabant , & quisque , ut quemque pot-
„ erat , occidebat : egi quidem granditer quantum valuī,
„ ut tam crudele atque inveteratum malum de cordibus
„ & moribus eorum avellerem pelleremque dicendo : non
„ tamen egisse aliquid me putavi , quum eos audirem ac-
„ clamantes , sed quum flentes viderem. Acclamationi-
„ bus quippe se doceri & delectari , flecti autem lacri-
„ mis indicabant. Quas ubi adspexi , immanem illam con-
„ suetudinem , a patribus & avis longeque a maioribus
„ traditam , quae pectora eorum hostiliter obsidebat , vel
„ potius possidebat , devictam , antequam re ipsa id osten-
„ derent , credidi. Moxque , sermone finito , ad agendas Deo
„ gratias corda atque ora converti. Et ecce iam ferme
„ octo vel amplius anni sunt , propitio Christo , ex quo
„ illic nihil tale tentatum est. Sunt & alia multa experi-
„ menta , quibus didicimus , homines , quid in eis fecerit
„ sapientis granditas dictionis , non clamore potius , quam
„ gemitu , aliquando etiam lacrimis , postremo vitae mu-
„ tatione monstrasse.

„ Submisso etiam dicendi genere sunt plerique muta-
„ ti;

(a) Cap. 34.

„ti; sed ut, quod nesciebant, scirent, aut quod eis vide-
 „batur incredibile, crederent; non autem ut agerent,
 „quod agendum iam noverant, & agere nolebant. Ad
 „huiusmodi namque duritiam flectendam debet grandi-
 „ter dici. Nam & laudes & vituperationes, quando elo-
 „quenter dicuntur, quum sint in genere temperato, sic
 „afficiunt quosdam, ut non solum in laudibus & vitupe-
 „rationibus eloquentia delectentur, verum & ipsi lau-
 „dabiliter appetant, fugiantque vituperabiliter vivere.
 Et mox.

„Illud vero, quod agitur genere temperato, id est,
 „ut eloquentia ipsa delectet, non est propter se ipsum
 „usurpandum; sed ut rebus, quae utiliter honesteque
 „dicuntur, si nec docente indigent eloquio, nec moven-
 „te; quia scientes & faventes auditores habent; aliquan-
 „to promptius ex delectatione ipsa eloquutionis accedat,
 „vel tenacius adhaerescat assensus. Nam quum eloquen-
 „tiae sit universale officium, in quocumque istorum trium
 „generum, dicere apte ad persuasionem; finis autem, id,
 „quod intenderis, persuadere dicendo: in quocumque
 „istorum trium generum dicit quidem eloquens ad per-
 „suasionem, sed nisi persuadeat, ad finem non pervenit
 „eloquentiae. Persuadet autem in submisso genere, vera
 „esse, quae dicit. Persuadet in grandi, ut agantur, quae
 „agenda esse iam sciuntur, nec tamen aguntur. Persuadet
 „in genere temperato; pulchre ornateque se dicere. Quo
 „fine nobis quid opus est? Appetant eum, qui lingua
 „gloriantur, & se in panegyricis, talibusque dictioni-
 „bus iactant, ubi nec docendus, nec ad aliquid agendum
 „movendus, sed tantummodo est delectandus auditor.
 „Nos vero istum finem referamus ad alterum finem, ut
 „scilicet quod efficere volumus, quum granditer dicimus,
 „hoc etiam isto velimus, id est, ut bona morum diligan-
 „tur, vel devitentur mala; si ab hac actione non sic alie-
 „ni sunt homines, ut ad eam grandi genere dictionis ur-
 „gendi videantur: aut si iam id agunt, ut agant studio-
 „sius, atque in eo firmiter perseverent. Ita fit, ut etiam
 „tem-

„temperari generis ornatu non iactanter, sed prudenter,
„utamur: non eius fine contenti, quo tantummodo
„delectatur auditor; sed potius hoc agentes, ut etiam
„ipso ad bonum, quod persuadere volumus, adiuve-
„tur.

Haec omnia ex D. Augustino ad verbum selecta sunt: quibus haec praeceptio de triplici dicendi genere, sive de tribus orationis formis, adeo copiose & aperte tradita est, ut facile quisque concionator intelligat, quo dicendi charactere in quavis concione, vel concionis parte, sit usus.

His autem, quae vir sanctus adeo copiose explicavit, totque commodissimis exemplis illustravit, nihil deesse videtur, nisi ut caveamus, quod Cornificius (a) diligenter admonet, „ne, dum haec (*tria dicendi*) genera conse-
„ctamur, in finitima & propinqua vitia veniamus. Nam
„gravi figurae, quae laudanda est, propinqua est ea, quae
„fugienda est, quae recte videbitur appellari, si sufflata
„nominabitur. Nam ut corporis bonam habitudinem tu-
„mor imitatur saepe; ita gravis oratio saepe imperitis vi-
„detur ea, quae turget & inflata est, quum aut novis,
„aut priscis verbis, aut duriter aliunde translatis, aut gra-
„vioribus, quam res postulat, aliquid dicitur; hoc mo-
„do: nam qui perduellionibus venditat patriam, non sa-
„tis supplicii dederit, si praeceptis in Neptunias depulsus
„erit lacunas. Poenitet igitur istum, qui montes belli fa-
„bricatus est, campos sustulit pacis.

„In hoc genus plerique quum declinassent, & ab eo,
„quo profecti sunt, aberraverunt, & specie gravi-
„tatis falluntur, nec prospicere possunt orationis tu-
„morem. Qui in mediocri genus orationis profe-
„cti sunt, si pervenire eo non potuerunt, errantes
„perveniunt ad confinem eius generis, quod ap-
„pellamus fluctuans & dissolutum; eo quod sine ner-
„vis & articulis fluctuat huc & illuc, nec potest con-
„firmate, neque viriliter se se expedire. Id est hu-
„ius-

(a) *Ad Heren. lib. III. cap. 10.*

„ iusmodi : socii nostri quum belligerare nobiscum vellent,
 „ profecto ratiocinati essent etiam atque etiam, quid
 „ possent facere, si quidem sua sponte facerent, & non ha-
 „ berent hic adiutores multos, & malos homines, & au-
 „ daces. Solent enim diu cogitare omnes, qui magna neg-
 „ otia volunt agere. Non potest huiusmodi sermo tenero
 „ attentum auditorem: diffluit enim totus, neque quid-
 „ quam comprehendens, perfectis verbis amplectitur. Qui
 „ non possunt in illa facetissima verborum attenuatione
 „ commode versari, veniunt ad aridum & exsangue ge-
 „ nus orationis, quod non alienum est, exile nominari,
 „ cuiusmodi est hoc: nam istic ille ad balneas accessit;
 „ ad hunc postea dixit: hic tuus servus me pulsavit. Po-
 „ stea dicit hic illi, considerabo. Post ille huic convicium
 „ fecit, & magis magisque praesentibus multis clamavit:
 „ Frivulus hic quidem iam, & illiberalis est sermo: non
 „ enim adeptus est id, quod habet attenuata figura, pu-
 „ ris verbis & electis compositam orationem. „ Hacten-
 „ us Cornificius.

CAP. XIX.

DE GRANDILOQUI GENERIS MATERIA

Quia vero grande genus orationis sublimitatem &
 vim ad commovendos animos habet, quod qui-
 dem est praecipuum & singulare concionatoris
 officium; danda illi opera est, ut in omni concione unam
 aliquam rem, aut plures etiam eligat, quas hac dicendi fi-
 gura prosequatur. Ad hoc autem pertinent, ut ex D. Au-
 gustini exemplis colligitur, quaecumque in suo genere
 maxima sunt, & ad movendos animos potentissima: cu-
 iusmodi non nulla docendi gratia hoc in loco breviter ad-
 notabimus. Periti autem concionatoris erit, eadem ratio-
 nibus & ornamentis, quae paullo ante exposuimus, exag-
 gerare, & talia dicendo facere, qualia sunt.

Ad hoc ergo genus pertinent, quae de severitate extre-
 mi

mi iudicii, de atrocitate & aeternitate poenarum, quas improbi apud inferos patiuntur, de letalis peccati gravitate dicuntur. Qua amplificata, vehementer adversus eos, qui sine ullo pungentis conscientiae aculeo tot letalia peccata committunt, incandescere possumus. Similique ratione adversus eos indignamur, qui levissimis de causis, hoc est, propter exiguum lucrum, aut etiam sine ullo suo comodo, divinam maiestatem gratis offendere, & eius amicitiam & gratiam amittere non verentur. Quam rem idem ipse Dominus sic apud Ieremiam amplificat, quum ait: (a) obstupescite, caeli, super hoc, & portae eius desolamini vehementer. Duo enim mala fecit populus meus, &c.

Hac item ratione illorum periculum amplificamus, qui statim a confessione, nulla interposita mora, in eadem crimina relabuntur, atque hunc tota vita ludum ludunt; & eorum etiam, qui de die in diem conversionem suam procrastinant; ac multo magis eorum, qui ad extremum vitae diem poenitentiam differunt; & eorum etiam, qui quam diutissime peccatis assuevere, quorum conversio adeo difficilis est, ut Dominus per Ieremiam dicat: (b) si potest aethyops mutare pellem suam, & pardus varietates suas; ita & vos poteritis benefacere, quum didiceritis malum. Verum maius adhuc periculum est obdurati & excaecati cordis, ad quod eadem peccandi consuetudine pervenitur. Eodem modo amplificamus summum redemptionis nostrae beneficium, quo summus ille rerum omnium conditor, ut nos divinitatis & gloriae suae participes efficeret, atrocissimum crucis supplicium subire, & sanguinem suum pretiosum pro nobis fundere dignatus est. In quo quidem beneficio omnia sunt adeo magna, ut maiora esse nequeant; hoc est, & meritum, & praemium, & supplicium, & dignitas dantis, & indignitas recipientis. Hinc orationis impetum flectimus ad hominum tum malitiam, tum ingrati animi crimen exaggerandum: qui ne tanta quidem Domini sui bonitate a peccatis cohibentur, nec pro-

tan-

(a) Cap. 2. (b) Cap. 13.

tanto beneficio dignas redemptori gratias agunt. Neque dissimilis ratio est, cetera divina beneficia, & ingratitude hominum amplificandi, atque eorum praecipue, qui divinis muneribus non ad largitoris gloriam, sed, quod est multo indignius, ad eius iniuriam abutuntur.

Hoc autem genus argumenti mira orationis grandiloquentia Moses, non quidem rhetorico, sed prophetico spiritu afflatus, tractat in cantico illo, cuius initium est: (a) audite caeli quae loquor: in quo primum divina beneficia, deinde populi ingratitude & scelera, ac postremo divinae iustitiae supplicia, sceleratis hominibus inferenda, amplissima oratione attollit. Similique ordine & facultate dicendi idem argumentum tractat Ezechiel cap. 17. sub metaphora Virginis derelictae, & a Deo in sponsam assumptae, & multis opibus auctae & ornatae; quae tamen fidem sponso datam violaverit, & adulterum admitterit. Eadem orationis figura Amos cap. 6. adversus Israëliti populi principes exclamat his verbis: vae vobis, qui opulenti estis in Sion, & confiditis in monte Samariae, optimates capita populorum, ingredienti pompae domum Israël: transite in Calanne. Et cetera, quae sequuntur. Huius autem loci grandiloquentiam D. Augustinus III. de doctrina christiana libro (b) miratur, & varia eius ornamenta copiose declarat. Verum haec, quae docendi gratia subiecimus, exempla ad indignationis affectum commovendum pertinent. In quo quidem amplificationis genere, illa, quam Graeci *dinosim* vocant, praecipue dominatur, quae rei indignitatem magnopere anget & attollit: de qua mox (c) dicemus.

Nemo tamen his exemplis admonitus existimet, ad hos tantum affectus hoc orationis genus deservire. Quaecumque enim alia res, sive nimium fausta & laeta, seu vehementer tristis & luctuosa existat, hoc orationis genere tractanda est. Vtriusque rei commodissimum exstat exemplum apud D. Cyprianum in sermone de lapsis. Initio namque rem tractat laetissimam. Gratulatur enim ecclesiae de
in-

(a) *Deut.* 32. (b) *Cap.* 7. (c) *Pag.* 354.

insigni confessorum gloria atque fortitudine, qua Christi fidem apud infideles iudices constanti animo confessi fuerant. Deinde vero miserandam lapsum ruinam & inconstantiam, qui tormentorum metu a fide desciverant, maestissima oratione lamentatur. Confessores igitur gloriosos initio sermonis his verbis collaudat: exoptatus votis omnibus dies venit, & post longae noctis horribilem tetricamque caliginem, Dei luce radiatus mundus eluxit. Confessores praeconio boni nominis claros, & virtutis ac fidei laudibus gloriosos, laetis conspectibus intuemur, sanctis osculis adhaerentes, desideratos diu inexplebili cupiditate complectimur. Adest militum Christi cohors candida, qui persecutionis urgentis ferociam turbulentam stabili congressione fregerunt, parati ad patientiam carceris, armati ad tolerantiam mortis, repugnastis fortiter saeculo: spectaculum gloriosum praebuitis Deo, sequuturis fratribus fuistis exemplo... Quam vos laeto sinu excipit mater ecclesia de praelio revertentes? Quam beata, quam gaudens portas suas aperit, ut adunatis agminibus intretis, de hoste prostrato tropaea referentes? Cum triumphantibus viris, & feminae veniunt, quae, cum saeculo dimicantes, sexum quoque vicerunt. Veniunt & geminata militiae suae gloria virgines, & pueri annos suos virtutibus transeuntes. Et cetera. Sunt & argumenta alia, quae hoc genus dicendi exigunt. Ea vero facile quisque ex his, quae diximus, intelligere poterit.

Illud tamen hoc in loco advertendum est, unius rei amplificationem alteri aditum praebere. Ut exempli causa, quum extremi iudicii severitatem, aut gehennae supplicium amplificaverimus; incandescere licebit adversus multorum hominum stuporem atque caecitatem; qui quum hoc certissima fide teneant, non verentur praecipites in omnia scelera, atque adeo in ipsa gehennae supplicia, sine ullo doloris sensu, irruere.

DE ALIIS ORNATVS VIRTVTIBVS,
*ac in primis de energia, quae latine evidentia
dicitur.*

PRaeter has autem quattuor ornatus virtutes, quas in tropis, figuris, compositione, & apte dicendi ratione posuimus, sunt & aliae, quae ad eundem ornatum pertinent, quas modo breviter attingemus.

Est enim in primis energia, quae latine dicitur evidentia, sive repraesentatio: quae rem oculis evidenter veluti spectandam proponit & repraesentat. Qua de re sic Fabius ait: (a) magna virtus est, res, de quibus loquimur, clare, atque ut cerni videantur, enuntiare. Quod aliquando brevi oratione, aliquando longiori efficitur. Hoc modo Cicero luxuriosum convivium describit his verbis: (b) videbar videre alios intrantes, alios vero exeuntes, quosdam ex vino vacillantes, quosdam hesternae potatione oscitantes... Humus erat immunda, lutulenta vino, coronis languidulis, & spinis cooperta piscium. Quid plus videret, qui intrasset? Sic urbium captarum crescit miseria. Sine dubio enim qui dicit, expugnatam esse civitatem, complectitur omnia, quaecumque talis fortuna recipit: sed in affectus minus penetrat brevis hic velut nuntius. At si aperias haec, quae verbo uno inclusa erant, apparebunt & fusae per domos ac templa flammae, & ruentium tectorum fragor, & ex diversis clamoribus unus quidam sonus, aliorum fuga incerta, alii in extremo complexu suorum cohaerentes, & infantium feminarumque ploratus, & male usque in illum diem servati fato senes: tum illa profanorum sacrorumque direptio, efferentium praedas, repetentiumque discursus, & acti ante suam quisque praedonem catenati, & conata retinere infantem suum mater, & sicubi maius lucrum est, pugna inter victores. Licet enim

(a) *Quintil. lib. VIII. cap. 3.* (b) *Cicero in frag. orat. pro Q. Gal. apud Quintil. loco citato.*

enim haec omnia , ut dixi , complectatur everſio ; minus eſt tamen totum dicere , quam omnia. Haſtenus Fabius. Ex cuius exemplis liquet , ad hoc genus virtutis , rerum & perſonarum deſcriptiones , de quibus in tertio huius operis libro (a) diſcernimus , maxime pertinere. Ea namque rem oculis ita ſubiiciunt , ut qui dicit , non dixiſſe , ſed pinxiſſe ; & qui audit , non tam audiſſe , quam inſpexiſſe , videatur.

Ad hanc etiam virtutem pertinet illud ſimilitudinis genus , obſcuris rebus explicandis accommodatum ; quo ex rebus familiariter notis , ea , quae ſunt reconditiora & obſcuriora , patefacimus , & velut ex tenebris in lucem produci-mus. Eſt enim , ut Ariſtoteles ait , innatum nobis , ut ex notioribus , & iis , quae ſenſu percipiuntur , ad ignotiora , & quae intellectu comprehenduntur , procedamus. Hoc autem ſimilitudinis genere aliquando quidem brevius , aliquando latius ſacrae litterae utuntur. Tale eſt illud : (b) ſicut ovis ad occiſionem ducetur , & quaſi agnus coram rudente ſe obmuteſcet , &c. Et apud Ieremiam : (c) quis eſt iſte , qui quaſi flumen aſcendit , & veluti fluviorum intumeſcunt gurgites eius ? Aegyptus fluminis inſtar aſcendet , & velut flumina movebuntur fluctus eius. Et Dominus in evangelio : (d) quoties , inquit , volui congregare filios tuos , quemadmodum gallina congregat pullos ſuos ſub alas , & noluiſti ? Longiores ſunt illae apud Iſaiam : (e) quo modo ſi rugiat leo ſuper praedam ſuam , quum occurrerit ei multitudo paſtorum , a voce eorum non formidabit , & a multitudine eorum non pavebit ; ſic deſcendet Dominus exercituum ſuper montem Sion , ut praelietur. Et alio in loco idem : (f) ſicut ſomniat eſuriens , & comedit , quum autem fuerit expergefactus , vacua eſt anima eius ; & ſicut ſomniat ſitiens , & bibit , &c. : ſic erit multitudo omnium gentium , quae dimicaverunt contra montem Sion.

Ad hanc etiam virtutem emphasiſ quoque pertinere idem Fabius (g) auctor eſt. Ea namque rem appoſitiſſimo

Z

no-

(a) Cap. 6. pag. 139. ſeqq. (b) Iſai. 53. (c) Cap. 46. (d) Matth. 23. (e) Cap. 31. (f) Cap. 29. (g) Inſtit. lib. VIII, cap. 3. ſub ſm.

nomine , reiue naturam maxime significante , exprimit: quam inter verborum figuras (a) collocavimus. Praecisio quoque , quae plus tacendo , quam docendo , significat , ad hoc genus pertinet : quam etiam inter sententiarum figuras (b) numeravimus.

§. I.

D I N O S I S .

EST etiam virtus alia , quam Graeci dinosim, id est, gravitatem, vocant, qua utimur in exaggeranda rei indignitate. Qua virtute Demosthenes plurimum valuisse (c) dicitur. Hac enim fit , ut rei indignitas tanta appareat , quanta est , & interdum etiam maior quam est. Vtinam autem eam nobis Dominus dicendi facultatem concederet , ut peccati indignitatem , & peccati supplicia , & multorum fidelium stuporem , & salutis suae neglectum , ceteraque his similia, oratione nostra , non dico supra id quod sunt, attollere , sed saltem exaequare possemus, & tanta dicendo efficere , quanta sunt ! Sed quae dicendi facultas haec ipsa pro dignitate amplificare queat ? Danda tamen nobis opera est , ut , quam proxime fieri poterit , ad harum rerum magnitudinem explicandam accedamus , quo torpentium atque ignorantiam animos salutare & necessario metu concutere & excitare possimus.

§. II.

D E C O P I A .

Pertinet etiam ad eloquendi rationem orationis ubertas & copia ; qualem in D. Chryostomo videmus. Ut enim eruditae aures brevitate & acumine sententiarum , & pressa oratione gaudent ; ita rudes & indoctae copia rerum maxime capiuntur. Ad hanc vero copiam pertinet, ut, quidquid apte & commode pro ratione argumenti dici potest, ad causam afferamus : neque quidquam , quod eam magno-

(a) *Lib.V.c.14.pag.292.* (b) *Pag.291.* (c) *Apud Quintil.lib.VI.c.3.*

gnopere tueatur, praetermittamus. Deinde ut ea ipsa, quae adducimus, non indigesta & angusta, sed copiosa oratione ita prosequamur, ut quidquid virium in rebus ipsis latet, eruamus, & in medium proferamus. Quod exor-
nationis proprium esse superius diximus, (a) quum col-
lectionis partes explicavimus. Cuius rei exempla ex D. Cy-
priano, Gregorio Nissen, & Eusebio Emiseno addu-
ximus.

Ad hanc etiam virtutem pertinet vitare tautologiam, cuius superius (b) mentionem fecimus, quae est eiusdem ver-
bi vitiosa repetitio, inopiae causa facta: quum is, qui di-
cit, adeo inops verborum est, ut rem eandem significatu-
rus, verbum aliud tantumdem efficiens non invenit, quo
eam exprimat. Qui enim copiae studet, non rerum mo-
do, sed verborum etiam dives esse debet: ne inopiae cau-
sa idem verbum centies, ut multi faciunt, repetere co-
gatur.

Porro autem quemadmodum liberalitatis virtuti duo vi-
tia finitima sunt, nempe avaritia, & prodigalitas; quorum
alterum defectu, alterum redundantia, virtutis mediocrita-
tem deserit: ita plane copiae utroque modo sua vitia adver-
santur. Nam illi primum orationis ariditas contraria est,
commune barbarorum & imperitorum vitium, qui animi
sui sensus ieiuna & sterili oratione declarant. Hi enim non
vident, hoc vel maxime, ut ante diximus, (c) dialecticam
& scholasticam orationem ab oratoria distare, quod il-
la nervis & ossibus tantum constat, haec istis cutem,
& carnem, & sanguinem, & coloris pulchritudinem
addat.

Per redundantiam vero illi adversatur vitium illud, quod
Asiatismum ab Asianis appellant: qui (d) longissima oratione
minimeque necessaria utebantur, inanique verborum con-
gerie luxuriabant. Adversatur etiam hoc eodem modo ma-
crologia, de qua mox (e) dicemus.

(a) *Lib. II. cap. 10. pag. 80. seqq.* (b) *Pag. 166.* (c) *Lib. II. cap. 2. pag. 46.* (d) *Apud Quintil. lib. XII. cap. 10.* (e) *Pag. 360.*

DE ORATIONIS VARIETATE.

EST etiam varietas non vulgaris orationis virtus: cui contrarium est vitium mire taediosum, homiologia quae (a) nulla varietatis gratia levat taedium, estque tota coloris unius. Est igitur primum quidem in rebus ipsis adhibenda varia & multiplex supellex, quam varia auctorum, tum nostrorum, tum etiam ethnicorum, lectio praestabit. Ad quod non modo sententiae, sed etiam exempla, similia, & apophthegmata mire faciunt. Utendum etiam tribus illis dicendi generibus, de quibus haecenus diximus, infimo, temperato, atque grandi, quae magnam orationi varietatem conciliant. Quum autem multa membra in eadem orationis serie coniunguntur, ne longa rerum enumeratio fastidium pariat, varietas figurarum adhibenda est, quae orationem a molesta illa rerum continuatione vindicet. Ad quod cum aliae figurae, tum praecipue interrogatio maxime conducit. Sic Ambrosius in eo exemplo, quod paullo ante posuimus, (b) quum multas beatissimae Virginis virtutes recto orationis ductu enumerasset, orationem hac interrogatione variavit: (c) quando illa vel vultu laesit parentes? quando vitavit inopem? quando fastidivit humilem? &c. Deinde repetitione quoque varietatem auxit: nihil torvum in oculis, nihil in verbis procax, nihil in actu inverecundum, non gestus fractior, & cetera, quae sequuntur. Denique omnes, tam verborum, quam sententiarum, figurae, huic orationis varietati deserviunt. Ut enim personae alio atque alio cultu, ita eadem sententiae alio atque alio verborum & figurarum habitu vestiri possunt. Quod ut planius fiat, exempla aliquot, quibus hanc variandi rationem rhetores commendant, subiiciemus.

Non est miserum mori: &, usque adeo ne mori miserum est? Nihil est te vanius: an quidquam est te vanius? Hic per interrogationem variata est figura. Non magnam
lau-

(a) *Apud Quintil. lib. VIII. c. 3.* (b) *Pag. 341.* (c) *Lib. II. de Virg.*

laudem assequutus es: egregiam vero laudem es assequutus. Non ista curat populus: id populus curat scilicet. Hic per ironiam commutata est sermonis facies. Vehementer amat pecuniam: bone Deus, quam amat pecuniam. Per admirationem versus est orationis color. Tum Deum contemnit, tum homines: haud scio, magis ne Deum contemnat, an homines. Hic per dubitationem commutata est orationis forma. Nihil mihi carius aut antiquius fama: dispeream, si quid mihi carius fama. Hic per adiurationem variatus est sermo. Est vir insigni vanitate: o singularem hominis vanitatem! Hic per exclamationem. Non modo virgines aliquot constupravir, verum etiam Vestalem incestu polluit: virgines complures stupravir, ut interim de Vestali, incestu polluta, fileam. Hic per occupationem variatus est sermo. Quum & genere sis obscurissimo, & re nulla, nullis litteris, nulla forma, nullo ingenio; quid est cur te adeo iactes? quid habes cur tam sis insolens? Natalium splendorem? atqui genere est obscurissimo: opes? at vel Iro ipso pauperior es: eruditionem? sed bonas litteras neque attigisti umquam: formam? at ipso Therſite deformior es: ingenium? at istud profecto nactus es stupidissimum. Quid igitur ista tua iactantia est, nisi mera insania? Hic per subiectionem variatus est orationis habitus.

Variatur etiam oratio per aequipollentiam: de qua dialectici quoque differunt. Ea constat negationis additione, detractione, geminatione, & verbis contrariis. Ut, primas obtinet, non est in postremis. Vir egregie doctus, vir minime indoctus. Omnia fecit, nihil non fecit. Placet, non displicet. Accipio conditionem, non recuso conditionem. Ad hanc formam pertinent, quae actionem & passionem declarant. Ab illo grave vulnus accepit: inflixit illi grave vulnus. In Cicerone quaedam desiderantur a doctis: in Cicerone docti quaedam desiderant.

Facilis est item variandi ratio per dictiones relativas, quae & ipsa ad contrariorum genus pertinent. Vxor illius esse non vult: non vult illum maritum. Recusat illius esse focer: recusat illum generum. Pudet me huius nurus: pu-

det me huius socrum videri. Non alium mihi patrem optem: nullius malim esse filius. O me tali felicem praeceptore! felicem me, qui tuus sim discipulus! Haec de eloquentionis virtutibus dicta sufficiant: nunc ad vitia illis adversantia transeamus.

CAP. XXI.

DE VITIIS ELOQVVTIONI, AC PRAECIPVE
ornatui, oppositis.

Quoniam de eloquentionis, ac praecipue de ornatae orationis virtutibus diximus; reliquum est, ut, quoniam virtutibus vitia contraria sunt, de vitiis quoque orationis non nulla dicamus, quo ea studiose declinantes, virtutes plenius consecrari valeamus. Et quidem quum initio huius libri (a) quattuor praecipuas eloquentionis virtutes esse dictum sit; ut videlicet oratio esset emendata, perspicua, ornata, & rebus, quae dicuntur, apta & accommodata: quae essent emendatae & perspicuae orationi contraria vitia, simul cum ipsis virtutibus (b) exposuimus. Ornatae autem atque aptae orationis vitia, quoniam plurima sunt, in hunc locum reservavimus: propterea quod ea, nisi cognitis virtutibus, haud facile dignosci poterant. Atque ut summam rem totam perstringamus, quaecumque adversus ea, quae ad ornate apteque dicendum requiri diximus, (c) pugnant, orationis vitia sunt. Quum igitur ornatus tria illa potissimum exigat, delectum verborum cum rebus ipsis cohaerentium, accommodatas eisdem verborum & sententiarum figuras, lenem & numerosam compositionem; quidquid adversus ista peccat, vitium est. Nec minus vitium est, si oratio personis & rebus apta non sit.

Sed quia sub hac communi admonitione varia vitia continentur; operae pretium erit, eadem sigillatim enumerare, suisque nominibus, quo apertius cognoscantur, adnota-

(a) *Cap. 2. pag. 236.* (b) *Ibid.* (c) *Lib. V. cap. 17. pag. 319. seqq.*

tare. (a) Incipiamus ab eo vitio, quod honestissimo cuique cum primis vitandum est, nempe cacophaton, id est, obscena pronuntiatio, quum turpe aliquod verbum, vel parum honestum dicimus. Cuius rei exemplum ponere non decet, ne in id vitium incidamus, quod vitandum praecipimus. Verum quum aliquid huiusmodi significandum necessario est, periphrasi, aut aliquo alio tropo, utemur.

Deformitati proximum vitium est tapinosis, qua rei magnitudo vel dignitas verbis aut sententiis minuitur; quum videlicet rei honestae vel splendidae sordidum nomen tribuimus, parumque rei dignitati accommodatum. Cui natura contrarium, sed errore par est, parvis dare excellentia modum nomina: ut si quis parricidam appellaverit nequam hominem, aut deditum meretrici, nefarium. Illud enim parum, hoc nimium est. Debent enim verba rebus convenire, nisi quum aliquid augere volumus: de quo in amplificandi rationibus (b) dictum est.

Tautologia, hoc est, vitiosa eiusdem verbi repetitio, non nitoris, sed inopiae causa facta: id quod aridis & inexercitatis evenit, ut eadem per eadem dicant, & eandem quasi cantilenam recantent, cordaque oberrent eadem. Vnde adagium manavit, *Crambe bis posita mors*. Varietas ergo verborum adhibenda est, quum res eadem saepius est dicenda, ne idem verbum pluries in eodem contextu repetatur.

Pleonasmus adiectio verbi supervacua, ut: (c) *sic ore loquuta est*. Itaque non inurbane Cicero adversus Pansam declamans, (d) quum is dixisset, filium a matre decem mensibus in utero latum, ille contra: quid igitur? aliae in penula gestare solent? Omne enim verbum, quod intellectum, aut ornatum non adiuvat, vitiosum dici potest. Excusatur tamen hoc, quum asseverationis gratia fit; quale est illud: (e)

..... *vocemque bis auribus hausi.*

Z 4

Et:

(a) Quae sequuntur paene ad verbum desumpta sunt ex Quintil. lib. VIII. cap. 3. (b) Lib. III. cap. 5. pag. 130. seqq. (c) Virg. Aeneid. lib. I. v. 618. (d) Apud Quintil. loco cit. (e) Virgil. Aeneid. lib. III. v. 359.

Et: hisce oculis vidi, ne nega.

Macrologia, id est, iusto longior sermo, quale est illud: (a) legati, non impetrata pace, retro domum, unde venerant, reversi sunt. Verum hic in brevi sententia peccatum est. Peius tamen est, quum hoc eodem modo in tota oratione peccatur: hoc est, quando, quae breviter & dici & intelligi poterant, longa & perplexa oratione tractantur: quae res prudentem auditorem obtundit enecatque.

(b) „Cacozelon, id est, mala affectatio, per omne dicendi genus peccat. Nam & tumida, & exilia, & praedulcia, & abundantia, & arcessita, & exsultantia sub idem nomen cadunt. Denique cacozelon vocatur, quidquid est ultra virtutem, quoties ingenium iudicio caret, & specie boni fallitur: omnium in eloquentia vitiorum pessimum. Nam cetera quum vitentur, hoc petitur. „In hoc autem vitium incidit quisquis eam orationem affectat, cui non est par, nec assuetus.

Brachilogia, (c) id est, concisum, quum de re gravi nimis breviter & anguste loquimur, quae longiorem & apertiorrem requirebat sermonem. Quod si is, qui dicit, alio properans, hoc ipsum praestare non poterit; causam reddere conveniet, cur rem amplam angustis terminis comprehenderit.

Miosis, id est, diminutio, superiori vitio affinis, nisi quod pluribus verbis fit, ubi de re magna & ardua est iusto tenuior & simplicior oratio, quam eius dignitas & natura postulat: ut si quis materiam grandem & splendidam, sermone quotidiano, & iacente, servilique proferat. Hoc enim eloquentiae proprium est, sermonem dignitati rerum parem adhibere.

Bomphiologia, hoc est, tumiditas, contraria miosis, ubi res tenues, & leviculae efferuntur affectata, tumida, & speciosa, nimisque magnifica oratione: ut si quis ad amicum in epistolio, vel ad rusticos & indoctos splendidis nugetur periodis. Quod vitium sic irridet Horatius in arte: (d)

Quid

(a) *T. Liv. lib. VIII. ab urbe condita.* (b) *Quae sequuntur ad litteram desumpta ex Quintil. loco cit.* (c) *Ex Quintil. lib. VIII. cap. 3. & lib. VIII. cap. 3.* (d) *Ver. 138.*

Quid dignum tanto feret hic promissor biatu?

Parturient montes, nascetur ridiculus mus.

Hoc idem Fabius reprehendit his verbis : (a) „ ut oran-
 „ tem pro capite sollicitudo deceat & cura , & omnes ad
 „ amplificandam orationem quasi machinae : ita in parvis
 „ rebus iudiciisque vana sint eadem ; rideaturque merito,
 „ qui apud disceptatorem de re levissima sedens dictu-
 „ rus , utatur illa Ciceronis (b) confessione , non modo
 „ se animo commoveri , sed etiam corpore ipso perhorre-
 „ scere.

Asiatismus , id est , Asianum genus orationis , immodi-
 cum verbis & figuris , sed rebus inane. Hoc enim oratio-
 nis genere Asiani utebantur , (c) a quibus huius vitii nomen
 desumptum est , ut paullo ante (d) diximus.

Homiologia , (e) mire taediosum vitium , quod nulla
 varietatis gratia levat taedium , estque tota coloris unius:
 quae maxime deprehenditur carens arte oratoria. Eodem
 quippe ducitur semper tenore , sicut cantilena aliqua tae-
 diosior , neque numeris neque sonis probe distincta & va-
 riata : ideoque non animis solum , sed etiam auribus est in-
 gratissima. Estque hoc vitium superiori finitimum , & se-
 quenti contrarium.

Picilogia , coloratum , superiori contrarium vitium,
 ubi nihil in oratione rectum aut proprium est , sed omnia
 immodice figurata , & , sicut versicolor vestis , scurriliter pi-
 cturata & confuta sunt. Tales est fere sermo Apulianus : atque
 hoc quidem vocatur alias immodice floridum , eo quod pue-
 riliter & effeminate flosculis figurarum abutatur.

Periergia , (f) id est , curiositas , & supervacua , ut sic di-
 xerim , operositas : ut a diligenti curiosus , & a religione
 superstitio distat. Ea vero est , quum de re nihili , & in sen-
 tentia levicula multum verborum absumimus , nimisque fu-
 tiliter immoramur. Quod vitium copiam male affectantibus
 est valde familiare.

Ca-

(a) *Quintil.* lib. XI. cap. 1. (b) *Divin.* in *Q. Caecil.* cap. 13.
 (c) *Apud Quintil.* lib. XII. cap. 10. (d) *Pag.* 355. (e) *Quintil.*
 lib. VII. cap. 3. (f) *Quintil.* *ibid.*

Cacophonia, id est, absurditas, vel absonum, quum duriter & confragose inter se cohaerent & colliduntur stridentque litterae & syllabae. Est autem hoc vitium in versu maxime cavendum, nisi ubi res tumultuosior requirit talem asperitatem. Peccat autem hoc vitium contra compositionis lenitatem & concinnitatem.


Arithmon, id est, sine numeris, est oratio carens numeris & compositione tolerabili: ut si quis mere brevibus breviter, aut mere longis longa continuet, aut perpetuis commatibus tinniat, vel continuatis membris abundet, vel perpetuis periodis incedat pompose. De quo vitio Fabius, lib. VIII. cap. 4. & Cicero in oratore perfecto (a) praecipit. Etenim quaedam temperatura syllabarum est facienda, quam & aures mediocriter purgatae sentiant & probent; ut Pontanus scribit in opere de euphonia.

Oniconomiton, id est, indistinctum, superiori affine vitium, peccans contra decorum orationis & dispositionis, in qua nulla est oeconomia, sed omnia confusa sursum deorsumque miscentur; & fit plerumque verbis pluribus in oratione longa, quae caret arte & ordine, neque habet dispositionem artificialem, neque naturalem. Verum hoc vitium non contra eloquutionem, sed contra orationis dispositionem est; de qua superius (b) diximus: in quod tamen non raro multi concionatores incidunt, praesertim quum parum meditati suggestum conscendunt.

Praeter haec autem vitia numerantur breviter a Fabio (c) alia. Est enim oratio hebes, in qua nihil est acuminis. Est item sordida, in qua nullus est nitor, nullus sermonis cultus & elegantia. Est sterilis & ieiuna, quam nulla dicendi ubertas & copia orationis ornat atque dilatat: qualis imperitorum est, & arte carentium. Est item subtristis, quae nihil habet laetum, nihil floridum, quo capiat auditorem. Est & ingrata, quae
ni-

(a) Cap. 9. (b) Lib. III. cap. 7. pag. 229. seqq. (c) Institut. lib. VIII. cap. 3.

nihil habet suauitatis & iucunditatis. Est & vilis, sordidae affinis, in qua nihil accurate dicitur. Vt igitur haec vitia fugienda, ita contrariae virtutes captandae sunt: quas quidem facile consequetur, quisquis ea, quae de orationis ornatu haecenus dicta sunt, servare conabitur. Haec de eloquutionis virtutibus simul ac vitiis dicta sufficiant.





LIBER SEXTVS

ECCLESIASTICAE

RHETORICAE,

SIVE DE RATIONE CONCIONANDI:
IN QVO DE ACTIONE, SIVE
pronuntiatione, & quibusdam aliis ad con-
cionandum adiumentis, differitur.

PRAEFATIO.

SUPEREST utilissima, eademque ad scribendum diffi-
cillima, huius operis pars, quam rhetores pronuntia-
tionem, sive actionem, nuncupant: sed illud nomen
ad figuram vocis, hoc ad corporis gestum & motum per-
tinet. De hac virtute Fabius, (a) & Cornificius (b) copio-
sius, quam ceteri rhetores, scripserunt. Cui quidem faculta-
ti tantum idem Cornificius tribuit, ut non magis inventio-
nem, dispositionem, eloquutionem, & memoriam, sine
pronuntiatione ad agendum conferre dicat, quam solam
sine his omnibus pronuntiationem. Quam fit vero diffi-
cile de hac re praecepta tradere, idem etiam declarat his
verbis: (c) „ quia nemo de *pronuntiandi ratione* diligenter
„ scripsit; nam omnes vix posse putarunt de voce, & vul-
„ tu, & gestu dilucide scribi, quum hae res ad sensus
„ nostros pertinerent; & quia magnopere ea pars a nobis
„ ad dicendum comparanda est, non negligenter videtur
„ tota res consideranda. „ Haec ille. Idem etiam, ubi de
ge-

(a) *Lib. I. cap. 11, & lib. XI. cap. 3.* (b) *Ad Heren. lib. III. cap. 11.*
(c) *Loco citato.*

gestu corporis praecepta dedisset , haec verba subiecit : (a)
 „ non sum nescius , quantum susceperim negotii , qui mo-
 „ tus corporis exprimere verbis , imitari scriptura conatus
 „ sim voces. Verum nec hoc confisus sum posse fieri , ut
 „ de his rebus satis commode scribi posset ; nec , si id fie-
 „ ri non posset , hoc , quod feci , fore inutile putabam:
 „ propterea quod hic admonere voluimus , quid oporteret;
 „ reliqua trademus exercitationi. Hoc scire tamen oportet,
 „ pronuntiationem bonam id perficere , ut res ex animo agi
 „ videatur. „ Haecenus ille.

Nos igitur , horum auctorum vestigiis insistentes , prae-
 termisissis iis , quae illi multa ad civiles causas tractandas
 litteris commiserunt , quae lectori fastidium parere possent,
 ea solum eligemus , quae instituto nostro fuerint commo-
 diora : ne in tradenda hac re , quae , ut paullo post videbi-
 mus , est omnium praestantissima , studioso concionatori
 defuisse videamur. Sed quoniam viri adeo eloquentes dif-
 ficile esse docent , pronuntiationis praecepta tradere ; dan-
 da nobis venia erit , qui vix , quod sentimus , explicare di-
 cendo possumus , si minus plene & aperte , quae de ea di-
 cenda erunt , exponemus. Quamvis enim de hac virtute
 nec omnia tradere , nec facili & dilucida oratione trade-
 re valeamus ; quia tamen res magni momenti est , nullo
 modo ea , quae praecipui possunt , negligenda sunt. Haec
 enim legentium ingenia ad ea , quae defunt , quaeque ver-
 bis exprimi nequeunt , excitare poterunt. Incidi paucis ante
 hac diebus in librum quemdam , Gallica lingua scriptum , qui
 de arte atque ratione venandi differebat : qui eo usque ad
 singularia artis huius praecepta descendit , ut iis notis , qui-
 bus cantores ea , quae concinunt , designare in libris so-
 lent , insinuaret , qua vocis figura atque sono canes a vena-
 toribus vocandi , atque ad venandum concitandi essent. De-
 miratus certe sum hominum diligentiam , qui ad hanc quo-
 que rem non modo praecepta excogitarunt , sed etiam ge-
 nus quoddam cantici & vocis , quo bruta animantia vo-
 canda essent , non loquendo , sed scribendo , tradere tenta-
 rent.

(a) Cap. 15.

rent. Si ergo isti adeo studiosi in re nihili fuerunt; cur nos in tradenda re omnium praestantissima, maximeque concionatoribus necessaria, ab illis superabimur? Ego itaque non modo ex his eloquentissimis viris, quos supra memoraui, huius rei observationes & praecepta in medium offeram, sed etiam quae ipse longo concionandi usu consequi potui, illis adiungam, eaque variis exemplis illustranda atque exponenda curabo.

CAP. I.

*PRONUNTIATIONIS NECESSITAS,
& commendatio.*

Quanta sit rectae pronuntiationis necessitas & utilitas, non video qua ratione magis explicare possim, quam quod non raro mihi videre contigit, immo vero nemo non passim videt, concionatores plurimos, quibus neque eruditio disputando, nec eloquentia scribendo, nec pietas & religio in vita deest, quorum tamen conciones vix ullae aures patienter ferre possunt. Cuius rei non alia profecto causa est, quam quod hac una pronuntiandi virtute destituti sunt.

Hos autem auditorum vulgus eruditos quidem viros, dicendi tamen gratia carere, ait: gratiae videlicet nomine, hanc agendi & pronuntiandi virtutem designans. Haec igitur una pars maxime in dicendo dominatur: sine qua summus etiam concionator esse in numero nullo potest; mediocri vero, hac instructus, summos saepe superare. Nam & infantes, actionis dignitate, eloquentiae saepe fructum tulerunt; & disertis multi, deformitate agendi, infantes putati sunt. Cuius rei ea vel praecipua causa esse videtur, quod auditores ita afficiuntur, ut ad eorum oculos & aures, vultus sermoque pervenit.

Hinc D. Bernardus, epist. 66. solet, inquit, acceptior esse sermo vivus, quam scriptus; & efficacior lingua, quam littera: nec tam affectum exprimit scribens digitus, quam vul-

vultus. Non tam enim quid dicas, aut quibus verbis dicas, quam quo vultu & actione dicas, attendere homines solent. Id adeo verum est, ut si rem indignissimam lenta & languida voce pronunties, ita ipsi quoque eandem concipiant, neque pro rei indignitate moveantur. Contra vero si levem alioqui iniuriam acri voce & vultu enuntiaveris, similem motum auditorum animis incuties. Est enim pronuntiatio, ut in priori libro (a) diximus, velut extrema orationis forma, quae tales in auditorum animis motus & affectus ingenerat, quales dicentis vox, vultus, & gestus prae se ferunt. Nec ad motus animorum tantum, sed ad fidem etiam faciendam apta pronuntiatio plurimum valet. Quam rem adversus Callidium ostendit Cicero. (b) Callidius namque Gallum accusavit, M. Tullio defendente: quumque accusator affirmaret, se testibus, chirographis, quaestionibus probaturum, sibi a reo fuisse praeparatum venenum; sed interim rem tam atrocem remisso vultu, languida voce, ac reliquo gestu parum concitato pronuntiaret: M. Tullius, an ista, inquit, si vera essent, sic a te dicerentur? tantum abest, ut inflammares nostros animos, ut somnum isto loco vix teneremus. Sed commodius erit, Fabium, huius virtutis laudes commemorantem, audire. Is igitur XI. oratoriarum institutionum libro (c) sic ait.

„ Habet... (*pronuntiatio*) miram quamdam in orationibus vim ac potestatem. Neque enim tam refert, qualia sint, quae intra nosmetipsos composuimus, quam quo modo efferantur. Nam ita quisque ut audit, movetur. Quare neque probatio ulla, quae modo venit ab oratore, tam firma est, ut non perdat vires suas, nisi adiuvetur asseveratione dicentis. Affectus omnes languescant, necesse est, nisi voce, vultu, totius prope habitu corporis inardescant. Nam quum haec omnia fecerimus, felices, si tamen nostrum illum ignem iudex conceperit: ne dum eum supini securique moveamus, ac non & ipse nostra oscitatione solvatur. Documento sunt vel scenici actores,

(a) Lib. II. cap. 1. pag. 44. (b) In frag. orat. pro Q. Gal. apud Quintil. lib. XI. cap. 3. (c) Cap. 3.

„ res , qui & optimis poëtarum tantum adiiciunt gratiae,
 „ ut nos infinite magis eadem illa audita , quam lecta , de-
 „ lectent ; & vilissimis etiam quibusdam impetrent aures,
 „ ut quibus nullus est in bibliothecis locus , sit etiam fre-
 „ quens in theatris.

„ Quod si in rebus , quas fictas esse scimus & inanes,
 „ tantum pronuntiatio potest , ut iram , lacrimas , sollicitu-
 „ dinem afferat ; quanto plus valeat necesse est , ubi & cre-
 „ dimus ? Equidem vel mediocrem orationem , commenda-
 „ tam viribus actionis , affirmaverim , plus habituram esse
 „ momenti , quam optimam , eadem illa destitutam. Siqui-
 „ dem & Demosthenes , quid esset in toto dicendi opere
 „ primum interrogatus , (a) pronuntiationi palmam dedit,
 „ eidemque secundum ac tertium locum, donec ab eo quae-
 „ ri desineret : ut eam videri posset non praecipuam , sed
 „ solam iudicasse. Ideoque ipse tam diligenter apud Andro-
 „ nicum Hypocritem studuit , ut admirantibus eius oratio-
 „ nem Rhodiis , non immerito Aechines dixisse videatur:
 „ quid si ipsum audissetis ? Et M. Cicero unam in dicendo
 „ actionem dominari putat. (b) Hac Cn. Lentulum plus
 „ opinionis consequutum , quam eloquentia , tradit. Eadem
 „ C. Grachum , in deflenda fratris nece , totius populi Rom.
 „ lacrimas concitasse , (c) Antonium & Crassum multum
 „ valuisse , plurimum vero Q. Hortensium : cuius rei fides
 „ est , quod eius scripta tantum intra famam sunt , qui diu
 „ princeps oratorum , aliquando aemulus Ciceronis existi-
 „ matus est , novissime , quoad vixit , secundus : ut appa-
 „ reat , placuisse aliquid eo dicente , quod legentes non in-
 „ venimus.

„ Et hercle quum valeant multum verba per se , & vox
 „ propriam vim adiiciat rebus , & gestus motusque signi-
 „ ficet aliquid ; profecto perfectum quiddam fieri , quum
 „ omnia coërint , necesse est. Sunt tamen qui rudem il-
 „ lam , & qualem imperus cuiusque animi tulit , actionem
 „ iudicent fortiolem , & solam viris dignam ; sed non alii
 „ fe-

(a) *Apud Cic. de Orat. lib. III. cap. 56.* (b) *Cic. in Bruto , cap. 66.*
 (c) *Ibid. cap. 38.*

„ fere , quam qui etiam in dicendo curam , & artem , &
 „ nitorem , & quidquid studio paratur , ut affectata & pa-
 „ rum naturalia solent improbare ; vel qui verborum , at-
 „ que ipsius etiam soni rusticitate , ut L. Cottam dicit Ci-
 „ cero (a) fecisse , imitationem antiquitatis affectant. Ve-
 „ rum illi persuasionem suam fruuntur , qui hominibus , ut
 „ sint oratores , satis putant nasci : nostro labori dent ve-
 „ niam , qui nihil credimus esse perfectum , nisi ubi natu-
 „ ra cura iuvetur : in hoc igitur non contumaciter con-
 „ sentio , primas partes esse naturae. Nam certe bene pro-
 „ nuntiare non poterit , cui aut in scriptis memoria , aut
 „ in his , quae subito dicenda erunt , facilitas prompta de-
 „ fuerit , nec si inemendabilia oris incommoda obstabunt.
 „ Corporis etiam potest esse aliqua tanta deformitas , ut
 „ nulla arte vincatur. Sed ne vox quidem , nisi liberalis ,
 „ actionem habere optimam potest. Bona enim firmaque ,
 „ ut volumus , uti licet : mala , vel imbecilla , & inhibet
 „ multa , ut insurgere , exclamare ; & aliqua cogit , ut
 „ summittere , deflectere , & raras fauces , ac latus fatiga-
 „ tum deformi cantico reficere. Sed nos de eo nunc loqui-
 „ mur , cui non frustra praecipitur. „ Haftenus Fabius.

Quum sit autem omnis actio in duas divisa partes ,
 vocem scilicet , & gestum ; quorum alter oculos , al-
 tera aures movet , per quos duos sensus omnis ad ani-
 mam penetrat affectus : prius quidem de voce , deinde
 de gestu , qui voci accommodatur , dicendum est.
 Sed antequam singulares huius partis observationes &
 praecepta tradamus , quem ad finem ea omnia referantur ,
 explicandum est : ut sine rei cognito , facilius ea , quae ad
 finem destinata sunt , percipiamus.

(a) De orat. lib. III. cap. 11. & in Bruto , cap. 74.

IN QVEM FINEM SIVE SCOPVM OMNIA
huius partis praecepta referenda sint.

QVamvis multa , ac varia de recte pronuntiandi ratione a rhetoribus sint tradita , tamen omnia ad unum dumtaxat finem referuntur ; hoc est , ut ita dicamus , quemadmodum natura ipsa , & communis ac naturalis loquendi modus dicat esse loquendum : a quo declinare , ut contra naturam , ita contra decorum est. Neque enim aliud tota artis observatio agit , quam ut hunc naturalem loquendi modum exprimat. Qua in re vehementer errant , qui aliam putant esse debere vocis figuram , quum concionantur , quam quum loquuntur : quum eadem rerum natura eandem utrobique agendi & pronuntiandi rationem exigit : nisi quod quum loquimur , vox quidem submissior ; quum vero concionamur , propter loci amplitudinem , auditorumque frequentiam , eadem attollenda sit , ut ab omnibus audiatur. Quo magis mirandum est , tam paucos esse concionatores , qui in hac parte naturam ducem sequantur , quum nihil facilius esse prima fronte videatur , quam illius ductum & motum , qui natura omnibus insitus est , sequi. Vt autem , quid in hac parte sentiam , apertius significare valeam , quid mihi & cuidam novicio concionatori acciderit , indicabo. Is igitur rogavit me , ut concionantem audirem , quo illum postea , si quid mihi animadversione dignum videretur , admone-rem. At is concionem omnem , quam ad verbum edidicerat , sine ulla vocis varietate ita pronuntiavit , ac si aliquem Davidis psalmum memoriter recitaret. Quum autem finita concione domum repeterem , vidi in itinere duas mulierculas acriter inter se contendentes atque rixantes. Quae ut veris animi affectibus concitatae loquebantur , ita varias quoque vocis figuras & flexus , pro ipsorum affectuum varietate , subinde commutabant. Tunc ego socio , qui mihi aderat : si ille , inquam , concionator has mulier-

cu-

eulas audisset , & hanc ipsam pronuntiandi rationem imitaretur ; nihil ei ad perfectam actionem , qua prorsus destitutus est , deesset.

Qua ex re colligitur , quod , quemadmodum pictores , quum vel arborum , vel avium , vel aliorum animantium corpora effingunt , dant operam , ut quam maxime possint , ad vivum ea exprimant ; ut qui illa cernit , non tam picta , quam vera , se corpora cernere putet : ita concionator naturalem loquendi cunctorum hominum modum diligenter observet , atque eorum praecipue , qui hoc aptius & elegantius , & cum quadam dignitate faciunt ; & hac una observatione , quidquid hic longa oratione praecipimus , erit assequutus. Animadverti aliquando pictorem quemdam , parvulum Iesum in tabula exprimentem , qui passerulum manu prehensum teneret : is autem , ut probe aviculam exprimeret , eandem in manu vivam contemplabatur ; ut ita demum effigies avis veram eius formam praesentaret. Idem ergo nobis agendum , ut diligenter & attente naturalem pronuntiandi rationem , qua viri , elegantiori ingenio praediti , in familiaribus colloquiis utuntur , observemus ; ut eandem nos , dum concionamur , pro virili nostra referre valeamus. Verum hoc , quamlibet facile ac naturale esse videatur , multi , ut iam diximus , minime assequuntur : ac multo minus illi , qui , quum verborum inopes sint , & extemporalis dicendi facultate careant , ad verbum conciones ediscunt ; & ita illas eodem vocis tenore , caecorum mendicantium more , pronuntiant. Haec ideo a me dicta sunt , ut studiosus concionator intelligeret , in quem finem omnia huius partis praecepta referenda sint. Omnia enim eo tendunt , ut illam pronuntiandi rationem sequamur , quam mortalibus cunctis natura ipsa , nullo docente , praescripsit. Quam qui probe fuerit assequutus , non admodum his nostris praeceptionibus indigebit.

QUATTUOR ESSE PRAECIPVAS PRONUNTIATIONIS

*virtutes: quarum prima est, ut sit emendata,
hoc est, ut careat omni vitio.*

EST autem commodissima, maximeque naturalis, illa Fabii partitio, qua dicit, easdem in pronuntiatione virtutes, quas in eloquutione (a) posuimus, spectandas esse. Sic enim ait: (b) „ non est alia ratio pronuntiationis, „ quam ipsius orationis. Nam ut illa emendata, dilucida „ ornata, apta esse debet; ita haec quoque. Emendata „ erit, id est, vitio carebit, si fuerit os facile, explana- „ tum, iucundum, urbanum, id est, in quo nulla neque „ rusticitas, neque peregrenitas resonet. Non enim sine „ causa dicitur, barbarum, Graecumve. Nam sonis ho- „ mines, ut aera rinnitu, dignoscimus. Ita fiet illud, quod „ Ennius (c) probat, quum dicit, suaviloquenti ore Ce- „ thegum fuisse: non quod Cicero in his reprehendit, quos „ ait latrare, non agere. „ Curabit etiam, ne simplicem vocis naturam pleniori quodam sono, quod quidam faciunt, circumliniat. „ Itaque sit ipsa vox primum, ut sic „ dicam, sana, id est, nullum eorum, de quibus nunc „ dixi, patietur incommodum; deinde non subsurda, ru- „ dis, immanis, dura, rigida, varia, praepinguis, aut „ tenuis, inanis, acerba, pusilla, mollis, effeminata; „ spiritus, nec brevis, nec parum durabilis, nec in receptu „ difficilis. „

Et quoniam in gestu quoque & motu corporis sua vitia sunt, de his quoque hoc in loco breviter dicendum est, quod ea sint cum vitiis pronuntiationis coniuncta: quamvis hac de re copiosius suo loco, ut polliciti sumus, differemus. Curandum ergo est, ut quoties exclamandum erit, laterum conatus sit ille, non capitis; ut gestus ad vocem, vultus ad gestum accommodetur. Observandum erit

(a) *Lib. V. cap. 2. pag. 236.* (b) *Quintil. Instit. lib. XI. cap. 24*
(c) *Aphid Cic. in Bruto, cap. 15.*

erit etiam, ut recta sit facies dicentis, ne labra detorqueantur, ne immodicus hiatus rictum distendat, ne supinus vultus, ne deiectioni in terram oculi, nec inclinata utroque libet cervix. Nam frons pluribus generibus peccat. Videntur multos, quorum supercilia ad singulos vocis conatus allevarentur, aliorum constricta, aliorum etiam dissidentia, quum altero in verticem tenderent, altero paene oculus ipse premeretur. Infinitum autem, ut mox dicemus, in his quoque rebus momentum est. Et nihil potest placere, quod non decet.

§. I.

SECUNDA PRONUNTIATIONIS VIRTUS,
ut sit dilucida.

„ **D**ilucida (a) vero erit pronuntiatio, primum, si verba
 „ tota exegerit, quorum pars devorari, pars desti-
 „ tui solet, plerisque extremas syllabas non proferentibus,
 „ dum priorum sono indulgent. „ *Expressa enim debent esse*
 „ *se verba.* „ Vt autem est necessaria verborum explana-
 „ tio, ita omnes computare, & velut adnumerare litte-
 „ ras, molestum & odiosum. Nam & vocales frequentissi-
 „ me coeunt, & consonantium quaedam in sequente vo-
 „ cali dissimulantur. „ Praecipue vero ad hanc virtutem
 „ parandam adiuvat distinctio, hoc est, ut oratio, velut ipsa
 „ corporis membra, articulis suis distincta sit: hoc est, ut
 „ qui dicit, & incipiat ubi oportet, & desinat. „ In ipsis
 „ *tamen* distinctionibus tempus alias brevius, alias lon-
 „ gius dabimus. Interest enim, sermonem finiat, an sen-
 „ sum. „ *Vbi enim orationis sensus perfecte finitur* „ „ depo-
 „ nam, & morabor, & novum rursus exordium faciam.
 „ Sunt aliquando & sine respiratione quaedam morae et-
 „ iam in periodis, ut in illa: (b) in coetu vero pop. Rom.
 „ negotium publicum gerens, magister equitum, & cete-
 „ ra, multa membra habent: sensus enim sunt alii atque

Aa 3

„ alii:

(a) Quintil. lib. XI, cap. 3. (b) Cic. in M. Ant. Philip. II.

„ alii : & sicut una circumductio est , ita paullum moran-
 „ dum in his intervallis , non interrompendus est contex-
 „ tus ; & e contrario spiritum interim recipere sine intel-
 „ lectu morae necesse est : quo loco quasi surripiendus est :
 „ alioqui si inscite recipiatur , non minus afferat obscuri-
 „ tatis , quam vitiosa distinctio. Virtus autem distinguen-
 „ di fortasse sit parva , sine qua tamen esse nulla alia in
 „ agendo potest. „ Haec omnia ex Fabio : (a) qui paucis
 sane verbis hanc virtutem ita commendavit , ut sine ea nul-
 lam aliam esse censeat.

Qua ex re liquet , graviter eos delinquere , qui summa
 celeritate tota fere concione ita dicunt , ut nullo in loco
 sistant , nihil distincte dicant ; sed uno spiritu , atque uno
 impetu , omnia percurrant. Aut enim memoriae diffiden-
 tes ita dicunt , ne , si aliter dixerint , aliquid e memoria
 excidat ; aut ita metu & trepidatione eorum animus obse-
 sus est , ut sui iuris esse non sinantur , quod metus ille
 omnem animi sensum quodam modo ebibat ; & vix , quid
 dicant , aut quo modo dicant , attendere permittat. Quod
 quidem vitium inter maxima computandum est : in quod
 tamen plerique concionatores incidunt , atque ii maxime ,
 qui huius officii rudes & velut tirones sunt , vel magno
 oppressi metu dicunt. Hinc idem Fabius : (b) „ nec volu-
 „ bilitate nimia confundenda , quae dicimus : qua & di-
 „ stinctio perit , & affectus ; & non numquam etiam ver-
 „ ba aliqua sui parte fraudantur. Cui contrarium est vi-
 „ tium nimiae tarditatis. Nam & difficultatem invenien-
 „ di fatetur , & segnitia solvit animos.... Promptum sit
 „ os , non praeceps ; moderatum , non lentum. Spiritus
 „ quoque nec crebro receptus concidat sententiam , nec
 „ eo usque trahatur , donec deficiat.... Quare longiorem di-
 „ cturis periodum colligendus est spiritus : ita tamen , ut
 „ id neque diu , neque cum sono faciamus , neque omni-
 „ no ut manifestum sit : reliquis partibus optime in-
 „ ter iuncturas sermonis revocabitur. Exercendus au-
 „ tem est , ut fit quam longissimus : quod Demosthe-
 „ nes

(a) *Instit. lib. XI. cap. 3.* (b) *Ibidem.*

„ nes ut efficeret , scandens in aduersum , continuabat
 „ quam posset plurimos versus.

§. II.

*TERTIA PRONUNTIATIONIS VIRTUS,
 ut sit ornata.*

„ **O**rnata (a) est pronuntiatio, cui suffragatur vox facilis,
 „ magna , beata , flexibilis, firma, dulcis , durabilis,
 „ clara , pura , secans aëra , auribus sedens. Est enim quae-
 „ dam ad auditum accommodata , non magnitudine , sed
 „ proprietate, ad hoc velut tractabilis, utique habens omnes
 „ in se , qui desiderantur , sonos , intentionesque , & to-
 „ to , ut aiunt, organo instructa: cui aderit lateris firmitas,
 „ spiritus cum spatio pertinax, tum labori non facile cessu-
 „ rus. Neque gravissimus, ut in musica, sonus, nec acutissi-
 „ mus orationibus convenit. Nam & hic parum clarus , ni-
 „ miumque plenus, nullum afferre animis motum potest; &
 „ ille praetenuis , & immodicae claritatis , cum est ultra
 „ verum, tum neque pronuntiatione flecti, nec diutius fer-
 „ re intentionem potest. Nam vox, ut nervi, quo remissior,
 „ hoc gravior & plenior ; quo tensior , hoc tenuis &
 „ acuta magis est. Sic ima vim non habet , summa rumpi
 „ periclitatur. Mediis igitur utendum sonis : hique, quum
 „ augenda intentio est , excitandi ; quum summitenda,
 „ sunt temperandi. „

Ad hunc etiam ornatum pertinet, ut vox, quatenus fie-
 ri possit, cum suavitate quadam, non quidem feminea , aut
 etiam affectata , sed virili & naturali , prodeat : quae qui-
 dem res , ut in cantu , ita etiam in dicendo aures mulcet
 ac detinet. Quod ut praestare possimus , curandum , ne
 quum sermo in contentione est , ita vocem ultra vires ur-
 geamus , ut arteriae laedantur. Sic enim velut exasperatur
 vox, & insuavem quamdam raucedinem contrahit, quae ipsas
 etiam auditorum aures exasperat. Hinc Fabius : (b) „ vox,

Aa 4

„ in-

(a) Idem loco cit. paullo superius. (b) Loco cit. paullo inferius.

„ inquit , ultra vires urgenda non est : nam & suffocata
 „ saepe , & maiore nisu , minus clara est. „ Moderandus
 ergo est ille impetus , nec ex toto sic effundendus , ut &
 vox laedatur , & sequentibus non sufficiat. Hoc autem ef-
 ficere , singularis cuiusdam dexteritatis est. Impetus enim il-
 le animi saepe ita mentem obruit , ut hoc animadvertere
 non sinat. Quid autem ad hanc vocis suavitatem & fir-
 mitatem conducat , paullo fufius Herenniana rhetorica do-
 cet. Cuius sententiam hoc in loco attexere libuit.

Primum enim admonet , ut (a) „ quam maxime seda-
 „ ta & depressa voce principia dicamus. Nam laeduntur
 „ arteriae , si ante quam leni voce permulsae sunt , acri cla-
 „ more compleantur. Etiam intervallis longioribus uti con-
 „ veniet. Recreatur enim vox spiritu , & arteriae reticen-
 „ do acquiescunt. Et continuum clamorem remittere , &
 „ ad sermonem transire oportet , (commutationes enim fa-
 „ ciunt , ut nullo genere vocis effuso , in omni voce in-
 „ tegri simus) & acutas vocis exclamations vitare.
 „ Ictus enim fit , & vulnerantur arteriae acuta atque
 „ attenuata nimis acclamatione : & si quis splendor est
 „ vocis , consumitur uno clamore universus. Et uno spiritu
 „ continenter multa dicere in extrema convenit oratione.
 „ Fauces enim calefiunt , & arteriae complentur , & vox ,
 „ quae varie tractata est , reducitur in quemdam sonum
 „ aequabilem atque constantem. „ Quod ergo ad vo-
 cis integritatem utile , id est etiam auditoribus gra-
 tum.

„ Saepe rerum naturae gratia quaedam iure debetur ,
 „ velut accidit in hac re. Nam quae diximus ad vocem ser-
 „ vandam prodesse , eadem attinent ad suavitatem pronun-
 „ tiationis : ut quod nostrae voci profit , idem voluptate
 „ auditoris probetur. Utile est ad firmitudinem vocis se-
 „ data vox in principio. Quid insuavius , quam cla-
 „ mor in exordio causae ? Intervalla vocem confirmant :
 „ eadem sententias concinniores divisione reddunt , &
 „ auditori spatium cogitandi relinquunt. Conservat vo-
 „ cem

(a) *Ad Heren. lib. III. cap. 12.*

cem continui clamoris remissio. Et auditorem quidem
 ,, varietas maxime delectat, quum sermone animum eius
 ,, retinet, aut exsuscitat clamore. Acuta exclamatio vocem
 ,, & fauces vulnerat, eadem laedit auditorem. Habet enim
 ,, quiddam illiberale, & ad muliebrem potius vociferatio-
 ,, nem, quam ad virilem dignitatem in dicendo accom-
 ,, modatum. In extrema oratione continens vox remedio
 ,, est voci. Quid? Haec eadem nonne animum vehemen-
 ,, tissime calefacit auditoris in totius conclusione cau-
 ,, sae? ,, Haëtenus Herenniana rhetorica.

Ornatam quoque facit pronuntiationem vocis varietas
 rebus ipsis accommodata: de qua tamen mox dicemus,
 quod hoc ad rationem apte pronuntiandi magis pertineat:
 id quod non minus ad eius ornatum facit. Ars enim va-
 riandi cum gratiam praebet ac renovat aures, tum di-
 centem ipsa laboris mutatione reficit: ut standi, ambu-
 landi, sedendi, iacendi vices sunt, nihilque horum pa-
 ti unum diu possumus.

CAP. IV.

*QUARTA PRONUNTIATIONIS VIRTUS,
 ut sit apta.*

HAëtenus de tribus pronuntiationis virtutibus, hoc
 est, de ratione emendate, dilucide, & ornatè pro-
 nuntiandi diximus: superest quarta, & ea quidem praeci-
 pua ac summa, apte pronuntiandi virtus; quae rebus ipsis,
 quas dicimus, pro ipsarum natura, vocis figuram accom-
 modat. Quae res ad attentionem auditorum excitandam,
 fastidiumque vitandum miro modo adiuuat. Ad singulas
 quippe vocis mutationes & flexus, auditoris animus,
 qui ex loquentis ore pendet, tot intra se concipit motus,
 quot ille sonos subinde mutat. Intelligit enim, non fru-
 stra illum rectam pronuntiandi formam in aliam atque
 aliam vocis figuram flectere: atque ita frequenter & at-
 tentionem renovat, & satietatem varietate vitat.

Qua

Qua de re sic Fabius ait: (a), iam .. tempus est dicendi, quae sit apta pronuntiatio, quae certe ea est, quae iis, de quibus dicimus, accommodatur: quod quidem maxima ex parte praestant ipsi motus animorum, sonatque vox, ut feritur. Sed quum sint alii veri affectus, alii ficti & imitati; veri naturaliter erumpunt, ut dolentium, irascentium, indignantium, sed carent arte: ideoque non sunt disciplinae traditione formandi. Contra qui effinguntur imitatione, artem habent, sed hi carent natura: ideoque in his primum est bene affici, & concipere imagines rerum, & tanquam veris moveri: sic velut media vox, quem habitum a nobis acceperit, hunc *auditorum* animis dabit. Est enim mentis index, & velut exemplar, ac totidem, quot illa, mutationes habet. Itaque laetis in rebus plena, simplex, & ipsa quodammodo hilaris fluit. At in certamine erecta, totis viribus, & velut omnibus nervis intenditur... At in blandiendo, fatendo, satisfaciendo, rogando, lenis & submissa. Suadentium, & monentium, & pollicentium, & consolantium, gravis: in metu, & verecundia, contracta: adhortationibus fortis, disputationibus teres, miseratione flexa & flebilis, & consulto quasi obscurior:... in expositione ac sermonibus, recta, & inter acutum sonum & gravem media. Attollitur autem concitatis affectibus, compositis descendit, pro utriusque rei modo altius, vel inferius. Haec Fabius.

Ex cuius verbis haud obscure, quaenam sit apta pronuntiatio, colligitur. Ea namque est, quae non uno & eodem tenore decurrit, sed quae, ut ante (b) diximus, pro rerum varietate & natura subinde vocem commutat: quae grandia graviter, mediocria temperate, submissa leniter, atrocia vehementer atque acriter afferat; ut & verbis, & rebus, quas dicimus, atque animo vox ipsa respondeat. Qua de re sic idem Fabius ait: (c), vitemus... illam, quae Graece monotonia vocatur, una quaedam spiritus

ac

(a) *Quintil. lib. XI. cap. 3.* (b) *Pag. 377.* (c) *Loco cit.*

„ ac soni intentio ; non solum ne dicamus omnia clamoſe,
 „ quod insanum eſt , aut intra loquendi modum , quod
 „ motu caret , aut ſubmiſſo murmure , quo etiam debili-
 „ tatur omnis intentio : ſed ut in iſdem partibus , iſdem-
 „ que affectibus , ſint tamen quaedam non ita magnae
 „ vocis declinationes , prout aut verborum dignitas, ... aut
 „ tranſitus poſtulabit : ut qui ſingulis pinxerunt coloribus,
 „ alia tamen eminentiora , alia reductiora fecerunt : ſine
 „ quo ne membris quidem ſuas lineas dediffent.

„ Proponamus enim nobis illud Ciceronis in oratio-
 „ ne nobiliſſima pro Milone principium : nonne ad ſin-
 „ gulas paene diſtinctiones , quamvis in eadem facie , ta-
 „ men quaſi vultus mutandus eſt? *Eſſi vereor , iudices,*
 „ *ne turpe ſit , pro fortiffimo viro dicere incipientem ti-*
 „ *mere.* Etiamſi eſt toto propoſito contractum atque ſub-
 „ miſſum , quia & exordium eſt , & ſolliciti exordium;
 „ tamen fuerit , neceſſe eſt , aliquid plenius , & erectius,
 „ dum dicit , *pro fortiffimo viro* , quam quum , *eſſi ve-*
 „ *reor* , & *turpe ſit* , & *timere.* Iam ſecunda respiratio in-
 „ creſcat oportet , & naturali quodam conatu , quo mi-
 „ nus pavide dicimus , quae ſequuntur , & quo magnitu-
 „ do animi Milonis oſtenditur : *minimeque deceat , quum*
 „ *T. Annii ipſe magis de reipub. ſalute , quam de ſua,*
 „ *perturbetur.* Deinde quaſi obiurgatio ſui eſt : *me ad*
 „ *eius cauſam parem animi magnitudinem afferre non poſ-*
 „ *ſe.* Tum invidioſiora : *tamen haec novi iudicii nova for-*
 „ *ma terret oculos.* Illa vero iam paene apertis , ut aiunt ,
 „ tibiis : *qui quocumque inciderunt , veterem conſuetudi-*
 „ *nem fori , & priſtinum morem iudiciorum requirunt.*
 „ Nam ſequens latum etiam atque fuſum eſt. *Non enim*
 „ *corona conſeſſus veſter cinctus eſt , ut ſolebat.* Quod no-
 „ tavi , ut appareret , non ſolum in membris cauſae , ſed
 „ etiam in articulis eſſe aliquam pronuntiandi varietatem ,
 „ ſine qua nihil neque maius neque minus eſt. „

Verum haec in genere de communibus pronuntiandi
 virtutibus dicta ſunt : reliquum eſt , ut , cuiuſmodi pro-
 nuntiatio ſingulis orationis partibus adhibenda ſit , dili-
 gen-

genter inspiciamus. Atque ut ordine hanc partem plenus tractemus, neque quidquam a nobis praetermissum esse videatur; eam methodum sequemur, quam dialectici, ceteraeque disciplinae observare solent: quae rem totam & partes eius ad prima usque elementa revocant. Itaque dialectici, quibus de syllogismo tractare propositum est, prius quam ad hoc veniatur, de syllogismi partibus, nempe de propositionibus, ex quibus syllogismus conficitur, disserunt. Quia vero propositiones singularibus vocibus constant, de illis etiam in libris praedicamentorum tractant: atque iis omnibus praelibatis, ad syllogismorum rationem explicandam veniunt. Hanc igitur methodum nos quoque in pronuntiandi facultate tradenda sequemur: nisi quod primo loco de praecipuis orationis partibus, secundo vero de variis sententiis, quae in eisdem partibus continentur, ac postremo de singulis verbis, ex quibus sententiae constant, quo modo pronuntianda sint, differemus.

CAP. V.

CVIVSMODI PRONUNTIATIO TRIBVS

praecipuis orationis partibus, hoc est, expositioni, argumentationi, & amplificationi, conveniat.

VT igitur, quod primo loco posuimus, expediamus, meminisse debemus, quid in huius operis initio (a) a nobis dictum sit: nempe orationem omnem aut in expositione, aut in argumentatione, aut in amplificatione versari. Constat autem vel rudibus etiam, aliam pronuntiandi rationem in expositione, aliam in argumentatione, aliam in amplificatione requiri. Hae autem tres partes alias etiam sub se continent. Expositioni namque exordium, narratio, propositio, atque divisio finitima sunt. In argumentatione vero aliquando probamus, aliquando improbamur & confutamus; & interdum quidem sedatius atque subtilius, interdum vero acrius & concitatius &

ve-

(a) *Lib. II. cap. 3. pag. 49.*

vehementius disputamus. In amplificatione autem maior varietas est. In hac enim diversarum rerum magnitudinem attollimus & amplificamus, & varios item affectus, nempe amorem, odium, admirationem, dolorem, & metum, aliosque similes animi motus, excitare nitimur: inter quos indignatio & commiseratio a rhetoribus praecipue numerantur. In his ergo affectibus tractandis tam varia esse actio debet, quam affectus ipsi varii sunt; ut suo loco (a) monstrabimus. Nunc, quid unaquaeque harum partium exigit, consideremus.

§. I.

EXpositioni igitur, quam ex tribus orationis partibus primam fecimus, finitima est, ut diximus, exordii, & narrationis actio: haec enim tria non acrem & concitatum, sed sedatam actionem postulant. In expositione ergo quum citra argumentationem rem aliquam, aut obscurum locum exponimus, sedata pronuntiatione opus est; intervallis tamen distincta, voceque paullulum pro sententiarum natura variata: ut ipsa pronuntiatione eas res, quas demonstrabimus, animis auditorum inferere videamur.

De exordio vero sic Fabius ait: (b) „*exordio* frequentissime lenis convenit pronuntiatio. Nihil est enim ad „conciliandum gratus verecundia... *Itaque* & vox temperata, ac gestus modestus, & sedens humero toga, & „laterum lenis in utramque partem motus, eodem spe- „stantibus oculis, decebit. „Haec Fabius. Qua in re non leviter concionatores quidam peccare solent, qui vel ostentandae eruditionis, vel ingenii, vel libertatis cuiusdam gratia, ita dicere incipiunt, ut quadam arrogantiae suspicione non careant. Quin & auditores hac agendi libertate quodam modo se contemni arbitrantur. Alii vero in ipso etiam exordio acri actione utuntur. Quod tunc maxime faciunt, quum frequentissimus ad audien-

(a) Pag. 383. seq. (b) *Instit. lib. XI. cap. 3. sub. fin.*

diendum populus confluit. Tunc enim partim maiori ad dicendum calore atque impetu concepto, partim ut vox ab omnibus audiat, eam plus, quam par est, urgent atque attollunt. Quo fit, ut eos non modo vox, sed vires etiam in medio orationis cursu destituant: atque ita qui acriter coeperunt, lente & languide, viribus fatiscen- tibus, sermonem finiant. Hi autem non advertunt, quod vulgo dici solet, non ex flamma fumum, sed ex fumo flam- mam excitari debere. Hoc ergo tempore peritus conciona- tor prudenter animi sui impetum cohibeat, & ad maiora illum magisque necessaria reseruet.

Sequitur narratio. Ea vero, ut Fabius ait, (a) magis prolatam manum, gestum distinctum, & vocem sermoni proximam: sonum autem simplicem frequentissime postu- labit in his, quae nullos continent animorum motus, aut quid simile, quod variam agendi rationem exigit. Est au- tem difficilior narrationis, quam argumentationis aut am- plicationis, actio. In his enim partibus, disputandi aut amplificandi ardor, & motus animi, actionem instruunt & adiuvant. At quum narratio minus actuosa, minimeque ardens & concitata esse debeat; sola dicentis arte at- que prudentia moderanda est. Quamvis non infitior, esse narrationes aliquas, quae hos affectus recipiant: quarum actio non perinde difficilis est. In omni igitur narratione vocum varietate opus est, ut quo pacto quidque gestum sit, ita narrari videatur. Strenue quod volumus ostendere factum, celeriuscule dicemus: deinde modo acriter, tum clementer, maestè, hilariter in omnes partes commutabi- mus, ut verba, ita pronuntiationem. Si qua inciderint in narratione dicta, rogata, responsa, si quae admiratio- nes, de quibus nos narrabimus; diligenter adverteamus, ut omnium personarum sensus atque animos voce expri- mamus.

Maxime varia est actio probationum: nam proponere, quae sis dicturus, atque in partes dividere, & explicare, quid conveniat, & quid in controversia sit, expositioni,
de

(a) *Loco citato.*

de qua modo diximus, similia sunt. At (a) ,, argumen-
 ,, ratio plerumque agilior, & acrior, & instantior, con-
 ,, sentientem orationi postulat etiam gestum, id est, for-
 ,, tem celeritatem. Instandum quibusdam in partibus, &
 ,, densanda oratio. ,, Hic oportebit augere vocem, & tor-
 quere sonum, & celeriter cum clamore verba conficere,
 ut vim volubilem orationis vociferatio consequi possit.
 Asseveratio autem, quae inter probandum occurrit, in-
 terdum plus ipsis probationibus valet. Fiducia igitur ap-
 pareat, & constantia, utique si auctoritas subest. Cete-
 rum quum rationes ac probationes difficiles ad intelligen-
 dum sunt, utpote ex philosophiae aut Theologiae abdi-
 tis petitae; tunc impetus hic cohibendus est, & sedata
 actione, acuta voce, & longioribus intervallis utendum
 est; ut hac distinctione apertior sit oratio, & auditoribus
 mora detur ac spatium cogitandi & percipiendi, quae di-
 cta sunt. Celeritas enim & volubilitas linguae non modo
 tardioribus, sed eruditis etiam impedimento est, quo mi-
 nus ea, quae dicuntur, intelligant. Haec igitur argumen-
 tandi ac probandi ratio, expositioni ac demonstrationi,
 quam argumentationi, similior est.

Amplificatio vero, quae tertiam sermonis partem com-
 plectitur, in affectibus praecipue locum habet: qui, ut
 paullo ante diximus, (b) tam variam vocis & actionis fi-
 guram desiderant, quam sunt ipsi varii. Prima igitur ad
 hoc cura esse debet, ut affectus & motus animi in no-
 bis sint; tunc enim ipsi naturali vi sua erumpent: & ut
 veri motus sunt, ita vere auditores afficient. Neque aliud
 agit ars, quam ut naturam imitetur: ad quam tamen ars
 nulla, quamlibet consummata sit, pertingere potest. Ideo-
 que numquam declamatores id efficiunt, quod sancti viri,
 Spiritu Dei acti, & veris affectibus concitati, efficere dicendo
 potuerunt. Qui sic igitur commotus fuerit, is plane, ipso
 affectu docente, intelliget, quam dissimili vocis figura
 affectus tractandi sint. Aliud enim vocis genus postulat
 miseratio ac maeror: flexibile, plenum, interruptum, fle-
 bi-

(a) *Quintil. loc. cit. paullo inferius.* (b) *Pag. 381.*

bili voce. Aliud metus : demissum , & haesitans , & abiectum. Aliud vis : contentum , vehemens , imminens , quadam incitatione gravitatis. Aliud voluptas : effusum , lenne , tenerum , hilaratum , ac remissum. Aliud iracundia : acutum , incitatum , crebro incidens. Atrox enim vox esse debet in ira , aspera , ac densa , & respiratione crebra : neque potest esse longus spiritus , ubi immoderate effunditur.

Sequitur deinde altera pronuntiationis observatio , quae ad peculiare sententias pertinet : quae sub his praecipuis orationis partibus , quas supra memoravimus , (a) continentur : de qua non nulla iam diximus , quum de apta pronuntiandi ratione (b) differuimus. Sed quoniam haec pars praecipuam pronuntiandi virtutem continet , de ea copiosius paullo post , propositis variis exemplis , tractabimus. Nunc ad aliam veniamus.

Superest enim quod tertio loco polliciti sumus , de singularium verborum pronuntiatione. Non enim in sententiis solum , sed frequenter etiam in singulis verbis alia atque alia vocis figura adhibenda est. (c) „ An non haec , „ inquit Fabius , *misellus & pauperculus* , submissa atque „ contracta ? *fortis* , & *vehemens* , & *latro* , erecta & con- „ citata voce dicenda sunt ? Accedit enim vis & proprie- „ tas rebus tali adstipulatione : quae nisi adsit , aliud vox , „ aliud animus ostendar. Quid quod eadem verba mutata „ pronuntiatione indicant , ... interrogant , irident , ele- „ vant ? Aliter enim dicitur : (d) *tu mihi quodcumque hoc* „ *regni*. Et : (e) *cantando tu illum* ? Et : (f) *tu ne ille Aeneas* ? „ Et : (g) *meque timoris Argue tu , Drance*. Et ne mo- „ rer , intra se quisque , vel hoc , vel aliud , quod volet , „ per omnes affectus verset : verum esse , quod dicimus , „ sciet. „ Haec Fabius. Plurima autem in scripturis sanctis verba invenire licet , quae hac vocis acrimonia enuntianda sint. Tale est illud : (h) *ignis accensus est in*
fu-

(a) Pag. 380. (b) Pag. 377. seq. (c) *Quint. instit. lib. XI. c. 3. sub fin.*
(d) *Virg. Aeneid. lib. I. v. 82.* (e) *Virg. Ecl. III. v. 25.* (f) *Virg. Aeneid. lib. I. v. 621.* (g) *Virg. Aeneid. XI. v. 384.* (h) *Deut. 32.*

furōte meo , & ardebit usque ad inferni novissima , devorabitque terram cum germine suo , & montium fundamenta comburet. Et : (a) inebriabo sagittas meas sanguine , & gladius meus devorabit carnes. Hic singula verba peculiarē quamdam vocis amplitudinem cum acrimonia coniunctam desiderant. Sic illud D. Chrysostomi : ut leones ignem spirantes ab illa mensa discedimus , terribiles daemonibus effecti. Videndum tamen in his , ne nimio boatu vocem affectata quadam amplitudine a naturali sono detorqueamus. Nihil enim affectatum , nihil a natura ipsa degenerans placere potest. In quo vitio sunt , qui , quum tenuem & pusillam vocem habeant , inflatis , ut ita dixerim , buccis hanc vocis amplitudinem & acrimoniam referre volunt.

CAP. VI.

DE GESTV ET MOTV CORPORIS.

Diximus, (b) perfectam pronuntiandi & agendi rationem apta vocis figura & gestu corporis contineri. Quia vero de vocis figura & varietate satis dictum est , proximum est , ut de gestu & motu corporis pauca dicamus: atque ea in primis , quae a Fabio animadversa sunt , qui hanc partem diligentissime tractavit ; utpote qui nullam fere corporis partem praetermisit , cui non suam faciem gestumque praebuerit. Gestus ergo primum , ut idem ait, (c) voci consentiat , & utrumque , vox scilicet & gestus, animo simul pareat. (d) „ Is vero quantum habeat in oratione momenti , satis vel ex eo patet , quod pleraque etiam citra verba significat. Quippe non manus solum , sed nutus etiam declarant nostram voluntatem , & in mutis pro sermone sunt : & salutatio frequenter sine voce intelligitur atque afficit : & ex ingressu vultuque perspicitur habitus animorum : & animalium quoque , sermones

Bb

„ ca-

(a) *Deut.* 32. (b) *Pag.* 369, & 372. (c) *Lib.* XI. cap. 3. ad finem. (d) *Hinc ad litteram.*

„ carentium , ira , laetitia , adulatio , & oculis , & quibusdam aliis corporis signis deprehenditur. Nec mirum, si ista , quae tamen in aliquo sunt posita motu , tantum in animis valent ; quum pictura , tacens opus , & habitus semper eiusdem , sic in intimos penetret affectus, ut ipsam vim dicendi non numquam superare videatur. Contra si gestus ac vultus ab oratione dissentiant , tristitia dicamus hilares , affirmemus aliqua renuentes ; non auctoritas modo verbis , sed etiam fides desit. Decor quoque a gestu atque a motu venit : ideoque Demosthenes , grande quoddam intuens speculum , componere actionem solebat. Adeo quamvis fulgor ille sinistras imagines reddat , suis demum oculis credidit quod eficeret.

„ Praecipuum vero in actione , sicut in corpore ipso , caput est , cum ad illum , de quo dixi , decorem , tum etiam ad significationem decoris. Illa sunt , ut sit primo rectum , & secundum naturam. Nam & deiecto humilitas , & supino arrogantia , & in latus inclinato languor , & praeduro ac rigente barbaria quaedam mentis ostenditur. Tum accipiat aptos ex ipsa actione motus , ut cum gestu concordet , & manibus ac lateribus obsequatur. Adspectus enim semper eodem vertitur , quo gestus , exceptis , quae aut damnare , aut non concedere , aut a nobis remove oportebit : ut idem illud vultu videamur averfari , manu repellere : (a)

..... *Dî , talem terris avertite pestem.* Et , (b)

..... *Haud equidem tali me dignor honore.*

„ Significat vero plurimis modis. Nam, praeter annuendi , renuendi , confirmandique motus , sunt & verecundiae , & dubitationis , & admirationis , & indignationis , noti & communes omnibus. Solo tamen eo facere gestum , scenici quoque doctores vitiosum putaverunt. Etiam frequens eius nutus non caret vitio : adeo iactare id , & comas excutientem rotare , fanaticum est. Dominatur autem maxime vultus. Hoc supplices , hoc minaces , hoc blandi , hoc tristes , hoc hilares , hoc erecti , hoc submissi sumus : hoc

„ pen-

(a) *Virg. Aenid. lib. III. v. 620.* (b) *Idem lib. I. v. 339.*

„ pendent homines, hunc intuentur, hunc spectant, etiam
 „ antequam dicamus: hoc quosdam amamus, hoc odi-
 „ mus, hoc plurima intelligimus: hic est saepe pro omni-
 „ bus verbis.

„ (a) Sed in ipso vultu plurimum valent oculi, per quos
 „ maxime animus emanat, ut citra motum quoque, & hi-
 „ laritate enitescant, & tristitia quoddam nubilum du-
 „ cant. Quin etiam lacrimas his natura mentis indices de-
 „ dit: quae aut erumpunt dolore, aut laetitia manant. Mo-
 „ tu vero intenti, remissi, superbi, torvi, mites, asperi
 „ fiunt: quae, ut actus poposcerit, fingentur..... Labra & por-
 „ riguntur male, & scinduntur, & adstringuntur, & didu-
 „ cuntur, & dentes nudant, & in latus, ac paene ad au-
 „ rem trahuntur.... Lambere quoque ea & mordere, defor-
 „ me est, quum etiam in efferendis verbis modicus eorum
 „ esse debeat motus. Ore enim magis, quam labris, loquen-
 „ dum est. Cervicem rectam oportet esse, non rigidam
 „ aut supinam... Manus vero, sine quibus trunca esset actio
 „ ac debilis, vix dici potest, quot motus habeant, quum
 „ paene ipsam verborum copiam persequantur. Nam cete-
 „ rae partes loquentem adiuvant, hae, prope est ut di-
 „ cam, ipsae loquuntur. An non his poscimus? pollicemur?
 „ vocamus? dimittimus? minamur? supplicamus? abo-
 „ minamur? timemus? interrogamus? negamus? gaudium,
 „ tristitiam, dubitationem, confessionem, poenitentiam,
 „ modum, copiam, numerum, tempus ostendimus? Non
 „ eadem concitant? supplicant? inhibent? probant? ad-
 „ mirantur? verecundantur? Non in demonstrandis locis
 „ atque personis adverbiorum atque pronominum obti-
 „ nent vicem? Vt in tanta per omnes gentes, nationesque
 „ linguae diversitate, hic mihi omnium hominum commu-
 „ nis sermo videatur. Et ii quidem, de quibus sum loquutus,
 „ cum ipsis vocibus naturaliter exeunt gestus. „ Haecenus
 Fabius. Idemque multa de digitorum & manuum motu at-
 que compositione docet: quae nos, quod minus instituto no-
 stro convenient, consulto missa fecimus.

Bb 2

II-

(a) *Ibidem paucis interiectis.*

Illam autem manus atque digitorum figuram probamus, qua cum pollice duo sequentes digiti coeunt: aut quando solus index, ceteris sub pollice compressis, directus & protensus est. Hic autem digitorum positus ad omnia ferre, quae dicimus, valet. Interdum etiam, diducto pollice, quattuor reliqui apte iunguntur, quando aut pectori manum admovemus, aut etiam aliquid averſantes ab eodem removemus. Sinistra vero manus numquam sola recte gestum facit, dexteræ se frequenter accommodat: idque praecipue dexteræ manus indice in sinistrae pollicem aut indicem incidente, aut alternis motibus, modo pollicem, modo indicem feriente. (a) „Hic veteres artifices illud recte, adiecerunt, ut manus cum sensu & inciperet & deponeret. Alioqui enim aut ante vocem erit gestus, aut post vocem: quod est utrumque deforme. „Illud etiam advertendum, ne vox a gestu, vel gestus a voce dissentiat. Vnde Polemon sophista (b) histrionem tragoediarum, qui in Olympiis, o Iuppiter! pronuntiaret, ostensa terra: o terra! manu in caelum proiecta, submovit a praemiis, praesidebat enim ei certamini, dicens: hic manu commisit soloecismum. Cetera vero, quae de corporis & membrorum gestu praecipui possunt, communis prudentiae iudicio, & naturae institui relinquimus.

CAP. VII.

DE VITIIS PRONUNTIATIONIS
& actionis.

Quemadmodum in superiori libro, postea quam eloquutionis virtutes exposuimus, communia quaedam eius vitia (c) adnotavimus; ita nunc idem facere visum est, quum de pronuntiandi ratione agimus. Quamvis enim facile sit, virtutibus cognitis, vitia cognoscere; vitium enim est, quidquid virtutibus adversatur: apertior tamen doctrina fuerit, si seorsum vitia designentur. Primum au-

(a) *Quintil. loco cit. paullo infer.* (b) *Philostratus in Polemone, pag. 841.* (c) *Cap. XXI. pag. 338. seqq.*

autem atque vulgatissimum vitium est, vocis aequalitas: quod Graeci monotoniam, hoc est, unum quemdam vocis sonum, appellant; quum is, qui dicit, eodem vocis tenore, sine ullo eius flexu ac varietate, tota fere concione decurrit, more eorum, qui quam orationem memoria complexi sunt, recitare solent. In hoc autem vitium huius officii tirones frequenter incidunt. Metu enim ac trepidatione quadam insoliti operis pressi, vix quidquam aliud, quam ne, quod dicturi sunt, memoria excidat, attendunt. Numquam autem quisque apte dicet, nisi qui hoc metu & cura solutus, liber, & sui ipsius compos sit: quo, & quid dicat, & quo modo dicat, prudenter inspiciat.

Huic autem contrarium vitium est, vocis inaequalitas: in quo peccant, qui prius illud vitium effugere contendunt. Sic enim frequenter accidit, ut qui vitium aliquod vitare student, in alterum, quod ei adversatur, incidant: ut ii faciunt, qui, avaritiae labem & infamiam fugientes, in prodigalitatis foveam labuntur. Vt enim simplicem illum vocis tenorem declinent, vocem ipsam, non pro natura rerum, sed pro suo arbitratu, temere illam modo in sublime attollunt, modo ad imum deprimunt: quae res & graviter auditorum aures laedit, & insanam ac temerariam libertatem prae se ferre videtur. Ab hac autem pronuntiandi ratione graves homines, & sana ingenia, maxime abhorrent.

Est autem aliud aequalitatis vitium, quod utriusque huius naturam referre videtur. Habet enim cum inaequalitate coniunctam aequalitatem. Est autem vitium hoc adeo occultum, ut vix verbis indicari possit. Quidam enim, hunc simplicem vocis sonum fugere studentes, quamdam pronuntiationis formam captant, quae suos etiam vocis flexus & varietatem habeat, & neque a communi & familiari loquendi consuetudine abhorreat: quam tamen omnibus concionis partibus accommodant. Sive enim aliquid narrent, sive argumententur, sive rem attollant atque amplificent; eandem fere pronuntiandi figuram retinent. Quod perinde

Bb 3

est,

est, ac si quis omnibus corporis partibus idem vestimenti genus aptare velit. Quod quidem vitium auditor minime stupidus in non nullis concionatoribus deprehendet. Qua quidem animadversione facilius intelliget, quod nos hoc in loco vix verbis explicare possumus.

Est & aliud vitium nimiae tarditatis, quo quidam lenta pronuntiatione, longioribusque intervallis, tota fere concione utuntur. Quae res tantum abest, ut auditores afficiat, ut somnum etiam frequenter illis incutiat. Cui contrarium est vitium nimiae celeritatis: quo multo plures laborant; sive quod memoriae diffidant, nisi ita dicant; sive quod ea libertate careant, qua dicunt, qui, nullo trepidationis affectu oppressi, sui ipsorum, & eorum, quae dicuntur, compotes sunt. Isti enim modo celerius, modo tardius, modo longioribus, modo brevioribus intervallis, pro rerum natura & dignitate, uti solent. Vtrumque enim vitium est, & celeri omnia, & tarda voce pronuntiare. Quocirca varietas, ut in vocis figura, ita in celeritate & tarditate adhibenda est. Quamvis si in alteram partem peccandum sit, fortasse gravius peccant, qui nimia velocitate, quam tarditate, dicunt. Initio tamen concionis, quamdiu dicentis animus nondum incalescet, ut sedatae & lenes sententiae, ita sedata & lenis actio, & longioribus intervallis distincta, quae aliquam dicenti ad ea, quae dicit, excogitanda moram praebeat, non immerito commendatur.

Vt autem in tarditate & celeritate, ita in acrimonia & remissione atque languore sua vitia, his non admodum dissimilia, notantur. Sunt enim quidam acri & vehementi ingenio, qui tota fere concione velut quodam perciri furore dicunt. Quod quidem non raro ex quadam animi trepidatione profiscitur. Vt enim arbores arboribus, ita affectus affectibus inferuntur: atque ita alii ex aliis vim & impetum capiunt. Qui igitur ita dicunt, in hoc incommodum incidunt, ut quum rem indignam acri pronuntiatione dixerint, nequaquam tamen auditores commoveant; propterea quod animadvertunt, eos omnia, quae dicunt, si-

ve

ve levia, siue gravia sint, simili vocis impetu pronuntiare. Quocirca delectum habere convenit, ut sciamus, quae acriori, quae leniore voce proferenda sint, ut suum cuique velut ius atque habitum praebeamus. Non abnuo tamen, magis ad dicendum compositos esse, qui acres & ardentiores sunt, si hunc ardorem suum regere sciant, eoque suis in locis utantur: sic tamen, ut ne tunc quidem quum eo utendum est, totas fervori suo habenas permittant; ne fauces ira laedant, ut vocem exasperent, & illiberali quadam atque incondita raucedine inficiant. Videant hi quoque, non protinus ad hanc pronuntiandi rationem initio statim concionis veniendum esse. Si enim, nondum praeparatis auditoribus, in hunc affectum irruerint, insanire tamquam vinolenti videbuntur.

Quia vero multi concionatores se se ad aliorum, qui sunt huius artificii principes, imitationem accingunt; eorumque non modo eloquentiam, sed etiam agendi & pronuntiandi rationem referre student: monendi sunt, ut caute hoc atque prudenter agant. Quum enim in actione praecipue spectetur decorum; sciant hi, non omnia omnes decere. „ Est enim, ut Fabius ait, (a) latens quaedam in hoc ratio, „ & inenarrabilis: & ut vere hoc dictum est, caput esse artis, decere quod facias, ita id neque sine arte esse, neque totum arte tradi potest. In quibusdam virtutes non habent gratiam, in quibusdam vitia ipsa delectant. Maximos „ actores comoediarum Demetrium, & Stratoclem placere „ diversis virtutibus vidimus... Fuit enim (eorum) natura „ diversa. Nam vox quoque Demetrii iucundior, illius acrior „ erat... Quare norit se quisque, nec tantum ex communibus praeceptis, sed etiam ex natura sua capiat consilium „ formandae actionis. „ Itaque quod idem Fabius in clarissimorum auctorum lectione atque imitatione docet, idem in imitanda insignium concionatorum pronuntiatione consilium sequi debemus. Sic enim ait: (b) „ neque id statim legenti „ persuasum sit, omnia, quae magni auctores dixerint, utique esse perfecta: nam & labuntur aliquando, & oneri

Bb 4

„ cc-

(a) *Lib. XI. cap. 3. sub finem.* (b) *Instit. lib. X. cap. 1.*

„cedunt, & indulgent ingeniorum suorum voluptati: nec
 „semper intendunt animum, & non numquam fatigantur;
 „quum Ciceroni dormire interim Demosthenes, Horatio
 „vero etiam Homerus ipse videatur. Summi enim sunt, ho-
 „mines tamen: acciditque iis, qui quidquid apud illos re-
 „pererunt, dicendi legem putant, ut deteriora imitentur,
 „id enim est facilius; ac se abunde similes putent, si vitia
 „magnorum consequantur. „Haec sunt communia pronun-
 tiationis vitia: nunc simili ratione actionis, hoc est, gestus
 vitia, quae fere contingunt, indicanda sunt.

§. I.

G E S T V S V I T I A .

VT autem a digitis & manibus ordiamur, primum vi-
 tium est, diductis omnibus digitis supinam palmam,
 more eorum qui stipem postulant, protendere. Secundum
 vero ab hoc diversum est, quo quidam digitos omnes ita
 comprimunt, ut ii faciunt, qui e fonte aquam manu hauri-
 re volunt, quod non minus indecorum est. Averso autem
 pollice demonstrare aliquid, receptum magis putat Fabius,
 (a) quam oratori decorum.

Brachiis quoque non uno modo peccatur. Primum enim
 vitiose dextrum brachium proferunt, & cubito pronuntiant.
 Quod ego vitium in diserto etiam concionatore animadver-
 ti. Aliud vero brachiorum vitium est, quum plus nimio vel
 in summum, vel in imum, vel in latera, instar eorum qui
 cruci affixi sunt, protenduntur. Hinc Fabius: (b) „tolli,
 „inquit, manum artifices supra oculos, demitti infra pe-
 „ctus vetant: adeo a capite eam petere, aut ad imum ven-
 „trem deducere, vitiosum habetur. „Idemque palmas com-
 plodere, quod modo multi concionatores passim faciunt, sce-
 nicum esse ait. Quamvis enim hoc in re maxima non num-
 quam

(a) *Instit. lib. XI. cap. 3. paullo post medium. Quo ex capite omnia pro-
 nuntiationis praecepta & vitia, quae ad litteram, quae ad sensum, excerptis
 aufer. (b) Ibidem.*

quàm deceat ; frequenter tamen illud facere , & aures , & oculos auditorum offendit : quum praesertim is , qui hoc facit , ardeat ; illi vero saepe langueant, vel minus fortasse attenti sint. Nec minus foede quidam suggestum palmis feriunt. Vitium enim hoc , sicut & illud. „ Femur autem ferire , inquit Fabius , (a) quod Athenis primus fecisse creditur Cleon , & usitatum est , & indignantes decet , & excitat auditorem. Idque in Callidio Cicero (b) desiderat. „ Non frons , inquit , percussa , non femur... Quamquam si licet , de fronte dissentio. „ Haetenus ille. Idemque humerorum vitium his verbis describit : (c) „ iactantur & humeri : quod vitium Demosthenes ita dicitur emendasse , ut quum in angusto quodam pulpito stans diceret , hasta humero dependens immineret ; ut si calore dicendi vitare id excidisset , offensazione illa commoneretur. „

Quid autem hic illos referam , qui & pedibus , & brachiis , & irrequieto corporis motu digladiari magis , quam agere , videntur ? Modo enim medium corpus frangunt , modo se intra suggestum demisso corpore condunt , modo inde velut emergunt , & in sublime attolluntur. Ut igitur languida actio motu caret , ita nimium actiuosa deformis & indecora est. Modus enim est rebus adhibendus : quod enim aut supra modum , aut infra est , & a recto declinat , & intuentes offendit.

Superest aliud vitium , cui auditorum voluptas , & ignorantia , virtutis nomen indidit : quum videlicet partim gestu , partim etiam voce aliorum dicta aut facta , histrionum more , imitamur. Gestus autem exemplum ponit Fabius : (d) „ si videlicet aegrum tentantis venas medici similitudine , aut citharoedum , formatis ad modum percutientis nervos , manibus ostendas , quod est genus quam longissime in actione fugiendum. Abesse enim plurimum a saltatore debet orator , ut sit gestus ad sensus magis , quam ad verba , accommodatus : quod etiam histrionibus paullo gravioribus facere moris fuit. Ergo ut ad se manum referre , quum „ de

(a) Loco cit. paullo inferius. (b) In Bruto, cap. 79 & 80. (c) Loco cit. paullo inferius. (d) Lib. XI. cap. 3. circa medium.

„ de se ipso loquatur , & in eum , quem demonstret , inten-
 „ dere , & aliqua his similia permiserim ; ita non effingere
 „ status quosdam , & quidquid dicet , ostendere. Neque id in
 „ manibus solum , sed in omni gestu ac voce servandum est.
 „ Non enim aut in illa periodo : (a) stetit soleatus praetor
 „ pop. Rom. inclinatio incumbens in mulierculam. Ver-
 „ ris effingenda est. Aut in illa : (b) caedebatur in medio fo-
 „ ro Messanae , motus laterum , qualis esse ad verbera so-
 „ ler , torquendus : aut vox , qualis dolore exprimitur , eru-
 „ da. Quum mihi comoedi quoque pessime facere videan-
 „ tur , qui... quum... in expositione aut senis sermo , ... aut
 „ mulieris... incidit , tremula , vel effeminata voce pronun-
 „ tiant. Adeo in illis quoque est aliqua vitiosa imitatio ,
 „ quorum ars omnis constat imitatione. „ Haetenus Fabius :
 qui si in oratore , qui de rebus ad brevis huius aevi usum
 pertinentibus disputat , hanc imitationem indecoram pu-
 tat ; quid idem faceret in concionatore , qui de aeterna vi-
 ta , aeternoque supplicio differit ? Neque vero me movet ,
 quod frequenter auditores hanc imitationem laudant : lau-
 dant quippe quod eorum aures mulcet , quodque illis volu-
 pratis cuiusdam & risus materiam praebet : quemadmodum
 histrionem laudant , qui probe voces & actus hominum ef-
 fingit. Quod tamen graves & eruditi viri reprehendunt : quo-
 rum magis iudicium sequi , quam populi plausum captare ,
 debemus. Hi namque indignum esse putant , ecclesiastici do-
 ctoris auctoritatem ad histrionum gesticulationem & levita-
 tem degenerare.

Sunt & alia oris vitia , quae Fabius in prima futuri rhe-
 toris institutione vitanda esse docet his verbis : (d) „ cura-
 „ bit etiam , ... ut quoties exclamandum erit , lateris co-
 „ natus sit ille , non capitis ; ut gestus ad vocem , vultus
 „ ad gestum accommodetur. Observandum erit etiam , ut re-
 „ cta sit facies dicentis , ne labra distorqueantur , ne immo-
 „ dicus hiatus rictum distendat , ne supinus vultus , ne de-
 „ iecti in terram oculi , ne inclinata utrolibet cervix. Nam
 „ frons

(a) *Cic. in Ver.* 33. (b) *Lib. VII. cap. 3.* (c) *Ibid.* (d) *Instit.*
lib. I. cap. 11.

„ frons pluribus generibus peccat. Vidi multos , quorum su-
 „ percilia ad singulos vocis conatus allevarentur , aliorum
 „ constricta , aliorum etiam dissidentia, quum altero in ver-
 „ ticem tenderent , altero paene oculus ipse premeretur. In-
 „ finitum autem... in his quoque rebus momentum est. Et ni-
 „ hil potest placere , quod non decet. „ Haftenus Fabius.
 Cetera vel actionis , vel pronuntiationis vitia facile horum,
 quae breviter exposuimus , admonitu prudens concionator
 deprehendet.

CAP. VIII.

DE VARIA PRONUNTIANDI RATIONE
in sententiis.

HAEC omnia , quae de pronuntiandi atque agendi fa-
 cultate dicta sunt , ex Quintiliano , huius artis prin-
 cipe , ad verbum paene desumimus : praetermissis tamen
 his , quae minus apta instituto nostro essent , vel quae le-
 ctori fastidium aut obscuritatem parere potuissent. Haec au-
 tem satis esse putamus , ut concionator minime stupidus,
 his documentis instructus , reliqua per se intelligere queat.
 Sed quoniam haec pronuntiandi virtus, ut initio (a) diximus,
 summa est , & multi nullum laborem inutilem putabunt,
 dummodo eam plenius assequantur ; his etiam morem ge-
 rendum esse duxi. Itaque eadem ipsa , quae haftenus in
 communi de vocis figura tradita sunt , rudi , ut ita dixe-
 rim , crassaque Minerva explicare constitui. Nequaquam
 tamen hoc in loco absolutum concionatorem , sed novi-
 cium , ac paene infantem , a primis huius disciplinae rudi-
 mentis instituendum suscipio. Vt enim ludi-magistri , qui vel
 legendi , vel scribendi artem docent , ab ipsis primum sin-
 gularibus litterarum elementis incipientes , ad maiora gra-
 dum facere solent ; sic enim perficiunt , ut inoffense postea
 vel legere , vel scribere sciant : ita ego per plurima senten-
 tiarum genera , ex quibus praecipuae concionis partes con-
 stant , decurrens , & qua vocis figura unaquaeque earum
 pro-

(a) Pag. 364. seqq.

pronuntianda sit, insinuans; facilem ipsi aditum aperiam, ut, quonam modo ceterae pronuntiandae sint, intelligat. Quae enim Fabius in communi dixit, ego ad peculiare etiam & singulares sententias accommodabo, propositisque variis exemplis illustranda curabo. In quibus exemplis pronuntiandis exerceri poterit, quisquis hanc facultatem plenius consequi desiderat.

Neque vero hoc ipsum sine eiusdem Fabii auctoritate facio, qui ediscere insignia auctorum loca monet, in quibus variam pronuntiandi rationem exercere valeamus. Eius haec verba sunt: (a) „ediscere autem, quo exercearis, erit „optimum; nam ex tempore dicenti, advocatur cura vocis „ille, qui ex rebus ipsis concipitur, affectus: & ediscere „quam maxime varia, quae & clamorem, & disputationem, „& sermonem, & flexus habeant, ut simul in omnia paremur. „Hactenus ille. Idemque rursus rhetoricae artis tironem comoediarum actori tradi praecipit, (b) ut ab illo hanc naturalem pronuntiandi formam discat: quamvis & ibidem, & ubique doceat, aliam oratoris, aliam vero actoris pronuntiationem esse. Ibidem etiam praecipit, quod modo diximus, nempe eligendos esse locos aliquot insigniores, in quorum pronuntiatione tirones exerceantur. Sic enim ait: (c) „debet etiam docere comoedus, quo modo narrandum, „qua sit auctoritate suadendum, qua concitatione consurgat ira, qui flexus deceat miserationem. Quod ita optime faciet, si certos ex comoediis elegerit locos, & ad hoc maxime idoneos, id est, actionibus similes. Idem autem non ad pronuntiandum modo utilissimi, verum ad augendam quoque eloquentiam maxime accommodati erunt. Et haec dum infirma aetas maiora non capiet. Ceterum quum legere orationes oportebit, quum virtutes earum iam sentiet; tum mihi diligens aliquis ac peritus adsistat, neque solum lectione formet, verum ediscere etiam electa ex his cogat, & ea dicere stantem clare, & quemadmodum agere oportebit, ut protinus „pro-

(a) *Lib. XI. cap. 3. haud ita procul ab initio.* (b) *Lib. I. cap. 11.*
 (c) *Loco cit.*

, pronuntiatione vocem & memoriam exerceat. ,, Haftenus ille.

Quia vero nobis neque licet , neque decorum est, ex comœdiis loca eligere , in quorum pronuntiatione exerceamur ; aliqua ex litteris sanctis loca in medium proferemus, atque ea in primis , quae dialogorum speciem prae se ferunt , quae ad huius facultatis exercitationem commodiora videbuntur. Quod si diutius in his exemplis fuerim immoratus , nemo mihi iure succensere debet. Quia enim (a) sapientibus & insipientibus debitor sum , ubi haftenus pronuntiandi rationem sapientibus demonstravi , modo eandem rudioribus aperire contendam. Sed , ut verum ingenue fatear , illud me ad hunc laborem magis excitavit , quod paucos admodum concionatores videam , qui rectam hanc & naturalem pronuntiandi rationem teneant. Quod eo magis dolendum est , quia huius rei ignoratio in non nullos cadit , qui, ceteris eloquentiae partibus instructissimi , quoniam hac virtute destituuntur , omnem laboris sui & communis utilitatis fructum prorsus amittunt. Huic igitur publicae utilitatis iacturae , si quid per nos praestari possit , hac nova docendi ratione consulendum putavi.

CAP. IX.

VARIA SENTENTIARVM EXEMPLA

e sanctis litteris excerpta.

Quid autem praecipue hoc in loco persequi velim, paucis indicabo. Tripartitam esse pronuntiandi rationem , superius (b) diximus. Aliam enim pronuntiandi rationem praecipuis concionis partibus , hoc est , expositioni , probationi , & amplificationi ; aliam variis sententiis, quae in has partes incurrunt ; aliam vero singulis saepe verbis , quae his sententiis continentur , convenire diximus. Quia vero summa pronuntiationis observatio in huiusmodi sententiis apte pronuntiandi sita est ; hanc partem , quam

(a) Rem. 1. (b) Pag. 389.

superius carptim & breviter attigimus, huic loco reservavimus, ut de ea, quam fieri posset, copiose ageremus, eamque variis, ut dixi, exemplis illustraremus. Sed prius tamen infantiam meam confitebor, quod nequaquam varios vocis flexus atque figuras scribendo exprimere potero. Vnum tamen illud praeſtabo, ut prudentem lectorem admoneam, aliam atque aliam vocis figuram in diversis propositae cuiuslibet sententiae partibus esse adhibendam: quam ipse per se, nisi stupidus admodum fuerit, facile deprehendet. Verum quia omnia sententiarum genera persequi, & variam pronuntiandi rationem unicuique illarum assignare, infiniti propemodum operis esset; hanc ego methodum commodissimam iudicavi, ut, propositis aliquot verborum & sententiarum figuris, de quibus in secundo & quinto huius operis libro differuimus, quam pronuntiandi rationem unaquaeque exigat, expendamus. Vt enim figurae omnes peculiarem quemdam veluti gestum & formam elocutionis habent, ita peculiarem quoque pronuntiandi formam requirunt. Ab his autem primum incipiamus, quae affectum aliquem & motum animi exprimunt: in his enim pronuntiandi ratio manifestior est.

Prima igitur figura, sic enim & hanc, & alias huic similes, hoc in loco appellare libet, oratio est, quae suam quamdam pronuntiandi formam requirit, quae videlicet desiderantis animi affectum exprimat; qualis illa sponsae in Cant. (a) quis det te fratrem meum sugentem ubera matris meae, ut inveniam te foris, & deosculer te? Paulo tamen acrior, & magis anxia atque indignabunda illa Ieremiae optatio: (b) quis dabit me in solitudine diversorium viatorum, ut fugiam populum meum? quia omnes adulteri sunt, & coetus praevaricatorum. Clementior tamen, & veluti commiserantis, illa: (c) quis dabit capiti meo aquam, & oculis meis fontem lacrimarum; & plorabo die ac nocte interfectos filiae populi mei? Sic illa: (d) utinam scaperent, & intelligerent, ac novissima providerent. In his omnibus eadem vocis figura, cum aliqua tamen dissimilitudi-

(a) Cant. 8. (b) Ierem. 9. (c) Idem ibidem. (d) Deut. 32.

dine, pro sententiarum natura, retinenda est.

Contraria huic est imprecatio, qualis illa: (a) pereat dies, in qua natus sum, & nox, in qua dictum est: conceptus est homo. Vehemens est & illa Didonis apud Maronem imprecatio: (b)

Sed mihi vel tellus optem prius ima debiscat,

Vel pater omnipotens adigat me fulmine ad umbras, &c.

Ante pudor, quam te violo, aut tua iura resollo.

Haec autem imprecatio acri & horrenda voce pronuntianda est. Bene precatio vero, sicut huic contraria, ita longe diversam vocis figuram desiderat; qualis illa Prophetarum: (c) Dominus conservet eum, & vivificet eum, & beatum faciat eum in terra; & quae sequuntur. Hoc autem vocis tenore totus ille psalmus pronuntiandus, cuius est initium: (d) exaudiat te Dominus in die tribulationis, &c. Similem vocis figuram exigunt & benedictiones illae in sacris literis frequentes; qualis illa Isaac ad Esau: (e) ecce odor filii mei, sicut odor agri pleni, cui benedixit Dominus: crescere te faciat Deus meus, det tibi de rore caeli, & de pinguedine terrae; & cetera, quae sequuntur.

Finitima est huic obsecratio, quae blandam & mollem, non tamen effeminatam, vocem requirit; cuiusmodi est illa Paulli: (f) ipse autem ego Paullus obsecro vos per mansuetudinem Christi, qui in facie quidem humilis sum inter vos, absens autem confido in vobis: (g) rogo autem vos, ne praesens audiam, &c. Obsecrationi finitima est invitatio ad iustitiam & pietatem, quae similem vocis molitudinem exigit; qualis est illa Domini in evangelio: (h) venite ad me omnes, qui laboratis, & onerati estis. Simili vocis, ut ita dixerim, blandiloquentia illa regii vatis invitatio proferenda est: (i) venite, filii, audite me: timorem Domini docebo vos, &c.

Sunt praeterea multi alii animorum motus & affectus, qui quam sunt varii, tam variam pronuntiandi formam de-

po-

(a) *Iob 3.* (b) *Virg. Aeneid. lib. III. v. 24-25. & 27.* (c) *Psal. 40.*
 (d) *Psal. 19.* (e) *Genes. 27.* (f) *2. Corin. 10.* (g) *Ibidem.*
 (h) *Matth. 11.* (i) *Psal. 33.*

poscunt. Aliter enim querimur, & vicem nostram lamentamur; ut quum Propheta, pio & moestu animi affectu, queritur, dicens: (a) usquequo, Domine, oblivisceris me in finem? Usquequo avertis faciam tuam a me? Quamdiu ponam consilia in anima mea, dolorem in corde meo per diem? Usquequo exaltabitur inimicus meus super me? &c. Sic sanctus Iob: (b) usquequo non parcis mihi, nec dimittis me, ut glutiam salivam meam? Acrius tamen Habacuc propheta queritur, quum ait: (c) usquequo, Domine, clamabo, & non exaudies; vociferabor ad te vim patiens, & non salvabis? (d) Hei mihi, quia factus sum, sicut qui colligit in autumno racemos vindemiae non est botrus ad comedendum, praecoquas ficus desideravit anima mea. Periit sanctus de terra, & rectus in hominibus non est, &c.

Hac eadem interiectione, *vae*, non modo sortem nostram dolemus, sed aliis etiam mortem & supplicium comminamur. Sic Amos: (e) vae vobis, qui opulenti estis in Sion, optimates, capita populorum, ingredientiés pompaticè domum Israël. Sic Dominus in evangelio: (f) vae, inquit, vobis, Scribae & Pharisei hypocritae, qui clauditis regnum caelorum, &c.

Finirimus autem comminationi est indignationis affectus. Sic Dominus apud Ezechielem: (g) & complebo, inquit, furorem meum in te, & dabo te in desertum, & in opprobrium gentibus, quae in circuitu tuo sunt; & eris opprobrium, & blasphemia, exemplum, & stupor in gentibus, quae in circuitu tuo sunt, quum fecero in te iudicia in furore, & in indignatione, & in increpationibus: ego Dominus loquutus sum, quando misero sagittas famis pessimas in eos, quae erunt mortiferae, & immittam in vos famem, & bestias pessimas usque ad internecionem: pestilentiae & faemes transibunt per te, & gladium inducam super te: ego Dominus loquutus sum. In his verbis aperte constat, atrocitatem indignationis similem in pronuntiatione atrocitatem

po-

(a) *Psalms*. 12. (b) *Iob* 7. (c) *Habac.* 1. (d) *Mich.* 7.
(e) *Amos* 6. (f) *Matth.* 23. (g) *Ezech.* 5.

postulare, ut habitus vocis orationi & sententiae respondeat. Sic etiam idem Dominus apud Isaiam: (a) tacui, semper silui, patiens fui, quasi parturiens loquar, dissipabo, & absorbebo simul, desertos faciam montes, & colles, & omne gramen eorum exsiccabo. Sic idem Dominus in Cantico: (b) ignis succensus est in furore meo, & ardebit usque ad inferni novissima: devorabitque terram cum germine suo, & montium fundamenta comburet. Dentes bestiarum mittam in eos cum furore trahentium super terram, atque serpentum; & cetera, quae in hanc sententiam sequuntur.

Incidit etiam non raro admirationis affectus. Tale est illud apud Isaiam: (c) quo modo cessavit exactor, quievit tributum? Et: (d) quo modo cecidisti de caelo, Lucifer, qui mane oriebaris? Corruisti in terram, qui vulnerabas gentes, &c. Interdum etiam affectus hic aliis admiscetur. Sic apud eundem indignationi coniungitur: (e) quo modo facta es meretrix, civitas fidelis, plena iudicii? Dolori autem apud Ieremiam, quum ait: (f) quo modo sedet sola civitas plena populo? &c. Sic David amicorum casum lamentatur: (g) quo modo, inquit, ceciderunt robusti, & perierunt arma belli?

Ironia vero, quae est in sententiis, non vacat quodam amarulentiae affectu, quam pronuntiatio prae se ferre debet. Sic Dominus in evangelio: (h) finite illos, caeci sunt, & duces caecorum, &c. Ironiae quoque speciem habet illud Apostoli: (i) comedamus, & bibamus; cras enim moriemur. Et in Apocalypsi Dominus: (k) qui nocet, noceat adhuc; & qui in sordibus est, sordescat adhuc.

Praecisio autem, quam inter sententiarum figuras (l) numeravimus, ingentem saepe affectum, non loquendo, sed tacendo, exprimit. Sic regius vates: (m) anima mea turbata est valde; sed tu, Domine, usquequo? Substitit enim in

Cc

hac

(a) *Isai.* 42. (b) *Deut.* 32. (c) *Isai.* 14. (d) *Ibid.* (e) *Isai.* 1. (f) *Thren.* 1. (g) *2. Reg.* 1. (h) *Matth.* 15. (i) *1. Corinib.* 15. (k) *Apocalyp.* 22. (l) *Pag.* 291. (m) *Psalms.* 6.

hac voce desiderantis affectus, & doloris magnitudine impeditus, ulterius progredi non valuit. Dæst enim verbum: *non parces mihi*, vel aliud simile. Diversum autem animi affectum insinuavit, quum dixit: (a) calix meus inebrians. Praecisa enim oratio est in Hebraeo. Particula enim, *quam praeclarus est*, ab interprete perspicuitatis gratia addita fuit. Hac autem orationis praecisione ingentem animi affectum significare possumus, quum alicuius rei dignitatem, vel, quod est frequentius, indignitatem ad summum usque extulimus. Ad quem ubi perventum est, subsistit oratio; quasi is, qui dicit, nullam satis dignam orationem inveniat, qua, quod reliquum est, explicare possit. Itaque concionator velut attonitus haeret, stupet, ac silet: quod quidem silentio, quum vere dicentis animus commotus est, vehementer auditorum animi concitantur. Tanta autem divini spiritus vis in concionatore esse poterit, ut concionem ipsam huiusmodi praecisione aliquando finiat: atque ita suspensos, & tremebundos auditores relinquat. Quae quidem res, ut ridicula erit, si ex sola dicentis arte fiat; ita quum ex animo, divinae gloriae zelo saucio, fit, ad permovendos animos efficacissima est.

Habent affectus aliquid haec orationum genera, quae mox subiiciemus: atque in primis asseveratio, quae interdum, ut Fabius ait, plus ipsis probationibus valet. Ea enim vim quamdam & acrimoniam in voce ac vultu requirit, quae causae suae fiduciam prae se ferat. Talis illa Paulli: (b) ecce ego Paullus dico vobis, si circumcidamini, Christus nihil vobis proderit. Testificor autem rursus omni circumcidenti se, quoniam debitor est universae legis faciendae. Idemque rursus: (c) si in hoc mundo tantum in Christo sperantes sumus, miserabiliores sumus omnibus hominibus. Et apud eundem: (d) nolite errare, neque fornicarii, neque idolis servientes, neque adulteri, neque molles, &c. regnum Dei possidebunt.

Cum asseveratione similitudinem quamdam habet ad-
iu-

(a) *Psalm. 22.* (b) *Ad Galat. 5.* (c) *1. Corinth. 15.* (d) *1. Corinth. 6.*

iuratio : cuiusmodi est illa Caiphæ pontificis : (a) adiuro te per Deum vivum , ut dicas nobis , si tu es Christus. Similem autem acrimoniam , & asseverandi vim , iusiurandum requirit. Sic David : (b) vivit Dominus Deus Israël , qui prohibuit me , ne malum facerem tibi , nisi cito venisses in occursum meum , non remansisset Nabal usque ad lucem matutinam mingens ad parietem. Sic Elias trepidantem Abdiam confirmat hoc iuramento : (c) vivit Dominus exercituum , in cuius conspectu sto , quia hodie apparebo ei , hoc est , Achab regi. Sic Ioab ad Davidem , Absalonis filii mortem lamentantem , ait : (d) nunc igitur surge , & procede , & alloquens satisfac servis tuis. Iuro enim tibi per Dominum , quod si non exieris , ne unus quidem remansurus sit tecum nocte hac : & peius erit hoc tibi , quam omnia mala , quae venerunt super te ab adolescentia tua. Quis non videret , quantam vocis acrimoniam hæc oratio postulet ?

Habet etiam adhortatio speciem quamdam affectus , quae praecipientis imperium & auctoritatem voce ipsa & quadam pronuntiandi celeritate repræsentat ; qualis est illa Domini apud Isaiam : (e) quaerite iudicium , subvenite oppresso , iudicate pupillo , defendite viduam ; & venite , & arguite me , dicit Dominus. Sic apud eundem : (f) dissolve colligationes impietatis , solve fasciculos deprimentis , dimitte eos , qui contracti sunt , liberos , & omne onus dirumpe , frange esurienti panem tuum ; & cetera , quae sequuntur.

Nec longe distat ab adhortatione castigatio ; qualis illa apud Salomonem : (g) usquequo , piger , dormies ? Quando consurges e somno tuo ? Paullulum dormies , paullulum dormitabis , &c. Idemque : (h) usquequo parvuli diligitis infantiam ? Et stulti ea , quae sunt sibi noxia , cupient ? Et imprudentes odibunt scientiam ?

Ad affectus etiam commovendos plurimum conferunt exclamatio & apostrophe ; quae non unum aliquem affectum exprimunt , sed ad omnes accommodantur. Ex quovis

Cc 2

enim

(a) *Matth. 26.* (b) *1. Reg. 25.* (c) *3. Reg. 18.* (d) *2. Reg. 19.*
(e) *Cap. 1.* (f) *Isai. 58.* (g) *Prov. 6.* (h) *Prov. 1.*

enim ingenti affectu in exclamationem & apostrophem erumpere licet. Ad commiserationem quidem illa Ieremiae exclamatio pertinet : (a) o vos omnes , qui transitis per viam , attendite , & videte , si est dolor similis sicut dolor meus. Leniorem vero indignationem habet illa : (b) o stulti , & tardi corde ad credendum ea , quae loquuti sunt prophetae ! Acrior tamen illa Paulli : (c) o insensati Galatae ! Quis vos fascinavit non obedire veritati ? Sed multo tamen acrior illa : (d) o generatio incredula & perversa , quousque apud vos ero ? Quamdiu vos patiar ? Neque vero necesse est ad exclamationes omnes particula O : sine ipsa namque , & cum aliis etiam interiectionibus , quibus vehemens affectus erumpit , exclamatio fit. Talis est illa Ioannis Baptistae : (e) gemina viperarum , quis ostendit vobis fugere a ventura ira ? Similiter & illa Domini vox apud Isaiam : (f) heu , conso- labor de hostibus meis , & vindictam sumam de inimicis meis. Sic & Dominus in evangelio , magno erumpente ani- mi dolore , ait : (g) vae mundo a scandalis. Et : (h) vae ho- mini illi , per quem scandalum venit. Sic & angelus in Apo- calypsi homines ipsos inducit Babylonis casum admirantes , & lamentantes : (i) vae , vae civitas illa magna Babylon , civitas illa fortis , quia una hora venit iudicium tuum. Numeratur etiam inter exclamationes illa Ieremiae , (k) A , A , Domine Deus , prophetae dicunt eis : non videbi- tis gladium , & fames non erit in vobis. Ut enim littera O , ita etiam A commodissime exclamationibus servit. Utra- que enim , quoniam fauces implet , ad exclamandum com- modissima est. Verum ex his , A , mihi commodior atque facilior ad pronuntiandum videtur , minusque dicentis ar- tificium detegit ; quum sit velut naturalis quaedam erum- pentis affectus significatio. Qua si prudenter suis in locis Ecclesiastes utatur , non parum auditorum affectus exci- tabit.

Exclamationi finitima est apostrophe : utpote quae illi
sem-

(a) *Thren.* 1. (b) *Luc.* 24. (c) *Ad Galat.* 3. (d) *Luc.* 9.
(e) *Luc.* 3. (f) *Isai.* 1. (g) *Matth.* 18. (h) *Ibid.* (i) *Apo-*
calyp. 18. (k) *Jerem.* 14.

semper adiuncta est; eademque, sicut exclamatio, cunctis affectibus servit. Vehemens illa: (a) audi caelum, & auribus percipe terra, quia os Domini loquutum est. Nec minus illa Moïsis: (b) testes invoco hodie caelum & terram, cito perituros vos esse de terra, quam, transito Iordane, possessuri estis. Nec minus vehemens illa: (c) obstupescite caeli super hoc, & portae eius desolamini vehementer. Duo enim mala fecit populus meus, &c. Sic & illa apud Ezechielem: (d) o mucro, mucro, evagina te ad occidendum; lima te, ut interficias, & fulgeas. Longe autem dissimili vocis figura pronuntianda est apostrophe illa suavissima: (e) rorate caeli desuper, & nubes pluant iustum; aperiat terra, & germinet Salvatorem. Sic & illa: (f) flecte ramos arbor alta, tensa laxa viscera, &c. Utrobique enim pronuntiationis vox desiderantis animi affectum exprimere debet. Diversum autem ab hoc affectum requirit illa Davidis apostrophe: (g) montes Gelboë, nec ros, nec pluvia veniat super vos, neque sint agri primitiarum, quia ibi abiectus est clypeus fortium.

Interrogatio quoque & omnes recipit affectus, & aperte dissimilem a communi sermone pronuntiationem requirit, eamque cum primis pro affectuum & sententiarum ratione variam. Simplici autem & blanda voce adolescens ille interrogat: (h) magister bone, quid faciendo vitam aeternam possidebo? Sic & illud: (i) qui sunt hi sermones, quos confertis adinvicem ambulantes, & estis tristes? Dissimili autem voce optantes interrogamus: (k) quis mihi tribuat, ut scribantur sermones mei? Quis mihi det, ut exarentur in libro? &c. Omnia huius interrogationis membra simili vocis tenore, cum quadam tamen vehementia atque instantia, pronuntianda sunt. Sic & illa: (l) quis infirmatur, & ego non infirmor? Quis scandalizatur, & ego non uror? Acrior tamen illa: (m) quare atteritis populum meum, & facies pauperum commolitis. Et: (n) generatio

Cc 3

pra-

(a) *Isai. 1.* (b) *Deut. 30.* (c) *Jerem. 2.* (d) *Ezech. 21.*
 (e) *Isai. 49.* (f) *In Offic. Eccl.* (g) *2. Reg. 1.* (h) *Luc. 10.*
 (i) *Luc. 24.* (k) *Iob 19.* (l) *2. Cor. 11.* (m) *Isai. 3.* (n) *Deut. 32.*

prava atque perversa, haecine reddis Domino, popule stulte & insipiens? Haec interrogatio cum quadam irae & indignationis significatione proferenda est; sicut etiam haec: (a) numquid super his non visitabo, dicit Dominus, aut in gente tali non ulciscetur anima mea? Haerentis autem, dubitantis & anxii animi voce pronuntianda est interrogatio illa: (b) cui loquar, aut quem contestabor, ut audiat? Et: (c) quis est vir sapiens, qui intelligat hoc, & ad quem verbum oris Domini fiat, ut annuntiet istud, quare perierit terra, & exusta sit quasi desertum, eo quod non sit qui pertranseat? Longum est ire per singula; huiusmodi namque exemplorum in litteris sanctis nusquam non magna copia est: in quorum varia ac dissimili pronuntiatione Ecclesiastes exerceri poterit, ut huiusmodi excitatione veram ac naturalem pronuntiandi formam animo concipiat.

Sermocinatio quoque, quam inter sententiarum figuras (d) numeravimus, quae varias personas loquentes inducit, variis quoque affectibus servit. Ideoque dissimilem vocis figuram in eisdem requirit. Aliter enim sermocinationem illam pronuntiamus: (e) & non dixerunt: metuamus Dominum, qui dat nobis pluviam temporaneam & serotinam, plenitudinem annuae mectis custodientem nobis. Aliter illa: (f) ne gemas in novissimis tuis, ... & dicas: cur detestatus sum disciplinam, & increpationibus non acquievit cor meum, nec audivi vocem docentium me, & magistris non inclinavi aurem meam? Aliter illa: (g) dixerunt impii cogitantes apud se non recte: exiguum, & cum taedio est tempus vitae nostrae, & non est refrigerium in fine hominis; & cetera, quae sequuntur Sapient. 2. Aliter illa, qua impii, felicissimam iustorum sortem admirantes, dicunt: (h) hi sunt, quos aliquando habuimus in derisum, & in similitudinem impropertii. Nos insensati vitam illorum aestimabamus insaniam, & finem illorum sine honore. Ecce quo modo computati sunt inter filios Dei, & inter sanctos fors il-

(a) *Ierem.* 5. (b) *Ierem.* 6. (c) *Ierem.* 9. (d) *Pag.* 156.
 (e) *Ierem.* 5. (f) *Prov.* 1. (g) *Sap.* 2. (h) *Sap.* 3.

illorum est. Ergo erravimus a via veritatis, &c. Sapient. 5. Aliter illa: (a) visitabo super fructum magnifici cordis regis Assur. Dixit enim: in fortitudine manus meae feci, & in sapientia mea intellexi, & abstuli terminos populorum, &c. Isaïae 10.

Sunt etiam inter figuras aliae, quae peculiarem quendam vocis habitum requirunt: quas non erit inutile hoc in loco exempli gratia recensere. Earum prima est repetitio, quae idem nomen orationis initio repetit. Haec autem postulat, ut eodem vocis tenore idem nomen repetatur. Sic apud Ieremiam: (b) gladius ad Chaldaeos, ait Dominus: & ad habitatores Babylonis, & ad principes, & ad sapientes eius: gladius ad divinos eius, qui stulti erunt: gladius ad fortes illius, qui timebunt: gladius ad equos eius, & ad currus eius, & ad omne vulgus, quod est in medio eius: gladius ad thesauros eius, qui diripientur. Conversio quoque idem postulat in fine, quod repetitio in principio. Sic autem pronuntiamus illud D. Paulli: (c) quum essem parvulus, loquebar ut parvulus, sapiebam ut parvulus, cogitabam ut parvulus, &c. Complexio vero, quae utriusque figurae naturam retinet, in qua initia inter se & fines conveniunt, utriusque etiam figurae formam in pronuntiando retinet. Cuius rei exemplum, quum de hac figura loqueremur, (d) subiecimus.

Conduplicatio, quam Graeci epizeusim vocant, quae idem verbum, aut etiam orationem repetit, ut asseverationi finitima est, ita similem fere pronuntiandi formam requirit. Sic apud Isaïam Dominus: (e) propter me, propter me faciam, ut non blasphemem, & gloriam meam alteri non dabo. Et iterum: (f) ego sum, ego sum; qui deleo iniquitates tuas propter me. Acrior illa: tu, tu faces illas incendiisti. Ei in oratione: (g) commotus non es, quum tibi mater pedes amplexaretur, non es commotus? Sic & illa: (h) tu in horum conspectum venire audes, proditor patriae?

Cc 4

Pro-

(a) *Isai.* 10. (b) *Ierem.* 50. (c) *1. Corinb.* 13. (d) *Pag.* 162. seq. (e) *Isai.* 48. (f) *Isai.* 43. (g) *Auſt. ad Herenn.* lib. III. cap. 28. (h) *Ibid.* non totidem verbis.

Proditor, inquam, patriae, tu in horum conspectum venire audes? Et: matrem tuam occidisti: quid dicam amplius? matrem tuam occidisti.

Correctio quoque peculiarem quamdam pronuntiandi rationem petit; qualis illa D. Gregorii: quid igitur miramur, fratres? Mariam venientem, an Dominum suscipientem? Suscipientem dicam? &c. Sic Terentianus ille senex, quum filium se habere dixisset, adiunxit: (a) *quid dixi habere me? Immo habui, Chreme: Nunc, habeam, necne, incertum est.*

Dubitatio quoque aliam pronuntiandi formam requirit, qualis illa Eusebii Emisleni: quid primum mirer, quidve postremum? Quod sine conceptu est collata secunditas, an quod per partum magis est glorificata virginitas? Sed non mirum, si ita peperit: talis erat ille, cui nupserat. Sic D. Cyprianus in sermone de lapsis: (b) *quid hoc loco faciam, dilectissimi fratres, fluctuans vario mentis aestu? Quid, aut quo modo dicam? Lacrimis magis, quam verbis, opus est.*

Verum inter alias figuras vix ulla maiorem in pronuntiando varietatem desiderat, quam ratiocinatio atque subiectio; quae similem paene naturam, similemque pronuntiandi formam requirunt: propterea quod crebris interrogatiunculis & responsionibus constant. Quo fit, ut subinde vocis figura varianda sit, quum aliter interrogemus, & aliter nobis ipsis, tamquam alteri, respondeamus. Quocirca non erit tironibus inutile, in harum duarum figurarum pronuntiatione exerceri. Exempla vero, quum de his duabus figuris ageremus, (c) subieciimus, quae hic repetere non est necesse. Verum de his satis multa: quibus facile quisque intelliget, qua pronuntiandi ratione in ceteris quoque sententiis, quae ad has revocari non possunt, usus sit. Omnia enim, quae hactenus praecepimus, eo pertinent, ut pronuntiatio cum rerum & sententiarum natura apte cohaereat.

CAP.

(a) *Heaut. Act. 1. scen. 1. v. 42.* (b) *Sub initium.* (c) *Lib. V. cap. 3. pagg. 281. & 285.*

CAP. X.

EXEMPLA QVAEDAM, E LITTERIS SANCTIS
desumpta, in quorum pronuntiatione rudes huius
officii exerceri valeant.

Quoniam, ut paullo ante diximus, (a) ediscere aliquid monet Fabius, (b) in quo exerceri valeant, qui hanc pronuntiandi facultatem consequi desiderant; operae pretium me facturum putavi, si praeter ea exempla, quae hactenus ex scripturis sanctis adduxi, alia quoque paullo longiora afferam, quae variam pronuntiandi rationem exigunt: in quibus huius artificii rudes exerceri queant, ut perfectam pronuntiandi formam addiscant. Sumamus igitur in primis locum illum ex psalmo 49. (c) *peccatori autem dixit Deus: quare tu enarras iustitias meas, & assumis testamentum meum per os tuum?* Haec duplex interrogatio figura obiurgantis atque admirantis pronuntianda est. Sequitur deinde alio vocis flexu proferendum, quod subdit: (d) *tu vero odisti disciplinam, proiecisti sermones meos retrorsum: & cetera*, quae sequuntur usque ad illud: (e) *adversus filium matris tuae ponebas scandalum*. Haec omnia membra eodem vocis tenore atque acrimonia pronuntianda, & suis intervallis distinguenda sunt, quoniam omnia eandem continent enumerationem scelerum; nisi quod sententia illa, (f) *si videbas furem, currebas cum eo*, non nihil ab antecedentibus & consequentibus membris in pronuntiatione distat. Sequitur deinde: (g) *haec fecisti, & tacui*. Haec admirantis vox est, & velut ad tam diuturnum silentium obstupescantis. Ideoque paullulum hoc in loco subsistere pronuntiatio debet. Hoc enim admirationis ratio postulat. Quod vero deinde sequitur, (h) *existimasti inique, quod ero tui similis*, maiorem dicentis acrimoniam & indignationem praese fert; maioremque adhuc, quod protinus subdit, (i) *arguam*

(a) Pag. 396. (b) *Instit. lib. XI. cap. 3.* (c) *Ver. 16.* (d) *Ibid. v. 17.* (e) *Ver. 20.* (f) *Ver. 18.* (g) *Ver. 20.* (h) *Ver. 21.* (i) *Ibid.*

quam te, & statuam contra faciem tuam: hoc enim minaci gestu atque voce pronuntiandum est. Sequitur deinde alia pronuntiandi ratio ab his longe dissimilis: (a) *intelligite haec, qui obliviscimini Deum, ne quando rapiat, & non sit qui eripiat*. Haec enim sententia voce prudenter atque opportune admonentis, & ab imminente periculo deterrentis, proferenda est. Hoc igitur exemplo aperte liquet, quam varia in his paucis versiculis pronuntiandi ratio adhibenda sit.

Sumamus aliud exemplum ex prima Paulli ad Corinthios epistola, in qua Corinthiorum lites reprehendit. Sic igitur ait: (b) *audet aliquis vestrum, habens negotium adversus alterum, iudicari apud iniquos, & non apud sanctos?* Haec interrogatio, & tres, quae deinde sequuntur, habitum vocis acriter obiurgantis, admirantis, & instantis exigunt. Quod vero sequitur, (c) *saecularia igitur iudicia si habueritis, contemtibiles qui sunt in Ecclesia, illos constituite ad iudicandum*; hoc maiori adhuc vehementia pronuntiandum est. Habet quippe oratio haec, *contemtibiles qui sunt in Ecclesia*, speciem quamdam vel hyperboles, vel ironiae, quam deinde corrigit, quum infert: (d) *ad verecundiam vestram dico*. Quae quidem sententia aliam vocis figuram requirit. Sequitur deinde: *sic non est inter vos sapiens quisquam, qui possit iudicare inter fratrem suum?* Haec interrogatio admirantis vocem postulat, & apertissima ratione eos, qui litigabant, convincentis. In illa vero particula, *sic*, paullulum immorandum esse videtur. Habet enim & silentium in pronuntiatione, alias quidem longius, alias brevius, non vulgarem emphasim. Quod vero protinus adiicit, (e) *sed frater cum fratre iudicio contendit, & hoc apud infideles*: haec sententia eandem vocis acrimoniam & admirationem petit; sic tamen ut circumstantia illa, & *hoc apud infideles*, maiori nisu atque voce proferenda sit, quo indignitas rei magis emineat.

Sequitur deinde alia pronuntiandi ratio, quum subdit:

(a) Ver. 22. (b) 1. Corintb. 6. v. 1. (c) Ibid. v. 4. (d) Ver. 5. (e) Ver. 6.

dit : (a) *iam quidem omnino delictum est in vobis , quod iudicia habetis inter vos.* Verum multo acrius urget , ubi continuo infert : *quare non magis iniuriam accipitis ? quare non magis fraudem patimini ?* Haec enim duplex interrogatio maiore spiritu atque impetu pronuntianda est. Aliam porro vocis figuram exposcit , quod sequitur : (b) *sed vos iniuriam facitis , & fraudatis : & hoc fratribus.* In qua sententia particula illa , *& hoc fratribus* , eminere debet , sicut superior illa , *& hoc apud infideles*. Vtrobique enim rei indignitas ex variis personarum circumstantiis colligitur ; quam pronuntiatio prae se ferre debet. Sequitur continuo alia vocis figura , quum addit : (c) *an nescitis , quia iniqui regnum Dei non possidebunt ?* A qua non nihil distat , quod deinde subiicit : *nolite errare : neque fornicarii , neque idolis servientes , neque adulteri , neque molles , &c. regnum Dei possidebunt.* Hi omnes articuli vehementius atque celerius pronuntiandi sunt : sic tamen , ut intervallis suis distinguantur. Asseveratio quippe , quae (d) ipsis interdum probationibus plus valere dicitur , vehementiam , atque impetum in asseverante requirit.

Quia vero orationes illae , in quas personarum varietas incurrit , quae instar dialogorum sunt , ad facultatis huius exercitationem plurimum conferunt , ex his etiam exempla aliquot in medium proferam : atque in primis illud Matthaei 15. ubi Scribae & Pharisei Dominum adierunt , ut ipsum de neglecta discipulorum cura ac disciplina obiurgarent. Sic igitur aiunt : (e) *quare discipuli tui transgrediuntur traditiones seniorum ?* Haec obiurgatio magna severitate , & ampla voce proferenda est , ut Scribarum & Phariseorum personam referamus , qui ingentis piaculi esse credebant , illotis manibus contra seniorum traditionem edere. Sed quanto alia voce dominica responsio proferenda est , quum ait : (f) *quare & vos transgredimini mandatum Dei propter traditionem vestram ?* Nam Deus dixit : (g) *honora patrem tuum , & matrem , & cetera* , quae sequuntur. Omnis haec oratio obiur-

(a) Ver. 7. (b) Ver. 8. (c) Ver. 9. (d) Pag. 402. (e) Matth. 15. 2. (f) Ver. 3. (g) Exod. 20. 12. Deut. 5. 16. & aliis locis.

iurgantis & indignantis vocem desiderat. Sed acrius tamen est & vehementius, quod deinde addit: (a) *hypocritae, bene prophetavit de vobis Isaias, quum dixit: (b) populus hic labiis me honorat, &c.* Hoc enim est velut adacto verbi Dei pugione divinam legem adulterantes transfodere. Longe vero dissimilem vocis figuram exigit, quod deinde discipuli ad Dominum dicunt: (c) *scis, quia Pharisei, audito verbo hoc, scandalizati sunt?* Hoc enim submissa voce, quasi ad aurem insusurrando, proferendum est. At illud, quod sequitur, libera asseverantis voce pronuntiandum: (d) *omnis plantatio, quam non plantavit Pater meus caelestis, eradicabitur.* Dissimili protinus voce proferendum est, quod subiecit Petrus, quum ait: (e) *ediffere nobis parabolam istam.* Sed quanto aliter pronuntiandum, quod deinde respondit Dominus: (f) *adhuc & vos sine intellectu estis? Non intelligitis, quia omne, quod in os intrat, in ventrem vadit, & in secessum emititur?* &c. quae sequuntur.

Si quis alia exempla desiderat, habet in evangelica historia non nulla; atque ea in primis, quae dialogorum speciem referunt, ut quum Dominus longa oratione cum muliere Samaritana usque ad discipulorum adventum (g) loquitur, illa interrogante, & Domino respondente. Sic etiam quum Petrus (h) pedes a Domino ablui recusat, Dominus vero coepto ministerio instat. Sed commodissimum huius rei exemplum exstat apud D. Gregorium Nazianzenum in funebri oratione, qua Basilii Magni virtutes, ac praecipue mirabilem eius in fide constantiam adversus imperatoris Arriani praefectum, commendat. Cuius rei historiam hoc in loco at-textere libuit, non solum quia instituto nostro utilissima est, sed etiam quoniam historiam scitu dignissimam continet. Sic igitur Gregorius: (i)

„ Quonam autem modo vel praefecti audaciam, vel Basilii virtutem & sapientiam, eam qua ei restitit, satis digna oratione complectar? Quae tua est, inquit, ratio, heus

(a) *Matth. 15. v. 7.* (b) *Isai. 29.* (c) *Matth. 15. v. 12.* (d) *Ver. 13.*
 (e) *Ver. 15.* (f) *Ver. 16. & 17.* (g) *Ioan. 4. a v. 7. usque ad 27.*
 (h) *Ioan. 13. a v. 6.* (i) *Oratione XX, paullo post medium, Tom. I. edit. Venet. ann. 1753. colum. 315. seq.*

„ heus tu , nomine illum compellans , (nondum enim eum
„ episcopum vocare dignabatur) ut tanto imperatori obli-
„ stere audeas , solusque omnium contumaciter te geras ?
„ Quorsum , respondit Basilius , haec oratio spectat , &
„ quaenam haec contumacia & arrogantia ? Nondum enim
„ id satis intelligo. Quoniam , inquit ille , imperatoris re-
„ ligionem minime colis , omnibus aliis iam inclinatis ac
„ superatis. Non enim , inquit Basilius , haec vult impe-
„ rator meus : nec rem ullam creatam adorare sustineo ,
„ quum & ipse a Deo creatus sim , & Deus esse iubeat. Nos
„ vero , inquit ille , quid tandem tibi videmur ? Nihil sa-
„ ne , inquit Basilius , dum haec iubetis. Age vero , inquit
„ ille , non magnum & honorificum existimas , ad nostras
„ partes adiungi , sociosque nos habere ? Ad haec Basilius :
„ vos quidem praefecti estis , & quidem illustres , non in-
„ ficias eo : minime tamen Deo praestantiores. Socios au-
„ tem vos habere , mihi quidem amplum & honorificum
„ fuerit ; (quidni enim , quum ipsi quoque Dei creaturae si-
„ tis ?) sed ut alios quosdam ex his , qui nobis subiecti
„ sunt. Non enim personarum dignitate , sed fide , chri-
„ stianismus insignitur.

„ Hac oratione commotus praefectus , ac maiori ira suc-
„ census , de subsellio surrexit , atque asperioribus verbis
„ cum eo agere perrexerit. Quid ? Potestatem hanc non per-
„ timescis ? Cur vero pertimescerem , inquit Basilius ? Quid
„ fiet ? quid patiar ? Quid patieris , intulit ille ? unum e-
„ tam multis , quae meae sunt potestatis. Quaenam haec ,
„ subiunxit Basilius ? fac enim intelligamus. Bonorum , in-
„ quit ille , proscriptionem , exitium , cruciatus , mortem.
„ Tum Basilius : si quid aliud habes , id nobis minitare. Ho-
„ rum enim , quae adhuc commemorasti , nihil nos attin-
„ git. Quoniam modo , inquit ille ? Quoniam , inquit Ba-
„ silius , bonorum proscriptioni obnoxius non est , qui ni-
„ hil habet : nisi forte laceris & detritis hisce pannis indi-
„ ges , ac paucis libellis , in quibus omnes mihi facultates
„ & copiae sunt. Exsilium autem haud cognosco , qui nul-
„ lo loco circumscriptus sum ; ac neque terram hanc , quam

„ nunc incolo, meam habeo; & eam omnem, in quam pro-
 „ iectus fuero, pro mea duco: immo, ut rectius loquar,
 „ universam terram Dei esse scio, cuius advena ego sum &
 „ peregrinus. Iam tormenta quid accipere queant, quum
 „ corpus desit? Nisi forte primam plagam dixeris: huius
 „ enim solius penes te arbitrium & potestas est. Mors por-
 „ ro beneficii mihi loco erit: citius enim me ad Deum
 „ transmittet, cui vivo, & munere meo fungor, maxima-
 „ que ex parte mortem obii, & ad quem iam pridem pro-
 „ pero.

„ Quo sermone obstupescit praefectus, nemo, inquit,
 „ me (nomenque suum adiunxit) ad hunc usque diem ita
 „ est alloquutus, nec pari verborum libertate. Neque enim,
 „ ait Basilus, fortasse in episcopum incidisti. Alioqui hoc
 „ prorsus modo differuisset, pro huiusmodi rebus in certa-
 „ men veniens. Nam ceteris quidem in rebus, o praefecte,
 „ mansueti & placidi sumus, atque omnium abiectissimi,
 „ quemadmodum hoc nobis lege (a) praescriptum est: ac non
 „ dicam adversus tantum imperatorem, sed ne adversus ple-
 „ beium quidem quemquam & infimi ordinis hominem su-
 „ percilium attollimus. Verum ubi Deus nobis periclitat-
 „ tur, ac proponitur; tum demum, alia omnia pro nihilo
 „ putantes, ipsum solum intuemur. Ignis autem, & gla-
 „ dius, & bestiae, & ungulae, carnem lacerantes, volupta-
 „ ti nobis ac delitiis potius sunt, quam terrori. Proinde
 „ contumeliis nos affice, comminare, fac quidquid colli-
 „ buerit, potestate tua frui, audiat haec etiam impera-
 „ tor: nequaquam profecto nos vinctus, nec efficies, ut im-
 „ piae doctrinae assentiamur: ne si his quidem atrociora
 „ miniteris. „ Haecenus Gregorii Nazianzeni verba. In his
 „ igitur, similibusque locis apte pronuntiandis exerceri pot-
 „ erunt, quicumque hanc facultatem perfecte consequi desi-
 „ derant.

CAP.

(a) *Luc. 22. v. 25. & Matth. 20. v. 25.*

CAP. XI.

*QUALIS PERFECTI CONCIONATORIS VITA ESSE,
& quo potissimum tempore, quoque temperamento, &
quo affectu concionandi munus exercere debeat.*

Absolvimus, amice lector, quae nobis de concionandi ratione atque officio in his libris dicenda esse videbantur. Reliquum est, ut, epilogi vice, documenta quaedam, partim ex iis, quae dicta sunt, partim aliunde, breviter colligamus; quae concionator noster, tamquam praecipua huius officii capita, habere semper ante oculos debeat. Quae qui diligenter observaverit, non dubium, quin egregius huius divini operis artifex evasurus sit. Sed antequam hoc attingamus, ad memoriam revocanda sunt, quae de concionatore ipso in primo huius operis libro diximus. Quae de re quattuor mihi breviter praelibanda esse videntur: nempe, quis, quando, & quo temperamento, & quo fine concionator munus suum exercere debeat.

Quod vero ad primum attinet, sancti illi patres, qui deserta Aegypti loca incolebant, eum praecipue huic officio maturum esse credebant, qui sibi iam consulisset, quique diuturna bene vivendi consuetudine omnes animi sui affectus motusque composuisset: ut virtute iam in naturam quodam modo transeunte, minima cura mores & actiones suas regere, & in officio continere posset. Qui enim desideriorum atque affectuum suorum impotentia laborat, cui necesse adhuc est, cum effrenatis carnis motibus continenter bellum gerere; nondum idoneus est, qui se totum alienis cupiditatibus frenandis impendat: quandoquidem se toto ad suarum moderationem indiget. Alios namque erudire, & ad virtutis amorem trahere, perfectorum est, & eorum, qui firmas iam radices in virtute iecerunt. Quod quidem natura nos & in arboribus & in animantibus docet: neque enim arbores recenter plantatae fructus continuo ferunt, neque animantia, ubi primum in lucem edita sunt, fetificant; nisi quum ad iustam corporis magnitudinem pervenerint.

venerunt. Quumque maxime naturale viventibus sit, similes sibi generare; hoc tamen nisi in adulta perfectaue aetate non praestant. Quocirca, probata iam & corroborata virtus sit, oportet, quae virtutem in aliis ingenerare debet. Recte enim D. Bernardus, cum concionatore agens: (a) dabis, inquit, voci tuae vocem virtutis, si quod suades, prius tibi illud persuasisse cognoveris. Efficacior enim operis, quam oris, vox est.

Adde etiam, quod quum praecipuum concionatoris officium in virtutum atque vitiorum natura explicanda versetur; quis hoc aut intelligere, aut eloqui commodius poterit, quam qui perpetuo vitiis bellum indixit, seque totum ad virtutum & divinae legis studium composuit? Quamvis enim exquisita doctrina atque eruditio ad concionandi officium necessaria sit, sine qua temeraria & caeca esset omnis oratio: tamen quum ad eam vitae puritas & sanctitas accedit, dictu mirum est, quantum eius accessione doctrina iuvetur. Quam quidem rem sanctorum patrum scripta facile declarant: in quibus videre licet, quantam eorum doctrinae vim & lucem, vitae sanctitas & innocentia adiunxerit. Hinc regius propheta: (b) super omnes, inquit, docentes me intellexi, quia testimonia tua meditatio mea est. Super senes intellexi, quia mandata tua quaesivi. Duo sunt, quae plurimum ad sapientiam conferunt; studium, & experientia: illud ad doctores, haec ad seniores pertinet. (c) *In antiquis* enim est sapientia, & in multo tempore prudentia.

Attamen divinae legis amor atque studium usque adeo piorum mentes illustrat, ut & doctoribus, & aetate proVectis anteferatur. Vnde est illud Ecclesiastici: (d) anima viri sancti annuntiat aliquando vera, plusquam septem speculatores sedentes in excelsa ad speculandum. Nam, ut omitram divinae gratiae lumen, & egregia illa Spiritus sancti dona, quae ad intellectus humani aciem illustrandam atque perficiendam conferuntur; quantum, quaeso, ad virtutum & vitiorum cognitionem parandam adiuvat, in vir-

tu-

(a) *Haec habentur ad sensum, epist. 201.* (b) *Psal. 118.* (c) *Iob 12.*
(d) *Ecclesi. 37.*

tutis & pietatis curriculo diu sudasse atque laborasse? Ut enim (a) qui navigant mare, narrant pericula eius; ita qui per iter virtutum gradiuntur, & latam vitiorum viam fugere student; hi plane itineris huius ingressum & exitum, praelia & victorias, labores & dolores, variasque pugnandi artes, & vitae pericula, non solum legendo, sed multo magis pugnando didicerunt. Quis enim melius de ratione venandi, quam venator? quis de piscandi arte, quam piscator, dicet? Quis vero anfractus & compendia viarum exploratius, quam assiduus viator, intelliget? Qui non est, inquit, (b) tentatus, quid scit? Qui spiritualia numquam arma tractavit, qui numquam cum inimico aperto Marte conflixit, qui se illi vincitum atque captivum tradidit, qui numquam cum affectibus suis colluctatus est, qui nullum propter honestatem atque virtutem laborem suscepit; qua ratione de hac spirituali pugna disputare perfecte poterit?

Hac enim de causa Annibal (c) Phormionem philosophum, de re militari disputantem, irrisit, quod senex, qui numquam hostem, numquam castra vidisset, coram se, qui tot annos cum populo Rom. orbis victore, bella gessisset, de re militari disputare ausus esset. Quo exemplo non obscure intelligimus, quanto aliter de spirituali militia loquantur, qui in ea strenue versati sunt, quam qui numquam illam attigerunt. Iam vero de divini Spiritus delitiis, de internis fidelis animae cum caelesti sponso colloquiis, de caritatis ardore atque impetu, de sobria illa humanae mentis ebrietate, qua sanctorum animae rapiuntur in Deum, quis melius dicere poterit, quam qui haec ipsa diu multumque expertus est? Qua ex re liquido apparet, verissime a Propheta dictum esse: (d) a mandatis tuis intellexi. Haec autem non eo consilio diximus, ut doctrinae vel necessitatem vel dignitatem minuamus, sine cuius luce mortales in densissimis errorum tenebris versarentur, & sine qua nemo docendi munus usurpare in Ecclesia debet; sed ut ostenderemus, quemadmodum paullo ante diximus,

Dd

quan-

(a) *Eccli.* 43. (b) *Eccli.* 34. (c) *Apud Cic. lib. II. de orat. cap. 18.*
 (d) *Psalms.* 118.

quantum lucis & caloris , integritas & sanctimonia vitae, sacrae Theologiae studiis atque doctrinae adiungat.

Ex his autem intelligi facile poterit , quod secundo loco posuimus, hoc est , quo tempore concionator munus hoc aggredi debeat. Si enim hoc officium ad eos solum pertinet , qui firmas in virtute radices iecerunt ; consequens est, ut nemo , nisi ad hanc virtutis firmitatem pervenerit , munus hoc obire debeat. Ideoque merito Propheta (a) iustum virum ligno comparat , iuxta decursus aquarum plantato, quod fructum , inquit , suum dabit in tempore suo. Neque enim omnia omnibus temporibus conveniunt. Recte enim Salomon ait : (b) tempus amplexandi , & tempus longe fieri ab amplexibus. Illud autem spectat ad privatam iustorum vitam , in qua ii spiritualibus delitiis atque amplexibus caelestis sponsi fruuntur ; hoc autem ad publicam , quae tota in aliorum salute procuranda intenta est.

Eleganter admodum Origenes adnotavit, quod magnus ille sapientiae amator eandem sapientiam modo sponsam, modo vero sororem appellet. Quamvis dissimilis utriusque nominis ratio sit ; utraque tamen in sapientiam cadit , quae alio tempore sponsa , alio soror esse debet. Et quidem quo tempore sponsa est , solius sponsi sui amplexibus destinatur , nec alteri communicari potest : ubi vero soror est effecta , potest utique aliis matrimonio copulari. Prius igitur tibi eam sponsam assume , cuius tu solus delitiis fruaris. (c) Non enim habet amaritudinem convictus illius , neque taedium conversatio illius , sed laetitiam & gaudium. Deinde vero illam , ceu castissimam sororem , in publicum profer , & aliis fruendam trade. Huius autem ordinis inversio facit , ut concionator & sibi ipsi noceat , & aliis prodesse nequeat. Non est enim iacentis , alium erigere : neque aliis quisquam dare potest , quod ipse non habeat. Immaturus sive arborum sive animantium partus ad frugem minime pervenit. Ita fit , ut concionatoris immaturus labor aliis quidem inutilis , sibi autem damno atque detrimento sit. Quod quidem damnum D. Bernardus exponit his verbis:

(a) *Psalm. 1.* (b) *Eccles. 3.* (c) *Sap. 8.*

bis : (a) „ quod tuum est , spargis & perdis , si prius quam „ infundaris tu totus , semiplenus festines effundere : contra „ legem arans in primogenito bovis , & ovis primogenitum „ tondens. Nimirum vita atque salute , quam alteri das , te „ fraudas , quum , sana vacuus intentione , gloriae inanis „ vento inflaris. „ Haftenus Bernardus.

§. I.

Sequitur deinde, quod tertio loco posuimus, hoc est, quo temperamento munere suo sit concionator usus. Quam rem brevi oratione Ecclesiasticus docet , quum ait : (b) recupera proximum secundum virtutem tuam , & attende tibi , ne incidas. Hoc enim caritatis ordo exigit : de quo sponsa in Cant. gloriatur. Hic autem ordo petit , ut hac ratione concionator aliis prosit , ne sibi desit ; sic aliorum saluti studeat , ne suam deserat ; sic in alios liberalis , ne sibi parcus ; sic pius , ne sibi immitis ; sic denique salutaris , ne sibi inutilis & sui negligens existat. Hoc autem nos docent quinque illae virgines sapientes , quae fatuis virginibus , oleum postulantibus , prudenter responderunt : (c) ne forte non sufficiat nobis & vobis , ite potius ad vendentes , & emite vobis. Hoc idem nos Apostolus docet , quum ad Timotheum ait : (d) attende tibi , & doctrinae. Hoc enim modo & te ipsum saluum facies , & eos , qui te audiunt. Priori ergo loco sibi concionator prospicere monetur : secundo vero , ut tradendae populo doctrinae vacet. Vires igitur suas perspectas atque exploratas habere debet , ut , quod sibi necessarium fuerit , prius sumat ; deinde , quod reliquum fuerit temporis & officii , aliis impendat. Hoc est enim quod Ecclesiasticus insinuavit , quum dixit : (e) recupera proximum secundum virtutem tuam : hoc est , ne maiora viribus tuis aggrediare , sed par sit virtuti atque facultati onus.

Qua de re sic Seneca : (f) *quoties aliquid conaberis , te simul,*

Dd 2

mul,

(a) Bernard. sup. Cant. Serm. 64. (b) Eccli. 29. (c) Matth. 25.
(d) 1. Timoth. 4. (e) Eccli. 29. (f) Lib. III. de ira , cap. 7.

mul, & ea, quae paras, quibusque pararis, ipse metire. Idemque rursus: (a) ut quietus possit esse animus, non est iactandus, nec multarum... rerum actu fatigandus, nec magnarum, supraque vires appetitarum. Facile est, levia aptare cervicibus, & in hanc aut in illam partem transferre sine lapsu. Illos igitur imitari concionator debet, qui ex alveariis favos decerpunt: qui nequaquam ita illa exhauriunt, ut non apibus alimenta mellis in hiemem reposita relinquant. Sic etiam pastores, qui distenta lacte ovium ubera emulgent, agnorum, quos lacte nutriunt, rationem habent, ne fetus alimenti inopia deficiat. Ad hunc igitur modum Ecclesiastes alios caelestis doctrinae pabulo alere debet, ut se quoque ipsum spiritualibus exercitiis, & interna cum Deo vacatione pascat. Famem quippe ipse & inedia sustinebit, si, se neglecto atque esuriente, de aliorum tantum pabulo sollicitus sit. Qua in re non animantium modo, sed arborum etiam & terrarum quoque ingenium atque naturam imitabitur. Arbores enim, quae uno anno uberrimos proventus ferunt, sequenti anno a solito ferendi fructus labore feriantur: fertiles etiam agri, qui copiosam uno anno messem tulerunt, sequenti, quo se reficiant, a solito cultu vacare permittuntur. Si ergo terra, cuius proprium est, fructus germinare, hac alterna quiete indiget; quanto magis spiritus noster, qui aliunde quam a natura vires haurit, eadem laboris & quietis vicissitudine indigebit, ne videlicet exhaustus deficiat, si se totum aliis, cura sui prorsus abiecta, permiserit?

Ceterum, quoniam tantum in me auctoritatis non est, ut mihi fides adhiberi debeat, sanctissimi viri Bernardi, qui non tam humano studio, quam divino haustu atque magisterio, divina tractavit, hac de re sententiam proferam. Is igitur ad Eugenium pontificem maximum sic scribit: (b) „au-
 „ di ergo quid redarguam, quid suadeam. Si quod vivis
 „ & sapias, totum das actioni, considerationi nihil; laudo
 „ te, in hoc non laudo. Puto quod & nemo qui a Salomo-
 „ ne audierit: (c) *qui minoratur actu, percipiet sapientiam.*
 „ Cer-

(a) Lib. III. de ira, cap. 6. (b) Lib. I. de considerat. c. 5. (c) Eccli. 38.

„ Certe nec ipsi actioni expedit , consideratione non prae-
 „ veniri. Si item totus vis esse omnium , instar illius , qui (a)
 „ omnibus omnia factus est ; laudo humanitatem , sed si ple-
 „ na sit. Quo modo autem plena , te excluso ? Et tu homo
 „ es : ergo ut integra sit & plena humanitas , colligat & te
 „ intra se sinus , qui omnes recipit. Alioqui quid tibi prod-
 „ est , iuxta verbum Domini , (b) si universos lucreris , te
 „ unum perdens ? Quam ob rem quum omnes habeant , esto
 „ etiam tu ex habentibus unus. Quid solus fraudaris mune-
 „ re tui ? Usquequo (c) spiritus vadens , & non rediens ? Us-
 „ quequo non recipis te & ipse inter alios vice tua ? (d) Sa-
 „ pientibus & insipientibus debitor es ; & soli negas te ti-
 „ bi ? Stultus & sapiens , servus & liber , dives & pauper ,
 „ vir & femina , senex & iuvenis , clericus & laicus , iustus
 „ & impius , omnes pariter participant te , omnes de fonte
 „ publico bibunt pectore tuo ; & tu seorsum sitiens sta-
 „ bis ? Si maledictus , qui partem suam facit deteriorem ;
 „ quid ille , qui se penitus reddit expertem ? Sane deriven-
 „ tur aquae tuae in plateas , homines , & iumenta , & pe-
 „ cora bibant ex eis , quin & camelis pueri Abrahae potum
 „ tribuas : sed inter ceteros bibe & tu de fonte putei tui. *A-*
 „ *lienus* , inquit , *non bibat ex eo*. Numquid tu alienus ? Cui
 „ non alienus , si tibi es ? „ Haec omnia ad verbum ex D.
 Bernardo : cuius ego sententiae nihil habeo quod adiacere
 possim ; quum satis superque id , quod volumus , a sanctissi-
 mo viro explicatum sit.

Quarto vero loco his , quae haecenus diximus , illud
 adiiciendum puto , ut qui hoc divinum munus aggredi con-
 stituit , diligenter attendat , quo spiritu atque animi de-
 stinatione ad hoc veniat. Hoc est , videat , an per ostium in
 ovile ovium ingrediatur , an aliunde ascendat. Ostium vero
 vel flagrans verae caritatis studium , vel maiorum obedientia
 est. Nemo quippe ad hunc hororis gradum ascendere de-
 bet , nisi vocatus a Deo tamquam Aaron. Recte enim Apo-
 stolus : (e) quo modo , inquit , praedicabunt , nisi mittan-
 tur ? Mitti vero est , a Deo ad hoc opus destinari. Neque

Dd 3

ve-

(a) 1. Corin. 9. (b) Matth. 16. (c) Psalm. 77. (d) Rom. 1.
 (e) Rom. 10.

vero satis est, ut opus ipsum ex natura sua pium atque sanctum sit, ut illud protinus adoriri quisque debeat, nisi pares oneri vires habeat: hoc est, nisi his virtutum ornamentis, quae modo commemoravimus, instructus sit. Tunc autem ad hoc officium aditus obedientia est, quae nihil deliberare, nihil discutere tenetur: quum ad hanc virtutem, non imperata examinare, sed diligenter exsequi, pertineat. Sed ne hic quidem securitatis tantum est, ut in utramque autem dormire liceat. Nam & Saül (a) ex imperio Domini regni curam suscepit, quam ipse, quaesitis etiam latebris, fugere voluit: eum tamen videmus in obedientiae quoque portu gravissimum vitio suo (b) fecisse naufragium. Sic etiam non pauci munus hoc ex maiorum imperio obeunt: qui, muneris ipsius occasione elati, aut popularis favoris auram captant, & ad plausum populi concionantur, aut ex aliorum laudibus & praedicatione inaniter efferuntur: ita fit, ut qui spiritu coeperunt, carne consumantur. Ceterum si, quam multis modis in hac parte peccetur, & in quanto salutis discrimine multi versentur, quantumque ii boni operis specie decipiantur, explicare dicendo vellem; nullus esset dolorum & querelarum finis. Quocirca consultius esse duxi, rem tantam silentio praeterire, quam leviter ac tenuiter eandem attingere. Haecenus de concionatoris persona, & vitae integritate diximus: nunc, quod paullo ante polliciti sumus, aggrediamur.

CAP. XII.

QVAE SINT, QVAE AD CONCIONATORIS
officium recte exsequendum praecipue iuvant.

QUoniam multa in his libris ad concionatoris munus utiliter exsequendum necessaria explicuimus, quae vix quisquam ante oculos habere omnia possit, erit sane operae pretium, pauca quaedam seligere, quae in hoc opere praecipua sunt, quaeque ambitu suo ea fere omnia,
 quae

(a) 1. Reg. 10. (b) 1. Reg. 13.

quae diximus, complectuntur. Horum autem primum, & maximum, & aliorum paene omnium causa, caelestis spiritus est: quo sane plenus erat ille, qui dicebat: (a) ego autem repletus sum fortitudine spiritus Domini, iudicio, & virtute, ut annuntiem Iacob scelus suum, & Israël peccatum suum.

Hic autem spiritus vitae integritatem atque sanctitatem donat, hic concionatoris pectus ardore caritatis inflamat, hic flagrantissimam fraternae salutis sitim accendit, hic maestissimum pereuntium animarum dolorem excitat, hic assiduas pro illis preces ad Dominum fundere compellit: quae omnia evangelico concionatori necessaria esse diximus. Qua de re sic D. Bernardus: (b) „ illius doni, „ storis libenter audio vocem, qui non sibi plausum, sed „ mihi planctum moveat. Vere turturem exhibes, si ge- „ mere doceas: & si persuadere vis, gemendo id magis, „ quam declamando, studeas, oportebit. „ Verum quoniam hac de re multa in primo huius operis libro dicta sunt; in praesentia hoc solum asseveranter affirmare audeo, plus hunc caelestem spiritum ad bene dicendum, quam omnia rhetorum praecepta, in unum congesta, iuvare. Quum autem hoc Dei donum, & clarissimum quidem donum, sit; continuis precibus ab eo flagitandum est, qui (c) dat spiritum bonum petentibus se. Nemo enim arte & simulatione huius divini Spiritus vim exprimere se posse confidat. Recte enim Fabius: (d) „ prodit, inquit, se, quamlibet „ custodiatur, simulatio: nec umquam tanta fuerit elo- „ quendi facultas, ut non titubet ac haereat, quoties „ ab animo verba dissentiant. „

Secundo loco, post divini Spiritus gratiam, cui primas partes tribuimus, pronuntiandi facultas est; quae, incredibile dictu est, quantum in dicendo dominetur: de qua, quum tam multa dicta sint, nihil est quod hoc in loco dicere amplius debeamus.

Tertio vero loco verborum copia paranda est: quam

Dd 4

ni-

(a) *Mich. 3.* (b) *Sup. Cant. Serm. 19.* (c) *Luc. 11.* (d) *In-
stitut. lib. XII. cap. 1.*

nisi multa eorum librorum lectione, qui patria lingua, quae in concionibus utimur, scripti sunt, nullo modo sibi quisquam perfecte comparare poterit. Quae res quam sit concionatori necessaria, causis redditis explicandum est. Constat igitur, summam eloquentiae in hoc sitam esse, ut dignitati rerum par sermo tribuatur: hoc est, ut unamquamque rem tantam dicendo faciamus, quanta est; ne sermo rerum pondere & dignitate sit inferior. Sicut igitur umbra corpus; ita sermo naturam rerum sequi, & cum ea cohaerere debet. Ad hoc autem praestandum duo sunt necessaria: alterum, ut eas res, de quibus dicturi sumus, totamque earum vim atque naturam pro dignitate concipiamus; alterum vero, ut hoc ipsum, quod mente concepimus, verborum atque orationis ministerio plenissime declaremus, ipsamque mentem nostram in auditorum animos quodam modo transmittamus. Hoc autem quam sit difficile praestare, exposito inter modum loquendi angelorum & hominum discrimine, intelligi poterit.

Angeli enim, praesertim qui superioris ordinis sunt, quemadmodum per pauciores species plura intelligunt, ita brevissima temporis mora conceptus suos aliis patefaciunt. Ceterum, quod ad homines attinet, adeo angusta intellectus humani vena est, ut & longiori mora ad plura intelligenda, multisque verbis ad ea explicanda egeat. Itaque angeli, ut vasa oris latissimi, quidquid intra se habent, momento temporis effundunt: hominum vero mens, & lingua, mentis interpret, ut vasa oris angusti, guttatim, ut ita dixerim, & longo temporis spatio unius rei naturam multis verbis exprimunt. Ad hoc igitur efficiendum, ubi res ipsas perfecte conceperimus, multa verborum supellex in promptu habenda est; ut necesse non sit, dicentem ad singulos animi conceptus haerere, & velut ostiatim mendicare, quonam modo illos afferre debeat. Nec multitudo solum verborum tumultuaria atque promiscua, sed selectissima eorum copia paranda est, quae significantissime & appositissime mentem nostram exprimant. Alia enim verba apertius, alia ornatius, alia significantius rerum na-

ture

turam explicant. Sed illud adhuc difficilius, ut verba rebus accommodentur. Alia enim verba rebus laetis, alia tristibus, alia grandibus, alia atrocibus serviunt. Atrocibus namque verba ipsa atrocia & auditu aspera conveniunt.

Ad hanc ergo idoneorum verborum copiam velut in procinctu habendam, opus est, ut diximus, multa eorum librorum lectione, qui ornatissime patrio sermone scripserunt. Nec satis est, multa tumultuarie & properanter legere, nisi diligenter & eius linguae phrasas, & idiomatica, & verba omnia, quae vel tropo aliquo a propria significatione deflexa sunt, vel quae significantissime aut aptissime rem exprimunt, observemus. Praecipueque insignes metaphorae & allegoriae adnotandae: quae, quoniam unico aut paucis verbis similitudinem quamdam comprehendunt, incredibile dictu est, quantam orationi gratiam addant, quantumque ad res ipsas non modo explicandas & ornandas, sed multo magis ad amplificandas & augendas valeant: quando res magnas, quarum tamen magnitudinem non assequimur, rerum maximarum translatis nominibus explicamus: ut quum, verbi gratia, daemonem appellamus leonem, draconem, serpentem antiquum, generis humani hostem, principem tenebrarum, truculentam bestiam, &c. Qua de causa libri psalmorum & prophetarum, metaphoris & allegoriis ubique latent.

Harum ergo insignium metaphorarum magnam vim sibi Ecclesiastes comparandam assidua lectione curabit. Quibus tamen prudenter ac sobrie uti debet: ut videlicet neque metaphora sit nimium frequens, nec dura, aut sordida, aut obscura; quales quaedam sunt ex philosophiae penetralibus excerptae: ac multo minus, humilis; quales sunt, quae ex rebus vilibus & sordidis sumuntur. Nec longius etiam progrediatur, ut multi faciunt, qui accepta semel metaphora recedere nesciunt. Quo fit, ut quum multa & varia eodem quasi habitu vestire nitantur, multa duxiter, improprie, & parum verecunde dicant. Nam oratio magna ex parte proprio sermone constare debet.

Lu.

Iuvabit autem memoriam haec eadem in libris, subiectis virgulis, aut signis aliquot, adnotare: ut quum eadem relegimus, horum admonitu signorum, ibidem pedem figamus; & memoriae atque imitationi, quod adnotavimus, commendemus.

Nec troporum gratiam solum, sed insignes quoque figuras, tam verborum, quam sententiarum, de quibus in superiori libro diximus, & quidquid postremo artis est, adnotare legendo debemus. Sic enim fiet, ut artis praecepta, variis exemplis renovata, tenacius memoriae haereant, & velut ante oculos habeantur, atque dicenti se se vel non quaesita offerant. Qui vero diligentiores in hac parte sunt, insignia loca, quae legentes observarunt, in albeolo, ad hoc parato, scribunt; ut frequenti lectione ad eorum imitationem, quae selegerunt, promptiores fiant. Quod cum alias, tum praecipue quum concionaturi sunt, facere debent; ut hac diligentia, verborum copia illis facile suppetat.

§. I.

CVius vero utilitatis huiusmodi lectio sit, vel ex eo patet, quod quum tria sint, quae eloquentiam pariant, nempe ars, imitatio, & exercitatio; lectio ad imitationem pertinet, quae nobis ante oculos ponit, quid in dicendo sequi & imitari debeamus. Sed operae pretium erit, haec ipsa, quae diximus, Fabii auctoritate non solum comprobare, sed uberius etiam explicare. Is igitur, quam sit dicenti verborum copia necessaria, & quonam modo paranda sit, ostendit his verbis.

(a) „ Haec eloquendi praecepta sicut cognitioni sunt
 „ necessaria, ita non satis ad vim dicendi valent, nisi illis
 „ firma quaedam facilitas, quae apud Graecos *éxis* (*id est*
 „ *habitus*) nominatur, accesserit: quam scribendo plus,
 „ an legendo, an dicendo consequamur, solere quaeri
 „ scio. Quod esset diligentius nobis examinandum, si qua-
 „ li-

(a) *Quintil. instit. lib. X. cap. 1. in principio.*

„libet earum rerum possemus una esse contenti. Verum
„ita sunt inter se connexa & indiscreta omnia, ut si quid
„ex his defuerit, frustra sit in ceteris laboratum. Nam ne-
„que solida atque robusta fuerit umquam eloquentia, ni-
„si multo sti'o vires acceperit: & citra lectionis exem-
„plum labor ille, carens rectore, fluit. Qui autem scierit,
„quo sint quaeque modo dicenda, nisi tamquam in pro-
„cinctu paratam quidem ad omnes casus habuerit eloquen-
„tiam, velut clausis thesauris incubabit.

Et mox: „num ergo dubium est, quin ei velut opes
„sint quaedam parandae, quibus uti, ubicumque desidera-
„tum erit, possit? Eae constant copia rerum ac verborum.
„Sed res propriae sunt cuiusque causae, aut paucis com-
„munes: verba in universas paranda: quae si rebus sin-
„gulis essent singula, minorem curam postularent: nam
„cuncta se se cum ipsis protinus rebus offerrent. Sed quum
„aliis sint alia aut magis propria, aut magis ornata, aut
„plus efficientia, aut melius sonantia; debent esse non so-
„lum nota omnia, sed in promptu, atque, ut ita dicam,
„in conspectu: ut quum se iudicio dicentis ostenderint,
„facilis ex his optimorum sit electio. Equidem scio, quos-
„dam collecta, quae idem significarent, vocabula, soli-
„tos ediscere, quo facilius & occurreret unum ex pluri-
„bus, & quum essent usi aliquo, si breve intra spatium
„rursus desideraretur, effugiendae repetitionis gratia su-
„merent aliud, quo idem intelligi posset: quod cum
„est puerile, & cuiusdam infelicitis operae, tum etiam uti-
„le parum: turbam enim modo congregat, ex qua sine
„discrimine occupet proximum quodque. Nobis autem
„copia cum iudicio paranda est, vim orandi, non cir-
„culatoriam volubilitatem, spectantibus. Id autem conse-
„quemur, optima legendo atque audiendo. Non solum
„enim nomina ipsa rerum cognoscemus hac cura, sed cui
„quodque loco sit aptissimum: omnibus enim fere ver-
„bis, praeter pauca, quae sunt parum verecunda, in oratio-
„ne locus est.

Et paullo post: „omnia verba, exceptis de quibus
di-

„ dixi , sunt alicubi optima : nam & humilibus interim &
 „ vulgaribus est opus , & quae cultiore in parte viden-
 „ tur sordida , ubi res poscit , proprie dicuntur. Haec ut
 „ sciamus , atque eorum non significationem modo , sed
 „ formas etiam mensurasque norimus , ut ubicumque
 „ erunt posita , convenient ; nisi multa lectione atque
 „ auditione assequi nullo modo possumus , quum omnem
 „ sermonem auribus primum accipiamus. Propter quod
 „ infantes a mutis nutricibus iussu regum in solitudine
 „ educati , etiamsi verba quaedam emisisse traduntur , ta-
 „ men loquendi facultate caruerunt. Sunt autem alia huius
 „ naturae , ut idem pluribus vocibus declarent , ita ut
 „ nihil significationis , quo potius utaris , intersit , ut en-
 „ sis & gladius : alia , quae etiamsi propria rerum ali-
 „ quarum sint nomina , *tropicos* tamen ad eundem intel-
 „ lectum feruntur , ut ferrum & mucro. Nam per abusio-
 „ nem sicarios etiam omnes vocamus , qui eadem telo quo-
 „ cumque commiserint : alia circuitu verborum plurium
 „ ostendimus , quale est : (a)

..... & *pressi copia laetis.*

„ Plurima vero mutatione figuramus : scio , non ignoro :
 „ & , non me fugit , non me praeterit : & , quis nescit ?
 „ Nemini dubium est. Sed etiam ex proximo mutuari li-
 „ cet : nam & intelligo , & sentio , & video saepe idem
 „ valent , quod scio. Quorum nobis ubertatem ac divitias
 „ dabit lectio , ut his , non solum quo modo occurrerint ,
 „ sed etiam quo modo oportet , utamur. Non semper
 „ enim haec inter se idem faciunt , nec sicut de intelle-
 „ ctu animi recte dixerim , *video* , ita de visu oculorum ,
 „ *intelligo.* „

Deinde vero , quum legendo & audiendo verborum
 copia paretur , lectionem auditioni idem Fabius anteponit
 his verbis : (b) „ in lectione certius iudicium , quod audien-
 „ ti frequenter aut suus cuique favor , aut ille laudantium
 „ clamor extorquet. Pudet enim dissentire , & velut ta-
 „ cita quadam verecundia inhibemur plus nobis credere :
 „ „ quum

(a) *Virg. Ael. I. v. 81.* (b) *Loco cit. paucis interiectis.*

„ quum & interim vitiosa pluribus placeant, & a corro-
 „ gatis laudentur etiam, quae non placent: sed e contra-
 „ rio quoque accidit, ut optime dictis gratiam prava iu-
 „ dicia non referant. Lectio libera est, nec actionis im-
 „ petu transcurrit, sed repetere saepius licet, siue dubi-
 „ tes, siue memoriae penitus affigere velis. Repetamus
 „ autem & tractemus, & ut cibos mansos ac prope
 „ liquefactos demittimus, quo facilius digerantur; ita
 „ lectio non cruda, sed multa iteratione mollita &
 „ velut confecta, memoriae, imitationique tradatur: ac
 „ diu non nisi optimus quisque, & qui credentem sibi
 „ minime fallat, legendus est: sed diligenter, ac paene
 „ ad scribendi sollicitudinem: nec per partes modo scru-
 „ tanda omnia, sed perlectus liber utique ex integro
 „ resumendus, praecipueque oratio, cuius virtutes fre-
 „ quenter ex industria quoque occultantur. „ Haec omnia
 ad verbum ex Fabio.

§. II.

NVnc, quas utilitates ex verborum copia concionator
 sit assequuturus, paucis absolvam. Primum quisquis
 copiosam idoneorum verborum suppellectilem sibi compa-
 raverit; animi sui sensus plenissime atque significantis-
 sime, quod eloquentiae maxime proprium est, explica-
 bit. Quum enim, ut philosophi docent, ea, quae sunt
 in voce, sint earum, quae in anima sunt, passionum no-
 tae; qui his vocibus abundaverit, easque velut ad ma-
 num assidua lectione habuerit, facilius, & brevius, & si-
 gnificantius animi sui sensum exprimet. Deinde etiam mi-
 nori studio atque labore concionem adornabit. Facile
 enim qui verborum dives est, mentem suam vel dicen-
 do, vel scribendo poterit explicare: qui secundus atque
 praecipuus, post rerum inventionem, labor est. Postre-
 mo hic idem verborum apparatus hoc etiam praestat, ut a
 metu & trepidatione, qua concionatorum multi labo-
 rant, magna ex parte liberi simus. Hic autem metus duo
 gra-

gravissima incommoda parit, quae totam paene vim dicendi exhauriunt. Primum enim mentem dicenti eripit, quae, timoris magnitudine oppressa, non satis providet, neque quid dicere, neque quo modo dicere debeat. Hoc autem quid aliud est, quam sopito gubernatori clavum in tempestate committere? Mens enim orationis clavum moderari, & quae dicenda sunt, excogitare debet; ne lingua mentem, sed mens linguam praecurrat: quae tamen, metu urgente obruta, magna ex parte acumine suo & luce destituitur, atque ita aegre admodum, quae dicenda sunt, providet. Idem etiam metus, ut initio (a) diximus, pronuntiationi obstat, quae maximam in dicente libertatem, atque, ut ita dixerim, dominium requirit: ut homo sui compos, eodem temporis spatio, & quid dicat, & quae vocis figura & varietate dicat, prudenter attendat. Hanc autem in dicendo libertatem plenius assequitur, cui verborum copia suppetit. Haec enim praestat, ut in quavis periodo, vel temere etiam coepta, exitum tandem sine ullo erroris aut haesitationis dedecore, verborum copia suffragante, invenire valeas. Quae res magna ex parte dicenti timorem adimit, quum sciat, facile sibi paratum ad omnia offendicula remedium. Quocirca non negligenter curanda ea res est, quae tot nobis ad dicendum adiumenta praebet.

Nemo tamen arbitretur, hanc verborum copiam ideo parari, ut multis nominibus idem significantibus rem eandem, quod quidam nimis inepte faciunt, exprimamus. Hoc enim, nisi in loco fiat, inanissimum & vana ostentatione plenum est: ideoque nihil magis verae eloquentiae contrarium. Neque etiam hoc quaerimus, ut, a communi sermone recedentes, selectissimis verbis semper utamur. Hoc enim & curiositatis, & vanitatis, & affectatae eloquentiae significationem dat: & ita fidem dicenti abrogat. In quid ergo hanc verborum copiam paramus? Sane ut & breviter, & facile, & quod caput est, significantissime animi nostri sensum, ut paullo ante (b) diximus, exprimamus:

(a) *Cap. 7. pag. 389.* (b) *Lib. V. cap. 20. §. II. pag. 354. seq.*

mus : idque sine ulla sermonis aut improprietate , aut rusticitate. Ille autem verborum & orationis ornatus maxime probandus est , qui res ipsas sequitur : ut sermonis elegantia non aliunde adscita , sed cum rebus ipsis nata videatur. Immo verbum omne inusitatum , quodque aliquam artis suspicionem prae se ferat , non aliter , quam scopulum in navigando , fugiendum esse moneo. Indignissimum quippe cordatis auditoribus videtur , ubi tam magna rerum momenta versantur , de verbis magis , quam de rebus , esse sollicitum. Qua de re multa iam in superioris libri initio (a) ex Fabii sententia diximus.

Haec tam longa oratione prosequutus sum , quod , multis experimentis edoctus , quantum facultas haec utilitatis ad bene dicendum afferat , intellexi. Non ignoro tamen , aliquos citra hanc operam , immo vero citra ullum artis studium , ornatissime dicere ; atque ii praesertim , qui frequenti usu concionandi copiosam verborum segetem sibi compararunt : sed hi tamen , ut Fabius ait , excellentis naturae atque ingenii sui imitatores habent paucos , negligentiae vero quam plurimos. In hoc igitur arti operam damus , ut qui tam egregiam dicendi facultatem a natura non accepimus , artis beneficio consequamur : & quod illis praeclara indoles ingenii dedit , nobis ars & industria conferat. Nam & illi ipsi , qui a natura ad bene dicendum ficti & compositi sunt , multo uberius & ornatus id fecissent , si naturam arte atque disciplina iuvissent.

Sed quoniam eorum librorum lectionem , qui patria lingua scripti sunt , ad parandam verborum copiam conferre diximus ; meminerit studiosus concionator , eloquentiam non in verbis tantum , sed multo magis in sententiis esse. Quod indicant non modo figurae sententiarum , de quibus in superiori libro (b) disseruimus , sed etiam variae amplificandi , probandi , narrandi , describendi , & exordiendi rationes , quas in ceteris libris exposuimus : quae

(a) Cap. 1. pag. 233. seq. (b) Cap. 12. seqq. a pag. 249.

quae non tam verbis, quam sententiis, constant. Ut autem his quoque virtutibus oratio nostra excolatur, alios nobis auctores ad imitandum proponere debemus, nempe Cyprianum, Chrysostomum, Basilium, Gregorium Nazianzenum, atque Nisenum, Magni Basilii fratrem, ceterosque similes patres; in quibus elegantissima oratoriae facultatis exempla reperiemus. Vtrique igitur auctores studiose legendi, ut ex illorum lectione verborum copiam comparare, horum vero ceteras eloquentiae virtutes referre atque imitari possimus. Sic enim fiet, ut his exemplis adiuti, apte atque ornate dicere valeamus. Recte enim Fabius: (a) „ omnis, inquit, vitae ratio sic con-
 „ stat, ut quae probamus in aliis, facere ipsi velimus.
 „ Sic litterarum ductus, ut scribendi fiat usus, pueri se-
 „ quuntur: sic musici vocem docentium, pictores opera
 „ priorum; rustici probatam experimento culturam in ex-
 „ emplum intuentur. Omnis denique disciplinae initia
 „ ad propositum sibi praescriptum formari videmus. Et
 „ hercle necesse est, aut similes aut dissimiles bonis si-
 „ mus. Similem raro natura praestat, frequenter imita-
 „ tio. „ Haec Fabius.

§. III.

VLtimo loco illud admonendum est, artis praecepta atque horum auctorum lectionem, sine stilo & exercitatione scribendi, quod ad eloquendi rationem attinet, exigui admodum fructus esse. Haec enim duo priora ad hoc postremum ceu ad finem destinata sunt: quo sublato, necesse est, illa frustra esse. Quin & illa ipsa plurimum scribendi usu & exercitatione iuvantur. Qua in re illud evenire videmus, quod philosophi aiunt, nempe causas sibi invicem esse causas, hoc est, mutuis se auxiliis iuvare. Constat enim, artis praecepta, & bonorum auctorum lectionem, magnopere ad usum scribendi atque dicendi conferre. Nam & ars dux est, quae dicendi rationem ordi-

nem-

(a) *Instit. lib. X. cap. 2. sub init.*

nemque describit : & lectio , praeterquamquod artis praecpta confirmat , idoneorum verborum copiam suppeditat , & veluti exemplar nobis ante oculos ponit , quod scribentes intueri & referre possimus. Contra vero stilus ipse , praeterquamquod exercitatione ipsa facultatem dicendi parat , quid scribenti potissimum desit , hoc est , quibus praecipue verborum aut sententiarum ornamentis destitutus sit , re ipsa experitur. Quo fit , ut multo attentius atque diligentius se in bonorum auctorum lectione & artis observatione gerat , ut inopiae suae , lectionis opibus , consulere valeat.

Qua ex re liquido apparet , verum esse , quod dici solet , optimum dicendi magistrum esse stilum ; ideoque illum Fabius commendat his verbis : (a) „ ut laboris , sic utilitatis „ etiam longe plurimum affert stilus. Nec immerito M. Tullius (b) hunc optimum effectorem ac magistrum dicendi „ vocat... Scribendum ergo quam diligentissime , & quam „ plurimum. Nam ut terra , altius effossa , generandis alendisque seminibus fecundior est ; sic profectus non a summo petitus , studiorum fructus & fundit uberius , & fidelius continet. Nam sine hac quidem conscientia , ipsa illa „ ex tempore dicendi facultas inanem modo loquacitatem „ dabit , & verba in labris nascentia. Illic radices , illic fundamenta sunt. Illic opes velut sanctiore quodam aerario reconditae , unde ad subitos quoque casus , quum res exiger , proferantur. Vires faciamus ante omnia , quae sufficiant „ labori certaminum , & usu non exauriantur. Nihil enim „ rerum ipsa natura voluit magnum effici cito , propositaque pulcherrimo cuique operi difficultatem ; quae „ nascendi quoque hanc fecerit legem , ut maiora animalia diutius visceribus parentum continerentur. „ Haec-nus Fabius.

Quamvis autem multa sint argumentorum genera , in quibus eloquentiae candidatus stilum exercere valeat ; nulla tamen in re utilius exerceri poterit , quam in aliquot sanctorum patrum elegantissimis scriptis patria lingua vertendis.

Ec

dis:

(a) *Instit. lib. X. cap. 3. sub init.* (b) *Lib. I. de orat. cap. 33.*

§. IV.

Quartum inter haec locum inventioni damus: quae licet prima natura sit, quia tamen in eloquendo materiae vicem obtinet, quae eloquutionis atque pronuntiationis virtutibus, ceu formis quibusdam, ut ante (a) diximus, excolenda & velut informanda est, posteriorem illi locum dedimus. Nec hoc mirum videri debet, quum passim cernere liceat, praeclara quorundam concionatorum inventa, si eloquutionis & actionis gratia destituantur, auditoribus parum grata, ideoque minus utilia esse: vulgaria vero, & quotidiana paene consuetudine detrita, si his virtutibus illustrentur, ab eisdem maxime probari. Inventionis autem prima virtus est electio: quam, ut Fabius ait, (b) multi ab inventione tamquam novam orationis partem secreverunt: tantum in illa momenti esse putabant. Ad eam vero pertinet, ut non vulgaribus inventis contenti simus, sed optima, & ad id, quod efficere volumus, accommodata, eligamus. Sunt enim humilia quorundam ingenia, qui, res insigniores praetereuntes, aut earum vim minime assequentes, vulgarissima quaeque & rudibus etiam pervia consectantur. Qua in re vis ingenii & acumen maxime desideratur: quod faciat, ut, instar periti aurificis, prudenter metallorum valorem & dignitatem expendamus, & purum ab adulterino auro discernamus.

Sunt autem multi, qui ingeniorum suorum inventa, quamlibet rudia sint, philautia, communi generis humani morbo, decepti, plusquam par est, diligant: parentum more, qui liberos suos, quamvis deformes, & amore suo dignissimos, & pulcherrimos iudicant. A quo morbo qui immunis fuerit, multo rectius de inventis poterit iudicare. Quamvis non desint alii, qui adeo longe ab hoc affectu absint, ut nihil illis suum placeat. Vtrumque autem vitium; & omnia sua amare, & nihil. Et nescio, inquit Fabius, (c) *utros peccare validius putem: an eos, quibus omnia sua placent, an*

Ee 2

qui-

(a) In praefat. operis. (b) *Instit. lib. III. c. 3.* (c) *Instit. lib. I. c. 3.*

quibus nihil suum placet. Praeclara autem inventa, & selectae sententiae, hoc etiam praestant, quod dicentis animum splendore & dignitate sua afficiunt: qui sic affectus, facile & commodissima verba, & dicendi figuras rei accommodas eligit, quibus, quod ipse animo concepit, enuntiet. Quid quod hic ipse affectus non modo facultatem ad eloquendum, sed vim etiam atque animum ad agendum confert; ut quem ipse affectum animo conceperit, in animos auditorum ipsa actionis vi atque calore transfundat? Quo modo ergo philosophi dicunt, formas rerum corporearum ex materiae sinu & potentia educi; ita plane ex praeclara aliqua & insigni sententia duplex in dicendo forma, eloquutionis videlicet & actionis, educitur.

Altera vero inventionis virtus est, ea potissimum dicenda eligere, quae & argumenti natura, & auditorum conditio & necessitas postulat. Ex his autem duobus apte dicendi ratio praecipue sumitur: quamvis diligentius auditorum, quam argumentorum, cura habenda sit, ad quorum institutionem, tamquam ad scopum, tota oratio dirigenda est. Quod multi non attendentes, &, quid argumenti natura exigat, solum perspicientes; longius in ea re, quam pro auditorum commoditate, progressi, eisdem paene vacuos inanisque relinquunt. Sic non nulli, Pharisaeorum adversus Dominum calumnias & odium persequentes, quum multa se se illis loca ex evangelica historia in eandem sententiam offerant; ea omnia congerere & accumulare student, in eaque re vel totam, vel maximam concionis partem, auditorum institutione neglecta, insumunt. Tales autem, velut in ipso itinere positi, & rerum, quae in via se se offerunt, specie capti, quo tenderent, obliti sunt. Omnia enim, quae dicimus, ad bonos mores instituendos, & malos revellendos, conferenda esse constar. Id ergo solum dicendum est, & tantum in eo immorandum, quantum ad hunc finem conducatur. Itaque ut fabri signarii & caementarii ad amulum omnia expendunt, quae moliuntur; neque quidquam probant, quod vel parum ab ea deflectitur: sic Ecclesiastes hanc semper ante oculos sive amulum sive scopum proponat;

nat ; neque quidquam , quamlibet novum , aut subtile , aut auribus populi gratum , ad se pertinere putet , quod ad hoc institutum non pertineat. Alias prodicionis se reum existimet, si , causam Christi & animarum agens , rem suam magis, quam Chr isti , curet ; suiue magis, quam salutis animarum, rationem habeat.

Ad hanc autem observationem spectat , ut pro auditorum varietate sermo dicentis accommodetur. Qua de re sic D. Gregorius : (a) „ ut , inquit , longe ante nos reveren-
 „ dae memoriae Gregorius Nazianzenus edocuit , non una
 „ eademque cunctis exhortatio congruit : quia nec cunctos
 „ par morum qualitas adstringit. Saepe namque aliis offi-
 „ ciunt , quae aliis profunt : ... quia & plerumque herbae,
 „ quae haec animalia enutrient , alia occidunt ; & levis si-
 „ bilus equos mitigat , & catulos instigat ; & medicamen-
 „ tum , quod hunc morbum imminuit , alteri vires iungit ;
 „ & panis , qui vitam fortium roborat , parvulorum necat.
 „ Pro qualitate igitur audientium , formari debet sermo
 „ doctorum , ut & sua singulis congruant , & tamen a com-
 „ munis aedificationis arte numquam recedat. „ Idemque
 rursus in eodem libro de hac virtute sit ait : „ lingua no-
 „ stra bonis fomentum sit , pravis aculeus : tumidos retun-
 „ dat , iratos mitiget , pigros exacuat , desides hortatu suc-
 „ cendat , refugientibus suadeat , asperis blandiatur , despe-
 „ ratos consoletur : ut qui doctores dicimur , viam salutis
 „ gradientibus ostendamus. „

Vt autem Ecclesiastes haec ipsa commode praestare va-
 leat , diligenter mores hominum , apud quos dicit , & pu-
 blica item vitia , quae maxime in populo grassantur , per-
 specta atque etiam in chartis descripta habere debet , co-
 rumdemque vitiorum medicamenta & remedia : ut ad haec
 ipsa omnis eius oratio dirigatur , & quocumque in dicendo
 eum vis argumenti rapuerit , meminerit , ad haec illi rursus
 esse redeundum : frustra enim dici videtur , quidquid extra
 hunc finem vagatur.

Hoc autem vel maxime praestare solent , qui ita se huic

Ec 3

of-

(a) In *Past.* parte III. in prol.

officio dediderunt , ut in eos fidelis operarii nomen , quo illos Dominus in evangelio (a) appellavit , cadere merito possit. Hi namque non modo concionibus frequenter habendis , sed etiam quotidianis poenitentium confessionibus audiendis , salutis animarum continenter incumbunt. In his autem non modo communes hominum mores , & vana studia , & communia scelera quotidie addiscunt ; sed etiam , quod maius est , iustam animo indignationem , piamque malorum compassionem adversus ea concipiunt. Quo fit , ut maiore adversus illa impetu & ardore declament. Quin etiam , quae sint vera & salutaria vitiorum remedia , hoc eodem opere assequuntur ; quando de huiusmodi morborum medicamentis quotidie tractare & cogitare coguntur. Nec communia solum vitia , quae in populo grassantur , sed perversas etiam de rebus opiniones , & sophisticas atque apparentes rationes , quibus ad ea rapiuntur , ibidem addiscunt , & adversus illas gravissimarum rationum praesidia comparant. Est apud nos insignis quidam concionator , cuius hoc vel praecipuum studium est , vulgares atque fallaces perditorum hominum opiniones atque sententias , quibus ipsi vitia sua tuentur , acerrimis rationibus confutare atque proscindere. Quum enim omne vitium error aliquis in intellectu , aut prava aliqua persuasio antecedit ; consultissimum est , securim ad radicem apponere , ut (b) omnis plantatio , quam non plantavit pater caelestis , radicitus evellatur. Harum autem sive opinionum , sive vitiorum cognitio facit , ut & aptissime dicamus , & attentiores etiam auditores habeamus : quandoquidem attentius ea homines audiunt , quae ad se maxime pertinere intelligunt.

Quae autem cautio in huiusmodi vitiis carpendis adhibenda sit , ne pro salutaribus pharmacis venena , aut alicuius gravis offensionis materiam , populo praebeamus ; concionatoris prudentiae relinquo. Illud autem admonendum esse duxi , ne facile delatoribus fidem habeat , quum aut praefectorum aut praelatorum suorum mores accusant. Sae-

pe

(a) *Luc. 12.* (b) *Matth. 13.*

pe namque hi, vel levibus causis inducti, vel privatis affectibus incitati, falsa in illos crimina intendunt; quibus concionatores fidem adhibentes, ea statim in concionibus, sine ullo gravi delationis testimonio aut examine, criminantur: qua quidem re non levem contra se maiorum suorum indignationem atque invidiam conflant; & non modo apud illos doctrinae fructum, sed fidem etiam, amittunt. Quocirca nullibi magis, quam in aliquarum personarum vitiis perstringendis, concionatoris prudentia desideratur: ne vel dicenda fileat, vel non dicenda temere effutiat.

Dissimili autem ratione, sed non minori fortasse incommodo, peccant, qui dictis & facietis populum ad risum movent. Hi namque in se ipsos iniurii sunt, quandoquidem sibi in dicendo fidem abrogant: quum nemo credat, illos ex animo a vitiis detertere, qui hac ratione aures demulcere, & plausum atque risum populi captare student. Hinc D. Hieronymus, illum Isaïae locum explanans, (a) *popule meus qui te beatum dicunt, ipsi te seducunt*, sic ait: (b) ille est doctor ecclesiasticus, qui lacrimas, non risum, movet, qui corripit peccatores, qui nullum beatum, nullum dicit esse felicem. Et ad Nepotianum: (c) docente te, inquit, in ecclesia, non clamor populi, sed gemitus, suscitetur: lacrimae auditorum laudes tuae sint.

Illud etiam concionator admonendus est, ut nimium subtilia, & quae populi captum excedunt, silentio premat: frustra enim dicitur, quod non intelligitur. Qui vero contra faciunt, magis se ipsos venditare, quam populum docere, student. Hinc D. Gregorius, locum illum beati Iob exponens: (d) *super ipsos stillabat eloquium meum*, sic ait: (e) debet praedicator inspicere, ne plus praedicet, quam ab audiente capi possit: ne, dum parvis sublimia & non profutura iungit, se magis curet ostendere, quam auditoribus prodesse.

Ultimo loco illud adiiciendum, haec ipsa, quae diximus, sine pertinaci studio atque labore, non ita multum

Ee 4

iu-

(a) *Isai. 3.* (b) *Comment. in Isai. lib. II.* (c) *Epist. II.* (d) *Iob 49.* (e) *Lib. XX. Moral. cap. 2. non ad litteram.*

iuvare. Non enim hic vulgarem ac trivialem concionatorem, sed singularem maximeque hominibus salutarem instituimus. Quod si Cicero (a) nullam iudicat eloquentiam, quae admirationem non habeat, quum in illa ethnicorum eloquentia vix quidquam aliud praeter verba & eloquutionis ornamenta sint, quae admirationem commoveant: quid de christiana eloquentia sentiendum est, quae tota in altissimis admirandisque caelestis philosophiae sacramentis explicandis versatur, quaeque non tam verborum, quam rerum, pondere & maiestate mentes hominum in admirationem rapit? Quanta ergo evangelici concionatoris ignominia erit, si suspensos non teneat auditorum animos, qui non tam verba splendida, quam admiranda mysteria, illis ante oculos ponit? Ad hanc igitur tantam laudem non inerti otio atque segnitie, sed pertinaci studio atque labore, pervenitur. Nam & multa & varia in omni vita legisse opus est, & multo labore ac studio unaquaqueque concio apparanda est.

Hoc enim studio se Demosthenes ad dicendum componebat. Vnde de eius orationibus vulgo dicebatur, quod lucernam olerent; eius videlicet in apparanda oratione vigilias hoc verbo notantes. Quod quidem vulgi testimonium ipse confirmavit, qui distitare solebat, (b) moleste se ferre, si quis fabrorum ferrariorum, aut aliorum opificum, antelucanas eius vigilias antevertisset. Idemque rogatus, qua ratione tantam eloquentiae vim comparasset: plus, inquit, olei, quam vini, absumendo. Hoc igitur studio ac labore id assequutus est, ut cum inter Graecos oratores locum assequeretur, quem inter latinos Cicero: quin & is, ut Fabius ait, (c) Ciceronem ipsum, quantus est, fecit. In quem Ciceronem, ut D. Hieronymus in epistola quadam scribit, (d) pulcherrimum illud exstat elogium: Demosthenes tibi praecepit, ne esses primus orator; tu illi, ne esset solus. Vtrumque autem flagrantissimus humanae gloriae ardor ad hanc dicendi facultatem magno labore parandam excitavit. Nobis vero non licet hoc affectu atque animo huic studio

(a) *In fragm. epist. ad Brutum.* (b) *Apud Cic. Tuscul. quaest. lib. III. cap. 19.* (c) *Instit. lib. X. cap. 1. versus fin.* (d) *Ad Nepotianum, epist. II.*

dio incumbere, quibus lege prohibitum est, (a) ne offeramus Domino sacrificium igne alieno. Quocirca ignem illum, quem super Apostolos Dominus (b) misit, assiduis ab eo precibus postulare debemus, ut ardentissimo eius gloriae, & fraternae salutis amore incensi, nihil non faciamus, nullumque studiorum laborem recusemus, quo multorum animas salutis nostrae auctori Christo lucrifaciamus. Multa quippe lectione, multa meditatione atque agitatione animi, multaque cura & studio opus est, ut egregiam concionem, rebus & verbis instructissimam, parare valeamus. Quod quidem studium gravi molestia non caret, quum eadem saepe repetere, & memoriae mandare necesse sit: quae res fastidio & molestia non caret; quam tamen flagrans in Christum caritas superare debet.

Neque vero quisquam satis se ad concionandum instructum putet, si praeclaras insignis alicuius viri conciones apud se retineat. Nemo enim munus hoc tractare pro dignitate poterit, nisi, quae aliunde congersit, ita cum animo suo verset ac volvat, ut ex alienis, multarum rerum adiectione, tractandique ratione, sua quodam modo faciat: ut videlicet non aliunde adscita, sed domi suae nata videantur: quod non levis operae atque negotii est. Quo autem is, quem imitari studet, in hac dicendi facultate praestantior est, eo est difficilius humili ingenio sublimia aptare. Hoc enim perinde est, ac si quis aurea Saislis arma exiguo Davidis corpori accommodare velit. Haec sunt igitur, quae studiosus concionator providere ante omnia debet, quo fideliter munus suum administrare valeat. Reliqua paucis expediemus.

CAP.

(a) *Hebrator. 9.* (b) *Act. 1.*

*QVA RATIONE ECCLESIASTES CONCIONEM
adornare debeat.*

HIS ita constitutis, quoniam modo Ecclesiastes concionem adornare & scribere debeat, breviter indicandum est. Meminisse igitur ad hoc oportet, ex quinque rhetoricae partibus, quas in II. huius operis libro (a) numeravimus, tres esse ad scribendum necessarias, inventionem, dispositionem, & eloquutionem. Primus ergo labor est, invenire quid dicas. Hanc autem inventionem dabit primum quidem parata ante facultas & sententiarum thesaurus: deinde inveniendi ars, de qua in superioribus libris differuimus: tum praeterea diligens & studiosa lectio, quae praesenti labore inventionis opes augere solet. Sed quoniam de inveniendi ratione modo diximus, nihil hic addere opus est, nisi hoc solum, quod Ecclesiastes pium mentis affectum, quatenus fieri possit, huic praesenti lectioni adiungat: ut quem ipse pium affectum intra se legendo conceperit, in auditorum animos dicendo transmittat. Si quid autem inter legendum offenderit, quod ipsum magis afficiat; ibi pedem figat, & cum animo suo verset atque retractet, nec oblatam pii affectus occasionem vacuum abire sinat. Ea vero omnia, quae vel legendo, vel meditando invenerit, brevissime in chartula describat: quo videlicet in prospectu cuncta, quae invenerit, habeat; ut commodiora ex illis eligere, & in ordinem redigere possit.

Post inventionem, proxima dispositionis cura est. Vbi enim ex tumultuaria illa rerum congerie & veluti silva aptissime elegerit, ea in ordinem disponere & suis in locis collocare necesse est. Quod ita facere debet, ut nihil in sententiis aut scripturarum testimoniis afferendis detortum, nihil sit violentum; sed omnia suis in locis apte collocentur, & velut ad numerum cadant: ut non aliunde ad-

(a) Cap. I. pagg. 43. & 44.

adscita , sed cum rebus ipsis nata videantur. Quam rem D. Chrysostomus diligentissime observare solet. Hanc autem orationis partem prudentia maxime & iudicio constare , auctor est (a) Cicero. Quae vero arte tradi possunt , in III. huius operis libro exposuimus : ad quem locum studiosum concionatorem remittimus.

Vbi vero inventa disposuerimus , postremus ac maximus eloquutionis labor sequitur : quae est velut ultima inventionis forma. Prior enim forma est dispositio , quae velut corporis ossa , iuncturis distincta , suis locis aptat : posterior vero eloquutio est , quae , ut suo loco diximus , carnem , & sanguinem , & colorem suum ac speciem ossibus ac nervis addit. Huius autem eloquutionis velut parens quaedam cogitatio est , a qua omnis eloquutionis vis ornatusque procedit. Vt enim pictores quam imaginem effingere volunt , mente prius concipiunt , cuius exemplar manus sequitur : sic concionator res primum concipere pro dignitate debet , ut deinde calamus propositi exemplaris ductum ordinemque sequatur. Qua quidem similitudine intelligimus , talia esse , quae proposito exemplari fiunt , quale exemplar ipsum est. Quid enim ex depravato exemplari , nisi depravatum opus , consequi potest ? Quo fit , ut quisquis res optime conceperit , sit etiam eas optime dicturus. Verissime enim dictum est : (b) si rem potenter conceperis , nec facundia dicendi , nec sermo te deseret ullus. Haec ergo cogitationi se totum Ecclesiastes tradat. Haec enim , ut Fabius ait , (c) „ paucis admodum horis magnas etiam causas complectitur. Haec quoties intermissus est somnus , ipsis noctis tenebris adiuvatur. Haec inter medios rerum actus „ aliquid invenit vacui , nec otium patitur. Neque vero rerum „ ordinem modo , quod ipsum satis erat , intra se ipsa „ disponit ; sed verba etiam copulat , totamque ita contexit „ ora-

(a) *De orat. lib. II. cap. 76.* (b) *Ita , non tamen ad litteram , Horatius in arte poet. v. 40. & 41. Eius haec sunt verba :*

..... Cui lecta potenter erit res ,

Nec facundia deseret hunc , nec lucidus ordo.

(c) *Instit. lib. X. cap. VI. sub initium.*

„ orationem , ut ei nihil praeter manum desit. Nam memoria quoque plerumque inhaeret fidelius , quod nulla scribendi securitate laxatur. „ Haftenus Fabius.

Ad hanc igitur cogitationem , & tempora & loca idonea captanda sunt. Tempus autem vel antelucanum , vel nocturnum , quum nec familia perstrepat , nec tumultus ullus partem nobis mentis eripit , commodissimum est. Loci quoque solitudo & obscuritas aciem mentis ad cogitandum efficit clariorem. Sacer vero locus , & is in primis in quo sacra eucharistia adservatur , super omnes alios aptissimus est. Sacramentalis enim Christi Domini praesentia miro modo pii hominis mentem & componit , & afficit , & ad salutaria atque utilia magis , quam curiosa & subtilia , cogitanda inducit. Hoc tamen admonendum , ut quum primum ea , quae paravimus , cogitare cum animo nostro coeperimus , ab iis praecipue cogitandi initium faciamus , quae animum nostrum maxime , quum legerentur , commoverunt , quaeque auditoribus maxime salutaria esse intelleximus. Haec namque facile pectus nostrum , ut ante fecerunt , incendunt : quo affectu incensa mens ad reliqua ab initio usque ad finem cogitanda magis apta erit. In hac autem cogitatione danda nobis opera est , ut quoties argumentationem aliquam fuerimus persequuti , aut mysterium aliquod explicaverimus , ad officii nostri scopum , hoc est , ad christianae vitae institutionem , aut pium animorum motum , haec ipsa , quae diximus , quatenus fieri possit , convertamus. Illa etiam , quae grandis figurae materiam esse in superiori libro (a) diximus , ubi locus postulaverit , tractanda erunt. Haec enim ad flectendos auditorum animos potentissima sunt. Flectere autem , esse inter tria concionatoris officia praecipuum , ex D. Augustini sententia superius (b) diximus. Ad hoc autem orationis cursum assidue vertere , & utilissimum , & laudatissimum , & cordatis auditoribus populoque gratissimum est : quum omnibus fere , natura docente , persuasum sit , concionatoris officium ad christianae vitae institutionem , & morum correctionem institutum esse.

Hanc

(a) Cap. 19. pag. 348. seqq. (b) Pag. 326.

Hanc porro cogitationem stilus deinde feliciter & facile sequetur. Vt enim D. Hieronymus ait, *quae bene scimus, bene & loquimur*. Ea autem bene scimus, quae diu multumque cum animo nostro retractavimus, in eisque penetrandis aciem mentis infiximus. Ea initio quidem, quamdiu stilus formatus non est, expediet sane totam concionem patria lingua ad verbum scribere: quamquam hic non nihil periculi est, nisi diligenter pronuntiandi leges attendamus, ne omnia uno vocis tenore pronuntiemus: ut ii faciunt, qui ea, quae memoria complexi sunt, recitare solent. Vbi vero stilus ipse assidua exercitatione vires collegerit, tunc scribendi laborem moderari oportebit. Quae enim plana atque facilia sunt, breviter, sive latino, sive patrio sermone, scribenda erunt. Poterit enim ea ex tempore concionator commode explicare. Loca vero difficiliora oportebit eo modo scribere, quo dicenda sunt. In quo genere ponimus membra illa, atque comparia, quibus D. Cyprianus frequentissime & elegantissime utitur, qualia sunt illa: (a) „ evangelica „ praecepta, fratres dilectissimi, nihil sunt aliud, quam „ magisteria divina, fundamenta aedificandae spei, firmamenta corroborandae fidei, nutrimenta fovendi cordis, „ gubernacula dirigendi itineris, praesidia obtinendae salutis: quae dum dociles credentium mentes in terris instruunt, ad caelestia regna perducunt. „ Idemque rursus ad Donatum: (b) „ tenacibus semper illecebris necesse est, ut „ solebat, vinolentia invitet, inflat superbia, iracundia inflammet, rapacitas inquietet, crudelitas stimulet, ambitio delectet, libido praecipitet. „ Haecenus ille. Huiusmodi ergo orationes, si quando inciderint, incidere autem aliquando, quoniam sunt venustissimae, debent, prius quidem ad verbum scribendae, & memoriae etiam, ne nos sermo destituat, fideliter sunt commendandae.

CAP.

(a) *His verbis incipit sermo, seu liber, de oratione dominica.* (b) *Epist. I. olim II. sub initium.*

**QVO MODO ECCLESIASTES PRAEPARARE
animum suum debeat, quando concionem habi-
turus est.**

VT huic institutioni nostrae finem apponamus, illud etiam scribendum esse iudicavi, quoniam modo ecclesiastes praeparare animum suum debeat, quum iam iam concionaturus est. Vt enim disciplina venatoribus est, accipitres ad invadendam praedam inaeda praeparare: ita nos ad hanc spirituales animarum venationem, de qua Dominus apud Ieremiam (a) meminit, compositis animi affectibus praeparari debemus. Ad hoc autem primum est, ut ea nocte, quae concionis diem antecedit, in oratione perseveremus, suppliciter illum obsecrantes, qui sapientiae auctor & gubernator est: in cuius manu sumus & nos, & sermones nostri: illum, inquam, qui (b) linguas infantium disertus facit, ut feliciter sermonis nostri cursum ad nominis sui gloriam dirigat, & nobis quidem puritatem intentionis, auditoribus autem proficiendi studium clementer impertiatur. Novi piissimum quemdam concionatorem, qui non modo fusis lacrimis, sed caeso etiam verberibus corpore, haec ipsa a Domino postulabat. Sequenti vero die sacra dominici corporis & sanguinis mysteria, quanta poterit animi submissione atque devotione, celebret: deque operam, ut devotionis calorem, quem ex sacra celebratione Domino adspirante conceperit, secum ad suggestum deferat. Plurimum enim hoc ipsum ad bene dicendum iuvabit.

Vbi vero suggestum conscenderit, priusquam dicendi initium faciat, quae dicturus est, omnia ad communis Domini gloriam, & animarum salutem dirigat; suppliciterque ab eodem misericordiae parente poscat, ut nihil ante oculos suos, nisi sola eius gloria, obversetur. Indignissimum enim est, ubi tam magna rerum momenta versantur, ubi
Deus

(a) Ierem. 6. (b) Sap. 10.

Deus ipse, cuius causa agitur, praesens adest, ad inanem popularis aurae plausum, posthabito mundi iudice Deo, oculos deflectere. Hac igitur parte Ecclesiastes (a) Armeniae, inclitae feminae, fidem atque pudorem imitari studeat; quae, a Cyri convivio domum rediens, Cyri pulchritudinem omnibus laudantibus, interrogata a viro, quid de Cyri dignitate sentiret, ait: a te, mi vir, oculos numquam deflexi; itaque, qualis alieni viri forma sit, prorsus ignoro. Si igitur femina haec, praesente viro, ne in Cyrum quidem, & regem, & forma praestantem, oculos conicere ausa est; quis ferat, praesente saeculorum rege, ad inanes vulgi rumusculos mentem convertere? Et quoniam saepe hostis antiquus velut ex insidiis occupatum concionatorem adoritur, dum inter dicendum latenter vanas ingerit cogitationes; ipse, antequam dicere incipiat, quidquid dicenti sibi vanitatis obreperit, initio adiuret atque detestetur, Deoque mentem suam puram castamque exhibeat. Quod ut praestare rectius valeat, Christum Dominum ad iudicium, sanctorum millibus stipatum, venientem, seque ante illum tumulo conditum in adverso pariete cogitatione depingat, ut hinc superni iudicis timor, inde mortis paullo post futurae metus, concionatoris mentem a periculosissimo & occultissimo inanis gloriae flatu incolumem servet, quae, ut D. Bernardus ait, leviter quidem volat, leviterque penetrat, sed non leve vulnus ingerit.

Vt autem & alacrius, & purius munus suum aggrediat, mirabilem eius fructum atque utilitatem, quam in primo huius operis libro (b) exposuimus, ad mentem revocet: quam novo hoc exemplo utcumque explicare tentabo. Fingamus, esse principem aliquem, pietate & virtute praestantem; eundemque non solum opibus, sed etiam misericordia, & benignitate divitem; qui inter cetera virtutum insignia, hoc etiam habeat, ut septimo quoque die mille pauperes in domum suam convocet, certamque pecuniae summam in uniuscuiusque sinu ad inopis vitae sustentationem condar. Quis non hunc principem summis laudibus efferret?

Quis

(a) *Apud Franc. Patric. Senens. de instit. reip. lib. III. tit. 5. in fine.*
 (b) *Cap. 2. pag. 3. seqq.*

Quis non hoc opus & Deo, pauperum amatori, gratissimum, & principi maxime salutare esse non videat? Si hoc igitur opus eximiis laudibus dignissimum est, quibus, quaeso, laudibus pii concionatoris opus dignum putabimus, qui omnibus diebus dominicis, proposita ante se frequenti hominum turba, non pecuniam, perituris corporibus profuturam, sed animabus spiritualem alimoniam, vitae pabulum, & salutis aeternae poculum subministrat? Vnico enim vocis ministerio omnes adstantium animas reficit, erudit, consolatur, & illuminat: & ita illuminat, ut quum ad omnes doctrinae lumen pertingat, non minus unicuique luceat, quam si solus ille hoc beneficio fueretur.

Hoc etiam tempore duo illi, antequam dicere incipiat, providenda sunt, eloquutio, & pronuntiatio: hoc est, quonam modo animi sui sensa verbis explicare, & qua vocis figura eadem pronuntiare debeat. Ad illud autem hoc praecipue spectat, ne lingua mentem praecurrat, ne verba in labris tantum nascantur, sed ab imo pectore cum iudicio progrediantur. Vt enim musices periti mente prius dictant, quod manus pulsando exsequitur; mens enim magistra, manus vero ministra obsequens est: ita vir eloquens sollicito & prudenti iudicio providet, quae deinceps lingua prolatura est. Qua ex re liquet, quam libera ab omni metu & perturbatione mens esse debeat, quae uno atque eodem temporis spatio sermonis velocitatem, & linguae volubilitatem antevertere, & regere, & actionem etiam moderari debet. Alioqui nisi dicendi magistra mens omnia praeveniat, nihil neque prudenter dici, neque apte pronuntiaripotest. Qua de causa concionis exordia, quamdiu dicentis animus non incaluit, submissa, & intervallis longioribus distincta esse debent, quo ad providenda, quae dicimus, datur aliqua cogitationi mora. Paullatim enim animus dicendo incalescet, quo tempore facilius omnia se se dicenti offerent. Hic enim mentis ardor, si rectorem habeat, magnus dicendi magister est.

Maius autem est moderandae actionis negotium. Eloquutio enim antecedenti labore ac studio iuvatur: at pronun-

nuntiatio tota praesentis temporis est. Ex universa autem illa pronuntiandi ratione, quam superius (a) tradidimus, haec sibi tunc ante oculos ponat. Primum quidem frequentissima illa aequalitatis & inaequalitatis viria, quae ibidem (b) perstrinximus, fugiat. Deinde vero curet, ut distincte, apte, atque ornate, quae dicenda sunt, pronuntiet. His enim virtutibus tota recte pronuntiandi facultas continetur. Sic enim fiet, ut pronuntiatio, quemadmodum eloquutio, emendata, dilucida, apta, & ornata sit. Et quidem distincte dicimus, quum intervallis suis orationis partes, & membra, articulosque distinguimus. Apte vero, quum & sententiis & verbis suam vocis figuram & corporis gestum accommodamus: quam rem paullo ante (c) copiose tractavimus. Ornate vero pronuntiamus, quum damus operam, ut vocem ipsam cum naturali quadam suavitate fundamus, quae videlicet nulla asperitate auditorum aures laedat, quas si non demulceat, certe non exasperet. Hoc autem praestare facilius poterunt, qui clara & suavi voce a natura donati sunt, si hanc in pronuntiando curam non neglexerint. Vocis autem acrimonia non semper, sed quum res postulat, utendum est: quae, ne languescat oratio, non infrequens esse debet. Quia in re impetus hic & ardor animi, ut ante (d) diximus, sic regendus & moderandus est, ne arteriae laedantur, & vox incondita quadam & insuavi asperitate aures offendat. Haec igitur praecipuas agendi virtutes Ecclesiastes in prospectu semper habeat. Quas ut uno simplici intuitu contempletur, non erit inutile, si forte insignem aliquem aetatis suae concionatorem audierit, aut quemvis alium, citra concionem, hac pronuntiandi virtute praestantem, eum sibi ante oculos ponat, immo & eius effigiem in adverso pariete depingat. Sic enim fiet, ut, sola hac imagine ante oculos posita, tota pronuntiandi ratio, quae multis, ut ante vidimus, praeceptis constat, hoc uno intuitu sibi offeratur. Quod si duos etiam, variis inter se dicendi pronuntiandique virtutibus insignes, audierit, eos etiam ante se simili ratione statuatur; ut multae virtutes, multaque agendi

Ff

prae-

(a) Pag. 372. seqq. (b) Pag. 389. (c) Pag. 377. seqq. (d) Pag. 390.

praecepta, sub hac specie se se illi obiiciant.

Illud autem providere diligentissime debet, ut quum dicit, totamque vim cogitationis ad bene dicendum confert, partem etiam cogitationis pronuntiationi tribuat. Dantur enim in intervallis morulae quaedam, in quibus, citra eloquentionis iacturam, hoc etiam provideri possit. Mens enim, quae magno divinitatis beneficio mortalibus data est, tantam habet vim, ut eodem temporis spatio, & quid dicere, & quo modo dicere, & quemadmodum rebus, quas dicit, vocis figuram, & corporis gestum accommodet, animadvertere possit. Si enim ea recte prius fuerit instituta, haec omnia providere ita potest, ut prima illa dicendi cura alias non excludat.

P E R O R A T I O .

HAEC habui, candide lector, quae de ratione concionandi dicerem, plura, quae mihi se se ingerebant, dicturus, si per alias occupationes & impedimenta licuisset. Sed haec tamen, ut arbitror, studioso concionatori satis erunt, ut cetera ipse per se invenire atque observare queat. Vere enim a Salomone dictum est: (a) da sapienti occasionem, & addetur ei sapientia. Audio etiam, insignes aliquot viros hac nostra aetate praeclara volumina de concionandi ratione edidisse, quae nondum ad manus meas pervenerunt: quae moneo diligenter evolvi. Sic enim fiet, ut haec divina facultas, multorum inventis & accessionibus aucta, numeris omnibus absoluta sit. Hac enim ratione disciplinas omnes crevisse, & ad perfectionis culmen pervenisse, Aristoteles (b) auctor est. Multorum autem inventa atque observationes ad concionandi officium esse necessarias, officii huius excellentia declarat: cuius nescias aestimare, maior ne utilitas, an difficultas sit. Quam rem insignium concionatorum raritas, quam in omnibus saeculis aetatibusque videmus, non obscure declarat. Nec maior olim oratorum copia, quam saeculo nostro insignium concionatorum fuit.

Ipse

(a) *Prov. 9.* (b) *Erbic. lib. I. cap. 7.*

Ipse enim eloquentiae parens Cicero in primo de oratore libro (a) plurimos & philosophos, & mathematicos, & iurisperitos, & musicos, & poetas, & belli duces, in sua quosque facultate praestantissimos, in sola urbe Roma fuisse memorat: quum tamen singulis aetatibus vix singulos tolerabiles oratores exstitisse dicat. Cuius rei causam esse docet multiplicem rerum omnium scientiam, variasque ingenii, & naturae dotes, quae ad orandi munus feliciter obeundum requiruntur; inter quas pronuntiandi, & agendi gratiam numerat; quae sola ipsa, ut idem ait, (b) quanta sit histrionum levis ars & scena, declarat: in qua, quum omnes in oris & vocis & motus moderatione elaborent, quis ignorat, quam pauci sint, fuerintque, quos animo aequo spectare possimus? Haec igitur omnia ad perfectam huius muneris functionem ita requiruntur, ut si unum aliquod eorum desit, facultas dicendi mutila & manca; si vero sola pronuntiatio nis gratia desit, nulla futura sit. Deest enim instrumentum & organum, quod animi nostri sensus atque conceptus ad auditorum aures commode perferat. Quum sint autem tres praecipue concionatoris partes, inventio, eloquutio, & pronuntiatio, & de inveniendi ratione multi multa dixerint; nos omissas ab aliis partes, eloquutionem, & pronuntiacionem, copiosius persequi volumus; quod hae, ab aliis neglectae, ad concionandum maxime necessariae sint. Boni ergo candidus lector operam nostram consulat: quae si parum utilis visa fuerit, hoc tamen praestabit, quod eruditorum ingenia ad utiliora & meliora invenienda exacuet; quod abunde magnum laboris nostri praemium existimavimus.

*EXPLICIT ECCLESIASTICAE RHETORICAE,
sive de ratione concionandi, liber.*



INDEX I.

EXHIBENS

LIBROS, CAPITA, PARAGRAPHOS.



LIBER PRIMVS.

- C**AP. I. De Rhetoricae artis origine. pag. 1.
- II. De Rhetoricae artis utilitate, & necessitate. 3.
- §. I. Quid de huius artis utilitate Fabius dicat. 6.
- II. Eius commendatio ex M. P. Augustino. 10.
- III. Obiectionibus occurritur. 12.
- C**AP. III. De concionandi officio, & insigni eius dignitate. 14.
- IV. De huius muneris difficultate. 16.
- V. De puritate & rectitudine intentionis in Ecclesiae. 19.
- VI. De probitate, & moribus concionatoris. 23.
- VII. De studio caritatis in Ecclesiae. 28.
- VIII. De studio S. orationis, & meditationis, quod in Ecclesiae esse debet. 37.

LIBER SECVNDVS.

- C**AP. I. Quid sit Rhetorica, quae eius materia, officium & finis, & quae sint eius partes. 41.
- II. Quo modo Rhetorica a Dialectica differat. 45.
- III. Orationem omnem in triplici genere versari, ex-

expositione , argumentatione , aut amplificatione: **49.**

CAP. IV. Divisio quaestionis. **50.**

V. De locis , unde argumenta ducuntur , quibus praecipue infinita quaestio tractatur. **52.**

VI. De duobus aliis argumentorum fontibus , nempe genere rei , & eius contrariis. **59.**

VII. Necessariam esse concionatori absolutam earum rerum scientiam , de quibus est dicturus , quo supra dictis locis uti possit. **61.**

VIII. De locis ex circumstantiis rerum & personarum. **65.**

IX. De formis argumentorum. **72.**

§. **L.** De inductione. **ibid.**

II. Syllogismus , sive ratiocinatio. **73.**

III. Complexio , sive dilemma. **77.**

IV. Sores. **78.**

V. Enumeratio , sive expeditio. **79.**

VI. Subiectio. **ibid.**

CAP. X. De collectione , & eius partibus. **80.**

§. **L.** De exornatione. **82.**

CAP. XI. De affectibus per totum corpus argumentationis , atque adeo per totam orationem , adspersendis. **86.**

XII. De accommodatione , sive ad singularia descensu. **91.**

§. **L.** Quid efficere debeat concionator , ubi suggestum conscenderit. **96.**

CAP. XIII. De sententiis , & epiphonematum ornamentis. **99.**

§. **L.** De epiphonemate. **103.**

CAP. XIV. De prolepsi , quae latine praesumptio vel anticipatio dicitur. **107.**

XV. De eloquutionis genere , quo argumentationes supra positae tractandae sunt. **113.**

LIBER TERTIVS.

- C**AP. I. Quid amplificatio ab argumentatione differat. 116.
- II. A partibus amplificatio. 118.
- III. Ab adiunctis : hoc est , antecedentibus , comitantibus , & consequentibus. 121.
- IV. A causis rerum amplificatio. 125.
- § I. Ab effectibus amplificatio. 127.
- II. De amplificatione a communibus locis , & circumstantiis simul. ibid.
- C A P.** V. De modis amplificandi ex Quintiliano. 130.
- VI. De rerum descriptionibus. 139.
- §. I. Descriptionum exempla. 143.
- II. Sermocinationum in descriptionibus usus. 149.
- CAP.** VII. De personarum descriptionibus. 152.
- VIII. De sermocinatione. 156.
- IX. De conformatione. 160.
- X. De affectibus in communi. 166.
- XI. De affectibus in specie. 170.
- §. I. De commiserationis affectu. 175.
- CAP.** XII. De figuris eloquutionis , quae affectibus concitandis deserviunt. 177.

LIBER QVARTVS.

- C**AP. I. De sex orationis partibus. 185.
- §. I. De exordio. 187.
- II. De narratione. ibid.
- III. De propositione & partitione. 195.
- IV. De confirmatione & confutatione. 197.
- V. De confutatione. 198.
- VI. De conclusione , seu peroratione. ibid.
- C A P.** II. De modo concionandi in genere suaforio. 203.
- §. I. 203.

§. I. Quid singulare ecclesiastes oratori addat. 208.

C A P. III. De secundo concionandi modo in genere demonstrativo , qui sanctorum festis & laudibus deservit. 210.

§. I. Qualiter SS. martyrum virtutes amplificandi sint. 214.

C A P. IV. Tertius concionandi modus , qui lectionis evangelicae enarrationem continet. 219.

V. Quartus concionandi modus ex superioribus mixtus. 224.

VI. De genere concionandi didascalico. 228.

VII. De dispositione. 229.

LIBER QVINTVS.

Praefatio. 232.

C A P. I. De eloquutionis commendatione , & qualitate , ex Fabii libro VIII. 233.

II. De quattuor eloquutionis virtutibus , ac primo de latinitate. 236.

III. De secunda eloquutionis virtute nempe perspicuitate. 237.

IV. De tertia eloquutionis virtute , quae in ornatu posita est. 240.

V. De ornatu , qui est in verbis singulis. 241.

VI. De tropis. 242.

VII. De ornatu , qui est in verbis coniunctis , ac primum de figuris. 254.

VIII. Prima classis de figuris verborum , quae eiusdem verbi repetitione constant. 261.

§. I. Conversio. ibid.

II. Complexio. 262.

III. Traduxio. 263.

IV. Gradatio. 265.

C A P. IX. Secunda classis de figuris , quae verborum simili-

	litudine constant.	266.
	§. I. Similiter cadens , similiter desinens.	267.
	II. Agnominatio.	268.
CAP. X.	Tertia classis de figuris verborum , quae contrariis nominibus aut rebus constant.	ibid.
	§. I. Cohabitatio.	270.
	II. Paradiaστοle.	ibid.
	III. Contrarium in sententiis.	272.
	IV. Contentio.	ibid.
	V. Commutatio.	273.
CAP. XI.	Quarta classis de reliquis verborum figuris.	274.
	§. I. Adiunctio.	ibid.
	II. Disiunctio.	275.
	III. Distributio.	ibid.
	IV. Interpretatio.	276.
	V. Congeries , vel synathrismus.	278.
CAP. XII.	De figuris sententiarum , ac primum de his , quae ad docendum magis pertinere videntur.	279.
XIII.	Prima classis de figuris sententiarum , quae maxime ad docendum pertinent.	280.
	§. I. Definitio.	ibid.
	II. Divisio.	281.
	III. Subiectio.	282.
	IV. Distributio.	283.
	V. Ratiocinatio.	285.
	VI. Diminutio.	287.
	VII. Commoratio.	ibid.
	VIII. Frequentatio.	288.
	IX. Brevitas.	289.
CAP. XIV.	Secunda classis de figuris sententiarum , quae maiorem vim & acrimoniam habent.	ibid.
	§. I. Interrogatio.	ibid.
	II. Occupatio.	291.
	III. Praecisio.	ibid.
	IV. Emphasis.	292.
	V. Dubitatio.	293.
	§. VI.	

LIBROS , CAPITA , PARAGRAPHOS. 457

§. VI. Concessio.	<u>294.</u>
VII. Adhortatio.	<u>295.</u>
VIII. Sustainatio.	<u>296.</u>
IX. Ironia.	<u>297.</u>
X. Exemplum.	<u>299.</u>
XI. De contentione demonstrativa, quae ad exemplorum ordinem spectat.	<u>302.</u>
XII. Similitudo.	<u>304.</u>
CAP. XV. De usu figurarum.	<u>310.</u>
XVI. De compositione.	<u>312.</u>
§. I. De compositione generatim.	ibid.
II. De duplici specie compositionis.	<u>314.</u>
CAP. XVII. De apte dicendo.	<u>319.</u>
§. I. Cuiusmodi eloquutionem varia genera causarum, variaque concionatoris officia exigant.	<u>324.</u>
II. De tribus eloquendi generibus, & quibus potissimum ornamentis unumquodque eorum constet.	<u>328.</u>
CAP. XVIII. Quibus in rebus his tribus dicendi figuris siue generibus uti debeamus, ex D. Augustini sententia lib. III. de doctrina christiana.	<u>331.</u>
XIX. De grandiloqui generis materia.	<u>348.</u>
XX. De aliis ornatus virtutibus, ac in primis de energia, quae latine evidentia dicitur.	<u>352.</u>
§. I. Dinosis.	<u>354.</u>
II. De copia.	ibid.
III. De orationis varietate.	<u>356.</u>
CAP. XXI. De vitiis eloquutioni, ac praecipue ornatui appositis.	<u>358.</u>

LIBER SEXTVS.

P. Praefatio.	<u>364.</u>
CAP. I. Pronuntiationis necessitas, & commendatio.	<u>366.</u>
CAP.	

- C A P. II. In quem finem sive scopum omnia huius partis praecepta referenda sint. 370.
- III. Quattuor esse praecipuas pronuntiationis virtutes, quarum prima est, ut sit emmendata, hoc est, ut careat omni vitio. 372.
 §. I. Secunda pronuntiationis virtus, ut sit dilucida. 373.
 II. Tertia pronuntiationis virtus, ut sit ornata. 375.
- C A P. IV. Quarta pronuntiationis virtus, ut sit apta. 377.
- V. Cuiusmodi pronuntiatio tribus praecipuis orationis partibus, hoc est, expositioni, argumentationi, & amplificationi conveniat. 380.
 §. I. Qualis esse debeat exordii & narrationis actio. 381.
- C A P. VI. De gestu & motu corporis. 385.
- VII. De vitiis pronuntiationis & actionis. 388.
 §. I. Gestus vitia. 392.
- C A P. VIII. De varia pronuntiandi ratione in sententiis. 395.
- IX. Varia sententiarum exempla, e sanctis litteris excerpta. 397.
- X. Exempla quaedam, e litteris sanctis desumpta, in quorum pronuntiatione rudes huius officii exerceri valeant. 409.
- XI. Qualis perfecti concionatoris vita esse, & quo potissimum tempore, quoque temperamento, & quo affectu concionandi munus exercere debeat. 415.
- XII. Quae sint, quae ad concionatoris officium recte exsequendum praecipue iuvant. 422.
 §. I. De copia verborum. 426.
 II. Copiae utilitas. 429.
 III. Stili exercendi ratio & utilitas. 432.
 IV. Inventionis virtutes, & variae admonitiones. 435.
- CAP.

CAP. XIII. Qua ratione Ecclesiastes concionem adornare
debeat.

XIV. Quo modo Ecclesiastes praeparare animum
suum debeat, quando concionem habiturus
est.


Peroratio operis.

442.


446.

150.

EXPLICIT INDEX **I**



IN-



INDEX II.

EXHIBENS

SACRAE SCRIPTURAE LOCA.



VETVS TESTAMENTVM.

<i>Genesis.</i>		<i>Deuteronomium.</i>	
C A P.	<u>I. pag. 314.</u>	C A P.	<u>III. 137.</u>
	<u>II. 172.</u>		<u>V. 411.</u>
	<u>IX. 338.</u>		<u>X. 206.</u>
	<u>XIV. 339.</u>		<u>XXVIII. 207.</u>
	<u>XVI. 333.</u>		<u>XXX. 206. 405.</u>
	<u>XXI. 333.</u>		<u>XXXII. 31. 88. 172.</u>
	<u>XXII. 118.</u>		<u>177. 182. 329.</u>
	<u>XXVII. 399.</u>		<u>350. 384. 385.</u>
	<u>XXX. 29.</u>		<u>398. 401. 405.</u>
	<u>XXXIX. 207.</u>		<i>Iudices.</i>
	<i>Exodus.</i>	C A P.	<u>VI. 339.</u>
C A P.	<u>XII. 193.</u>		<i>Regum L.</i>
	<u>XVI. 220.</u>	C A P.	<u>X. 422.</u>
	<u>XX. 411.</u>		<u>XIII. 422.</u>
	<u>XV. 87.</u>		<u>XVII. 137.</u>
	<u>XXXIII. 171.</u>		<u>XXV. 403.</u>
	<i>Leviticus.</i>		<i>Regum II.</i>
C A P.	<u>XII. 192.</u>	C A P.	<u>L. 401. 405.</u>
	<i>Numeri.</i>		<u>XI. 118.</u>
C A P.	<u>XI. 339.</u>		<u>XIII. 293.</u>
	<u>XIX. 192. 193.</u>		<u>XIX. 119. 403.</u>
	<u>XXXVI. 182.</u>		<u>XX. 253.</u>

Re-

Regum III.

C A P.	I.	85.
	X.	215.
	XVIII.	403.

Regum IV.

C A P.	IV.	19. 194.
	V.	206.

Iob.

C A P.	III.	183. 399.
	VII.	400.
	XII.	416.
	XIV.	182.
	XIX. 110.	182. 405.
	XXVI.	17.
	XXIX.	439.
	XXXI.	92. 150. 151.

Psalmi.

C A P.	I.	418.
	II.	92.
	VI.	292. 401.
	VIII.	131.
	XII.	400.
	XV.	93.
	XVII.	119.
	XIX.	399.
	XXII.	292. 402.
	XXVI.	172.
	XXXIII.	399.
	XL.	399.
	XLIII.	337.
	XLIV.	27. 215.
	XLIX.	28. 171. 409.
	LIV.	182.
	LXVIII.	29. 183. 296.
	LXXI.	38.
	LXXVII.	421.
	LXXXIV.	179.

Psalmi.

C A P.	XCIII.	184.
	XCV.	179. 245.
	XCVII.	179. 245.
	CI.	122.
	CIX.	339.
	CXIII.	185.
	CXVIII.	29. 416. 417.

Proverbia.

C A P.	I.	158. 163. 403.
	II.	97.
	V.	406.
	VI.	97. 403.
	VII.	158.
	VIII.	162.
	IX.	450.
	X.	100.
	XI.	34. 100.
	XIII.	69.
	XXII.	297.

Ecclesiastes.

C A P.	III.	418.
	XI.	298.

Canticum.

C A P.	I.	215.
	VIII.	398.

Sapientia.

C A P.	II.	157. 406.
	V.	157. 406.
	VIII.	418.
	X.	218. 446.
	XI.	1.

Ecclesiasticus.

C A P.	XI.	69.
	XIII.	69.
	XXVIII.	222.
	XXIX.	419.

Ec-

*Daniel.*CAP. XIII. 68.*Osee.*CAP. XIV. 183.*Ioel.*CAP. II. 15.*Amos.*CAP. VI. 254. 350. 400.*Michaeas.*CAP. III. 423.V. 77.*Micheas.*

CAP. VII. 400.

*Habacuch.*CAP. I. 400.III. 87.*Machabaeorum I.*

CAP. II. 73.

IX. 206.

*Machabaeorum II.*CAP. VII. 68.

NOVVM TESTAMENTVM.

*Matthaeus.*CAP. II. 143.V. 16. 24. 293.

341.

VI. 89.XI. 171. 206. 399.XII. 133.XV. 297. 401. 438.XVI. 403. 411. 412.421.XVII. 177.XVIII. 75. 177. 424.XIX. 205. 289.XX. 414.XXIII. 28. 353. 400.XXV. 419.*Marcus.*CAP. VII. 192.X. 171.*Lucas.*CAP. I. 16.*Lucas.*CAP. II. 122. 289.III. 404.V. 16. 38.VII. 223.VIII. 17.IX. 404.X. 405.XI. 17. 423.XII. 89. 171. 340.438.XIII. 206.XVI. 332.XIX. 245.XXI. 92.XXII. 414.XXIV. 404. 405.*Ioannes.*CAP. III. 171.IV. 6. 223. 412.VI. 93.*Ioan-*

Ioannes.

C A P.	VII.	34.
	IX.	191.
	XI.	220.
	XII.	104.
	XIII.	412.
	XIV.	34.
	XV.	171. 338.
	XVIII.	15.

Actus Apost.

C A P.	II.	24. 441.
--------	-----	----------

Epist. ad Rom.

C A P.	I.	218. 331. 397.
		421.
	III.	254.
	VI.	254.
	VIII.	88. 255. 282.
		336.
	X.	255. 421.
	XII.	94. 180. 334.
	XIII.	335.
	XV.	98.

Ad Corinth. I.

C A P.	II.	214.
	IV.	26. 270. 278.
	V.	341.
	VI.	60. 402. 410.
	VII.	206.
	IX.	30. 98. 150.
		180. 291. 421.
	X.	339.
	XIII.	407.
	XV.	206. 401. 402.
	XVII.	13.

Ad Corinth. II.

C A P.	II.	30.
	IV.	239. 271.

Ad Corinth. II.

C A P.	V.	15. 87.
	VI.	335.
	VII.	26.
	X.	171. 180. 399.
	XI.	29. 117. 169.
		255. 262. 314.
		315. 405.
	XII.	24.

Ad Galatas.

C A P.	III.	177. 333. 404.
	IV.	29. 30. 169.
		333. 337.
	V.	402.

Ad Ephesios.

C A P.	II.	97.
	III.	172.
	IV.	181.
	V.	284.
	VI.	284.

Ad Philipp.

C A P.	II.	215.
	IV.	26.

Ad Thessal. I.

C A P.	II.	30.
--------	-----	-----

Ad Thessal. II.

C A P.	IV.	18.
--------	-----	-----

Ad Timoth. I.

C A P.	II.	55.
	IV.	293. 419.
	V.	334.

Ad Timoth. II.

C A P.	I.	293.
	II.	30.
	IV.	288.

Ad Titum.

C A P.	I.	68.
		<u>Ad</u>

<i>Ad Hebraeos.</i>		<i>Iudae.</i>	
C A P. I.	<u>15.</u>	VERS. <u>XII.</u>	<u>249.</u>
IX.	<u>441.</u>	<i>Apocalypsis.</i>	
<i>Iacobi.</i>			
C A P. <u>V.</u>	<u>16. 34.</u>	C A P. XII.	<u>29.</u>
<i>Ioannis I.</i>		<u>XVIII.</u>	<u>404.</u>
C A P. III.	204.	<u>XXII.</u>	<u>298.</u>
V.	<u>17.</u>	401.	

EXPLICIT INDEX II.





INDEX III.

EXHIBENS

SCRIPTORVM TESTIMONIA.



A

Agricola (Rodulphus) laudatur. 43. 53. 54.
 Ambrosius (S.) laudatur. 76. 105. 289. 339. 341. 342. 356.
 Apollonius rhetor laudatur. 177.
 Arias Montanus (Benedictus) laudatur. 45.
 Aristoteles laudatur. 45. 50. 60. 170. 185. 229. 240. 316. 318. 450.
 Augustinus (S. Aurelius) laudatur. 11. 18. 25. 38. 48. 65. 106. 201. 202. 239. 241. 254. 271. 279. 312. 315. 326. 327. 328. 332. seqq. ad 347.

B

Basilus M.(S.) laudatur. 125. 160. 190. 210. 270. 334.
 Bernardus (S.) laudatur. 26. 37. 83. 85. 127. 155. 268. 294. 300. 366. 416. 419. 423. 447.
 Bonaventura (S.) laudatur. 263.

C

Cassianus (Ioannes) laudatur. 55. 152. 154.
 Chrysostomus (S. Ioannes) laudatur. 109. 129. 130. 143. 148. 150. 181. 190. 302. 385.
 Cicero (M. Tullius) laudatur. 3. 8. 9. 11. 33. 44. 50. 51. 58. 66. 71. 72. 73. 74. 77. 78. 101. 104. 108. 114. 131. 132. 133. 135. 137. 161. 168. 175. 185. 196. 197. 198. 200. 202. 206. 233. 234. 236. 240. 244. 246. 247. 248. 250. 255. 264. 265. 268. 272. 274. 275. 276. 277. 292. 296. 306. 316. 319. 321. 324. 326. 328. 229. 332. 352. 359. 361. 362. 367. 368. 369. 372. 373. 379. 393. 394. 417. 433. 440. 443. 451.
 Climacus (S. Ioannes) laudatur. 249.
 Commentarius de rerum copia. *Vid. Erasmus.*
 Cornificius laudatur. 79. 100. 156.

156. 160. 198. 265. 270.
 313. 326. 328. 330. 347.
 364. 365. 376. 407.
 Cyprianus (S. Caecilius) lauda-
 tur. 3. 8. 9. 11. 33. 44. 50.
 51. 58. 66. 71. 72. 73. 74.
 77. 78. 84. 89. 90. 102. 123.
 128. 134. 136. 141. 163.
 164. 203. 204. 207. 208.
 261. 262. 265. 267. 268.
 269. 271. 275. 276. 277.
 278. 281. 282. 283. 284.
 287. 290. 291. 293. 294.
 298. 308. 309. 316. 317.
 318. 321. 338. 340. 342.
 350. 351. 408. 445.

D

Demetrius Phalereus lauda-
 tur. 5.

E

ENnius (Q.) laudatur. 245.
 313. 372.
 Erasmus (Desiderius) lauda-
 tur. 120. 121. 234. 300.
 Eucherius (S.) laudatur. 294.
 Eusebius Emislenus laudatur.
 82. 83. 94. 257. 293. 408.

F

FAbius. *Vid.* Quintilianus.
 Franciscus Senensis. *Vid.* Patri-
 cius.

G

GRanatenfis (Ludovicus)
 laudatur. 93.
 Gregorius Magnus (S.) lauda-
 tur. 18. 22. 26. 34. 38. 39.
 62. 83. 92. 102. 256. 263.
 265. 270. 292. 294. 408.
 437. 439.
 Gregorius Nazianzenus, seu
 Theologus, (S.) laudatur.
 119. 140. 160. 177. 189.
 211. 302. 412.
 Gregorius Nyssenus (S.) lauda-
 tur. 142. 149.

H

HErenniana rhetorica. *Vid.*
 Cornificius.
 Hieronymus (S.) laudatur. 64.
 67. 78. 110. 155. 164. 165.
 178. 179. 191. 193. 222.
 282. 288. 292. 293. 300.
 306. 312. 439. 440. 445.
 Homerus laudatur. 136. 137.
 246.
 Horatius Flaccus (Q.) lauda-
 tur. 315. 360. 392. 443.

I

IOannes Anglus laudatur. 8.
 Ioannes Picus Mirand. *Vid.* Pi-
 cus.

L

L Astantius (L. Coelius Firmianus) laudatur. 25.
119. 166. 270.

Libellus de conflictu vitiorum
& virtutum laudatur. 163.

Livius (T.) laudatur. 245. 246.
360.

Lucanus (M. Annaeus) laudatur. 53. 54.

Lucilius (C.) laudatur. 313.

M

M Aro. *Vid.* Virgilius.

N

N Aso. *Vid.* Ovidius.
Nazianzenus, & Nyssen. *Vid.*
Gregorius.

O

O Rigenes laudatur. 193.
211. 249. 418.

Oforius (Hieronymus) laudatur. 80. 88. 124. 161.

Ovidius Naso (P.) laudatur. 101. 102. 284.

P

P Atricius (Franciscus) laudatur. 19. 447.

Philostatus laudatur. 388.

Picus Mirandulanus (Ioannes)
laudatur. 264. 265.

Plato laudatur. 5. 172.

Plutarchus laudatur. 5. 208.

Politianus (Angelus) laudatur. 313.

Pontanus (Ioannes Iovianus)
laudatur. 362.

Prosper Aquitanicus (S.) laudatur. 40. 258. 259.

Q

Q uinctilianus (M. Fabius)
laudatur. 2. 6. 39. 91.

101. 103. 107. 113.

130. 135. 136. 138. 149.

150. 167. 198. 200. 233.

seqq. 237. 240. 244. 245.

250. 255. 268. 285. 310.

320. 321. 322. 324. 325.

352. 353. 354. 355. 356.

359. 360. 361. 362. 364.

367. 372. 373. 374. 375.

378. 381. 382. 383. 384.

385. 386. 387. 388. 391.

392. 393. 394. 396. 402.

409. 423. 426. 427. 428.

430. 431. 432. 433. 435.

440. 443.

R

R odolphus. *Vid.* Agricola.

S

S Annazarius (Iacobus) laudatur. 318.

Se-

Sedulius laudatur. 256. 265.

V

273.

Seneca (L. Annaeus) laudatur.

17.25.27.46. 56.57.85.102.211.seqq. 262.271.419.420.Sulpitius Severus laudatur. 104.**V**alerius Maximus lauda-
tur. 5.321.

Vidas (Hieronymus) laudatur.

277.

Virgilius Maro (P.) laudatur.

76.102.103. 132. 135. 137.183. 245. 246. 247. 248.249. 250. 251. 264. 265.284. 297. 359. 384. 386.399.428.

T

Terentius (P.) laudatur. 68.

408.

Theodoreus laudatur. 110.seq.

Thomas Aquinas (S.) laudatur.


127.

Titelmanus (Franciscus) lau-
datur. 181.

Z

Zeno laudatur. 46.

EXPLICIT INDEX III.





INDEX IV.

R E R V M

ET PROPRIORVM NOMINVM.



Admonitum lectorem volo , non nulla in hoc indice propria scriptorum nomina desiderari ; quaedam etiam reperiri , quibus non omnes , ubi leguntur , paginae adiectae sunt. Quod dedita opera factum est , ne actum agere videamur. Ea enim videre est in secundo ac tertio indicibus , quibus si postremum hocce addideris , & omnium priorum nominum indicem videbis perfectum , & nihil quoque praetermissum esse , quod tuae utilitati quoquo modo inserviat.



A

- | | | |
|-----------------------------------|-------|-------------------------------------|
| A Aron. | 42 L. | Accommodatio , seu ad singu- |
| Abdias. | 403. | laria descensus. 86. 91. |
| Abella , <i>urbs Italiae.</i> | 253. | Achab. 403. |
| Abisag. | 85. | Achillis hasta. 137. |
| Abraham. 66. 67. 73. 130. 172. | | Acres & ardentis aptiores ad |
| 214. 262. 302. 333. 334. | | concionandum sunt , quam |
| 339. 421. | | tardi. 391. |
| Abraham obediencia. 117. seq. | | Actio ad corporis gestum & |
| 189. 211. | | motum pertinet. 364. |
| Abfalom. 293. 403. | | — languida , motu caret ; ni- |
| Abydos , <i>urbs Asiae.</i> 289. | | mis actiuosa , deformis est. |
| Accidentia quid sint dialecticis. | | 393. |
| 53. | | Actiois partes duae ; vox , & |
| Accidiosi monachi descriptio. | | gestus. 369. <i>Vid.</i> Pronuntia- |
| 152. seqq. | | tio. |

Actio-

- Actioni consideratio etiam iun-
 genda est. 420. seq.
 Adagia. Mali corvi malum o-
 vum. 68. Crambe bis posita
 mors. 86. 359. Rudi Miner-
 va explicare. 103. 255. 395.
 Quantumvis rudius dicitur,
 modo clarius. 239. Vestis
 virum facit. 234. Laterem
 lavare. 306. Iro pauperior.
 357. Theriste deformior. i-
 bid. Aperto Marte conflagre-
 re. 417.
 — non vulgurem orationi fi-
 dem & ornamentum addunt.
 101.
 — quaedam humilia & pae-
 ne sordida. ibid.
 Adhortatio quid sit. 295.
 — eius usus. ibid.
 — exempla. ibid. seq. 403.
 Adhortationis pronuntiatio.
 403.
 Adiunctio quid sit. 274.
 — eius exempla. ibid.
 Adiuratio maiorem vim, quam
 obsecratio, habet. 181.
 — eius exempla. ibid. seq.
 403.
 Adiurationis pronuntiatio. ibid.
 Admiratio inter figuras, quae
 affectibus serviunt, numera-
 tur. 183.
 — eius exempla. ibid. 401.
 — duplicatur, quum ei iun-
 gitur apostrophe. ibid.
 Admirationis pronuntiatio.
 401.
 Adspectus plurimis modis signi-
 ficat. 386.
 Adspectus actio. ibid.
 Adulterii genera. 59. seq.
 AEacides. 284.
 AEgyptus. 18. 118. 159. 175.
 243. 251. 353. 415.
 AEgypti eversio. 138.
 AEneas. 248. 384.
 AEolus, ventorum rex. 135.
 AEschines. 368.
 Affectatio vitium omnium pes-
 simum. 260. 323.
 Affectio quid sit. 67.
 Affectus duplicis generis. 86.
 — utriusque exempla. 87. seq.
 — qualiter, & qua occasione
 concitandi. ibid. seq.
 — alii oratorum, conciona-
 torum alii. 170.
 — alii veri, alii ficti & imita-
 ti. 378.
 — in peroratione qualiter
 excitandi. 201. seq.
 Affectuum movendorum sum-
 ma in quo posita. 39. 166.
 Affectuum pronuntiatio tam
 varia esse debet, quam sunt
 ipsi varii. 381. 388. 399. seq.
 Affectibus veris concitatus eo-
 rum pronuntiationem, nullo
 docente, intelliget. 383.
 Affectus movere difficillimum.
 43.
 Affectus movere Atheniensium
 actores vetabantur. 6. in
 quibusdam civitatibus inter-
 dictum. 91.
 Affectus concitandi ratio. 166.
 seqq.
 qua-

- qualiter in nobis excitabimus. 168. seq.
- Affectus pios erga res spirituales dumtaxat Spiritus S. prae-
bere potest. 169.
- ad Affectus movendos multum
iuvat, ut & ipsi commoveamur. 167. seq.
- Agar. 333.
- Agésilas, Lacedaemoniorum
rex, qua ratione milites ad
praelium acueret. 36.
- Agnetis (S.) fortitudo & con-
stantia, in tenera aetate, com-
mendatur. 105. seq. 216.
- Agnominatio quid sit. 268.
- eius exempla. ibid.
- Aiacis clypeus. 137.
- Alexander Magnus. 21.
- Clitum, carissimum sibi,
inter epulas transfodit. 47.
- concidit bibendi intempe-
rantia. 48.
- Babylonis muros intravit.
213.
- Alexandri M. crimen aeternum,
Callisteni occisio. 262.
- Alexandria. 9.
- Alexii (S.) patientia singularis.
216.
- Allegoria quid. 250.
- eius varia genera. ibid. seq.
- genus maxime excellens.
191.
- ad Christi mysteria expli-
canda pertinet. 190.
- eius supra tropologiam
dignitas. ibid.
- Allegoriarum scriptores. 195.
- in Allegoriis quis tenendus mo-
dus. 191. seq.
- Ambiguitas, orationis vitium,
duplex. 238.
- Ambrosii (S.) orationis varie-
tas laudatur. 315.
- Amici falsi ingenium. 305.
- Amicitia qualiter gerenda. 304.
seq.
- Amnon. 293.
- Amor rebus cedit. 316.
- Amoris remedium. 76.
- Amoris in Deum incitamenta.
171. seq.
- Amorrhæi, & Cethæi impro-
bi. 61.
- Amos. 263.
- Amplificandi variae species.
130.
- 1. ex ipso rei nomine. ibid.
seq.
- 2. per incrementum. 131.
eius usus. ibid. eius quattuor
modi. ibid. seq.
- 3. per comparisonem.
132. seq. eius usus. 134.
- 4. per ratiocinationem.
135. idem efficit, quod am-
plificatio per incrementum.
136.
- 5. per congeriem. 137.
- Variae species. 138.
- ad Amplificandum qui loci ma-
gis valeant. 117.
- Amplificatio quæ ab argumen-
tatione differat. 116. seq.
- ad commovendos affectus
instituta est. 139.
- in genere demonstrativo
præ-

- praecipue dominatur. 211.
 eius exemplum. 212. seq.
 Amplificatio a partibus. 118.
 eius varia exempla. 118. seqq.
 in scriptura & PP. passim ob-
 via est. 121.
 — ab antecedentibus. ibid.
 eius exempla. ibid. seq. 124.
 eius usus. 122.
 — a comitantibus & conse-
 quentibus. 123. eius exem-
 pla. ibid. seq. eius usus & u-
 tilitas. 123.
 — a causis. 125. seq.
 — ab effectibus. 127. eius u-
 sus. ibid.
 — plenissima a communibus
 locis & circumstantiis simul.
 127. seqq. exempla. ibid.
 Amplificatio & affectus, cau-
 sam iam probatam conse-
 quuntur. 226.
 Amplificatio & descriptio ad
 quid valeant. 166. seqq.
 Amplificationis pronuntiatio.
 383.
 Anadiplosis quid sit. 261. eius
 exempla. ibid. seq.
 Ananias. 73.
 Andreae (S.) insignis animus,
 dum crucem sibi paratam sa-
 lutabat. 215.
 Andronicus Hypocrites. 368.
 Angelorum & hominum in co-
 gnoscendo, se seque explican-
 do, discrimen. 424.
 Animantia bruta pluribus cor-
 poris dotibus hominibus
 praestant. 7.
 — intellectum & cognitio-
 nem quamdam habere, eo-
 rum industriae ostendunt.
 ibid.
 Animarum salute nullum sacri-
 ficiū Deo gratius. 34.
 Animus non es iactandus, nec
 fatigandus. 420.
 Animum bene fundatum nulla
 machinamenta agitare pos-
 sunt. 212. seq.
 Anna. 152. 165.
 Annibal. 136. 238. 248.
 — Phormiorem philoso-
 phum, de re militari dispu-
 tantem, merito irrisit. 417.
 Antepraedicamentalis regula.
 60.
 Anti-Christus. 269.
 Antimetabole quid. 273.
 Antoninus philosophus gloriam
 contemnebat. 303.
 Antonius (S.) tametsi illitera-
 tus, multorum monachorum
 pater exstitit. 25.
 Antonius *Orator*. 368.
 — latronum sicis confossus
 est. 309.
 Antonii, *equitis Romani*, vom-
 itus amplificatur. 132. 135.
 Antonomasia quid sit. 248.
 — quo a periphrasi differat.
 ibid.
 Apellis mira dexteritas. 36.
 Apollonius. 300.
 Apostoli cur rudes electi. 13.
 — in die pentecostes, Spiritus
 S. gratia repleti sunt. 24.
 Apostolorum praedicatio, labo-
 res,

- res, & infractus animus. 128.
 seq.
 Apostrophe cum exclamatione
 coniuncta. 178.
 — cum admiratione. 183.
 — cunctis affectibus servit.
 405.
 — eius exempla. *ibid.* pro-
 nuntiatio. *ibid.*
 Appius Caecus. 329.
 Appositum. *Vid.* Epitheton.
 Apte dicendi ratio. 319. *seqq.*
 — ex duobus praecipue su-
 mitur. 456. *Vid.* Dicere apte.
 Arabia. 333.
 Araxes. 245.
 Archias. 275.
 Architas Tarentinus. 58.
 Argumentatio quid sit. 72.
 — inter tria dicendi genera
 praecipuum est. 49.
 Argumentatio popularis. 76.
 — oratoria quid supra diale-
 cticam addat. 81.
 Argumentationis vis & elegan-
 tia quo contineatur. 86.
 Argumentationis & amplifica-
 tionis discrimen. 116. *seq.*
 Argumentationes quo eloquii
 generis tractandae.
 113. *seq.*
 Argumentationum dispositio.
 230. *seq.*
 Argumentum quid sit. 72.
 Argumentorum formae. *ibid.*
seqq.
 — fontes. *Vid.* Loci.
 Ariditas, orationis vitium. 355.
 Aristarchus eruditissimus & di-
 ligentissimus. 249.
 Aristides iustissimus. *ibid.*
 Aristoteles. 52. 53. 247. 248.
 — scientiarum antistes. 4.
 — aureum flumen. 8.
 — omnia rhetorum praece-
 pta collegit, ipsisque inven-
 toribus praestitit. 3.
 — plurima adiumenta rhe-
 toricae subministravit. 42.
 — de affectibus copiose scri-
 psit. 170.
 Arithmon quid sit. 362.
 Armeniae, inclytae feminae, in-
 signis pudicitia. 19. 447.
 Arrhievalus B. Eduardi vitam
 scripsit. 84.
 Arrianus imperator. 412.
 Ars quid sit. 44.
 — dux certior est, quam na-
 tura. *ibid.*
 — imitatione & exercitatio-
 ne adiuvatur. 44.
 — naturam imitatur, ad eam
 tamen pertingere nequit.
 383.
 — multum adiuvat naturam.
 431.
 Artis praecepta, & lectio, sine
 exercitatione, exigui fructus
 sunt. *ibid.*
 Artis praeceptorum necessitas.
 44.
 Arte perficitur & consumatur
 natura. 2.
 Artes quae ratione inventae. *ibid.*
 Asia. 289.
 Asiaticus, orationis vitium.
 355. 361.
 Asi-

Asinius Pollio. 237.
 Alseveratio ad amplificandum
 valet. 138.
 — interdum plus, quam pro-
 bationes, valet. 383. 411.
 Assur. 158. 407.
 Assyriorum vastatio. 118. 138.
 Assyriorum regis superbia. 158.
 Athenae. 189. 247. 248. 393.
 Attentionis captandae ratio.
 187.
 Attilius Regulus (M.) 299.
 Avari arguuntur. 89.
 Avaritia quid sit. 280.
 Auditor non solum oratione
 flectendus, verum & dele-
 ctandus est. 48.
 — qua ratione docendus, de-
 lectandus, & flectendus sit.
 202. 327.
 — raedio afficiendus non est.
 225.
 Auditorum habenda est ratio
 concionatori. 322. seq.
 — diligentior cura habenda
 est, quam argumentorum.
 436.
 Augusti urbanitas. 303.
 Augustinus. (S.) 163. 260. 348.
 444.
 — eam rhetoricae partem,
 quae de tribus dicendi ge-
 neribus est, diligenter per-
 tractavit. 331.
 — pugnam civilem, quae a-
 pud Caesarem invaluerat,
 pepulit. 345.
 — proportionem verborum
 prae ceteris PP. delectatus

est. 258.
 Avidus quis. 102.
 Aureola virginibus, martyri-
 bus, & doctoribus in caelo
 parata est. 16.
 Azarias. 73.

B

Babylon. 213. 404. 407.
 Babylonis everfio. 118.
 Balnearum pericula. 141.
 Barbara lexis quid sit. 237.
 Barbarismus quid. 236.
 Bafan, regis, proceritas. 137.
 Basilius (S.) 12. 143. 211. 412.
 413. 414. 432.
 — erudito cuidam christia-
 nus Demosthenes dictus. 9.
 — cum PP. veteris & novi te-
 stamenti confertur. 302. seq.
 — eius eloquentia laudatur.
 8. seq.
 — cum Arriani praefecto
 dialogus, quo singularis eius
 fortitudo ostenditur. 412.
 seqq.
 Belli incommoda. 123. 145.
 seq.
 Bene-precationis pronuntiatio.
 399.
 — exempla. ibid.
 Benevolentiae captandae ratio.
 187.
 Beniamin. 298.
 Bernardus (S.) 260.
 — non tam humano studio,
 quam divino magisterio, di-
 vina tractavit. 420.
 Be-

Bethacarem. 298.
 Bithynia. 289.
 Blefilla. 164.
 Boethius. 53.
 Bombycum ingenium. 62.
 Bomphiologia quid. 360.
 — exempla. ibid. seq.
 Bona vera & falsa quae. 212.
 Bonaventurae (S.) oratio, etsi
 non leniter fluat, sententia-
 rum tamen pondere grata
 est. 262. seq.
 Bonitas, voluntatis obiectum
 est. 205.
 Bonorum tria genera secundum
 philosophos. ibid.
 — quinque secundum rheto-
 res. ibid.
 Brachilogia quid. 360.
 Brachiorum in pronuntiando
 vitia. 392.
 Brevitas quid sit. 289.
 — quando adhibenda. ibid.
 — eius exempla. ibid.
 — nimia, vitium est. 238.
 Brutus (L.) 161. 240. 246.

C

CAcophaton quid sit. 359.
 Cacophonia quid. 362.
 Cacozelon quid. 360.
 — vitium omnium pessi-
 mum. ibid.
 Cadaveris horrida species. 125.
 Caecilius (Q.) 108.
 Caelestia pro terrenis relin-

quentium miseranda fors. 182.
 Caelestis vitae dulcedinem co-
 gnoscens, terrena omnia li-
 benter derelinquit. 83.
 Caesar (C. Iulius) 21. 73. 101.
 136. 152. 237. 292.
 — eius felicitas. 303.
 Caesarea, Mauritaniae popu-
 lus. 345.
 Caesarius, Gregorii Nazianze-
 ni frater. 9. 211.
 Cain. 268. 290.
 Caiphas. 403.
 Calanne. 350.
 Caleb. 73.
 Caligula. 303.
 Calix Dominicus aquam vino
 mixtam debet habere. 338.
 seq.
 Callidius. 367. 393.
 Callisthenes. 262.
 Camptera, latine tractus, vel
 nexus, quid sit. 318.
 — eius exemplum. ibid.
 Cannae. 248.
 Caritas omnes concionandi
 molestias superare debet. 441.
 Caritatis studium in Ecclesiae
 commendatur. 28. seqq.
 — magis prodest, quam o-
 mnia rhetorum praecepta. 31.
 — a Spiritu S. gratia unice
 procedit. 32.
 — quibus mediis adiuvetur. 33. seqq.
 Caritatis oratio qualiter insti-
 tuen-

tuenda.	227.	Centurio.	223.
Caritatis exempla.	28. seq.	Ceres.	247.
— incitamenta.	171. seqq.	Cervicis actio.	387.
Carnis maceratio commenda-		Cethegus.	372.
tur.	75.	Cethim.	133.
Carthago. 213. 248. 251. 252.		Chanaan.	68.
— dolis malitiosa.	160.	Chananaea.	249.
Cassianus (Ioannes) in descri-		Chremes.	238. 408.
ptionibus personarum , ex		Chrysologus (S. Petrus) unde	
notatione , mirus est.	152.	ita dictus.	260.
Castigationis pronuntiatio &		Chrysostomus (S. Ioannes) 8.	
exempla.	403.	12. 121. 306. 432. 434. 443.	
Cathacresis quid sit.	250.	— inter ceteros PP. maxime	
— metaphorae valde similis,		legendus.	65.
quoque ab ea distinguatur.		— in circumstantiis excu-	
ibid.		tiendis mirus artifex.	129.
Catharina Senensis (S.) multos		150.	
homines ad pietatem con-		— indignum se esse ad epi-	
vertit.	25.	scopi munus , Basilio proba-	
— eius virtutes , & admiran-		re contendit.	143. seqq.
da divinae familiaritatis in-		— quo animi aestu angere-	
dicia.	111.	tur , dum episcopatus suspi-	
Catilina. 77. 121. 133. 134.		cio ei fuit infecta.	ibid.
152. 161. 164. 265. 268.		— in amplificatione maxime	
274. 276. 329.		excellit.	150.
Cato. 54. 152. 165. 237. 245.		— tum etiam in genere mix-	
246.		to concionandi.	224. 228.
— severissimus morum cen-		— tractandorum animorum	
for.	249.	artifex peritissimus.	223.
Causa quid sit.	69.	Chrysostomi admiranda elo-	
Causarum tria genera , iudicia-		quentia.	8.
le , deliberativum , ac de-		— oratio uber & copiosa.	
monstrativum.	42. 185.	354.	
Cedar.	133. 215.	— quidam sermones dignis-	
Celerinus.	293.	simi qui legantur.	151.
Celeritas nimia pronuntiatio-		— de divina providentia li-	
nis vitium.	390.	ber commendatur.	214.
— qui in hoc vitium inci-		— concionum quale exor-	
dant.	ibid.	dium.	320.
		Chri-	

- Christianismus non personarum dignitate, sed fide, insignitur. 413.
- Christus. 9. 13. 15. 20. 26. 29. 35. 60. 61. 62. 84. 87. 88. 89. 90. 94. 105. 110. 111. 122. 128. 148. 160. 163. 164. 165. 190. 191. 193. 194. 239. 245. 255. 259. 261. 262. 269. 276. 281. 282. 283. 293. 295. 296. 298. 329. 334. 336. 337. 338. 339. 340. 345. 351. 399. 403. 437. 441. 444. 447.
- verus Salomon. 215. 218.
- veram humilitatem docuit. 155.
- se ad docendi munus quadraginta dierum ieiuniis praeparavit. 24.
- per diem miracula edebat, & ad orationis studium pernoctabat. 38.
- cur hominis filius esse voluerit. 269.
- sacerdotes aut constituit, aut protegit. 319.
- Christi benignitas. 87. amoris & grati animi affectum excitar. ibid.
- benignitas, caritas, & humilitas. 105.
- caritas. 171. seq.
- patientia. 269.
- passionis acerbitas ex eius partibus amplificatur. 119.
- verae generationis testimonia. 289.
- imperuestigabiles divinitiae. 215.
- vias quando carparamus. 94. seq.
- Cicero (M. Tullius) 12. 13. 53. 138. 186. 200. 247. 392.
- eloquentiae parens. 3. 248. 249. 309. 451.
- Catilinae conatus represent. 121. seq.
- in tropis & figuris tradendis sibi discrepat. 310.
- Ciceronis de rhetoris officio sententia. 42.
- exempla ad omnia eloquutionis praecepta satis esse, credunt rhetores. 232.
- Ciceroni mortem eloquentia attulit. 309.
- Cicero (Quintus) 77.
- Circumstantiae quid sint. 50.
- peccatum aggravantes, duplicis generis. 118.
- quatenus in confessione detegendae. ibid.
- Circumstantiarum personarum consideratio. 66. seqq.
- rerum. 69. seq.
- exempla. 70.
- usus. ibid.
- Circumstantias excutere, ad amplificationem valde conducit. 129.
- Clamor continuus remittendus. 376.
- Classis mala & incommoda. 146.
- Cleombrotus. 165.
- Cleon. 393.
- Cle-

- Clerici unde ita vocati. 67. seq.
 Clitus. 47.
 Clodius. 244. 251.
 Cogitatio eloquutionis est pa-
 rens. 443.
 — tempora & loca cogita-
 tioni idonea. 444.
 — eius rectae instituendae
 ratio. ibid.
 Cognatio magnum amoris in-
 citamentum est. 172.
 Cohabitatio quid sit. 270.
 — eius exempla. ibid.
 Cola, latine membra. 314.
 — eorum exempla. 315.
 Collectio quid sit. 8.
 — eius partes quinque. ibid.
 concionatoribus propriae ac
 necessariae. 111. seq.
 Collocatio recta quam sit disse-
 renti necessaria. 230.
 Commata, latinae caesa. 314.
 — eorum exempla. ibid.
 Comminationis pronuntiatio.
 — exempla. 400. ibid.
 Commiserationis affectus consi-
 deratio. 175. seq.
 Commoratio quid sit. 287.
 — eius usus. ibid. seq.
 Commutatio quid. 233.
 — eius exempla. ibid.
 Comoediarum insignia loca e-
 discenda ad pronuntiationis
 exercitationem, monet Fa-
 bius. 396.
 — id concionatorem non
 decet. 397.
 Comoedus quid docere orato-
 rem debeat. 396.
 Compar quid sit. 266.
 — eius exempla. 267.
 Comparatio in amplificatione.
 132. seq.
 Comparisonis pertractandae
 ratio. 303.
 Complexio quid sit. 81. 262.
 — eius exempla. ibid. seq.
 — pronuntiatio. 407. *Vid.*
 Dilemma.
 Compositio quid sit. 313.
 — qua ratione conservabi-
 tur. ibid.
 — concionatori negligenda
 non est. 312.
 — non mediocriter intelle-
 ctum adiuvat. 313.
 Compositionis duplex species,
 simplex, & composita. 314.
 — compositae partes. 314.
 seqq.
 — eius varietas commenda-
 tur. 315. 319.
 — vitia, eorumque exem-
 pla. 313.
 Conceptus duplicis generis, di-
 rectus, & reflexus. 108.
 Concessio quid sit. 136. 294.
 — eius exempla. ibid. seq.
 Concilium quid sit. 67.
 Concionandi I. modus suaso-
 rius ac dissuasorius sub deli-
 berativo genere comprehen-
 ditur. 203. quodnam exor-
 dii genus requirat. 204. &
 propositionis ac divisum.
 205. tum etiam confutatio-
 nis. 207. & epilogi. 208. lo-
 ci

- ci huic generi deservientes.
 ibid. exempla. ibid. seq. non
 nulla in hoc genere concio-
 natoris propria. 208. seqq.
 — II. modus in genere de-
 monstrativo, sanctorum fe-
 stis & laudibus deservit. 210.
 qualiter tractandus sit. ibid.
 seqq. ad 219.
 — III. modus, qui in evan-
 gelicae lectionis explanatio-
 ne versatur. 279. quodnam
 exordii genus requirat. 220.
 seq. *Vid.* Lectio evangelica.
 — IV. modus ex superiori-
 bus mixtus. 224. eius duae
 praecipuae partes. ibid. hu-
 ius generis periculum. 225.
 prae ceteris commodissi-
 mus. 228.
 — quattuor modi inter se
 conferuntur. 225. seqq.
 — quinam modus praeferen-
 dus. 227.
 — genus didascalicum. 228.
 ordo in hoc genere servan-
 dus. ibid. seq.
 — omnia genera ad tria re-
 ducuntur capita. 225.
 Concionandi munus difficilli-
 mum. 4. 450.
 — huius officii dignitas. 14.
 seqq. 447. seq.
 — eius finis. 13.
 — utilitas. 16.
 — difficultas. ibid. seqq.
 — eius praecipuus magister,
 divinae gloriae, & humanae
 salutis desiderium est. 31.
 — ei recte exsequendo quae
 requirantur. 423. seq.
 Concionis adornandae metho-
 dus. 442. seqq.
 Conciones eruditae quo ab in-
 eruditis distent. 81.
 — difficiliore, quae de SS.
 laudibus habentur. 219.
 — eas ad verbum ediscen-
 tium vitia. 371. 374. 389.
 Concionis fructum saepe audi-
 tores impediunt. 221.
 Concionator qualiter se gerere
 debeat, ut par officio sit. 18.
 seqq.
 — intentionis puritatem &
 rectitudinem retinere debet.
 19.
 — ne suae gloriae rationem
 habeat. 19. seq.
 — exemplo magis, quam
 verbo, proficiat. 25. seq.
 — caritatis studio prae o-
 mnibus excellere debet. 28.
 seqq.
 — qua ratione caritatis stu-
 dium induere possit. 33.
 seqq.
 — totum spiritum suum con-
 ferat ad rogandum Domi-
 num. 33.
 — piscatoris nomen & cu-
 ram prae oculis habeat. 35.
 — precibus magis, quam
 verbis, munus suum urgeat.
 38.
 — non in verborum splendo-
 re, sed in operum virtute,
 totam praedicandi fiduciam
 po-

- ponat. 40.
 — moralis philosophiae & christianae doctrinae peritus esse debet. 61. seq.
 — antequam munus attingat, in sanctarum scripturarum, & patrum lectione versatus sit. 62.
 — qualiter se gerere debeat in S. scripturarum lectione. 63. seq.
 — exactam dialecticorum formam non semper sequatur. 76.
 — quid supra oratorem addat. 86.
 — quo ab oratore distet. 99.
 — quid inducere in animum debeat, ubi suggestum conscenderit. 96. seq.
 — medici curam & sollicitiam imitetur. 97. seq.
 — omnibus accommodandus est. 98.
 — Spiritus sancti auxilium flagitare debet. 170.
 — quos praecipuae affectus excitare debeat. 173. seq.
 — quibus libris allegiarum tractationem addiscet. 195.
 — paraphrastem magis, quam interpretem, agat. 219.
 — expertus in virtutis via esse debet. 417. seq.
 — quo tempore hoc munus aggredi debeat. 418.
 — prius infundendus, ut postea effundat. 419.
 — quo temperamento munere suo usus. ibid.
 — ita aliis salutaris esse debet, ut sibi etiam utilis sit. ibid. seq. id quod adductis similibus ostenditur. 420. & Bernardi auctoritate. ibid. seq.
 — ad hoc munus non accedat, nisi a Deo vocatus sit. 420. seq. nec si impares oneri vires habeat. 422.
 — quas utilitates ex verborum copia assequatur. 429. seq.
 — vitia moresque eorum, apud quos dicit, perfectos habeat. 437. seq. tum peruersas de rebus opiniones, &c. 438.
 — quae aliunde congestis, sua quodam modo faciat. 441.
 — pium mentis affectum lectioni adiungat. 442.
 — quid efficere debeat, ut pronuntiationis virtutem addiscat. 449.
 — cui pronuntiatio deest, etiam si summus sit, mediocri, hac instructo, saepe concedit. 366.
 — zelum sine ostentatione debet ostendere. 322.
 — quando submisce, temperate, & granditer dicere debeat. 333.
 — naturalem loquendi modum.

- dum diligenter observet. 371.
- novicius ad mulieres rixantes remittitur. 370. seq.
- Concionatoris praecipuum officium. 17. 20. 348. 416.
- triplex officium, docere, delectare, & flectere. 38. 190. 197. seq. 202. 279. 310. 327.
- praecipuum munus in movendis affectibus positum est. 86. 91. 221.
- summum studium. 64.
- tota cura & studium. 27.
- scopus. 91. seq. 203. seq.
- finis. 95. in quocumque dicendi genere. 346.
- septem virtutes. 37. praecipua, orationis studium. 36. 37. seq. id variis exemplis ostenditur. 38.
- tres partes, inventio, eloquutio, pronuntiatio. 451.
- vita & mores quales esse debeant. 23. seqq. variis exemplis ostenditur. 24.
- prudentia maxime in vitiis perstringendis desideratur. 438. seq.
- eximii gloria quam late pateat. 21.
- cuiusdam insignis praecipuum studium. 438.
- disertissimi factum, ut tironem institueret. 2.
- veterani ad novicium, super concionandi officio, dictum. 32.
- eius & scholastici doctoris differentia. 229.
- praeparatio ante concionem. 446. seqq.
- Concionatori humilitas necessaria est. 33. seq.
- histrionum gesticulatio indecora. 394.
- qui loci magis proprii ac necessarii. 81. seq.
- Concionatorem, caritatis studio incensum, non potest non populus revereri. 32.
- Concionatores rhetoricae adminiculo plurimum adjuvari possunt. 3.
- pertinaci studio atque labore se se praeparare debent. 440.
- inanem gloriam interdum non cavent, nec advertunt. 22. seq.
- mundari prius oportet, ut alios mundos faciant. 26.
- cur nostro saeculo tam exiguos fructus edant. 27. seq.
- insignes, rarissimi sunt. 450.
- divinarum rerum, & devotionis studio dediti, facile auditorum animos afficiunt. 40.
- quid facere debeant, exemplo Pauli ostenditur. 284.
- subtilia, & populi captum excedentia, silentio premant. 439.
- *obiurgantur*, qui obscuras quae-

quaestiones pertractant. 239.
 — aridi. 85.
 — instituti sui immemo-
 res. 95. 324.
 — qui rhetoricae non
 student. 4.
 — qui exemplo non pro-
 sunt. 28.
 — qui ad hoc munus ae-
 tate immatura, vel imperfe-
 cti, accedunt. 62.
 — qui auram popularem
 captant. 422. 446. seq.
 — qui de auditorum in-
 stitutione non curant. 436.
 seq.
 — qui disteriis & facetis
 populum ad risum movent.
 439.
 Concionatorum affectus. 170.
 — meritum & praemium. 34.
 — vitia. 220. 222. 237. 239.
 278. 322. 323. 324. 370.
 374. 381. seq. 389. seqq.
 391. seq.
 — pauci admodum rectam
 pronuntiandi rationem te-
 nent. 397.
 — eorum studii formandi ra-
 tio. 62. seqq.
 Conclusio quid sit. 186.
 — quando sit adiicienda. 86.
Vid. Peroratio.
 Concupiscentia, peccati radix
 est. 254.
 Conduplicationis pronuntiatio
 & exempla. 407. seq.
 Confessio vera. 258.
 Confessorem Christi quid de-

ceat. 261.
 Confessores, qui fidem apud in-
 fideles constanti animo con-
 fessi fuerant, laudantur. 351.
 Confirmatio quid sit. 80. seq.
 186.
 — a locis externis potissi-
 mum peti solet. 81.
 — totam causae vim conti-
 net. 227.
 — eius consideratio. 197. seq.
 Conformatio quid sit. 160.
 — eius exempla. *ibid.* seqq.
 Confutatio quid. 186. 207.
 — qualiter instituenda. 198.
 Congeries in amplificatione.
 137. *Vid.* Synathrismus.
 Conquaestio quid sit. 175.
 — a quibus locis ducatur.
ibid. seq.
 — eius in concionibus usus.
 175.
 Conscientiam quotidie exami-
 nare oportet. 159.
 Consolatio elegans de filii mor-
 te. 300. seq.
 Constructio. *Vid.* Compositio.
 Consuetudinis pravae vis. 275.
 Contentio quid. 272.
 — confirmatione & confuta-
 tione constat. 197.
 — eius usus & exempla. 272.
 Contentionis demonstrativae
 consideratio. 302. seq.
 Contentionibus sententiae & e-
 piphonemata apte admiscen-
 tur. 301.
 Contrarium in sententiis quid
 sit. 272.
 Hh 2 ex-

— exempla. 272.
 Contrariorum eadem est disciplina. 52. 60. 118.
 Contrariorum proportio quid sit. 268.
 — eius exempla. *ibid.* seqq.
 Conversio quid sit. 161.
 — eius exempla. 162. 407.
 — pronuntiatio. 407.
 Convivii luxuriosi descriptio. 352.
 Copia & ubertas orationis ad eloquendi rationem pertinet. 354.
 — qua ratione paretur. *ibid.* seq.
 — ei opposita vitia. 355.
 Copia verborum concionatori necessaria est. 423. seq.
 — qua ratione paretur. 277. 425. 427.
 Corinthus, *Achaiarum urbs*, disciplinis erudita. 160.
 — totius Graeciae lumen. 272.
 Cornelius. 268. 281. 291. 318. 329.
 Corollarium quid sit. 103. seq.
 Correctionis pronuntiatio & exempla. 408.
 Cotta (L.) antiquitatis affectator. 369.
 Crassus (L.) 233. 368.
 Cretenes semper mendaces. 68.
 Crucis Christi gloria. 13.
 Cyneas orator. 5.
 Cyprianus (S.) 10. 12. 189. seq. 225. 331. 355. 432.
 — omnium orthodoxorum

PP. eloquentissimus & ornatus-
 tissimus. 232.
 — christianus Cicero. *ibid.*
 — dicendi virtutes prae ceteris PP. servavit. 321.
 Cypriani eloquentia a Lactantio commendatur. 10.
 — oratio, pietatis & dilectionis affectum, atque apostolicum pectus prae se fert. 321.
 — sermo *de lapsis* commendatur. 434.
 Cyrus, *Persarum rex*. 19.
 — forma praestans. 447.

D

D AEdalus. 246.
 Daemon. *Vid.* Diabolus.
 Daniel. 73. 263.
 Dares. 300.
 Darius. 262.
 David. 66. 119. 130. 188. 214. 251. 263. 302. 370. 404. 405. 441.
 — quo animarum ardore aestuaret. 29.
 — solis piis haud prolixè canit. 178.
 Davidis adulterium. 139.
 — fortitudo. 137.
 Decorum ubique captandum. 320.
 — ex prudentiae iudicio pendet. *ibid.*
 — in actione praecipue spectandum. 386. 391.
 Definitio quid sit. 280. du-

- duplex est; brevis dialecticorum, & longior rhetoricorum. 281.
- prioris exempla. 280.
- posterioris. 281.
- Deliberativum causarum genus. 185.
- concionatoris maxime proprium est. 203.
- Demaea. 238.
- Demetriades. 288.
- Demetrianus. 267. 275. 278. 296. 308. 316.
- a Cypriano corripitur. 78. 276.
- Demetrius Phalereus. 5.
- illius vox iucundior. 391.
- Demetrius Poliorcetes. 212.
- Demoleos. 137.
- Demonstrativum causarum genus. 185.
- eius consideratio. 210. seqq.
- Demosthenes. 9. 114. 247.
- dinosi plurimum valuit. 174. 354.
- plurimum figuris utitur. 255.
- ad speculum componere actionem solebat. 386.
- qualiter humerorum vitium emendaverit. 393.
- Ciceroni interim dormire videtur. 392.
- Ciceronem, quantus est, fecit. 440.
- Demosthenis orationes lucernam olebant. ibid.
- eius cura de spiritu quam longissimo sibi parando. 374. seq.
- eius de pronuntiatione iudicium. 368.
- Demostheni eloquentia miserandum exitum attulit. 309.
- Descensus & ascensus quid sit dialecticis. 121.
- Descriptio rei quid sit. 140.
- graece hypotyposis. ibid.
- quibus rebus iuvetur. ibid.
- eius varia exempla. ibid. seqq.
- virtus est in dicendo maxima. 143.
- longissima ex Chrysostomo. ibid. seqq.
- Descriptiones ad quid valeant. 311.
- rerum & personarum inter eloquutionis ornamenta, quae amplificationi deserviunt, numerantur. 139.
- ad energiam maxime pertinent. 353.
- personarum non omnes ad amplificandum pertinent. 152.
- earum varia genera. ibid.
- exempla. ibid. seqq.
- temporum & locorum. 166.
- Detrahentium sub pietatis larva ingenium describitur. 155.
- Deus disciplinarum omnium & virtutum semina animis nostris ingeneravit. 1.

- cur saepe in hoc saeculo irascatur. 258.
- quo affectu & desiderio colendus. ibid.
- digne aestimatur, quum inaeestimabilis dicitur. 262.
- ab homine peccante supplicium sumit. 134. 308.
- Dei beneficentia. 173.
- bonitas & caritas. 171. seq.
- clementia. 264.
- furor in impios. 179.
- in pios dilectio. 216. seq.
- immensa pulchritudo. 171. seq.
- eius laus quo dicendi genere tractanda. 333.
- oblivio, malorum omnium origo est. 56.
- Deum esse, similium inductione probatur. 72. seq.
- in Deo omnes amandi rationes inveniuntur. 173.
- Diaboli acies quovis praelio horribilior. 146. seqq.
- eius vis atque potentia. 180.
- adversus diaboli iacula qualiter firmandus animus. 296.
- adversus diabolum dimicanti numquam deponenda arma. 148.
- Dialectica philosophicis & theologicis disputationibus necessaria est. 4.
- quibus conveniat cum rhetorica, quibusque ab ea differat. 45. seqq.
- compressae manui similis est. 46. *Vid.* Rhetorica.
- Dialecticae orationis ab oratoria discrimen. 355.
- Dialecticorum methodus. 380.
- eorum oratio ad concionandum inepta. 85.
- Dialogi commoditates. 286.
- Dialogorum pronuntiatio allatis exemplis ostenditur. 411. seqq.
- Dicendi tria genera, seu figurae, grave seu sublime, mediocre seu temperatum, & extenuatum acutum seu submissum. 326. 327. 328.
- rebus, de quibus dicimus, aptanda sunt. 326.
- non numquam miscenda, & quando. 343. seq.
- quibus quodque locis interponendum. 344. seqq.
- *Vid.* Sublime. Submissum. Temperatum.
- in tribus dicendi generibus quae vitia cavenda. 347. seq.
- Dicendi genus aridum. 348.
- fluctuans & dissolutum. 347. seq.
- turgidum & inflatum. 347.
- Dicendi modestia exordio praecipue convenit. 321.
- Dicendum omnibus ita est, ut auditores non offendantur. 321.
- Dicere apte quid sit. 319. 323. seq.
- quar-

— quarta eloquentionis est
virtus. 319. 324.

— maxime necessaria est.
325.

— ad dicendum apte quat-
tuor observanda, nempe
quis, cui, qua de re, & ob
quem finem dicat. 320.

Didascalicum genus quid com-
plectatur. 185.

— eius finis cognitio est. 186.

Didonis imprecatio. 183. 399.

Digitorum pronuntiatio. 388.

— in pronuntiando vitia.
392.

Digressiones orationem splen-
didiores faciunt. 75.

Dilemma quid sit. 77.

— eius exempla. ibid.

— cur syllogismus cornutus
dicatur. ibid.

Diligentia quid sit. 280.

Diminutio quid sit. 287.

— eius exempla. ibid.

Dinosis, latine gravitas. 354.

— inter oratorum virtutes
praecipue numeratur. 174.

— ad indignationis affectum
praecipue valet. 350. 354.

Diomedes. 248.

Dipsas. 303.

Disciplinae laus. 281.

Disciplinae qua ratione creve-
rint. 450.

Disiunctio quid sit. 275.

— eius exempla. ibid.

Dispositio quid sit. 44.

— duplex est, una per ora-
tiones, altera per argumen-

tationes. 230.

— quae cuique orationis par-
ti conveniat. ibid. seq.

— qualiter instituenda. 242.
seq.

— prudentia & iudicio con-
stat. 443.

Dispositionis consideratio. 230.
seq.

— eius vitium. 362.

Dissimilitudo in translationi-
bus fugienda. 245.

Dissuadendi ratio. 207.

Distinctio ad dilucidam pro-
nuntiationem valet. 373.

— eius tempora. ibid. seq.

Distributio duplex; una in ver-
bis. 275.

— eius exempla. ibid. seq.

— altera in sententiis. 283.

— eius exempla. ibid. seq.

— in descriptionibus. 284.

Divinae gratiae & humanae sa-
lutis desiderii vis. 31. seq.

Divisio, figura, quid sit. 280.

— quo differat a divisione,
quae orationis est pars. 282.

Divisio, orationis pars. *Vid.*
Partitio.

Divitis & pauperis differentia.
66.

Divites, indigentibus non sub-
venientes, quantum pec-
cent. 84.

Divitiarum quisnam usus esse
debeat. 291.

Docendi munus nemo sine do-
ctrina usurpare debet. 417.

Docilis quis sit. 187.

Doctor ecclesiasticus quis. 439.
 Doctorum ecclesiae scriptis
 nulla eloquentiae pars de-
 fuit. 8.
 Doctrinae rectus ordo. 231.
 Dominicus (S.) auide marty-
 rium sitiebat. 216.
 — eius insignis caritas. 30.
 — qua Praedicatorum
 ordinem instituit. 122. seq.
 Donatus. 267. 275. 284. 287.
 445.
 Drancus. 251. 384.
 Dubitatio quid sit. 299.
 — eius exempla. ibid. seq.
 408.
 — pronuntiatio. 408.

E

EBrietas voluntaria insania
 est. 47.
 — eius effectus. ibid. seq.
 Ecclesia longe magis sanctorum
 exemplis, quam disertorum
 hominum verbis, aucta fuit.
 250.
 — eius splendor & gloria.
 215.
 — in martyribus elucet.
 ibid. seq.
 — unitas, similium inductio-
 ne ostenditur. 309. seq.
 — eius ministri, praedicationi
 operam non dantes, re-
 prehenduntur. 92.
 Ecclesiastes. *Vid.* Concionator.
 Ediscere insignia auctorum lo-
 ca, ad pronuntiationem con-

fert. 396. 404.
 Eduardus, Angliae rex, (B.)
 cum eius uxore virginitatem
 ad finem usque vitae conser-
 varunt. 84.
 — eius mira castitas. 216.
 — qua ipse aqua manus la-
 vabat, Deus caeco oculorum
 lumen restituit. ibid.
 Electio, prima inventionis vir-
 tus. 435.
 — eligenda sunt, quae & ar-
 gumenti natura, & audito-
 rum conditio ac necessitas
 postulat. 436.
 Eleemosyna qualiter commen-
 danda. 209.
 — eius commendatio. 84.
 — impedimenta removen-
 tur. 207.
 Eleemosynas non facientes ob-
 iurgantur. 163. seq.
 Elias. 84.
 — trepidantem Abdiam iu-
 ramento confirmat. 403.
 Elisabeth. 289.
 Eliseus propheta quid innuerit,
 dum tantam celeritatem
 puero commendavit. 19. seq.
 — pueri ab Eliseo sanati hi-
 storia. 194.
 Eloquentis quis. 328. 332.
 — ita dicere debet, ut do-
 ceat, delectet, & flectat.
 326. 327.
 Eloquentium consuetudo ho-
 mines eloquentes facit. 65.
 Eloquentia ad regendam mul-
 titudinem utilis. 5.
 La-

- Lacedaemoniorum civitate expulsa fertur. 6.
 — ad ecclesiae aedificationem ac Dei gloriam referenda est. 10.
 — vera quatenus. 41.
 — locuples & speciosa vult esse. 113.
 — in narratione praecipue dominatur. 188.
 — oratoris est propria. 233.
 — quae admirationem non habet, nulla est. 240. 440.
 — praestantissimis viris extitio fuit. 309.
 — tribus comparatur; arte, imitatione, exercitatione. 426. seq.
 — multo magis in sententiis, quam in verbis, est. 431.
 Eloquentiae universale officium & finis. 346.
 — summa in quo posita. 424.
 — quid eius proprium. 360.
 — eius praecepta ex observatione manarunt. 65.
 — Christianorum & Ethnorum eloquentiae distinctio. 440.
 Eloqui quid sit. 233.
 Eloquutio quid sit. 44.
 — praecipua est rhetoricae pars. 42.
 — prudentis hominis est. 82.
 — pars operis difficillima. 233.
 Eloquutionis quattuor virtutes. 236. 358. 372.
 — I. ut oratio latina sit atque emendata. 236.
 — ei opposita vitia. ibid. seq.
 — II. perspicuitas. 237.
 — vitia ei opposita. 238.
 — III. ornatus. 240.
 — aut in propriis verbis. 241. seq.
 — aut in translatis. 242. seqq.
 — aut in coniunctis. 254. seqq.
 — aut in compositione. 312. seqq.
 — IV. apte dicere. 319. seqq.
 Eloquutionis vitia. 359. seqq.
 — eius cura qua ratione temperanda. 235.
 — eius tractandae ordo. 236.
 — genus pro causae diversitate variandum est. 234. seq.
 in Eloquutione & vitium & virtus dicendi est. 233.
 Emphasis, sententiarum figura, quid sit. 292.
 — in sacris litteris frequens est. 293.
 — eius duae species. 292.
 — exempla. ibid. seq.
 Emphasis, ornatus virtus, ad energiam pertinet. 353. seq.
 — ex verbo coniecturam facit. 137.
 Energia, latine illustratio, & evidentia. 168. 352.
 — rem oculis evidenter veluti

- uti spectandam proponit. 352.
 — eius natura proposito exemplo apparet. ibid.
 — quibus figuris constet. 353. seq.
 Entellus. 300.
 Enthymema quid sit. 76.
 Enumeratio, argumentationis forma, quid sit. 79.
 — eius exempla. ibid. 92. seq.
 — ea frequenter utatur concionator. 93. seq.
 Enumeratio, perorationis pars, quid sit. 198.
 — quo modo tractanda. 199. seq.
 Enumerationis commune praeceptum. 200.
 Epanalepsis quid sit. 260.
 — eius exempla. ibid.
 Epicherema quid sit. 76.
 Epilogus argumentorum, extremam orationis partem praecedere debet. 202.
 — eius duo officia. 208.
 Epiphonema quid sit. 103. seq.
 — inter orationis ornamenta numeratur. 99.
 — quid eius proprium. 106.
 — eius usus. ibid.
 Epirus, *pars Graeciae*. 284.
 Epitheta ad descriptiones plurimum valent. 140.
 — quatenus versui ac prosae convenient. 249.
 — translationibus illustrantur. ibid.
 — in epithetis quis tenendus modus & ratio. 249.
 Epitheton quid sit. 248.
 — eius exempla. ibid. seq.
 — solet etiam adiunctis tropis fieri. 249.
 Epizeusis quid sit. 265.
 — eius exempla. ibid.
 Eremitica vita commendatur. 282.
 Eruflare, *Psalms. 44.* quid sit. 27.
 Esther. 188.
 Etymologia in periphrasi. 262.
 Evangelicae lectionis pauca loca concionatori explicandi. 201. seq. *Vid. Lectio.*
 Evangelicae sententiae aliis scripturarum & PP. testimoniis confirmandae. 222.
 Eucharistiae figurae. 338. seq.
 Eversionis urbis descriptio. 352.
 Eufemiae, nobilis virginis, alacritas ad martyrium. 216.
 Eugenius pontifex maximus. 294. 420.
 Evidentia. *Vid. Energia.*
 Euphantasioton quid sit. 168.
 Euripus, fretum. 251.
 Eusebius Emisenus. 260. 355.
 Exclamatio quando aptissime cadat. 112.
 — vehementissima. 177. seq.
 — cum apostrophe. 178.
 — ad omnes affectus accommodantur. 403.
 — splendidior atque suavior. ibid.
 Ex-

- Exclamationis consideratio.** 177. seq.
 — eius exempla. 404.
 — pronuntiatio. 394. 404.
 — ei contraria figura. 179.
Exclamationes acutae vitandae. 376. 377.
Exclamatiumculae ubi adhibendae. 110.
Exemplum quid sit. 299.
 — eius virtutes. ibid.
 — per inductionem. 309.
Exemplum & simile argumentandi loca sunt. 299.
 — inter figuras etiam numerantur. ibid.
Exempla qua ratione amplificari debeant. 84.
 — quatenam potissimum animos moveant. ibid.
 — qua ratione augeantur & crescant. ibid. seq.
 — qualiter tractanda sint. 300. seqq.
Exemplorum & similium usus ad faciendam fidem non vulgariter adiuuat. 309.
Exercitatio quid sit. 44.
Exercitus numerosissimi descriptio. 145.
Exordium quid sit. 186. 187.
 — qua ratione instituendum. 187.
 — in genere suasorio. 204.
 — in concionibus, quae de sanctis habentur. 220. seq.
Exordii pronuntiatio. 376. 381. 390. 448.
 — eius vitium. 381. seq.
- Exornatio quid sit.** 81.
 — cur expositio dicatur. 82.
 — ubi praecipue locum habeat. ibid.
 — non tam verbis, quam sententiis, facienda. 85. seq.
 — utilis quae. 291.
 — eius exempla. 82. seqq.
Expositio quid sit. 49.
 — eius pronuntiatio. 380. seq.
Ezechielis animalia quid innuerent. 169.
- F**
- F** Abius. *Vid.* Quintilianus.
Facies dicentis recta sit. 373. 394.
Felicitatis ac Symphorosae (SS.) fortitudo. 68.
Femina animal est inconstans, & affectibus vehementer obnoxium. 68.
Feminae, quae coloribus faciem depingunt, obiurgantur. 163.
 — earum lascivus ornatus notatur. 269. 277. seq.
Femur ferire, auditorem excitat. 393.
Fides, iustificationis radix & fundamentum est. 254.
Figura quid sit. 255.
 — eius usus, & exempla. ibid. seq.
Figurae graece schemmata. 254.
 — maximam ornatus & elegantiae partem continent.

- nent. 255.
 — in loco additae, quid praestent. 279.
 — earum usus. 310. seq.
 — numerus cur certus esse non possit. 310.
 — aut verborum sunt, aut sententiarum. 256. aut eloquutionis. 177.
 Figurae verborum ornatum orationi conciliant, & unde hic ornatus originem ducat. 256. seqq. 259.
 — quo a figuris sententiarum differant. 274. 279.
 — earum consideratio. 261. seqq.
 — earum quattuor classes. 261.
 — I. earum quae verbi repetitione constant. 261. seqq.
 — II. verborum similitudine. 266. seqq.
 — III. contrariis nominibus. 268. seqq.
 — hae tres classes ex triplici proportionis genere manant. 260.
 — IV. in quibus proportio non ita apparet. 274. seqq.
 Figurarum sententiarum duae classes. 279. seqq.
 — I. earum quae ad docendum pertinent. 280. seqq.
 — II. earum quae ad flectendum. 289. seqq.
 Figurarum eloquutionis consideratio. 177. seqq.
 Filiorum corrupta institutio, rerum publicarum exitium est. 162.
 Finitio in periphrasi. 255.
 Flaviani (Radulphi) opus in Leviticum commendatur. 195.
 Fortis viri quid proprium. 286.
 Fortitudo quid sit. 280.
 Fortunae adversae aut secundae conditio. 17. seqq.
 Franciscus, (S.) illiteratus, tot virtutum plantaria sanctitatis exemplo conseviti. 25.
 — cuiusdam illius focii animus quam addictus orationi. 40.
 Frequentatio quid sit. 288.
 — eius usus & exempla. ibid.
 Frigoris dolor quam intolerabilis. 126.
 — corporis illi expositi descriptio. ibid.
 Frontis vitia. 373. 395.
 Furentium indicia. 57.

G

- G**allus (Quintus) 367.
 Gedeonis sacrificium, Christi sacrificium adumbravit. 338.
 Gehennae poenarum magnitudo nulla arte satis amplificari potest. 174.
 Gelboe, *mons.* 405.
 Genealogia attributorum cuiuslibet rei. 52. 54.
 Gestus ad vocem accommodandus. 372. 385. 388. 394. ple-

— pleraque, citra verba, significat. 385. seq.
 — eius exemplum. 393. seq.
 — eius vitia. 392. seqq.
 Gestus ac motus corporis consideratio. 385. seqq.
 Gnomae quid sint. 101.
 Goliae proceritas & fortitudo. 137.
 Gordius martyr. 434.
 Gorgia pedissequa. 156.
 Gorgias Leontinus antiquissimus fere rhetor. 42.
 Gorgonia. 211.
 — femina sanctissima, naturam virilem superavit. 178.
 Gracchis (Tib. & C.) eloquentia miseram caedem attulit. 309.
 Gracchus (C.) pronuntiatione claruit. 368.
 Gradatio quid sit. 265.
 — eius exempla. ibid. seq.
 Graeci quid peius Latinis faciant. 104.
 Graeci doctores eloquentiae laude floruerunt. 138.
 Graecia. 272.
 Grammatici officium. 236.
 Granatensis (Ludovici) liber de orationis & meditationis studio. 209.
 — eiusdem *Guia de Pecadores*. ibid. huius libri argumentum. ibid. seq.
 de Gratiae natura tractatio qualiter instituenda. 228.
 Gregorius M. (S.) 103. 260.
 — exornationibus ubique

scatet. 83.
 Gregorius Nazianzenus (S.) 121. 437.
 — in soluta oratione, Thucydidis; in carmine, Horatii imitator dicitur. 9.
 — Alexandriam, philosophiae perdiscendae gratia, petiit. ibid.
 — vitae contemplativae felicitatem expertus fuit. 140.
 Gregorius XI. 25.

H

Habitus quid sit. 67.
 Hebraica lingua quaedam metra propria habet. 312.
 Hector. 264. 284.
 Helenae pulchritudo. 136.
 Heliodorus. 67. 78. 282. 306.
 Hellepontus. 289.
 Herodes dilemmate convenitur. 77. seq.
 — eius scelestum decretum. 142.
 Hieronymus (S.) 10. 12. 13.
 — in quocumque scriptionis genere eloquentem se prodit. 9. seq.
 — in somnio plagis vapulavit, & quare. 12. seq.
 Hippas. 132. 135.
 Hispania. 181.
 Histrionum levis ars & scena. 451.
 Homerus. 275.
 — Horatio interdū dormire vide-

- detur. 392.
 Homiliarii saeculi XVI. notantur. 64.
 Homiologia vitium est varietati oppositum. 356. 361.
 Homo animal est maxime versatile. 5.
 — nulla re magis a ceteris animantibus, quam dicendi facultate, differt. 7.
 — nudus, contra atque cetera animantia, nascitur. 124.
 — eo nihil est in terris calamitosius. 125.
 Homines laudis & gloriae maxime avidi sunt. 206.
 — qualiter diligendi. 271.
 — eorum duo genera. 210.
 — eorum salus praecipuus concionatoris scopus esse debet. 332.
 Honestum dumtaxat esse bonum, probat Cicero. 78.
 Honoris & gloriae appetitus quam difficulter superetur. 20.
 — quot malorum causa. 21.
 — intentionis puritatem inficit. 16.
 Horatius Flaccus (Q.) 9.
 Hortensius (Q.) plurimum pronuntiatione claruit. 368.
 — a Cicerone secundus. ibid.
 Humerorum in actione vitia. 393.
 Humilis perfectus quis. 93.
 Humilitatis fictae descriptio. 155. seq.
 Hyperbole, latine superlatio. 179.
 — rem supra fidem attollit. ibid. 329.
 — rebus dare solet excedentia fidem nomina. 130.
 — eius exempla. 179.
 Hyperbolus. 303.
 Hypothesis, latine causa, sive controversia. 50.
 — de rebus singulis speciatim quaerit. ibid. 65.
 — ad thesim revocanda est. 52. 70.
 — eius exempla. 117. seq.
 — ad eam tractandam unde sumenda argumenta. 51. 70.
 Hypothyposis quid significet. 140.
- I
- I** Acob. 67. 130. 178. 214. 302. 423.
 — quantum fuerit affectus, quum ei Iosephi mors nuntiata fuit. 129.
 Jeremias etiam in matris utero Spiritu sancto impletus fuit. 24.
 — admirabilis concionator. 64.
 — captivum populum consolatur. 166.
 — eius oratio. 167.
 — lamentationum argumentum. ibid.
 Ierosolymae. 297.
 — earum ruina. 118.
 Ierosolymorum civitas filios suos captivos alloquitur. 166.
 Ie-

- Ierusalem.** 122. 298. 333. — eius exempla. *ibid.* seq.
Iesse. 243. Infantium imbecillitas & pericula. 124.
Iesus. 32. 35. 67. 239. 249. Ingenium ad dicendum aptum rarissimis contingit. 4.
 334. 336. 337. 339. 371. Ingenii humani vena valde angusta est. 64.
Imago similis quid. 149. Ingratus quis. 102.
Imitatio quid sit. 44. Ingrati divinis beneficiis corripiuntur. 350.
 — in pronuntiando cum iudicio adhibenda. 391. Inimicus latens plus metuentus. 103.
 — vitiosa. 394. Iniquus quis. 102.
 — bonorum scriptorum, similes eis nos facit. 432. Iniuriae quid sint. 280.
Impatientia, Zabuli malum. 60. Innocentium parvulorum felicitas exornatur. 82.
Imperatoris quattuor circumstantiae. 196. — eorum caedis pulchra descriptio. 142. seq.
Impiorum in iudicii die timor, & sermo. 158. Intentionis puritas in concionando quam difficulter servetur. 22.
Imprecatio optationi contraria. 183. Interpretatio quid sit. 276.
 — in Scriptura, praesertim in Prophetis ac Psalmis, frequentissima. *ibid.* — eius exempla. *ibid.* seq.
 — eius exempla. 183. 399. Interrogatio magis, quam ceterae figurae, in usu est. 289.
 — usus. 183. — eius exempla. 290. seq.
 — pronuntiatio. 399. — orationem vivam & mobilem efficit. 290. seq.
Improbi quibus verbis simplices ad pravitatem inducant. 158. — eo est ornatior, quo longior. 291.
 — quibus rationibus se in sceleribus consolentur. 160. — ad varietatem orationis conducit. 356.
Impudicitiae dissuadendae ratio. 71. — eius duplex genus; simplex, & figuratum. 289. seq.
Inanis gloriae flatus occultissimus & periculosissimus. 447. — pronuntiatio. 405. seq.
Incrementum in amplificatione. 131. seq. Interrogationum repetitio & ad movendum, & ad orationis varietatem plurimum
Indignationis pronuntiatio, & exempla. 400. seq.

- valet. 179.
 — eius exempla. 180.
 Inventa praeclara, absque elo-
 quutionis & actionis gratia,
 minus utilia sunt. 435.
 Inventio quid sit. 44.
 — eius virtutes. 435. seqq.
 — eius parandae ratio. 442.
 — prima illius forma, dispo-
 sitio. 443.
 — secunda, eloquutio. ibid.
 Inventio & dispositio, pruden-
 tis propria est. 233.
 Invidi descriptio. 59.
 — eius pectus perpetuo dila-
 niatur. 58.
 Invidia, animi tinea est. ibid.
 — bonos plerumque infecta-
 tur. 256.
 — difficulter vitatur. 265.
 — eius virus. 123.
 Imitationis pronuntiatio. 399.
 — eius exempla. ibid.
 Ioab. 253. 403.
 — servorum Davidis benefi-
 cium amplificat. 119.
 Ioannes. 66. 67.
 — Baptista. 302. 404.
 — in utero exsultavit. 269.
 — praecepta vivendi, pro
 cuiusque conditione, trade-
 bat. 98.
 — eius laus. 16.
 Iob. 152.
 — oculos suos magna cura
 custodiebat. 150.
 Ionas. 133. 165. 188.
 Iordanis, *fluvius*. 4. 183. 405.
- Iosaphat. 35.
 Ioseph. 66. 67. 73. 129. 188.
 207. 254. 302.
 Iosue. 73.
 Ira affectus est maxime teter ac
 rabidus. 56.
 — brevis insania est. 57.
 — non numquam indoctis e-
 loquentiam facit. 39. 168.
 — eius effectus & damna. 57.
 Irati hominis descriptio. ibid.
 Ironia, tropus, quid sit. 251.
 — qua ratione intelligatur.
 ibid.
 — eius exemplum. 297.
 Ironia, figura. ibid.
 — eius exempla. ibid. seq.
 401.
 — pronuntiatio. 401.
 Iro pauperior. 357.
 Isaac. 67. 211.
 Isaias in verborum delectu cul-
 tus. 64.
 — eius labia caelesti igne
 purgata sunt. 24.
 Isocolon. 266.
 Israel. 172. 178. 206. 350. 400.
 403. 423.
 Israelitae in Aegypto Mo-
 sis verba audire noluerunt. 18.
 Israelitici populi scelera, & in-
 gratus animus. 158. seq.
 Iuda. 68.
 Iudaea. 122.
 Iudaeorum caecitas. 133.
 — captivitas, eos a Deo dere-
 lictos esse, ostendit. 80.
 — eorum facinus, in Christi
 caede, amplificatur. 88. seq.
 Iu-

Judas Machabaeus. 206.
 Iudiciale causarum genus. 185.
 — praecipue apud rhetores
 in officio fuit. 42.
 Judith. 152. 188.
 Iulia. 50.
 Iuno. 135.
 Iuppiter. 85. 388.
 Iurisconsulti multum de verbo-
 rum proprietate curant. 114.
 Iusiurandum non numquam ad
 veritatem confirmandam ad-
 hibendum. 110.
 — eius pronuntiatio. 403.
 Iustitia vera compassionem ha-
 bet, falsa indignationem.
 102.
 — eius partes duae. 98.

L

L Abrorum in pronuntiando
 vitia. 387.
 Lacrimae, mentis indices sunt.
 387.
 Laetantius Firmianus. 121.
 — Tullianae eloquentiae flu-
 men. 10.
 Laudis appetitus latrunculo
 comparatur. 22. multum a-
 pud homines valet. 206.
 Laurentii (S.) in tormentis lae-
 titia. 215. seq.
 Lausus. 132.
 Lazarus. 217.
 Lectio auditioni praefertur.
 428. seq.
 — eius instituendae ratio.
 425. seq. 428. seq. 442.

— eius recte institutae utili-
 tas. 426. seqq. 433.
 Lectio evangelii breviter & ve-
 nuste recitanda est. 219. tum
 explananda, & qualiter. 220.
 circa hanc rem admonitio-
 nes. 221. seq.
 — eius explicandae metho-
 dus accommodata. 123.
 Lemnus. 289.
 Lentulus (Cn.) pronuntiatione
 plus opinionis consequutus
 fuit, quam eloquentia. 368.
 Leo Papa. 163.
 Lex cur data, si ex ipsa non esset
 hereditas. 334.
 Lia. 36.
 Libellus de venandi arte. 365.
 Libri patrio sermone conscripti
 legendi, & qualiter. 415.
 — verborum copiam confe-
 runt. 425. 431.
 Ligarius. 291.
 Lingua efficacior, quam littera.
 366.
 — mentem praecurrere non
 debet. 448.
 — sua quaeque habet idio-
 mata, phrascs, &c. 236.
 — peregrinae linguae phra-
 ses & idiomata fugere debe-
 mus. 237.
 Litterae eiusdem nimia assidui-
 tas vitanda. 313.
 Livii (T.) patavinitas. 237.
 Loci unde argumenta sumun-
 tur. 25. seq. quid sint. 53.
 — eorum scriptores. ibid.
 — eorum tria genera; inter-

- na, externa, & media. 81.
 — eorum divisio in artificia-
 lia, & artis expertia, expo-
 nitur. 53. seq.
 Locus, qui ab effectibus & ad-
 iunctis ducitur, fecundissi-
 mus est. 56. 57. seq.
 — a genere rei. 59. seq. vim
 habet. 60.
 — a contrariis. ibid.
 — ex circumstantiis rerum &
 personarum. 65. seqq.
 Loquacitas copiosa notatur.
 238.
 Lucifer. 183. 401.
 Lucilius, *Senecae amicus*. 26.
 Lucilius, *poeta*, in verborum
 traiectione assiduus est. 313.
 Luxus ruinae amplificatur.
 120.
 Lybanus sophista, oratoriae
 professor, & idolorum cul-
 tor. 9.
 Lysiae oratio pro Socrate, phi-
 losopho non conveniebat.
 320. seq.

M

- M** Achabaeorum matris for-
 titudo. 68. 119. elegan-
 ti descriptione amplificatur.
 149. seq.
 Macrologia quid sit. 360.
 — eius exemplum. ibid.
 Magdalena. 294.
 Magos per aliam viam in do-
 mum suam reversos fuisse,
 utilitati nostrae conveniens
 fuit. 94.

- Malachias episcopus. 300.
 Mansuetus perfecte quis. 93.
 Manus per se ipsae prope lo-
 quuntur. 387.
 — earum pronuntiatio. ibid.
 392.
 — huius vitia. 392. seq.
 Manuum ac digitorum quae fi-
 gura probetur. 388.
 Marcus Antonius. 233.
 Maria *virgo*. 165. 256. 294.
 — virginibus in exemplum
 proponitur. 341.
 — eius laus. ibid. 356.
 Mariae, *sororis Moysi*, pius erga
 Deum affectus. 87.
 Marius (C.) 104.
 Mars. 417.
 Martini (S.) laus. 258.
 — eius invictus animus. 104.
 Martyrum constantia. 215.
 — divinam bonitatem &
 caritatem declarat. 217.
 — infideles ad fidem &
 martyrium excitat. ibid.
 — eorum virtutes qualiter
 amplificandae. 214.
 Mathathias, morti proximus,
 filios suos ad religionis de-
 fensionem hortatus est. 73.
 Matthaeus evangelista (S.) 263.
 — eius obedientia & caritas.
 105.
 — vocatio quam mirabilis.
 104.
 Medea. 101.
 Mediolanum. 21.
 Medium *verbum* quid sit. 54.
 Mediorum ratio ex fine sumen-
 da-

- da est. 43.
 Megara. 189. 212.
 Melaniae, (S.) defuncto viro
 & liberis, mirabilis in Chri-
 stum affectus. 110.
 Melchisedech divinum *euchari-*
stiae sacramentum praefigu-
 ravit. 338. seq.
 Memoria quid sit. 44.
 Menandri opinio a Plutarcho
 corrigitur. 5.
 Mens inter Dei dona praestan-
 tissimum est. 58.
 — eius vis. 450.
 Mercatoris, quaerentis marga-
 ritas, parabola exornatur.
 83.
 Messana. 394.
 Metaphora quid sit. 244.
 — necessitate genita, dele-
 ctatione postea celebrata
 fuit. ibid.
 — eius quadruplex vis, &
 exempla. 245.
 — eius nimius usus notatur.
 245. seq.
 Metaphorae humiles. 245.
 — in metaphoris quae vitia
 cavenda. ibid. seq. 425.
 Metonymia quid sit. 247.
 — eius varii modi & exem-
 pla. ibid. seq.
 — hypallage dicitur. 248.
 Metus in concionando incom-
 moda. 374. 389. 430.
 Milo (*T. Annii*) 104. 244. 250.
 379.
 Minerva. 103. 255. 395.
 Minuendi ratio eadem fere est,
 quae amplificandi. 138.
 Miracula sanctorum an praedi-
 canda. 216.
 — Dei bonitatem, carita-
 tem, &c. ostendunt. ibid. seq.
 — desiderium serviendi Do-
 mino in piis accendunt. 217.
 — ad divinae gratiae & po-
 tentiae admirationem confe-
 runt. 218.
 — improborum caecitatem
 accusant. ibid.
 Misael. 73.
 Miseri quinam. 259.
 Modica unde ita dicta. 332.
 Modus quid sit. 69.
 — eius partes. ibid. seq.
 Monachus in patria sua perfe-
 ctus esse non potest. 78. seq.
 Monotonia quid sit. 378. seq.
 389.
 Moralis doctrinae finis. 91.
 Mors omnia aequat. 247.
 — quibus timenda. 295.
 Mortis animi corporisque dis-
 crimen. 145.
 Moses. 18. 87. 130. 131. 182.
 194. 195. 206. 207. 214.
 302. 350. 405.
 Mulier quanta mala pepererit.
 249.
 — cuius animus corruptus,
 & corpus quoque, est. 285.
 Mulieres, os coloribus depin-
 gentes, acriter obiurgantur.
 342. seq.
 — earum convictus viris pe-
 riculosus. 109.
 Mundus occasum sui testa-
 tur.

tur. 267. 316.
 — eius conversio, per apostolos facta, amplificatur. 128.
 Mundum consilio administrari, probatur. 74. seq.
 Murena (L.) 306.

N

NAaman Syrus a servis extitatur, ut prophetae obediatur. 206.
 Nabal *Carmelus*. 403.
 Nabuchodonosor. 190.
 Narratio quid sit. 186.
 — eius quattuor virtutes, & qua hae ratione obtinendae. 188. seq.
 — eius pronuntiatio. 382.
 — — — — — difficilior est, quam argumentationis & amplificationis actio. ibid.
 Narrationum quattuor genera, quae in conciones incurrunt. 188.
 — I. genus, quod res gestas, & SS. exempla commemorat. 188. seq.
 — II. quod amplificandi causa sumitur. 189. seq. maiorem eloquentiae vim, quam primum, desiderat. 190.
 — III. quod allegoriae, mysticisque Scripturae sensibus deservit. ibid. seqq.
 — IV. quod in evangelica lectione explananda versatur. 195. 219. seqq. *Vid. Con-*

cionandi III. modus.
 Nascendi lex. 433.
 Nathan Davidis adulterium accusavit. 139.
 Natura nihil magnum effici cito voluit. 433.
 Nepotianus. 67. 178. 439.
 Nero, *imperator*. 303.
 Noe. 130. 214. 302.
 — dominicae passionis figura exstitit. 338.
 Nominibus multis synonymis eandem rem exprimere, verae eloquentiae contrarium est. 430.
 Notatio ad descriptiones personarum accommodata est. 152.
 — unde ducatur. ibid.
 — eius exempla. ibid. seq.
 Notatio in periphrasi. 252.
 Novatiani vituperatio. 281.
 Novatus. 56.
 Numantia. 213. 248.
 — viribus probata. 160.

O

OBdurati cordis periculum maximum. 349.
 Obediens perfecte qui. 93.
 Obedientiae quid proprium. 422.
 Obscuritas in oratione notatur. 234. 238.
 — in rebus vitanda. 239.
 Obsecratio post rem probatam, aut amplificatam, appositissime cadit. 180.
 ma-

- magnam vim habet, si a caritate proficiscatur. 181.
- ex eius usu Hispanus quidam concionator laudatur. ibid.
- Obsecrationis pronuntiatio. 399.
- exempla. ibid.
- Occasio quid sit. 69.
- quo differat a tempore. ibid.
- Occupatio quid sit. 291.
- eius exempla. ibid.
- Odia vetusta qualiter extirpanda. 204.
- Oniconomiton quid sit. 362.
- quinam hoc vitio peccent. ibid.
- Optatio affectum animi desiderantis explicat. 182.
- eius exempla. ibid. 398.
- pronuntiatio. 398.
- Oratio omnis in triplici genere versatur, expositione, amplificatione, argumentatione. 49. 184. 380.
- perfectum quoddam corpus est. 227.
- non una omnibus convenit. 320.
- pro auditorum varietate varianda est. 322. seq.
- erudita quae. 81. 161. seq.
- admirabilis & iucunda. 236.
- hebes, sordida, sterilis, subtristis, ingrata, vilis. 362. seq.
- Orationis genus, definitio, causa, effectus, partes, adiuncta, similia, dissimilia. 55. seq.
- genus speciosissimum. 251.
- virtutes. *Vid.* Eloquentio.
- praecipua virtus, ut viva & mobilis sit. 290.
- perfectae sex partes, exordium, narratio, propositio & partitio, confirmatio, confutatio, & conclusio seu peroratio. 186. *Vid.* suis quaeque locis.
- aptae vis atque potentia. 5. 6. 7.
- numerosae & apte constructae vis. 313.
- Orationes ornatissimae quae. 71.
- Oratio, *virtus*, bonorum omnium fons & initium est. 56.
- qualiter commendanda & tractanda. 227. seq.
- Orationis studium commendatur. 263.
- caritatem mire adiuvat. 36.
- concionatori prae omnibus necessarium est. ibid. seqq.
- Orationi studentium praecipua cura. 39. seq.
- Orator vir bonus sit. 7.
- est vir bonus, dicendi peritus. 27.
- quid supra dialecticum addat. 86.

- plurimum a saltatore abesse debet. 393.
 — affectibus movendis praecipue incumbat. 91.
 — fit, poeta nascitur. 64.
 — miser & pauper. 235.
 Oratoris officium & finis. 43.
 — partes quinque. *ibid.* seq.
 — qua ratione parentur. 44.
 — tria munera; docere, delectare, & flectere. 38.
 Oratorum affectus. 170.
 — insignium raritas, eiusque rei causa. 451.
 Oratoribus apud Romanos summa semper dignitas fuit. 6.
 Ordo quid sit. 230.
 — eius utilitas, ac necessitas. *ibid.*
 — duplex; unus dispositionis. *ibid.*
 — alter doctrinae. 231.
 — rectus dicendi. 49.
 Origenes. 194.
 — in mysticis Scripturae sensibus explicandis diligentissimus. 190.
 — a Hieronymo notatur. 191.
 Origenis libri in Pentatheucum commendantur. 195.
 — regula circa sensus mysticos. 192. seq.
 Ornate dicere, proprium est eloquentissimi. 233.
 Ornatus haud parum causae confert. 240.
 — qualis esse debeat. *ibid.* seq.
 — rerum naturam sequi debet, non affectari. 260.
 — pro ratione materiae debet esse variatus. 325.
 — duplex est. 241.
 — I. in singulis verbis quid exigat. 241. seq. *Vid.* Tropi.
 — II. quid in coniunctis. 254. seqq.
 — triplex; in verbis, in sententiis, in compositione. 358.
 — eius tres partes; tropi, figurae, compositio. *Vid.* Suis quaeque locis.
 — translatis verbis praecipue constat. 241. 242.
 — in verbis coniunctis, quibus constet. 254.
 Ornatus opposita vitia. 359. seqq.
 Os oratoris quale. 372. 374.
 Orosius (Hieronymus) periphrasi frequentissime utitur. 252.
- P
- P Alaeftina. 9.
 Pallas. 250.
 Panfa. 359.
 Paradiastole quid sit. 270.
 — eius exempla. 271.
 Parentes, qui filiorum curam non habent, patriae vocibus obiurgantur. 161. seq.
 Paris. 137.
 Par-

- Participiorum usus. 317. — eloquentia commendatur. 315.
 Partitio quid sit & quotuplex. 195. seq. — rara laetitia & congratulationis genus. 215.
 Partitionis tres virtutes. 196. — epistolae ad Romanos & Hebraeos. 203.
 — eius vitia. ibid. in Pauperibus Christus vestitur. 164.
 — ea vitandi, partitionisque recte instituendae ratio. 197.
 Partium enumeratio rem valde amplificat. 120.
 Patiens perfecte qui. 93.
 Patientia bonum Christi est. 60.
 — aedificat ad gloriam. 61.
 — eius laus. 208. 317.
 — necessitas & utilitas. 204. seq.
 Patriae salus civium moribus & honestate continetur. 162.
 Patris-familias parabola qualiter exponenda. 220.
 Paulla de Blefillae filiae morte consolatur. 164. seq.
 Paullus (S.) 263. 302. 316. 404. 407. 410.
 — doctor gentium. 94.
 — omnibus se se accommodabat. 98.
 — corpus suum castigabat, ne reprobus fieret. 150. seq.
 — in tertium caelum sublatu fuit, ut inter angelos disceret, quod inter homines doceret. 24.
 — se ipsum in imitationis exemplum fidelibus proponebat. 26.
 Paulli insignis caritas. 29. seq. 88. 169. 336. seq.
 — infractus animus. 271.

- eloquentia commendatur. 315.
 — rara laetitia & congratulationis genus. 215.
 — epistolae ad Romanos & Hebraeos. 203.
 in Pauperibus Christus vestitur. 164.
 Peccatorem convertere maius est miraculum, quam mortuum suscitare. 18.
 Peccati metum quatenus accuant. 173.
 Peccata facile admittentes arguuntur. 90.
 — quo orationis genere perstringendi. 349.
 — letalia non deferentes, interrogationum repetitione obiurgantur. 180.
 Peccatorum varia genera per morbos corporis designantur. 96. seq.
 Perditorum hominum sermocinatio. 157.
 Peribole quid sit. 317.
 — quo a periodo differat. ibid. seq.
 — ne sit iusto prolixior. 318.
 — eius exemplum. ibid.
 — usus. 319.
 Pericles. 8.
 Periergia quid sit. 361.
 Periodus, latine ambitus, comprehensio, &c. 314.
 — isocolon quae. 315.
 Periodi usus. 319.
 — eius duplex forma; una qua caesim vel membratim,

- altera qua circumscripte dicimus. 315. seq.
 — prioris exemplum. 316.
 — posterioris. ibid. seq.
 Periodi bimembris, trimembris & quadrimembris exempla. 315. seq.
 Periphrasis quid sit. 251.
 — tribus modis constat; etymologia, notatione, & finitione. 252.
 Periphrasis & antonomasiae distinctio. 248.
 Perorandi modus commodissimus. 202.
 — eius exemplum. 203.
 — alius modus. ibid.
 Peroratio quid sit. 186. 198.
 Perorationis consideratio. 198. seqq.
 — eius affectus. 201. seq.
 — partes. 198. 208.
 — *Vid.* Conclusio.
 Personarum undecim circumstantiae. 66.
 Perspicuitas, prima in dicendo virtus. 238.
 — puritati antefertur. 239.
 — propriis verbis praecipue constat. 241. seq.
 — in verbis qualiter comparabitur. 237.
 Petrus *Apostolus* (S.) 38. 66. 67. 263. 302. 412.
 — eius interrogatio. 220.
 Phantasiae latine visiones appellantur. 168.
 Pharaon cur draco vocetur. 243.
 Phariseorum levitas amplificatur. 297.
 — eorum malitia quanta. 105.
 Pharmacopolarum ars. 61.
 Philaenae in iudicando incommoda. 435.
 Phinaees. 75.
 Phormio philosophus merito ab Annibale reprehensus. 417.
 Picilogia quid sit. 361.
 Pictoris exemplo naturam imitari edocemur. 371.
 Pictorum sollertia. 135.
 Picus Mirandulanus. 313.
 Plato. 247. 300.
 — certissimus auctor. 249.
 Pleonasmus quid sit. 359.
 — eius exempla. ibid. seq.
 Plutarchus omnium philosophorum gravissimus. 5.
 — cur ita dicatur. 299.
 Poeta nascitur. 64.
 Poetis plura, quam oratoribus, licent. 246.
 Polemon Sophista histrionem submovit a praemiis, ob manuum soloecismum. 388.
 Polybia. 102.
 Polypoton. 264.
 Pompeius (Cn.) 50. 73. 264.
 — multa bella felicissime confecit. 69.
 Pontus. 284.
 Populus qua re maxime capitur. 99.
 Praecepta evangelica quid sint. 281. 445.
 Praeceptor aliud docens, atque

- que agens, obiurgatur. 27.
 Praecisio quid sit. 291.
 — eius exempla. *ibid.* seq. 401. seq.
 — ad energiam pertinet. 354.
 — eius pronuntiatio. 401.
 Praelatorum vitia accusantibus non est leviter adhibenda fides. 438. seq.
 Praesumptio. *Vid.* Prolepsis.
 Precandi studium qualiter suadendum. 209.
 Priamus. 264. 284.
 — eius in Helenam amor. 136. seq.
 Principis laudandi ratio. 303.
 Probationes qui comparentur. 54. 56.
 — earum pronuntiatio maxime varia esse debet. 382. seq.
 Proditionis patriae facinus gravi dicendi figura amplificatur. 330.
 Prolepsis inter figuras eloquutionis numeratur. 107.
 — unde oriatur. 107. 108. 112.
 — concionatoris & oratoris propria est. 111.
 — lectione comparanda est. *ibid.*
 — confutationis naturam refert. 112.
 — eius diversae species. 108.
 Pronuntiandi virtus summa est. 395.
 Pronuntiatio quid sit. 44. 364. — utilissima rhetoricae pars & ad scribendum difficillima. 364. seq.
 — extrema orationis forma est. 367.
 — miram vim & potestatem habet. *ibid.* seq.
 — ex prudentia plurimum pendet. 391.
 — in concionis partibus, sententiis ac verbis diversa est. 397.
 — concionatori necessaria est. 423.
 Pronuntiationis quattuor virtutes; nempe ut sit emendata, dilucida, ornata, & apta. 372. 449.
 — emendatae consideratio. 372. seq.
 — dilucidae. 373. 449. seq.
 — ei opposita vitia. 374.
 — ornatae. 375. seqq. 449.
 — aptae. 377. 449. seqq.
 — ei opposita vitia. 378. seq.
 Pronuntiationis necessitas & utilitas. 366. seqq. 451.
 — difficultas. 448. seq. 451.
 — eius duae partes; vox, & gestus. 369.
 — eius vitia. 389. seqq.
 — praecepta omnia eo referenda sunt, ut naturam sequamur. 370. seq. 408.
 Pronuntiationi exercendae exempla. 409. seqq.
 Pronuntiatione quanam valeant. 368.
 Pro-

Prophetarum Vet. Test. eximia
 caritas. 30.
 — eorum scripta metaphoris
 & allegoriis plena sunt. 243.
 251.
 — aliis etiam tropis. 253.
 seq.
 Proportio quid sit, adductis
 exemplis ostenditur. 257. seq.
 — eius triplex genus. 260.
 Proportione verborum quinam
 patres delectati. ibid.
 Propositio, *collectionis pars*,
 quid sit. 80.
 — *orationis perfectae pars*,
 quid. 186. 195.
 — eius consideratio. ibid.
 seq.
 Propositionum probatio quali-
 ter instituenda concionatori.
 112.
 Proprietas verborum. 237.
 Protheus. 98.
 Prudentiae praecipuum opus.
 320.
 — eius iudicium, & geren-
 darum, & dicendarum re-
 rum moderator est. 320.
 Pseudo-apostolorum descri-
 ptio. 249. seq.
 Ptolemaeus Almagranus. 181.
 Publii Mimi dictum. 68.
 Pudica perfecte quae. 93.
 Puellae optimae & elegantissi-
 mae descriptio. 144.
 Pulchritudo in quo consistat.
 257.
 — ad amorem incitat. 171.
 Pupianus Cyprianum episco-

pum esse negabat. 297.
 — acri ironia perstringitur.
 ibid. seq.
 Pyrrhus, Epirotarum rex. 5.
 Pythagoras. 300.

Q

Q Vadraginta martyrum
 cruciatus & insuperabi-
 lis constantia. 125. seq.
 Quaestio finita. *Vid.* Hypothe-
 sis.
 — infinita, seu *thesis*, vel ad
 cognitionem, vel ad actio-
 nem pertinet. 50.
 — quae ad actionem per-
 tinet, triplex. ibid.
 — quae ad cognitionem,
 duplex. 51.
 — qua ratione singulae
 tractentur. ibid. seq.
 Quaestionum varia genera: pra-
 cticum, & speculativum. 45.
 finitum, & infinitum. 50. 65.
 117.
 Quaestiones difficiles in con-
 cionibus tractantes notan-
 tur. 322.
 Quintilianus. 8. 111. 431.
 — rhetoricae artis princeps.
 39. 339.
 — rhetorum disertissimus. 6.
 — pervenisse se ad aliquod
 nomen ingenii asserit. 169.

Ra-

R

Rachel quanto filiorum a-
more flagraret. 29.

Ratio quid sit. 80.

— a quibus locis ducatur. 81.

Rationis confirmatio quid. *ibid.*

Ratiocinari ac disputare, ratio-
nalis creaturae proprium
est. 1.

Ratiocinatio idem Tullio est,
ac syllogismus. 73.

— eius partes. *ibid.* seq.

— exemplum. 74. seq.

— pronuntiatio. 408.

Ratiocinatio duplex ; altera
quae amplificationi deservit,
altera quae sententiarum fi-
gura est. 285.

— *figura*, quid. *ibid.*

— quo a subiectione dif-
ferat. *ibid.*

— eius exempla. *ibid.*
seq.

— ad concionandi ratio-
nem utilissima est. 286.

Rabirius Posthumus. 108.

Redemptionis beneficium o-
mnium Dei beneficiorum
maximum. 173.

— ab incremento ampli-
ficatur. 131. seq.

— qua ratione ampli-
candum. 349. seq.

Regulus. 303.

— eius historiae tractandae
ratio. 223.

Religio , virtutum moralium

praestantissima est. 35.

Repetitio quid sit. 261.

— eius exempla. *ibid.* 406.

— pronuntiatio. 406.

Res, sive negotium, quid sit. 69.

Rerum septem circumstantiae,
seu attributa. *ibid.* seq.

Resurrectio corporum magna
verborum maiestate a Iobo
praedicta. 110.

Rhetor non uno semper modo
loqui debet. 48.

Rhetoris officium tribus gene-
ribus, demonstrativo, deli-
berativo, & iudiciali conti-
netur. 42.

— *Vid.* Orator.

Rhetorica quid sit. 7. 41. 320.

— eloquentiae pars est. *ibid.*

— quo modo inventa. 2. seq.

— ad concionandi officium
in primis utilis. 3. seq.

— non suadendi opifex, sed
adiutrix, est, ex Plutarcho. 5.

— dialecticae finitima est, &
sub illa continetur. 45.

— sine cum dialectica conve-
nit, quaestionibus tamen,
auditoribus, & dicendi ra-
tione differt. *ibid.* seq.

— manui extensae similis. 46.

— commendatur. 11.

— ecclesiastica quaestiones
practicas saepius tractat. 45.

Rhetoricae utilitas & necessi-
tas. 3. seqq. ad 14.

— eius materia. 41. seq. va-
riae

riae hac de re opiniones. 42.
 — praecepta divino Spiritu
 non obsistunt. 434.
 Rhetoricae & dialecticae offi-
 cia, pictorum exemplo ex-
 plicantur. 46.
 — objectiones adversus Rhe-
 toricae studium diluuntur.
 13. seq.
 — in Rhetorica hoc perpe-
 tuum, ut nihil perpetuo fieri
 debeat. 221.
 Roma. 21. 247. 451.
 Ruffinus. 12.

S

Saba regina, Salomonis ma-
 gnificentiam admirata fuit.
 215.
 Sabellicus fus. 246.
 Saeculi corruptio eleganti di-
 stributione ostenditur. 284.
 — eius amatorum conditio.
 18.
 Salem. 339.
 Sallustius Catilinae, Caesaris,
 & Catonis personas descri-
 psit. 172.
 Salomon. 34. 69. 100. 133.
 158. 162. 215. 298. 403.
 418. 420. 450.
 — in *Prov. lib.* sententiis fre-
 quentissime utitur. 100.
 Samaria. 183. 350.
 Samaritana mulier. 220. 412.
 Sanctitas & puritas vitae ma-
 gnam accessionem doctrinae
 addit. 416.
 Sancti viri sine arte eloquentes

sunt. 315.
 — eorum duae utilitates. 83.
 Sanctorum laudes qualiter in-
 stituendae. 210. seq. & am-
 plificandae. 211. seqq. 214.
 seqq.
 Sapiens similis Deo est. 213.
 — eius animus insuperabilis
 est. ibid.
 Sapientia studio & obedientia
 comparatur. 416.
 — cur modo sponsa, modo
 soror appelletur. 418.
 Sapientiae laudes. 162. seq.
 Sara. 67. 211.
 Sardanapalus. 303.
 Sareptana vidua in exemplum
 eleemosynae proponitur. 84.
 Saul. 441.
 — in obedientiae portu nau-
 fragium fecit. 422.
 Scelera sex quae odit Domi-
 nus. 97.
 Schismaticus gravius peccat i-
 dololatra. 134.
 Scipio. 133. 136. 245. 251.
 252.
 — Carthaginis & Numan-
 tiae everfor. 248.
 Scribendi ratio & methodus.
 442. seqq.
 Scripturae sacrae verbis vis fa-
 cienda non est. 222.
 — eius testimonia qualiter
 tractanda. 224.
 — circa scripturae loca ad-
 ducenda quattuor observa-
 tiones. 222. seq.
 Scripturae exempla ad pronun-
 tia-

- riationis exercitationem adducuntur. 409.
 — eius mystici sensus. 190.
 — quando adhibendi. 191. seqq.
 — eorum tractandorum ratio. 193. seqq.
 Scripturae sacrae, eloquutionis ornatus deest. 312. multum tamen decoris inest. ibid.
 Seneca (*L. Annaeus.*) 48. 103. 138. 214.
 Sententia quid sit. 100. 102.
 Sententiae duplicis generis; sine ratione, & cum ratione. 100.
 — breves qua ratione tractandae. 85.
 — quatenus probandae. 100.
 Sententiae & epiphonemata multum decoris & utilitatis orationi afferunt. 99.
 Sententiarum varia genera. 100. seqq.
 — varia exempla, e sacris litteris excerpta. 397. seqq.
 — earum copiae parandae quinam auctores legendi. 432.
 Sententiis Seneca & Gregorius abundant. 103.
 Serenus. 213.
 Sermo pro auditorum varietate accommodandus. 437.
 — eius proprietas in reddendis Scripturae locis commendatur. 223.
 — duo in hac re vitia. ibid.
 Sermocinatio quid sit. 156.
 — inter sententiarum figuras numeratur. ibid.
 — in sacris litteris frequens. 162.
 — eius exempla. ibid. seqq. 406.
 — in Sapientiae libro frequentia sunt. 157.
 — & in Basilio atque Gregorio Nazianzeno. 160.
 — eius usus. 159. seqq.
 — pronuntiatio. 166. 406.
 Sermocinationes personarum ad descriptiones plurimum conferunt. 149.
 Sicilia. 136.
 Siderum magnitudo. 181.
 Siloe. 243.
 Simeon *propheta*. 152.
 — eius pius zelus, Christi praesentia muneratus fuit. 122.
 Simeon Stylites, litterarum rudis, multas nationes, in columna manens, ad fidem Christi revocavit. 25.
 — eius vitam Theodoretus scripsit. ibid.
 — eius vitae genus novum & inauditum. 110. seqq.
 Simile per inductionem. 309.
 Similia ne ex rebus sordidis, humilibus, obscuris, &c. sumantur. 306.
 — qualiter tractanda. ibid. seqq.
 — ea inveniendi ratio. 305. seqq. in

- in Similibus quae observanda. 305.
 — *Vid.* Exemplum.
 Similiter cadens, & desinens,
 quid sit. 267.
 — huius figurae exempla. ibid.
 Similitudo quid sit. 304.
 — quattuor modis sumitur;
 per contrarium, per nega-
 tionem, per brevitatem, per
 collationem. ibid. seq.
 — ad quid deserviat. 253.
 — quum a maiori vel mino-
 ri ducitur, imparitas maxi-
 me conspicua esse debet.
 308.
 — rebus obscuris explicandis
 apta, multum ad energiam
 valet. 353.
 — eius exempla. ibid.
 Similitudine magnopere ca-
 piuntur animi. 244.
 Similitudinum vis. 311.
 — varia genera. 149. seq.
 — plurimum ad amplifi-
 candum valent. ibid.
 Simo. 189.
 Simulatio, quamlibet custodia-
 tur, se prodit. 423.
 Sina, *Arabiae mons.* 333.
 Sion. 166. 183. 350. 353. 400.
 Socrates. 172.
 — eius de Lyfiae oratione iu-
 dicium. 320. seq.
 Socrates Platonicus in exemplis
 per inductionem plurimus
 est. 309.
 Soloecismus quid sit. 236.
 Sonus quisnam orationibus
 conveniat. 375.
 Sonis homines, ut aera tinnitu,
 dignoscuntur. 372.
 Sores quid sit. 78.
 — eius exempla. ibid.
 Sorores adoptivas domi foven-
 tes, acriter a Chrysofthomo
 obiurgantur. 109. 181.
 Spiritus sanctus. 122. 170. 218.
 219. 261. 333.
 — praecipua est orationis
 causa. 55.
 Spiritus sancti virtus. 211.
 — afflatus ad pios affectus
 necessarius est. 169.
 — assistentia concionatori
 necessaria. 423.
 — plus ad bene dicen-
 dum facit, quam omnia rhe-
 torum praecepta. 423.
 — gratia necessaria est ad
 virtutum dignitatem aesti-
 mandam. 214. seq.
 — unctio de omnibus men-
 tem docet. 263.
 — dona intellectum illu-
 strant. 416.
 Spiritus vocis qualiter regen-
 dus. 374.
 Stagirites, monachus arrepti-
 cus. 130. 434.
 Stilponis philosophi dictum, o-
 mnia bona mea mecum porto,
 amplificatur. 212. seq.
 Stilus optimus dicendi magi-
 ster. 433.
 — in vertendis quibusdam
 SS. PP. scriptis conmode
 exer-

exerceri potest. 433. seq.
 Stili exercendi utilitas. 433. ratio. 445.
 Stratoclis vox acrior. 391.
 Studium quid sit. 67.
 Suasorii generis consideratio. 203. seqq.
 Subiectio quid sit. 79.
 — inter figuras numeratur. 282.
 — eius exempla. 79. seq. 282. seq.
 — usus. 282. seq.
 — pronuntiatio. 408.
 Sublime dicendi genus vim habet maximam. 329. 345.
 — quae verba & ornatum exigat. 329.
 — quas figuras. 331.
 — quo a genere temperato distet. 335.
 — eius exempla. 329. seq. 335. seqq. 342. seq.
 — quid in eo cavendum. 344.
 Submissum dicendi genus quem orationis habitum & ornatum requirat. 328.
 — quando adhibendum. 333.
 — diutius, quam grande, tolerari potest. 344.
 — quaestionibus solvendis aptum. ibid.
 — eius exempla. 333. seq. 338. seq.
 Superbi monachi morum & ingenii descriptio. 254.
 Superbia quid sit. 249.

Superlatio. *Vid.* Hyperbole.
 Suspicio tacita atrocior est, quam diserta explanatio. 292.
 Sustainatio quid sit. 296.
 — eius exempla. ibid. seq.
 — usus. 297.
 Syllogismus perfectissima argumentandi forma est. 73.
 — quibus partibus apud dialecticos & rhetores constat. ibid. seq.
 — eius exempla. 74. seq.
 Synathrismus quid sit. 278.
 — frequentationi similis. ibid.
 — plurium rerum congeriem continet. 137.
 — eius exempla, & usus. ibid. seq.
 Synecdoche quid sit. 246.
 — quot modis fiat, & eorum exempla. ibid. seq.
 Synecdoches & metaphorae differentia. 247.
 Synonymia quid sit. 241. seq. 276.
 — *Vid.* Interpretatio.

T

T Apinosis quid sit. 359.
 — eius exempla. ibid.
 Tarditas nimia vitium est. 374.
 Tarsus. 289.
 Tautologia quid sit. 86. 266. 355. 359.
 — eius exemplum. 266.
 Te-

- Temeritas quid sit. 280.
 Temperatum dicendi genus
 quodnam orationis genus re-
 quirat. 228. seq.
 — nervorum parum, suavi-
 tatis plurimum habet. 329.
 — quando adhibendum. 333.
 — ad delectandos animos su-
 scipitur. 345.
 — in quem finem assumen-
 dum. 346.
 — eius exempla. 334. seq.
 — 340. seq.
 — usus. 346.
 Tempus quid sit. 69.
 — pulcherrimum immorta-
 lis Dei munus. 307.
 Temporis habenda est ratio.
 ibid. seq.
 — eius iactura irreparabilis
 est. 307.
 Tentationes cur a Deo permit-
 tantur. 93.
 Theodectes. 170.
 Theodoretus. 25.
 Theologia mystica divinarum
 rerum dignitatem, magis a-
 mando ac degustando, quam
 intelligendo, cognoscit. 191.
 ad Theologiae pleniorē intel-
 ligentiam, ceterarum artium
 studia necessaria sunt. 3.
 Theriste deformior. 357.
 Thesis, latine propositum. 50.
 — quid sit, & quo ab hypo-
 thesi differat. ibid. 65. 118.
 — non numquam ad hypo-
 thesim deflectitur. 71.
 — ad eam tractandam unde
 argumenta sumantur. 51.
 Thomas Aquinas (S.) 186.
 228.
 Thucydides. 9.
 Tiberius Gracchus. 133. 134.
 Timoris Dei utilitates. 173. seq.
 Timotheus. 419.
 Titi senioris civilitas. 303.
 Timolus, *mons.* 284.
 Tobias. 152. 188.
 Topica, argumentorum sedes
 sunt. 252.
 — enumerantur. 253.
 Topicorum ars quibus similis.
 61.
 — eius summa. 54.
 Totum, partium enumeratione,
 amplificatur. 120.
 — tribus modis accipitur.
 ibid. seq.
 Transductio quid sit. 263.
 — eius exempla. ibid. seq.
 Traiani sanctimonia, & cle-
 mentia. 303.
 Transilio ad docendum praeci-
 pue pertinet. 279.
 Translatio plurimum saepe lu-
 cis affert. 114.
 — eo translationis genere
 definendum est, quo incipi-
 tur. 251.
 — *Vid.* Metaphora.
 Translatis verbis cur magis de-
 lectemur, quam propriis.
 244.
 Trinitatis unitas submisso di-
 cendi genere pertractanda
 est. 333.
 Tropologia ad mores forman-
 dos

- dos pertinet. 190. — ea rebus accommodare, difficillimum. 425.
 — eius ab allegoria distinctio. ibid. Verborum varia genera, & eorum exempla. 242.
 Tropus quid sit. 244. — eorum quicquam delectus habendus. 239. 242.
 Tropi plurimum ornatus orationi conciliant. 252. — inanum turba notatur. 238. 278.
 — a topicis originem ducunt. ibid. seq. — nimia & affectata cura notatur. 325. 333. seqq. 430.
 — ad omnem usum, cui topica, deserviunt. 253. — traectio vitanda. 313.
 — & ad intelligenda prophetarum scripta. ibid. — copia & electio cum iudicio paranda. 427. seq.
 — in prophetis frequentissimi. 242. seq. — legendo & audiendo paratur. 428.
 — eorum exempla. 243. — in quid paretur. 430. seq.
 Tubero. 137. 245. — eius utilitas. 429. seq.
 Turnus. 132. 251. — rectus usus multa lectione & auditione comparandus est. 428.
 Tyrus. 118. eius casus & ruina. 138. — singularium pronuntiatio. 384. seq.
 Tyfias rhetoricae inventor. 3.


V

- V**ariandae orationis modi & exempla. 350. seqq.
 Varietas orationis non vulgaris est virtus. 350.
 — qua ratione paretur. ibid. seq.
 Varro. 76.
 Vcalegon. 248.
 Venatorum disciplina. 446.
 Verbum vitiosum quodnam. 359.
 Verbi eiusdem assiduitas vitanda. 313.
 Verba inusitata fugienda. 431.
 — obscena, sordida & humilia vitanda. 237.
 Veritas, sermonis simplicitate gaudet. 314.
 Verres. 264. 296.
 — eius vitia. 130. seq. 136.
 Victoris (S.) exemplum nobis utile. 83. seq.
 Vidas, (Hieronymus) poeta clarissimus, sordidas gentiliū poetarum Musas expurgavit. 4.
 Vincentii martyris (S.) alacritas. 216.
 — constantia. 107.
 Vincentius Ferrerius (S.) qua ratione infinitam hominum multitudinem ad poenitentiam

- tiam traxerit. 174.
 Vir perfectus nihil perdere potest. 213.
 — nisi fortis sit animo, nec viri nomine censetur. 301.
 Virgilius. 248.
 Virgines qualiter se gerere debeant. 340.
 — Mariam V. imitari debent. 341.
 — immodico ornatu utentes, acriter corripuntur. 90.
 — quae conviviiis nuptialibus intersunt, obiurgantur. 141.
 — & quae balneas adeunt. ibid. seq.
 Virginum sapientum exemplum concionatoribus documento est. 419.
 Virginitatis laus. 340.
 Virtus sola sub hominis potestate est. 100.
 — divitiis praeferenda. 264.
 — sine doctrina comparari nequit. 304.
 — perfecta quae. 93.
 Virtutis suadendae ratio. 204.
 ad Virtutem adhortatio qualiter instituenda. 208.
 Virtute orbatus eo vehementius irridetur, quo in sublimiore loco positus est. 305.
 Virtutes qua ratione commenduntur. 60.
 — prae ceteris laudandae quae. 206.
 Virtutum quatenam praestantissimae. 98.
 — officia quo modo amplificanda. 118.
 — tractationum de virtutibus ratio. 229.
 Vita aeterna commendatur. 294.
 Vitae principium a fletu ducimus. 124.
 Vitae humanae miseria elegantissime describitur. 124. seq.
 — contemplativae felicitas describitur. 140. seq.
 Vitium omne error in intellectu antecedit. 438.
 Vlysses. 284.
 Vocalium concursiones vitandae. 313.
 Voluntas nihil velle potest, nisi bonum. 205.
 Voluptatis perniciosi effectus. 58.
 Voluptate nulla capitalior pestis, magisque detestanda. ibid.
 Vox qualis esse debeat. 372.
 — eadem sit quum concionamur, & quum loquimur. 375. seq.
 — ultra vires urgenda non est. 375. seq.
 — in principio sedata sit. 376.
 — in extrema oratione continens. 377.
 — ita sonat, ut feritur. 378.
 — tot recipit mutationes, quot ipsa mens. ibid.
 — pro affectibus varianda est. 377. seq. 383. seq.
 Vo-

- Vocis suauitas virilis & naturalis commendatur. 375.
 — ad eius suauitatem quae conducant. 379.
 — varietas commendatur. 377. 390.
 — rerum naturae accommodanda. ibid.
 — acrimonia quando utendum. 449.
 — varia vitia. 389. seq. 449.
 — volubilitas nimia; vitiosa. 374.
 — affectatio fugienda. 385.
 — aequalitas, vitium est. 389.
 — & inaequalitas. ibid.
 — & aequalitas cum inaequalitate coniuncta. ibid. seq.
 Voces passionum animae notae sunt. 429.
 Vultus citra motum plura significat. 387.
 — eius pronuntiatio. 386. seq.
- Z**
- Z**Abulus. 60. 269. 290.
 Zelus terminum non habet, ac sine fine peccatum est. 59.
 — eius multiplex & secunda perniciēs. 123. seq. 262.
 Zeno. 165.
 — vir maximus, & Stoicorum sectae conditor. 46.
 — a Seneca reprehenditur. 47.
 Zeuma quid sit. 274.
 — eius tres species. ibid.
 Zoilus. 303.

EXPLICIT INDEX IV.



ERRATA SCRIPTVRAE MACHINARIAE potiora.

<i>Pag.</i>	<i>lin.</i>	<i>errata</i>	<i>legenda.</i>
25.....	3.....	falice.....	facile.
43.....	32.....	maioris.....	maiori.
86.....	6.....	Crambebis.....	Crambe bis.
161.....	35.....	extimisceres.....	extimesceres.
186.....	30.....	antequum.....	antequam.
212.....	23.....	hominum.....	hominem.
216.....	8.....	mobilis.....	nobilis.
260.....	17.....	gavitatis.....	gravitatis.
271.....	26.....	presbyter.....	presbyteri.
368.....	18.....	AEchines.....	AEschines.
400.....	4.....	faciam.....	faciem.

MAG 20155/7

